

遼

史

11.3414.1/1-2

11.3414.3/1-1

791316


遼

元 脫脫等撰

R022/17 史

第 一 卷
一 至 卷 四

中 華 書 局



21.11.11

遼 史

(精裝本全三冊)

[元] 脫脫等撰

*

中 華 書 局 出 版

(北京人民路 36 號)

新華書店北京發行所發行

廣西民族印刷廠印

*

850 × 1168 毫米 1/32 · 50 印張 · 900 千字

1974 年 10 月第 1 版 1974 年 10 月南寧第 1 次印刷

統一書號：11018 · 627 定價：7.50 元

出版說明

一

《遼史》一百十六卷，元脫脫等修，記載遼政權二百多年（公元九〇七——一二二五年）的歷史。其中也兼敘了遼以前契丹族和遼末耶律大石建立的西遼的歷史。

契丹是我國歷史上的古老各族之一，《魏書》、《隋書》等史都有傳。唐末，封建軍閥篡奪和瓜分農民起義的果實，在中原和南方各地分別建立自己的統治，契丹貴族耶律阿保機（遼太祖）則在祖國的北方疆土上建立了遼朝。它是一個以契丹貴族為主，聯合一部分漢族地主和其他各族上層分子組成的政權。

遼朝和歷代封建政權一樣，設立史官，撰寫起居注、日曆，纂修實錄。歷次所修的實錄，最後由耶律儼綜合編訂成書，後人稱之為耶律儼《實錄》。耶律儼，析津（今北京）人，本書有傳。他的父親耶律仲禧是在遼朝做官的漢人，本姓李，賜姓耶律。耶律儼本人官至參知政事、知樞密院事、監修國史。

從今本《遼史》可以考見，耶律儼《實錄》包括紀、志、傳等部分，為後來編寫紀傳體《遼

史》打下了基礎。金朝兩次纂修《遼史》，都以這部書爲基本依據。第一次纂修在完顏亶（熙宗）時代，由耶律固、蕭永祺先後執筆，皇統八年（公元一一四八年）完成，未曾刊行，到元修《遼史》時已散佚無存。第二次在完顏景（章宗）時代，由移刺履、党懷英等十三人纂修，泰和七年（公元一二〇七年）由陳大任最後完成，後人稱之爲陳大任《遼史》。當時由於所謂修史「義例」未定，主要是金朝繼承哪一朝的「帝統」問題還未解決，所以陳大任《遼史》也沒有經金朝批准刊行。

元代中統二年（公元一二六一年）和至元元年（公元一二六四年），都會議修遼、金二史。南宋亡後，又議修遼、金、宋三史。也由於「義例」未定，以至「六十餘年，歲月因循」。關於「義例」的爭論主要有兩種意見：一種主張仿《晉書》例，以遼、金作爲「載記」，附於宋史；另一種主張仿《南·北史》例，以北宋爲宋史，南宋爲南史，遼、金爲北史。這個問題長期爭議不決。直到元末至正三年（公元一三四三年），脫脫任纂修三史的都總裁，才決定遼、金、宋「各與正統，各繫其年號」，由廉惠山海牙、王沂、徐曷、陳繹曾四人分撰《遼史》。當時階級矛盾和民族矛盾都很尖銳，各地人民相繼起義，元政權處於風雨飄搖之中，財政又極困難，故三史都是倉促修成。其中《遼史》時間最短，只用了十一個月（至正三年四月到四年三月）。這次纂修即以耶律儼《實錄》、陳大任《遼史》爲基礎，參考《資治通鑑》、《契

丹國志》及各史《契丹傳》等，稍加修訂編排。撰成本紀三十卷，志三十二卷，表八卷，列傳四十五卷，國語解一卷，共一百十六卷，就是現在這部《遼史》。

二

元朝統治者修《遼史》的目的，和其他許多封建史書一樣，是爲了「有助人君之鑑戒」（《進遼史表》），也就是企圖總結前代王朝統治人民的經驗教訓，以維護他們自己的反動統治。

在《遼史》作者們看來，王朝的興廢存亡是由統治階級及其代表人物來決定的。他們認爲，遼朝後期之所以「變強爲弱」，以至最後被女真貴族取而代之，主要是由於統治集團內部「上下離心」和「讒賊興而根本蹙」（同上）。換句話說，只是由於內部的分裂和叛亂從根本上削弱了遼朝統治者的力量。因此，《遼史》對統治集團內部的歷次叛亂都詳加記述，以資「鑑戒」。

人民，只有人民，才是創造世界歷史的動力。在封建社會，只有農民的階級鬥爭、農民的起義和農民的戰爭，才是歷史發展的真正動力。遼朝的統治之所以被推翻，主要是因爲他們殘酷地壓迫和剝削各族人民，引起各族人民的反抗。特別是在遼的最後一個皇帝天

祚帝時代，各族人民紛紛舉行起義，有力地打擊和削弱了遼朝的統治基礎。女真貴族所以能够起而代替契丹貴族的統治，也是由於利用了女真族和其他各族人民對契丹貴族統治的不滿和反抗。而《遼史》作者們却從唯心主義的英雄史觀出發，抹殺人民羣衆在歷史上的偉大作用，硬把遼朝的滅亡歸結爲少數人行動的結果。正是由這種反動的唯心史觀所支配，《遼史》一方面對統治階級內部叛亂記載特詳，另一方面則對農牧民的起義記載很簡略，或根本不予記載。像「東路諸州盜賊蜂起」、「李弘以左道惑衆伏誅」之類簡略的誣蔑性的記述，既沒有反映起義的原因，也沒有敘述起義的經過和結果。在這一問題上，即使和其他封建史書比較，《遼史》也是很突出的。

在所謂「總結」遼朝滅亡的經驗教訓的基礎上，《遼史》作者們抬出了孔老二這具僵屍，極力宣揚孔孟之道，特別是「君君、臣臣」的綱常名教。他們一方面表彰所謂功臣名將，同時又特立了《姦臣傳》兩卷、《逆臣傳》三卷，合佔整個列傳四十五卷的九分之一，他們聲稱這樣作是仿照《春秋》「善惡並書」，以「示勸懲」，妄圖以此防止統治集團的分崩離析，以便共同對付人民，維護元朝的統治。但是歷史無情地嘲笑了這伙孔孟之徒。就在《遼史》修成後七年，以紅巾軍爲首的人民起義相繼暴發，終於埋葬了元朝封建政權。歷史證明，一切反動統治階級，由他們反動的階級本性所決定，總是要殘酷地壓迫和剝削人民，而最後

被人民所推翻。他們在這個問題上是不可能記取任何經驗教訓的。

《遼史》還從唯心史觀出發，極力美化遼朝統治者，甚至不惜無中生有，捏造事實。如《太祖紀》把阿保機描繪爲「超人」，說他生時「室有神光異香，體如三歲兒」，死時又有「大星隕於幄前，紫黑氣蔽天」。還讓他在死前數年說出一段預言，表示自己是「上承天命」而做皇帝，并能預知自己死去的時間。這類描寫，充滿迷信色彩，是用唯心主義「天命」論爲契丹貴族的統治辯護。

爲了美化遼朝統治者，《遼史》往往歪曲或隱諱一些歷史事實。如對於戰爭，往往只記遼的勝利，諱言其失敗。又如耶律德光攻進汴梁後，大肆燒殺搶掠，人民紛紛起義反抗，迫使他不得不很快地從當地撤退，這一歷史事實在《遼史》中非但沒有如實反映，反而借用耶律德光自己的話，把撤退的原因說成是「汴州炎熱，水土難居」。可見，《遼史》的作者們雖然批評「耶律儼語多避忌，陳大任辭乏精詳」，但他們也沒有在史實上作認真的補充訂正。

三

元修《遼史》時，既沒有認真搜集和考訂史料，再加上紀、志、表、傳之間相互檢對也很不夠，因此前後重複，史實錯誤、缺漏和自相矛盾之處很多。甚至把一件事當成兩件事，一

個人當成兩個人或三個人。這種混亂現象在《二十四史》中也是很突出的。

但由於耶律儼《實錄》和陳大任《遼史》都已失傳，元修《遼史》成了現存唯一的一部比較系統、完整地記載遼朝歷史的書。儘管封建史官作了種種顛倒和歪曲，我們在馬克思列寧主義、毛澤東思想的指導下，透過現象看本質，仍然可以從中找到一些研究當時階級鬥爭、民族關係等問題的材料。

例如，《聖宗紀》、《道宗紀》記載的「霸州民妻王氏以妖惑衆伏誅」和「香河縣民李宜兒以左道惑衆伏誅」等，反映了農民不斷在宗教掩護下進行起義活動，並有婦女爲領袖。從耶律洪基（道宗）下令「諸路備盜賊」，也可看出遼朝統治者對人民起義的防範和恐懼。《天祚紀》還反映出，當遼朝對女真的戰爭節節失敗的時候，漢族農民和各族人民紛紛起義，其中由安生兒、張高兒領導的起義軍多達二十萬人。這些，都爲我們研究當時的階級鬥爭提供了綫索。

從《遼史》裏還可以看到，當時草原上由於農業的發展，手工業人口的增加，逐步出現了一些農業聚落和城市。特別是先後建立的上京和中京，與南京（今北京）有着密切的聯繫，從而溝通了這一廣闊地區的經濟和文化。

此外，如《營衛志》、《禮志》提供了契丹部落的建置、分佈，以及遊牧民族風俗習慣的材

料。《地理志》和《百官志》記錄了當時的地理建置和農牧區統治機構的概況。《本紀》、《部族表》、《屬國表》、《二國外紀》等部分還保存了一些研究契丹以外各族歷史以及中外關係史的參考資料。

四

《遼史》於元順帝至正五年（公元一三四五年）與《金史》同時刊刻，只印了一百部，這次的印本已經失傳。明初修《永樂大典》引用的很可能就是這個初刻本。商務印書館影印的百衲本，係用幾種元末或明初翻刻本殘本拼湊而成，雖有不少脫誤，但也有許多勝於後出諸本的地方。明南監本源於百衲本所據的元本。北監本脫誤與南監本同，且偶有誤改。清乾隆殿本係據北監本校刻。道光殿本據四庫本改譯人名、官名等，有失原書面目。

這次點校，以百衲本爲工作本，用乾隆殿本進行通校，以南、北監本和道光殿本進行參校。又用《永樂大典》所引《遼史》全部校對一過。另外，還用紀、志、表、傳互校，並參考《冊府元龜》、《資治通鑑》、《續資治通鑑長編》、新舊《唐書》、新舊《五代史》、《宋史》、《金史》、《契丹國志》、《遼文匯》等書校訂了史文的脫誤。對於前人校勘成果，主要參考了錢大昕《二十二史考異》、厲鶚《遼史拾遺》、陳漢章《遼史索隱》、張元濟《遼史校勘記》（稿本）、馮家

昇《遼史初校》、羅繼祖《遼史校勘記》。原書卷首有關修史的幾個材料移作附錄。舊有的總目不便尋檢，現予重編。

工作中可能還有不少缺點錯誤，希望讀者指正。

中華書局編輯部

遼史目錄

卷一 本紀第一	
太祖 耶律阿保機上	一
卷二 本紀第二	
太祖下	一五
卷三 本紀第三	
太宗 耶律德光上	二七
卷四 本紀第四	
太宗下	四三
卷五 本紀第五	
世宗 耶律阮	六三
卷六 本紀第六	
穆宗 耶律璟上	六九
卷七 本紀第七	
穆宗下	八一
卷八 本紀第八	
景宗 耶律賢上	八九
卷九 本紀第九	
景宗下	九九
卷十 本紀第十	
聖宗 耶律隆緒一	一〇七
卷十一 本紀第十一	
聖宗二	一二九
卷十二 本紀第十二	
聖宗三	一三九

卷十三 本紀第十三

聖宗四 一三九

卷十四 本紀第十四

聖宗五 一五三

卷十五 本紀第十五

聖宗六 一六七

卷十六 本紀第十六

聖宗七 一八三

卷十七 本紀第十七

聖宗八 一九七

卷十八 本紀第十八

興宗 耶律宗真 一 二二一

卷十九 本紀第十九

興宗二 二三五

卷二十 本紀第二十

興宗三 二三七

卷二十一 本紀第二十一

道宗 耶律洪基 一 二五一

卷二十二 本紀第二十二

道宗二 二六一

卷二十三 本紀第二十三

道宗三 二七三

卷二十四 本紀第二十四

道宗四 二八三

卷二十五 本紀第二十五

道宗五 二九五

卷二十六 本紀第二十六

道宗六 三〇七

卷二十七 本紀第二十七

天祚皇帝 耶律延禧 一 三二七

卷二十八 本紀第二十八

天祚皇帝二 三三二

卷二十九 本紀第二十九

天祚皇帝三 三四二

卷三十 本紀第三十

天祚皇帝四 三五二

卷三十一 志第一

營衛志上 三六一

宮衛 三六二

著帳郎君 三七二

著帳戶 三七二

卷三十二 志第二

營衛志中 三七三

行營 三七三

部族上 三七六

卷三十三 志第三

營衛志下 三八三

部族下 三八三

卷三十四 志第四

兵衛志上 三九五

兵制 三九七

卷三十五 志第五

兵衛志中 四〇一

御帳親軍 四〇一

宮衛騎軍 四〇二

大首領部族軍 四〇九

衆部族軍 四一〇

卷三十六 志第六

兵衛志下 四一七

五京鄉丁 四一七

屬國軍	四二九	南京道	四九三
邊境戍兵	四三三	卷四十一 志第十一	五〇七
卷三十七 志第七	四三七	地理志五	五〇五
地理志一	四三八	西京道	五〇五
上京道	四三八	卷四十二 志第十二	五二七
頭下軍州	四四八	曆象志上	五二七
邊防城	四五〇	曆	五二七
卷三十八 志第八	四五五	卷四十三 志第十三	五三九
地理志二	四五五	曆象志中	五三九
東京道	四五五	閏考	五三九
卷三十九 志第九	四八一	卷四十四 志第十四	五六七
地理志三	四八一	曆象志下	五六七
中京道	四八一	朔考	五六七
卷四十 志第十	四九三	象	六七八
地理志四	四九三	刻漏	六七九

官星……………六七九

卷四十五 志第十五

百官志一……………六八五

北面……………六八六

北面朝官……………六八六

北面御帳官……………六九七

北面著帳官……………七〇二

北面皇族帳官……………七〇七

北面諸帳官……………七一一

北面宮官……………七二六

卷四十六 志第十六

百官志二……………七二三

北面部族官……………七二三

北面坊場局治牧厩等官……………七三〇

北面軍官……………七三四

北面邊防官……………七四二

北面行軍官……………七五二

北面屬國官……………七五四

卷四十七 志第十七上

百官志三……………七七二

南面……………七七二

南面朝官……………七七二

南面宮官……………七九五

卷四十八 志第十七下

百官志四……………八〇一

南面京官……………八〇一

南面大蕃府官……………八二〇

南面方州官……………八二三

南面分司官……………八三二

南面財賦官……………八三三

南面軍官 八三三

南面邊防官 八三八

卷四十九 志第十八

禮志一 八三三

吉儀 八三四

卷五十 志第十九

禮志二 八三九

凶儀 八三九

卷五十一 志第二十

禮志三 八四五

軍儀 八四五

禮志四 八四六

賓儀 八四六

卷五十二 志第二十一

禮志五 八五七

嘉儀上 八七七

卷五十三 志第二十二

禮志六 八七七

嘉儀下 八七七

卷五十四 志第二十三

樂志 八八一

國樂 八八一

諸國樂 八八二

雅樂 八八二

大樂 八八五

散樂 八八一

鼓吹樂 八九三

橫吹樂 八九五

卷五十五 志第二十四

儀衛志一 八九九

輿服八九九

國輿九〇〇

漢輿九〇一

卷五十六 志第二十五

儀衛志二九〇五

國服九〇五

漢服九〇七

卷五十七 志第二十六

儀衛志三九一三

符印九一三

印九一四

符契九一五

卷五十八 志第二十七

儀衛志四九一七

儀仗九一七

國仗九一七

渤海仗九一八

漢仗九一九

鹵簿儀仗人數馬匹九二〇

卷五十九 志第二十八

食貨志上九二三

卷六十 志第二十九

食貨志下九二九

卷六十一 志第三十

刑法志上九三五

卷六十二 志第三十一

刑法志下九四三

卷六十三 表第一

世表九四九

卷六十四 表第二

皇子表	九六一	肅祖昭烈皇后蕭氏	二九八
卷六十五 表第三		懿祖莊敬皇后蕭氏	二九八
公主表	九九九	玄祖簡獻皇后蕭氏	二九八
卷六十六 表第四		德祖宣簡皇后蕭氏	二九八
皇族表	一〇三三	太祖淳欽皇后述律氏	二九九
卷六十七 表第五		太宗靖安皇后蕭氏	三〇〇
外戚表	一〇三七	世宗懷節皇后蕭氏	三〇一
卷六十八 表第六		世宗妃甄氏	三〇一
遊幸表	一〇三七	穆宗皇后蕭氏	三〇一
卷六十九 表第七		景宗睿智皇后蕭氏	三〇一
部族表	一〇七七	聖宗仁德皇后蕭氏	三〇二
卷七十 表第八		聖宗欽哀皇后蕭氏	三〇三
屬國表	一二二五	興宗仁懿皇后蕭氏	三〇四
卷七十一 列傳第一		興宗貴妃蕭氏	三〇四
后妃		道宗宣懿皇后蕭氏	三〇五

道宗惠妃蕭氏……………二〇五

天祚皇后蕭氏……………二〇六

天祚德妃蕭氏……………二〇六

天祚文妃蕭氏……………二〇六

天祚元妃蕭氏……………二〇七

卷七十二 列傳第二

宗室

義宗倍……………二〇九

子平王隆先……………二一一

晉王道隱……………二一二

章肅皇帝李胡……………二二三

子宋王喜隱……………二二四

順宗濬……………二二五

晉王敖盧幹……………二二六

卷七十三 列傳第三

耶律曷魯……………二二九

蕭敵魯……………二二三

弟阿古只……………二二三

耶律斜涅赤……………二三四

姪老古……………二三四

頗德……………二三五

耶律欲穩……………二三六

耶律海里……………二三六

卷七十四 列傳第四

耶律敵刺……………二三九

蕭痕篤……………二三九

康默記……………二四〇

孫延壽……………二四〇

韓延徽……………二三一

子德樞……………二三一

德樞孫紹勳……………二二三

紹芳……………二二三

紹芳孫資讓……………二二三

韓知古……………二二三

子匡嗣……………二三四

孫德源……………二三五

德凝……………二三五

卷七十五 列傳第五

耶律覲烈……………二三七

弟羽之……………二三八

耶律鐸臻……………二三九

弟古……………二三九

突呂不……………二四〇

王郁……………二四一

耶律圖魯寤……………二四二

卷七十六 列傳第六

耶律解里……………二四五

耶律拔里得……………二四六

耶律朔古……………二四六

耶律魯不古……………二四六

趙延壽……………二四七

高模翰……………二四九

趙思溫……………二五〇

耶律漚里思……………二五一

張礪……………二五一

卷七十七 列傳第七

耶律屋質……………二五五

耶律吼……………二五六

子何魯不……………二五九

耶律安搏……………二五九

耶律注……………二六一

耶律頽昱……………二六二

耶律撻烈……………二六三

卷七十八 列傳第八

耶律夷臘葛……………二六五

蕭海瓌……………二六六

蕭護思……………二六六

蕭思溫……………二六七

蕭繼先……………二六八

卷七十九 列傳第九

室昉……………二七一

耶律賢適……………二七二

女里……………二七三

郭襲……………二七四

耶律阿沒里……………二七四

卷八十 列傳第十

張儉……………二七七

邢抱朴……………二七六

馬得臣……………二七九

蕭朴……………二八〇

耶律八哥……………二八一

卷八十一 列傳第十一

耶律室魯……………二八三

子歐里斯……………二八四

王繼忠……………二八四

蕭孝忠……………二八五

陳昭袞……………二八六

蕭合卓……………二八六

卷八十二 列傳第十二

耶律隆運……………二八九

弟德威……………二九一

德威孫滌魯……………二九一

姪制心……………二九二

耶律勃古哲……………二九三

蕭陽阿……………二九三

武白……………二九四

蕭常哥……………二九四

耶律虎古……………二九五

子磨魯古……………二九五

卷八十三 列傳第十三

耶律休哥……………二九九

孫馬哥……………三〇一

耶律斜軫……………三〇二

耶律奚低……………三〇三

耶律學古……………三〇三

弟烏不呂……………三〇四

卷八十四 列傳第十四

耶律沙……………三〇七

耶律抹只……………三〇八

蕭幹……………三〇九

姪討古……………三〇九

耶律善補……………三一〇

耶律海里……………三一

卷八十五 列傳第十五

蕭撻凜……………三二三

蕭觀音奴……………三三四

耶律題子……………三三四

耶律諧理……………三三五

耶律奴瓜……………三三五

蕭柳……………三三六

高勳……………一三七

奚和朔奴……………一三七

蕭塔列葛……………一三八

耶律撒合……………一三九

卷八十六 列傳第十六

耶律合住……………一三一

劉景……………一三三

劉六符……………一三三

耶律襲履……………一三四

牛溫舒……………一三五

杜防……………一三五

蕭和尚……………一三六

弟特末……………一三六

耶律合里只……………一三七

耶律頗的……………一三七

卷八十七 列傳第十七

蕭孝穆……………一三一

子撒八……………一三三

弟孝先……………一三三

孝友……………一三四

蕭蒲奴……………一三五

耶律蒲古……………一三六

夏行美……………一三六

卷八十八 列傳第十八

蕭敵烈……………一三九

弟拔刺……………一四〇

耶律盆奴……………一四〇

蕭排押……………一四一

弟恒德……………一四二

恒德子匹敵……………一四三

耶律資忠……………一三四

耶律瑤質……………一三四五

耶律弘古……………一三四六

高正……………一三四六

耶律的瑒……………一三四七

大康父……………一三四七

卷八十九 列傳第十九

耶律庶成……………一三四九

弟庶箴……………一三五〇

庶箴子蒲魯……………一三五二

楊哲……………一三五二

耶律韓留……………一三五三

楊佶……………一三五三

耶律和尚……………一三五三

卷九十 列傳第二十

蕭阿剌……………一三五五

耶律義先……………一三五六

弟信先……………一三五七

蕭陶隗……………一三五七

蕭塔刺葛……………一三五八

耶律敵祿……………一三五九

卷九十一 列傳第二十一

耶律韓八……………一三六一

耶律唐古……………一三六二

蕭朮哲……………一三六三

姪藥師奴……………一三六三

耶律玦……………一三六四

耶律僕里篤……………一三六五

卷九十二 列傳第二十二

蕭奪刺……………一三六七

十二

①

蕭普達……………一三六八

耶律侯晒……………一三六八

耶律古昱……………一三六九

耶律獨攬……………一三六九

蕭韓家……………一三七〇

蕭烏野……………一三七〇

卷九十三 列傳第二十三

蕭惠……………一三七三

子慈氏奴……………一三七六

蕭迂魯……………一三七六

弟鐸盧幹……………一三七七

蕭圖玉……………一三七八

耶律鐸軫……………一三七九

卷九十四 列傳第二十四

耶律化哥……………一三八一

耶律幹臘……………一三八二

耶律速撒……………一三八三

蕭阿魯帶……………一三八三

耶律那也……………一三八四

耶律何魯掃古……………一三八四

耶律世良……………一三八五

卷九十五 列傳第二十五

耶律弘古……………一三八九

耶律馬六……………一三九〇

蕭滴冽……………一三九〇

耶律適祿……………一三九〇

耶律陳家奴……………一三九一

耶律特麼……………一三九二

耶律仙童……………一三九二

蕭素颯……………一三九二

耶律大悲奴……………一三九三

卷九十六 列傳第二十六

耶律仁先……………一三九五

子撻不也……………一三九七

耶律良……………一三九八

蕭韓家奴……………一三九九

蕭德……………一四〇〇

蕭惟信……………一四〇〇

蕭樂音奴……………一四〇一

耶律敵烈……………一四〇二

姚景行……………一四〇二

耶律阿思……………一四〇四

卷九十七 列傳第二十七

耶律幹特刺……………一四〇七

孩里……………一四〇八

寶景庸……………一四〇九

耶律引吉……………一四〇九

楊績……………一四一〇

趙徽……………一四一〇

王觀……………一四一一

耶律喜孫……………一四一一

卷九十八 列傳第二十八

蕭兀納……………一四一三

耶律儼……………一四一五

劉伸……………一四一六

耶律胡呂……………一四一七

卷九十九 列傳第二十九

蕭巖壽……………一四一九

耶律撒刺……………一四二〇

蕭速撒……………一四二一

耶律撻不也……………一四二

蕭撻不也……………一四三

蕭忽古……………一四三

耶律石柳……………一四三

卷一百 列傳第三十

耶律棠古……………一四七

蕭得里底……………一四八

蕭酬幹……………一四九

耶律章奴……………一四〇

耶律朮者……………一三一

卷一百一 列傳第三十一

蕭陶蘇幹……………一四三

耶律阿息保……………一四四

蕭乙薛……………一四五

蕭胡篤……………一四六

卷一百二 列傳第三十二

蕭奉先……………一四九

李處溫……………一四〇

張琳……………一四一

耶律余覲……………一四二

卷一百三 列傳第三十三

文學上

蕭韓家奴……………一四五

李澣……………一五〇

卷一百四 列傳第三十四

文學下

王鼎……………一五三

耶律昭……………一五四

劉輝……………一五五

耶律孟簡……………一五六

耶律谷欲……………一四五七

卷一百五 列傳第三十五

能吏

大公鼎……………一四五九

蕭文……………一四六一

馬人望……………一四六一

耶律鐸魯幹……………一四六三

楊遵勗……………一四六四

王棠……………一四六四

卷一百六 列傳第三十六

卓行

蕭札刺……………一四六七

耶律官奴……………一四六八

蕭蒲離不……………一四六八

卷一百七 列傳第三十七

列女

邢簡妻陳氏……………一四七一

耶律氏常哥……………一四七二

耶律奴妻蕭氏……………一四七三

耶律朮者妻蕭氏……………一四七三

耶律中妻蕭氏……………一四七四

卷一百八 列傳第三十八

方技

直魯古……………一四七五

王白……………一四七六

魏璘……………一四七六

耶律敵魯……………一四七七

耶律乙不哥……………一四七七

卷一百九 列傳第三十九

伶官

羅衣輕……………一四七九

宦官

王繼恩……………一四八〇

趙安仁……………一四八一

卷一百十 列傳第四十

姦臣上

耶律乙辛……………一四八三

張孝傑……………一四八六

耶律燕哥……………一四八七

蕭十三……………一四八八

卷百十一 列傳第四十一

姦臣下

蕭余里也……………一四九一

耶律合魯……………一四九二

蕭得裏特……………一四九二

蕭訛都幹……………一四九三

蕭達魯古……………一四九三

耶律塔不也……………一四九四

蕭圖古辭……………一四九四

卷百十二 列傳第四十二

逆臣上

耶律轄底……………一四九八

子迭里特……………一四九九

耶律察割……………一四九九

耶律婁國……………一五〇一

耶律重元……………一五〇一

子涅魯古……………一五〇二

耶律滑哥……………一五〇三

卷百十三 列傳第四十三

逆臣中

蕭翰……………一五〇五

耶律牒蠟……………一五〇六

耶律朗……………一五〇七

耶律劉哥……………一五〇七

弟益都……………一五〇八

耶律海思……………一五〇八

耶律敵獵……………一五〇九

蕭革……………一五二〇

卷百十四 列傳第四十四

逆臣下

蕭胡覩……………一五二三

蕭迭里得……………一五二四

古迭……………一五二五

耶律撒刺竹……………一五二五

奚回離保……………一五二六

蕭特烈……………一五二七

卷百十五 列傳第四十五

二國外記

高麗……………一五二九

西夏……………一五二三

卷百十六

國語解……………一五三三

附錄：

修三史詔……………一五五三

進遼史表……………一五五五

三史凡例……………一五五六

修史官員……………一五五七

遼史卷一

本紀第一

太祖上

太祖大聖大明神烈天皇帝，姓耶律氏，諱億，字阿保機，小字啜里只，契丹迭刺部霞瀨益石烈鄉耶律彌里人。〔一〕德祖皇帝長子，母曰宣簡皇后蕭氏。唐咸通十三年生。初，母夢日墮懷中，有娠。及生，室有神光異香，體如三歲兒，卽能匍匐。祖母簡獻皇后異之，鞠爲己子。常匿於別幕，塗其面，不令他人見。三月能行，晬而能言，知未然事。自謂左右若有神人翼衛。雖齟齬，言必及世務。時伯父當國，疑輒咨焉。旣長，身長九尺，豐上銳下，目光射人，關弓三百斤。爲撻馬狻沙里。時小黃室韋不附，太祖以計降之。伐越兀及烏古、六奚、比沙狻諸部，克之。國人號阿主沙里。

唐天復元年，歲辛酉，痕德堇可汗立，以太祖爲本部夷離堇，專征討，連破室韋、于厥及

奚帥轄刺哥，俘獲甚衆。冬十月，授大迭烈府夷離董。

明年秋七月，以兵四十萬伐河東代北，（三）攻下九郡，獲生口九萬五千，駝、馬、牛、羊不可勝紀。九月，城龍化州于潢河之南，始建開教寺。

明年春，伐女直，下之，獲其戶三百。九月，復攻下河東懷遠等軍。冬十月，引軍略至薊北，俘獲以還。先是德祖俘奚七千戶，徙饒樂之清河，至是創爲奚迭刺部，分十三縣。遂拜太祖于越、總知軍國事。

明年歲甲子，三月，廣龍化州之東城。九月，討黑車子室韋，唐盧龍軍節度使劉仁恭發兵數萬，遣養子趙霸來拒。霸至武州，太祖諜知之，伏勁兵桃山下。遣室韋人牟里詐稱其酋長所遣，約霸兵會平原。既至，四面伏發，擒霸，殲其衆，乘勝大破室韋。

明年七月，復討黑車子室韋。唐河東節度使李克用遣通事康令德乞盟。冬十月，太祖以騎兵七萬會克用于雲州，宴酣，克用借兵以報劉仁恭木瓜澗之役，太祖許之。易袍馬，約爲兄弟。及進兵擊仁恭，拔數州，盡徙其民以歸。

明年二月，復擊劉仁恭。還，襲山北奚，破之。汴州朱全忠遣人浮海奉書幣、衣帶、珍玩來聘。十一月，遣偏師討奚、靺諸部及東北女直之未附者，悉破降之。十二月，痕德董可汗殂，羣臣奉遺命請立太祖。曷魯等勸進。太祖三讓，從之。

元年春正月庚寅，命有司設壇于如迂王集會塢，〔三〕燔柴告天，卽皇帝位。尊母蕭氏爲皇太后，立皇后蕭氏。北宰相蕭轄刺、南宰相耶律歐里思率羣臣上尊號曰天皇帝，后曰地皇后。庚子，詔皇族承遙輦氏九帳爲第十帳。

二月戊午，以從弟迭栗底爲迭烈府夷離董。是月，征黑車子室韋，降其八部。

夏四月丁未朔，唐梁王朱全忠廢其主，尋弑之，〔四〕自立爲帝，國號梁，遣使來告。劉仁恭子守光囚其父，自稱幽州盧龍軍節度使。

秋七月乙酉，其兄平州刺史守奇率其衆數千人來降，命置之平盧城。

冬十月乙巳，討黑車子室韋，破之。

二年春正月癸酉朔，御正殿受百官及諸國使朝。辛巳，始置惕隱，典族屬，以皇弟撒刺爲之。河東李克用卒，〔五〕子存勗襲，遣使弔慰。

夏五月癸酉，詔撒刺討烏丸、黑車子室韋。

秋八月壬子，幽州進合歡瓜。

冬十月己亥朔，建明王樓。築長城於鎮東海口。遣輕兵取吐渾叛入室韋者。

www.docsriver.com 定制及广告服务 小飞鱼

更多**广告合作及防失联联系方式**在电脑端打开链接

<http://www.docsriver.com/shop.php?id=3665>



www.docsriver.com 商家 本本店

内容不排斥 转载、转发、转卖 行为

但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼

更多**广告合作及防失联联系方式**在电脑端打开链接

<http://www.docsriver.com/shop.php?id=3665>



三年春正月，幸遼東。

二月丁酉朔，梁遣郎公遠來聘。

三月，滄州節度使劉守文爲弟守光所攻，遣人來乞兵討之。命皇弟舍利素、夷離堇蕭敵魯以兵會守文於北淖口。進至橫海軍近淀，一鼓破之，守光潰去。因名北淖口爲會盟口。

夏四月乙卯，詔左僕射韓知古建碑龍化州大廣寺以紀功德。

五月甲申，置羊城于炭山之北以通市易。

冬十月己巳，遣鷹軍討黑車子室韋，破之。西北嗚娘改部族進輓車人。

四年秋七月戊子朔，以后兄蕭敵魯爲北府宰相。后族爲相自此始。

冬十月，烏馬山奚庫支及查刺底、鋤勃德等叛，討平之。

五年春正月丙戌朔，日有食之。丙申，上親征西部奚。奚阻險，叛服不常，數招諭弗聽。是役所向輒下，遂分兵討東部奚，亦平之。於是盡有奚、靺之。東際海，南暨白檀，

西踰松漠，北抵潢水，凡五部，咸入版籍。

三月，次灤河，刻石紀功。復略地薊州。

夏四月壬申，遣人使梁。

五月，皇弟刺葛、迭刺、寅底石、安端謀反。安端妻粘睦姑知之，以告，得實。上不忍加誅，乃與諸弟登山刑牲，告天地爲誓而赦其罪。出刺葛爲迭刺部夷離堇，封粘睦姑爲晉國夫人。

秋七月壬午朔，斜離底及諸蕃使來貢。

八月甲子，劉守光僭號幽州，稱燕。

冬十月戊午，置鐵冶。

十一月壬午，遣人使梁。

六年春正月，以化葛爲惕隱。

二月戊午，親征劉守光。

三月，至自幽州。

夏四月，梁郢王友珪弑父自立。

秋七月丙午，親征朮不姑，降之，俘獲以數萬計。命弟刺葛分兵攻平州。八月壬辰，上次恩德山。皇子李胡生。

冬十月戊寅，刺葛破平州，還，復與迭刺、寅底石、安端等反。甲申，遣人使梁致祭。壬辰，還次北阿魯山，聞諸弟以兵阻道，引軍南趨十七灤。是日燔柴。翼日，次七渡河，諸弟各遣人謝罪。上猶矜憐，許以自新。

是歲，以兵討兩冶，以所獲僧崇文等五十人歸西樓，建天雄寺以居之，以示天助雄武。

七年春正月甲辰朔，以用兵免朝。晉王李存勗拔幽州，擒劉守光。甲寅，王師次赤水城，弟刺葛等乞降。上素服，乘赭白馬，以將軍耶律樂姑、轄刺僅阿鉢爲御，解兵器、肅侍衛以受之，因加慰諭。刺葛等引退，上復數遣使撫慰。

二月甲戌朔，梁均王友貞討殺其兄友珪，嗣立。

三月癸丑，次蘆水，弟迭刺哥圖爲奚王，與安端擁千餘騎而至，給稱入覲。上怒曰：「爾曹始謀逆亂，朕特恕之，使改過自新，尙爾反覆，將不利於朕！」遂拘之。以所部分隸諸軍。而刺葛引其衆至乙室堇淀，具天子旗鼓，將自立，皇太后陰遣人諭令避去。會弭姑乃、懷里陽言車駕且至，其衆驚潰，掠居民北走，上以兵追之。刺葛遣其黨寅底石引兵徑趨行宮，焚

其輜重、廬帳，縱兵大殺。皇后急遣蜀古魯救之，〔六〕僅得天子旗鼓而已。其黨神速姑復劫西樓，焚明王樓。上至土河，秣馬休兵，若不爲意。諸將請急追之，上曰：「俟其遠遁，人各懷土。懷土既切，其心必離，我軍乘之，破之必矣！」盡以先所獲資畜分賜將士，留夷離畢直里姑總政務。

夏四月戊寅，北追刺葛。己卯，次彌里，問諸弟面木葉山射鬼箭厭禳，〔七〕乃執叛人解里向彼，亦以其法厭之。至達里淀，選輕騎追及培只河，盡獲其黨輜重、生口。先遣室韋及吐渾酋長拔刺、迪里姑等五人分兵伏其前路，命北宰相迪里古爲先鋒進擊之。刺葛率兵逆戰，迪里古以輕兵薄之。其弟遏古只臨陣，射數十人斃，衆莫敢前。相拒至晡，衆乃潰。追至柴河，遂自焚其車乘廬帳而去。前遇拔刺、迪里姑等伏發，合擊，遂大敗之。刺葛奔潰，遺其所奪神帳於路，上見而拜奠之。所獲生口盡縱歸本土。其黨庫古只、磨朶皆面縛請罪。師次札堵河，大雨暴漲。

五月癸丑，遣北宰相迪輦率驍騎先渡。甲寅，奏擒刺葛、涅里、哀阿鉢於榆河，前北宰相蕭實魯、寅底石自剄不殊。遂以黑白羊祭天地。壬戌，刺葛、涅里、哀阿鉢詣行在，以橐索自縛，牽羊望拜。上還至大嶺。時大軍久出，輜重不相屬，士卒煮馬駒、採野菜以爲食，孳畜道斃者十七八，物價十倍，器服資貨委棄於楚里河，狼藉數百里，因更刺葛名暴里。丙

寅，至庫里，以青牛白馬祭天地。以生口六百、馬二千三百分賜大、小鶻軍。

六月辛巳，至榆嶺，以轄賴縣人掃古非法殘民，磔之。甲申，上登都庵山，撫其先奇首可汗遺跡，徘徊顧瞻而興歎焉。聞獄官涅離擅造大校，人不堪其苦，有至死者，命誅之。壬辰，次狼河，獲逆黨雅里、彌里，生理之銅河南軌下。放所俘還，多爲于骨里所掠。上怒，引輕騎馳擊。復遣驍將分道追襲，盡獲其衆并掠者。庚子，次阿敦灤，以養子涅里思附諸弟叛，以鬼箭射殺之。其餘黨六千，各以輕重論刑。于厥掠生口者三十餘人，亦俾贖其罪，放歸本部。至石嶺西，詔收回軍乏食所棄兵仗，召北府兵驗而還之。以夷離董涅里哀附諸弟爲叛，不忍顯戮，命自投崖而死。

秋八月己卯，幸龍眉宮，轅逆黨二十九人，以其妻女賜有功將校，所掠珍寶、孳畜還主，亡其本物者，命責償其家；不能償者，賜以其部曲。

九月壬戌，上發自西樓。

冬十月庚午，駐赤崖。戊寅，和州回鶻來貢。癸未，乙室府人迪里古、迷骨離部人特里以從逆誅。詔羣臣分決滯訟，以韓知古錄其事，只里姑掌捕亡。

十一月，祠木葉山。還次昭烏山，省風俗，見高年，議朝政，定吉凶儀。

十二月戊子，燔柴于蓮花灤。

八年春正月甲辰，以曷魯爲迭刺部夷離董，忽烈爲惕隱。于骨里部人特離敏執逆黨怖胡、亞里只等十七人來獻，上親鞠之。辭多連宗室及有脅從者，乃杖殺首惡怖胡，餘並原釋。于越率懶之子化哥屢蓄姦謀，上每優容之，而反覆不悛，召父老羣臣正其罪，并其子戮之，分其財以給衛士。有司所鞠逆黨三百餘人，獄旣具，上以人命至重，死不復生，賜宴一日，隨其平生之好，使爲之。酒酣，或歌、或舞、或戲射、角觝，各極其意。明日，乃以輕重論刑。首惡刺葛，其次迭刺哥，上猶弟之，不忍置法，杖而釋之。以寅底石、安端性本庸弱，爲刺葛所使，皆釋其罪。前于越赫底里子解里、刺葛妻轄刺已實預逆謀，命皆絞殺之。寅底石妻涅離脅從，安端妻粘睦姑嘗有忠告，並免。因謂左右曰：「諸弟性雖敏黠，而蓄姦稔惡。嘗自矜有出人之智，安忍兇狠，谿壑可塞而貪黷無厭。求人之失，雖小而可恕，謂重如泰山；身行不義，雖入大惡，謂輕於鴻毛。昵比羣小，謀及婦人，同惡相濟，以危國祚。雖欲不敗，其可得乎？」北宰相實魯妻餘盧覩姑於國至親，一旦負朕，從于叛逆，未置之法而病死，此天誅也。解里自幼與朕常同寢食，眷遇之厚，冠於宗屬，亦與其父背大恩而從不軌，茲可恕乎！」

秋七月丙申朔，有司上諸帳族與謀逆者三百餘人罪狀，皆棄市。上嘆曰：「致人于死，

豈朕所欲。若止負朕躬，尙可容貸。此曹恣行不道，殘害忠良，塗炭生民，剽掠財產。民間昔有萬馬，今皆徒步，有國以來所未嘗有。實不得已而誅之。」

冬十月甲子朔，建開皇殿於明王樓基。

九年春正月，烏古部叛，討平之。

夏六月，幽州軍校齊行本舉其族及其部曲男女三千人請降，詔授檢校尙書、左僕射，賜名兀欲，給其廩食。數日亡去，幽帥周德威納之。及詔索之，德威語不遜，乃議南征。

冬十月戊申，釣魚于鴨淥江。新羅遣使貢方物，高麗遣使進寶劍，吳越王錢鏐遣滕彥休來貢。

是歲，君基太一神數見，詔圖其像。

神册元年春二月丙戌朔，上在龍化州，迭烈部夷離董耶律曷魯等率百僚請上尊號，三表乃允。丙申，羣臣及諸屬國築壇州東，上尊號曰大聖大明天皇帝，后曰應天大明地皇后。大赦，建元神册。初，闕地爲壇，得金鈴，因名其地曰金鈴岡。壇側滿林曰册聖林。

三月丙辰，以迭烈部夷離董曷魯爲阿廬朶里于越，百僚進秩、頒賚有差，賜酺三日。立

子倍爲皇太子。

夏四月乙酉朔，晉幽州節度使盧國用來降，〔云〕以爲幽州兵馬留後。甲辰，梁遣郎公遠來賀。

六月庚寅，吳越王遣滕彥休來貢。

秋七月壬申，親征突厥、吐渾、党項、小蕃、沙陀諸部，皆平之。俘其酋長及其戶萬五千六百，鎧甲、兵仗、器服九十餘萬，寶貨、駝馬、牛羊不可勝算。

八月，拔朔州，擒節度使李嗣本。勒石紀功於青塚南。
冬十月癸未朔，乘勝而東。

十一月，攻蔚、新、武、媯、儒五州，斬首萬四千七百餘級。自代北至河曲踰陰山，盡有其地。遂改武州爲歸化州，媯州爲可汗州，置西南面招討司，選有功者領之。其圍蔚州，敵樓無故自壞，衆軍大譟乘之，不踰時而破。時梁及吳越二使皆在焉，詔引環城觀之，因賜滕彥休名曰述呂。

十二月，收山北八軍。

二年春二月，晉新州裨將盧文進殺節度使李存矩來降。進攻其城，刺史安金全遁，以

文進部將劉殷爲刺史。

三月辛亥，攻幽州，節度使周德威以幽、并、鎮、定、魏五州之兵拒于居庸關之西，合戰於新州東，大破之，斬首三萬餘級，殺李嗣恩之子武八。〔九〕以后弟阿骨只爲統軍，實魯爲先鋒，東出關略燕、趙，不遇敵而還。己未，于骨里叛，命室魯以兵討之。

夏四月壬午，圍幽州，不克。

六月乙巳，望城中有氣如煙火狀，上曰：「未可攻也。」以大暑霖潦，班師。留曷魯、盧國用守之。刺葛與其子賽保里叛入幽州。

秋八月，李存勗遣李嗣源等救幽州，曷魯等以兵少而還。

三年春正月丙申，以皇弟安端爲大內惕隱，命攻雲州及西南諸部。

二月，達旦國來聘。癸亥，城皇都，以禮部尙書康默記充版築使。梁遣使來聘。晉、吳越、渤海、高麗、回鶻、阻卜、党項及幽、鎮、定、魏、潞等州各遣使來貢。

夏四月乙巳，皇弟迭烈哥謀叛，事覺，知有罪當誅，預爲營壙，而諸戚請免。上素惡其弟寅底石妻涅里，乃曰：「涅里能代其死，則從。」涅里自縊壙中，并以奴女古、叛人曷魯只生瘞其中。遂赦迭烈哥。

五月乙亥，詔建孔子廟、佛寺、道觀。

秋七月乙酉，于越曷魯薨，上震悼久之，輟朝三日，贈賻有加。

冬十二月庚子朔，幸遼陽故城。辛丑，北府宰相蕭敵魯薨。戊午，以于越曷魯弟汗里軫爲迭烈部夷離董，蕭阿古只爲北府宰相。甲子，皇孫隈欲生。

校勘記

〔一〕霞灑益石烈 張元濟校勘記（以下稱張校）引百官志一「石烈，縣也」，百官志二「彌里，鄉也」，謂石烈下不應綴鄉字。按國語解又以石烈爲鄉，彌里爲鄉之小者。石烈鄉，鄉字亦複贅。檢下文太祖七年六月轄賴縣、營衛志下六院部轄懶石烈，均此名異譯。鄉字衍。

〔二〕伐河東代北 代北，原誤「伐北」，據兵衛志上及永樂大典（道光殿本考證引）改。

〔三〕如迂王集會塢 紀太宗天顯五年十月作如迂正集會塢。

〔四〕夏四月丁未朔唐梁王朱全忠廢其主尋弑之 錢大昕廿二史考異（以下稱考異）引歐陽修五代史記（以下稱新五代史），梁王卽位在四月甲子，明年正月「弑濟陰王」。此繫之四月朔，誤。

〔五〕河東李克用卒 卒字，據張校補。

〔六〕皇后急遣蜀古魯救之 蜀古魯，儀衛志四作曷古魯，是。

〔七〕問諸弟面木葉山射鬼箭厭禳 馮家昇遼史初校（以下稱馮校）云：問當作聞。

〔八〕晉幽州節度使盧國用來降 按此爲次年二月盧文進來降之重出。考異又論是時幽州節度使

爲周德威，不能同時又是盧國用。因文進爲契丹平州節度使，遂誤以契丹所授之官爲唐官。輯

本薛居正五代史（以下稱舊五代史）九七文進字國用，新五代史四八作大用。

〔九〕李嗣恩之子武八 嗣恩，原誤「嗣本」。按新、舊五代史李嗣本傳均不稱有子武八。檢舊五代史

五二李嗣恩傳：「有子二人，長曰武八……戰契丹於新州，歿焉。」據改。

遼史卷二

本紀第二

太祖下

四年春正月丙申，射虎東山。

二月丙寅，修遼陽故城，以漢民、渤海戶實之，改爲東平郡，置防禦使。

夏五月庚辰，至自東平郡。

秋八月丁酉，謁孔子廟，命皇后、皇太子分謁寺觀。

九月，征烏古部，道聞皇太后不豫，一日馳六百里還，侍太后，病間，復還軍中。

冬十月丙午，次烏古部，天大風雪，兵不能進，上禱于天，俄頃而霽。命皇太子將先鋒軍進擊，破之，俘獲生口萬四千二百，牛馬、車乘、廬帳、器物二十餘萬。自是舉部來附。

五年春正月乙丑，始製契丹大字。

夏五月丙寅，吳越王復遣滕彥休貢犀角、珊瑚，授官以遣。庚辰，有龍見于拽刺山陽水上，上射獲之，藏其骨內府。

閏六月丁卯，以皇弟蘇爲惕隱，康默記爲夷離畢。

秋八月己未朔，党項諸部叛。辛未，上親征。

九月己丑朔，梁遣郎公遠來聘。壬寅，大字成，詔頒行之。皇太子率迭刺部夷離堇汗里軫等略地雲內、天德。

冬十月辛未，攻天德。癸酉，節度使宋瑤降，賜弓矢、鞍馬、旗鼓，更其軍曰應天。甲戌，班師。宋瑤復叛。丙子，拔其城，擒宋瑤，俘其家屬，徙其民於陰山南。

十二月己未，師還。

六年春正月丙午，以皇弟蘇爲南府宰相，迭里爲惕隱。南府宰相，自諸弟構亂，府之名族多罹其禍，故其位久虛，以鋤得部轄得里、只里古攝之。府中數請擇任宗室，上以舊制不可輒變，請不已，乃告于宗廟而後授之。宗室爲南府宰相自此始。

夏五月丙戌朔，詔定法律，正班爵。丙申，詔畫前代直臣像爲招諫圖，及詔長吏四孟月

詢民利病。

六月乙卯朔，日有食之。

冬十月癸丑朔，晉新州防禦使王郁以所部山北兵馬內附。丙子，上率大軍入居庸關。十一月癸卯，下古北口。丁未，分兵略檀、順、安遠、三河、良鄉、望都、潞、滿城、遂城等十餘城，俘其民徙內地。

十二月癸丑，王郁率其衆來朝，上呼郁爲子，賞賚甚厚，而徙其衆于潢水之南。庚申，皇太子率王郁略地定州，康默記攻長蘆。唐義武軍節度使王處直養子都囚其父，〔一〕自稱留後。癸亥，圍涿州，有白兔緣壘而上，是日破其郛。癸酉，刺史李嗣弼以城降。乙亥，存勗至定州，王都迎謁馬前。存勗引兵趨望都，遇我軍禿餒五千騎，圍之，存勗力戰數四，不解。李嗣昭領三百騎來救，我軍少却，存勗乃得出，大戰，我軍不利，引歸。存勗至幽州，遣二百騎躡我軍後，我軍反擊，悉擒之。己卯，還次檀州，幽人來襲，擊走之，擒其裨將。詔徙檀、順民于東平、瀋州。

天贊元年春二月庚申，復徇幽、薊地。癸酉，詔改元，赦軍前殊死以下。

夏四月甲寅，攻薊州。戊午，拔之，擒刺史胡瓊，以盧國用、涅魯古典軍民事。壬戌，大

饗軍士。癸亥，李存勗圍鎮州，張文禮求援，命郎君迭烈、將軍康末怛往擊，敗之，殺其將李嗣昭。辛未，攻石城縣，拔之。

五月丁未，張文禮卒，其子處瑾遣人奉表來謝。

六月，遣鷹軍擊西南諸部，以所獲賜貧民。

冬十月甲子，以蕭霞的爲北府宰相。分迭刺部爲二院：斜涅赤爲北院夷離堇，綰思爲南院夷離堇。詔分北大濃兀爲二部，立兩節度使以統之。

十一月壬寅，命皇子堯骨爲天下兵馬大元帥，略地薊北。

二年春正月丙申，大元帥堯骨克平州，獲刺史趙思溫、裨將張崇。〔三〕

二月，如平州。甲子，以平州爲盧龍軍，置節度使。

三月戊寅，軍于箭筈山，討叛奚胡損，獲之，射以鬼箭。誅其黨三百人，沉之狗河。置奚墮瑰部，以勃魯恩權總其事。

夏四月己酉，梁遣使來聘，吳越王遣使來貢。癸丑，命堯骨攻幽州，迭刺部夷離堇覲烈徇山西地。庚申，堯骨軍幽州東，節度使符存審遣人出戰，敗之，擒其將裴信父子。

閏月庚辰，堯骨抵鎮州。壬午，拔曲陽。丙戌，下北平。是月，晉王李存勗卽皇帝位，

國號唐。

五月戊午，堯骨師還。癸亥，大饗軍士，賞賚有差。

六月辛丑，波斯國來貢。

秋七月，前北府宰相蕭阿古只及王郁徇地燕、趙。

冬十月辛未朔，日有食之。己卯，唐兵滅梁。

三年春正月，遣兵略地燕南。

夏五月丙午，以惕隱迭里爲南院夷離堇。是月，徙薊州民實遼州地。渤海殺其刺史張

秀實而掠其民。

六月乙酉，召皇后、皇太子、大元帥及二宰相、諸部頭等詔曰：「上天降監，惠及烝民。聖主明王，萬載一遇。朕旣上承天命，下統羣生，每有征行，皆奉天意。是以機謀在己，取舍如神，國令旣行，人情大附。舛訛歸正，遐邇無愆。可謂大含溟海，安納泰山矣！自我國之經營，爲羣方之父母。憲章斯在，胤嗣何憂？升降有期，去來在我。良籌聖會，自有契於天人；衆國羣王，豈可化其凡骨？三年之後，歲在丙戌，時值初秋，必有歸處。然未終兩事，豈負親誠？日月非遙，戒嚴是速。」聞詔者皆驚懼，莫識其意。是日，大舉征吐渾、党項、阻卜

等部。詔皇太子監國，大元帥堯骨從行。

秋七月辛亥，曷刺等擊素昆那山東部族，破之。

八月乙酉，至烏孤山，以鵝祭天。甲午，次古單于國，登阿里典壓得斯山，以麋鹿祭。

九月丙申朔，次古回鶻城，勒石紀功。庚子，拜日于躑林。丙午，遣騎攻阻卜。南府宰相蘇、南院夷離董迭里略地西南。乙卯，蘇等獻俘。丁巳，鑿金河水，取烏山石，置輦致潢河、木葉山，以示山川朝海宗嶽之意。癸亥，大食國來貢。甲子，詔襲關遏可汗故碑，以契丹、突厥、漢字紀其功。是月，破胡母思山諸蕃部，次業得思山，以赤牛青馬祭天地。回鶻霸里遣使來貢。

冬十月丙寅朔，獵寓樂山，獲野獸數千，以充軍食。丁卯，軍于霸離思山。遣兵踰流沙，拔浮圖城，盡取西鄙諸部。

十一月乙未朔，獲甘州回鶻都督畢離遏，因遣使諭其主烏母主可汗。射虎于烏刺邪里山，抵霸室山。六百餘里且行且獵，日有鮮食，軍士皆給。

四年春正月壬寅，以捷報皇后、皇太子。

二月丙寅，大元帥堯骨略党項。丁卯，皇后遣康末怛問起居，進御服、酒膳。乙亥，蕭

阿古只略燕、趙還，進牙旗兵仗。辛卯，堯骨獻党項俘。

三月丙申，饗軍于水精山。

夏四月甲子，南攻小蕃，下之。皇后、皇太子迎謁於札里河。癸酉，回鶻烏母主可汗遣使貢謝。

五月甲寅，清暑室韋北陁。

秋九月癸巳，至自西征。

冬十月丁卯，唐以滅梁來告，卽遣使報聘。庚辰，日本國來貢。辛巳，高麗國來貢。

十一月丁酉，幸安國寺，飯僧，赦京師囚，縱五坊鷹鵠。己酉，新羅國來貢。

十二月乙亥，詔曰：「所謂兩事，一事已畢，惟渤海世讎未雪，豈宜安駐！」乃舉兵親征渤海大誣譏。皇后、皇太子、大元帥堯骨皆從。

閏月壬辰，祠木葉山。壬寅，以青牛白馬祭天地于烏山。己酉，次撒葛山，射鬼箭。丁巳，次商嶺，夜圍扶餘府。

天顯元年春正月己未，白氣貫日。庚申，拔扶餘城，誅其守將。丙寅，命惕隱安端、前北府宰相蕭阿古只等將萬騎爲先鋒，遇誣譏老相兵，破之。皇太子、大元帥堯骨、南府宰相

蘇、北院夷離董斜涅赤，南院夷離董迭里是夜圍忽汗城。己巳，誣譟請降。庚午，駐軍于忽汗城南。辛未，誣譟素服，橐索牽羊，率僚屬三百餘人出降。上優禮而釋之。甲戌，詔諭渤海郡縣。丙子，遣近侍康末怛等十三人入城索兵器，爲邏卒所害。丁丑，誣譟復叛，攻其城，破之。駕幸城中，誣譟請罪馬前。詔以兵衛誣譟及族屬以出。祭告天地，復還軍中。

二月庚寅，安邊、鄭頡、南海、定理等府及諸道節度、刺史來朝，慰勞遣之。以所獲器幣諸物賜將士。壬辰，以青牛白馬祭天地。大赦，改元天顯。以平渤海遣使報唐。甲午，復幸忽汗城，閱府庫物，賜從臣有差。以奚部長勃魯恩、王郁自回鶻、新羅、吐蕃、党項、室韋、沙陀、烏古等從征有功，優加賞賚。丙午，改渤海國爲東丹，忽汗城爲天福。冊皇太子倍爲人皇王以主之。以皇弟迭刺爲左大相，渤海老相爲右大相，渤海司徒大素賢爲左次相，耶律羽之爲右次相。赦其國內殊死以下。丁未，高麗、濊貊、鐵驪、靺鞨來貢。

三月戊午，遣夷離畢康默記、左僕射韓延徽攻長嶺府。甲子，祭天。丁卯，幸人皇王宮。己巳，安邊、鄭頡、定理三府叛，遣安端討之。丁丑，三府平。壬午，安端獻俘，誅安邊府叛帥二人。癸未，宴東丹國僚佐，頒賜有差。甲申，幸天福城。乙酉，班師，以大誣譟舉族行。

夏四月丁亥朔，次傘子山。辛卯，人皇王率東丹國僚屬辭。是月，唐養子李嗣源反，郭

存謙弒其主存勗，〔四〕嗣源遂卽位。

五月辛酉，南海、定理二府復叛，大元帥堯骨討之。

六月丁酉，二府平。丙午，次慎州，唐遣姚坤以國哀來告。

秋七月丙辰，鐵州刺史衛鈞反。乙丑，堯骨攻拔鐵州。庚午，東丹國左大相迭剌卒。辛未，衛送大誣譏于皇都西，築城以居之。賜誣譏名曰烏魯古，妻曰阿里只。盧龍行軍司馬張崇叛，奔唐。〔五〕甲戌，次扶餘府，上不豫。是夕，大星隕于幄前。辛巳平旦，子城上見黃龍繚繞，可長一里，光耀奪目，入于行宮。有紫黑氣蔽天，踰日乃散。是日，上崩，年五十五。天贊三年上所謂「丙戌秋初，必有歸處」，至是乃驗。壬午，皇后稱制，權決軍國事。八月辛卯，康默記等攻下長嶺府。甲午，皇后奉梓宮西還。壬寅，堯骨討平諸州，奔赴行在。乙巳，人皇王倍繼至。

九月壬戌，南府宰相蘇薨。丁卯，梓宮至皇都，權殯于子城西北。己巳，上諡昇天皇帝，廟號太祖。

冬十月，盧龍軍節度使盧國用叛，奔于唐。

十一月丙寅，殺南院夷離董耶律迭里、郎君耶律匹魯等。

二年八月丁酉，葬太祖皇帝于祖陵，置祖州天城軍節度使以奉陵寢。統和二十六年七月，進諡大聖大明天皇帝。重熙二十一年九月，加諡大聖大明神烈天皇帝。太祖所崩行宮在扶餘城西南兩河之間，後建昇天殿于此，而以扶餘爲黃龍府云。

贊曰：遼之先，出自炎帝，世爲審吉國，其可知者蓋自奇首云。奇首生都菴山，徙潢河之濱。傳至雅里，始立制度，置官屬，刻木爲契，穴地爲牢。讓阻午而不肯自立。雅里生毗牒。毗牒生頡頏。頡頏生耨里思，大度寡欲，令不嚴而人化，是爲肅祖。肅祖生薩刺德，嘗與黃室韋挑戰，矢貫數札，是爲懿祖。懿祖生勻德實，始教民稼穡，善畜牧，國以殷富，是爲玄祖。玄祖生撒刺的，仁民愛物，始置鐵冶，教民鼓鑄，是爲德祖，卽太祖之父也。世爲契丹遙輦氏之夷離董，執其政柄。德祖之弟述瀾，北征于厥、室韋，南略易、定、奚、靺，始興板築，置城邑，教民種桑麻，習織組，已有廣土衆民之志。而太祖受可汗之禪，遂建國。東征西討，如折枯拉朽。東自海，西至于流沙，北絕大漠，信威萬里，歷年二百，豈一日之故哉！周公誅管、蔡，人未有能非之者。刺葛、安端之亂，太祖旣貸其死而復用之，非人君之度乎？舊史扶餘之變，亦異矣夫！

校勘記

〔一〕唐義武軍節度使王處直 唐，原誤「晉」。據卷七五王郁傳、舊五代史五四及司馬光資治通鑑（以下稱通鑑）改。

〔二〕裨將張崇 張崇，新五代史四七、舊五代史八八本傳並作張希崇。此避天祚延禧嫌名，去「希」字。

〔三〕鑿金河水取烏山石 按「鑿」「取」二字互舛。

〔四〕郭存謙弒其主存勗 存謙，新五代史七三作從謙。

〔五〕盧龍行軍司馬張崇叛奔唐 按張奔唐事，舊五代史三九及通鑑並繫于天成三年（遼天顯三年）閏八月。



遼史卷三

本紀第三

太宗上

太宗孝武惠文皇帝，諱德光，字德謹，小字堯骨。太祖第二子，母淳欽皇后蕭氏。唐天復二年生，神光異常，獵者獲白鹿、白鷹，人以爲瑞。及長，貌嚴重而性寬仁，軍國之務多所取決。

天贊元年，授天下兵馬大元帥，尋詔統六軍南徇地。明年，下平州，獲趙思溫、張崇。回破箭筈山胡遜奚，諸部悉降。復以兵掠鎮、定，所至皆堅壁不敢戰。師次幽州，符存審拒于州南，縱兵邀擊，大破之，擒裨將裴信等數十人。及從太祖破于厥里諸部，定河壩党項，下山西諸鎮，取回鶻單于城，東平渤海，破達盧古部，東西萬里，所向皆有功。

天顯元年七月，太祖崩，皇后攝軍國事。

明年秋，治祖陵畢。冬十一月壬戌，人皇王倍率羣臣請于后曰：「皇子大元帥勳望，中外攸屬，宜承大統。」后從之。是日卽皇帝位。癸亥，謁太祖廟。丙寅，行柴冊禮。戊辰，還都。壬申，御宣政殿，羣臣上尊號曰嗣聖皇帝。大赦。有司請改元，不許。十二月庚辰，尊皇太后爲太皇太后，皇后爲應天皇后，立妃蕭氏爲皇后。禮畢，閱近侍班局。辛巳，諸道將帥辭歸鎮。己丑，祀天地。庚寅，遣使諭諸國。辛卯，閱羣牧于近郊。戊戌，女直遣使來貢。壬寅，謁太祖廟。甲辰，閱旗鼓、客省諸局官屬。丁未，詔選遙輦氏九帳子弟可任官者。

三年春正月己酉，閱北剋兵籍。庚戌，閱南剋兵籍。丁巳，閱皮室、拽刺、墨離三軍。己未，黃龍府羅涅河女直、達盧古來貢。庚午，以王郁爲興國軍節度使，守中書令。

二月，幸長樂。己亥，惕隱涅里袞進白狼。辛丑，達盧古來貢。

三月乙卯，東蒐。癸亥，獵殺斃山。乙丑，獵松山。唐義武軍節度使王都遣人以定州來歸。唐主出師討之，使來乞援，命奚禿里鐵刺往救之。

四月戊寅，東巡。己卯，祭廡鹿神。丁亥，於獵所縱公私取羽毛草木之材。甲午，取箭

材赤山。丙申，獵三山。鐵刺敗唐將王晏球于定州。唐兵大集，鐵刺請益師。辛丑，命惕隱涅里袞、都統查刺赴之。

五月丙午，建天膳堂。獵索刺山。戊申，至自獵。丁卯，命林牙突呂不討烏古部。己巳，女直來貢。

六月己卯，行瑟瑟禮。

秋七月丁未，突呂不獻討烏古捷。壬子，王都奏唐兵破定州，鐵刺死之，涅里袞、查刺等數十人被執。上以出師非時，甚悔之，厚賜戰歿將校之家。庚午，有事于太祖廟。

八月丙子，突厥來貢。庚辰，詔建應天皇太后誕聖碑于儀坤州。

九月己卯，突呂不遣人獻討烏古俘。癸未，詔分賜羣臣。己丑，幸人皇王倍第。庚寅，遣人使唐。辛卯，再幸人皇王第。癸巳，有司請以上生日爲天授節，皇太后生日爲永寧節。

冬十月癸卯朔，以永寧節，上率羣臣上壽於延和宮。己酉，謁太祖廟。唐遣使遺玉笛。甲子，天授節，上御五鸞殿受羣臣及諸國使賀。

十一月丙子，鼻骨德來貢。辛丑，自將伐唐。

十二月癸卯，祭天地。庚戌，聞唐主復遣使來聘，上問左右，皆曰：「唐數遣使來，實畏威也。未可輕舉，觀釁而動可也。」上然之。甲寅，次杏塢，唐使至，遂班師。時人皇王在皇

都，詔遣耶律羽之遷東丹民以實東平。其民或亡入新羅、女直，因詔困乏不能遷者，許上國富民給贍而隸屬之。升東平郡爲南京。

四年春正月壬申朔，宴羣臣及諸國使，觀俳優角觝戲。己卯，如瓜塢。

二月庚戌，閱遙輦氏戶籍。

三月甲午，望祀羣神。

夏四月辛亥，至自瓜塢。壬子，謁太祖廟。癸丑，謁太祖行宮。甲寅，幸天城軍，謁祖陵。辛酉，人皇王倍來朝。癸亥，錄囚。

五月癸酉，謁二儀殿，宴羣臣。女直來貢。戊子，射柳于太祖行宮。癸巳，行瑟瑟禮。

六月丙午，突呂不獻烏古俘。戊申，分賜將士。己酉，西巡。己未，選輕騎數千獵近山。癸亥，駐蹕涼陁。

秋七月庚辰，觀市，曲赦繫囚。甲午，祠太祖而東。

八月辛丑，至自涼陁，謁太祖廟。癸卯，幸人皇王第。己酉，謁太祖廟。

九月庚午，如南京。戊寅，祠木葉山。己卯，行再生禮。癸巳，至南京。

冬十月壬寅，幸人皇王第，宴羣臣。甲辰，幸諸營，閱軍籍。庚戌，以雲中郡縣未下，大

閱六軍。甲子，詔皇弟李胡帥師趣雲中討郡縣之未附者。

十一月丙寅朔，以出師告天地。丁卯，餞皇弟李胡于西郊。壬申，命大內惕隱告出師于太祖行宮。甲申，觀漁三叉口。

十二月戊申，女直來貢。戊午，至自南京。

五年春正月庚午，皇弟李胡拔寰州捷至。甲午，朝皇太后。

二月己亥，詔修南京。癸卯，李胡還自雲中，朝于行在。丙午，以先所俘渤海戶賜李胡。丙辰，上與人皇王朝皇太后。太后以皆工書，命書于前以觀之。辛酉，召羣臣議軍國事。

三月丙寅，朝皇太后。丁卯，皇弟李胡請赦宗室舍利郎君以罪繫獄者，詔從之。己巳，幸皇叔安端第。辛未，人皇王獻白紵。乙亥，冊皇弟李胡爲壽昌皇太弟，兼天下兵馬大元帥。壬午，以龍化州節度使劉居言同中書門下平章事。乙酉，宴人皇王僚屬便殿。庚寅，駕發南京。

夏四月乙未，詔人皇王先赴祖陵謁太祖廟。丙辰，會祖陵。人皇王歸國。
五月戊辰，詔修褒潭離宮。乙酉，謁太祖廟。

六月己亥，射柳于行在。乙卯，如沿柳湖。丁巳，拜太祖御容于明殿。己未，敵烈德來貢。

秋七月壬申，烏古來貢。戊子，薦時果于太祖廟。

八月丁酉，以大聖皇帝、皇后宴寢之所號日月宮，因建日月碑。丙午，如九層臺。

九月己卯，詔舍利普寧撫慰人皇王。庚辰，詔置人皇王儀衛。丁亥，至自九層臺，謁太祖廟。

冬十月戊戌，遣使賜人皇王胙。癸卯，建太祖聖功碑于如迂正集會場。甲辰，人皇王進玉笛。

十一月戊寅，東丹奏人皇王浮海適唐。

六年春正月甲子，西南邊將以慕化轄戛斯國人來。乙丑，敵烈德來貢。丁卯，如南京。三月辛未，召大臣議軍國事。丁亥，人皇王倍妃蕭氏率其國僚屬來見。

夏四月己酉，唐遣使來聘。是月置中臺省于南京。

五月乙丑，祠木葉山。乙亥，至自南京。壬午，謁太祖陵。

閏月庚寅，射柳于近郊。

六月壬申，如涼陁。壬午，烏古來貢。

秋七月丁亥，女直來貢。己酉，命將校以兵南略。壬子，薦時果于太祖廟。東幸。

八月庚申，皇子述律生，告太祖廟。辛巳，鼻骨德來貢。

九月甲午，詔修京城。

冬十月丁丑，鐵驪來貢。

十一月乙酉，唐遣使來聘。

十二月甲寅朔，祭太祖廟。丙辰，遣人以詔賜唐盧龍軍節度使趙德鈞。

七年春正月壬辰，征西將軍課里遣拽刺鐸括奏軍事。己亥，唐遣使來聘。癸卯，遣人使唐。戊申，祠木葉山。

二月壬申，拽刺迪德使吳越還，吳越王遣使從，獻寶器。復遣使持幣往報之。

三月己丑，林牙迪離畢指斥乘輿，囚之。丁未，遣使諸國。戊申，上率羣臣朝于皇太后。

夏四月甲戌，唐遣使來聘，致人皇王倍書。己卯，女直來貢。

五月壬午朔，幸祖州，謁太祖陵。

六月戊辰，御製太祖建國碑。戊寅，烏古、敵烈德來貢。庚辰，觀角觝戲。

秋七月辛巳朔，賜中外官吏物有差。癸未，賜高年布帛。丙戌，召羣臣耆老議政。壬辰，唐遣使遺紅牙笙。癸巳，使復至，懼報定州之役也。壬寅，唐盧龍軍節度使趙德鈞遣人進時果。丁未，薦新于太祖廟。

八月壬戌，捕鵝于沿柳湖，風雨暴至，舟覆，溺死者六十餘人，命存恤其家，識以爲戒。戊辰，林牙迪離畢逸囚，復獲而鞠之，知其事本誣構，釋之。

九月庚子，阻卜來貢。

冬十月乙卯，唐遣使來聘。己巳，遣使雲中。

十一月丁亥，遣使存問獲里國。丁未，阻卜貢海東青鶻三十連。

十二月辛亥，以叛人泥離袞家口分賜羣臣。丁巳，西狩，駐蹕平地松林。

八年春正月戊子，女直來貢。庚子，命皇太弟李胡、左威衛上將軍撒割率兵伐党項。癸卯，上親餞之。

二月辛亥，吐谷渾、阻卜來貢。乙卯，剋實魯使唐還，以附獻物分賜羣臣。

三月辛卯，皇太弟討党項勝還，宴勞之。丙申，唐遣使請罷征党項兵，上以戰捷及党項

已聽命報之。

夏四月戊午，党項來貢。

五月己丑，獵獨牛山，惕隱迪輦所乘內廐騮馬斃，因賜名其山曰騮山。戊戌，如沿柳湖。

六月甲寅，阻卜來貢。甲子，回鶻阿薩蘭來貢。

秋七月戊寅，行納后禮。癸未，皇子提離古生。丁亥，鐵驪、女直、阻卜來貢。

冬十月乙巳，阻卜來貢。丙午，至自沿柳湖。辛亥，唐遣使來聘。己未，遣拔刺使唐。辛未，烏古吐魯沒來貢。

十一月辛丑，太皇太后崩，遣使告哀于唐及人皇王倍。是月，唐主嗣源殂，子從厚立。十二月丁卯，党項來貢。

九年春正月癸酉，漁于土河。丙申，党項貢駝、鹿。己亥，南京進白驘。

閏月戊午，唐遣使告哀，即日遣使弔祭。壬戌，東幸。女直來貢。

二月壬申，祠木葉山。戊寅，葬太皇太后於德陵。前二日，發喪于葭塗殿，上具衰服以送。後追諡宣簡皇后，詔建碑于陵。

三月癸卯，女直來貢。

夏四月，唐李從珂弑其主自立。人皇王倍自唐上書請討。

五月甲辰，如沿柳湖。癸丑，女直來貢。大星晝隕。

六月己巳朔，〔三〕鼻骨德來貢。辛未，唐李從厚謝弔祭所遣使初至闕。

秋八月壬午，自將南伐。乙酉，拽刺解里手接飛雁，上異之，因以祭天地。

九月庚子，西南星隕如雨。乙卯，次雲州。丁巳，拔河陰。

冬十月丁亥，略地靈丘，父老進牛酒犒師。

十一月辛丑，圍武州之陽城。壬寅，陽城降。癸卯，注只城降，括所俘丁壯籍于軍。

十二月壬辰，皇子阿鉢撒葛里生，皇后不豫。是月駐蹕百湖之西南。

十年春正月戊申，皇后崩于行在。

二月戊寅，百僚請加追諡，不許。辛巳，宰相涅里袞謀南奔，事覺，執之。

三月戊午，党項來貢。

夏四月，吐谷渾會長退欲德率衆內附。丙戌，皇太后父族及母前夫之族二帳並爲國舅，

以蕭緬思爲尙父領之。己丑，錄囚。

五月甲午朔，始製服行后喪。丙午，葬于奉陵。上自製文，諡曰彰德皇后。癸丑，以舍利王庭鶚爲龍化州節度使。

六月乙丑，吐渾來貢。辛未，幸品不里淀。

秋七月乙卯，獵南赤山。

冬十一月丙午，幸弘福寺爲皇后飯僧，見觀音畫像，乃大聖皇帝、應天皇后及人皇王所施，顧左右曰：「昔與父母兄弟聚觀于此，歲時未幾，今我獨來！」悲嘆不已。乃自製文題于壁，以極追感之意。讀者悲之。

十二月庚辰，如金瓶灤，遣拽刺化哥、窟魯里、阿魯掃姑等捉生敵境。

十一年春正月，釣魚于土河。庚申，如潢河。

三月庚寅朔，女直來貢。

夏四月庚申，謁祖陵。戊辰，還都，謁太祖廟。辛未，燕民之復業者陳汴州事宜。癸酉，女直諸部來貢。癸未，賜回鶻使衣有差。

五月戊戌，清暑沿柳湖。

六月戊午朔，鼻骨德來貢。乙酉，吐谷渾來貢。

秋七月辛卯，烏古來貢。壬辰，蒲割額公主率三河烏古來朝。丙申，唐河東節度使石敬瑭爲其主所討，遣趙瑩因西南路招討盧不姑求救，上白太后曰：「李從珂弑君自立，神人共怒，宜行天討。」時趙德鈞亦遣使至，河東復遣桑維翰來告急，遂許興師。

八月己未，遣蕭轄里報河東師期。丙寅，吐谷渾來貢。庚午，自將以援敬瑭。

九月癸巳，有飛鷲自墜而死，南府夷離堇曷魯恩得之以獻。占卜之，吉。上曰：「此從珂自滅之兆也！」丁酉，入雁門。戊戌，次忻州，祀天地。己亥，次太原。庚子，遣使諭敬瑭曰：「朕興師遠來，當卽與卿破賊。」會唐將高行周、符彥卿以兵來拒，遂勒兵陳于太原。及戰，佯爲之却。唐將張敬達、楊光遠又陣于西，未成列，以兵薄之。而行周、彥卿爲伏兵所斷，首尾不相救。敬達、光遠大敗，棄仗如山，斬首數萬級。敬達走保晉安寨，夷離堇的魯與戰，死之。敬瑭率官屬來見，上執手撫慰之。癸卯，圍晉安。甲辰，以的魯子徒離骨嗣爲夷離堇，仍以父字爲名，以旌其忠。南宰相鶻離底、奚監軍寅你已、將軍陪阿臨陣退懦，上召切責之。

冬十月甲子，封敬瑭爲晉王，幸其府。敬瑭與妻李率其親屬捧觴上壽。初圍晉安，分遣精兵守其要害，以絕援兵之路。而李從珂遣趙延壽以兵二萬屯團栢谷，范延廣以兵二萬屯遼州，幽州趙德鈞以所部兵萬餘由上黨趨延壽軍，合勢進擊。知此有備，皆逗留不

進。從珂遂將精騎三萬出次河陽，〔六〕親督諸軍。然知其不救，但日酣飲悲歌而已。丁卯，召敬瑭至行在所，賜坐。上從容語之曰：「吾二千里舉兵而來，一戰而勝，殆天意也。觀汝雄偉弘大，宜受茲南土，世爲我藩輔。」遂命有司設壇晉陽，備禮册命。

十一月丁酉，册敬瑭爲大晉皇帝。自戊戌至戊申，候騎兩奏南有兵至，復奏西有兵至。〔七〕命惕隱迪輦注拒之。唐將張敬達在圍八十餘日，〔八〕內外隔絕，軍儲殆盡，至濯馬糞、屑木以飼馬，馬饑至自相啖其驥尾，死則以充食。光遠等勸敬達出降，敬達曰：「吾有死而已。爾欲降，寧斬吾首以降。」

閏月甲子，楊光遠、安審琦殺敬達以降。上聞敬達至死不變，謂左右曰：「凡爲人臣，當如此也！」命以禮葬。所降軍士及馬五千匹以賜晉帝。丙寅，祀天地以告成功。庚午，僕射蕭酷古只奏趙德鈞等諸援兵將遁，詔夜發兵追擊。德鈞等軍皆投戈棄甲，自相蹂踐，擠于川谷者不可勝紀。仍命皇太子馳輕騎據險要，追及步兵萬餘，悉降之。辛未，兵度團柏谷，以酒肴祀天地。俄追及德鈞父子，乃率衆降。次潞州，召諸將議，皆請班師，從之。命南宰相解頴、鶻離底、奚監軍寅你已、將軍陪阿先還。壬申，惕隱注、林牙迪離畢來獻俘。晉帝辭歸，上與宴飲。酒酣，執手約爲父子。以白貂裘一、廐馬二十、戰馬千二百錢之。命迪離畢將五千騎送入洛。臨別，謂之曰：「朕留此，候亂定乃還耳。」辛巳，晉帝至河陽，李從珂窮

蹇，召人皇王倍同死，不從，遣人殺之，乃舉族自焚。詔收其士卒戰歿者瘞之汾水上，以爲京觀。晉命桑維翰爲文，紀上功德。

十二月乙酉朔，遣近侍撻魯存問晉帝。丙戌，以晉安所獲分賜將校。戊子，遣使馳奏皇太后，及報諸道師還。庚寅，發太原。辛卯，聞晉帝入洛，遣郎君解里德撫問。壬辰，次細河，閱降將趙德鈞父子兵馬。戊戌，次雁門，以沙太保所部兵分隸諸將。庚戌，幸應州。癸丑，唐大同、彰國、振武三節度使迎見，留之不遣。

十二年春正月丙辰，次堆子口。唐大同軍節度判官吳巒閉城拒命，遣崔廷勳圍其城。庚申，上親征，至城下諭之，巒降。〔五〕辛酉，射鬼箭于雲州北。壬戌，祀天地。癸亥，遣國舅安端發奚西部民各還本土。丙寅，皇太后遣侍衛實魯趣行，是夕，率輕騎先進。丁丑，皇子述律迎謁于灤河，告功太祖行宮。戊寅，朝于皇太后，進珍玩爲壽。

二月丁亥，以軍前所獲俘叛入幽州者皆斬之。壬寅，詔諸部休養士卒。癸卯，晉遣唐所掠郎君刺哥、文班吏蕭解里還朝。

三月庚申，晉遣使來貢。丁卯，晉天雄軍節度使范延廣潛遣人請內附，不納。己巳，遣郎君的烈古、梅里迭烈使晉。壬午，晉使及諸國使來見。

夏四月甲申，地震。幸平地松林，觀潢水源。

五月甲寅，幸頻蹕淀。壬申，震開皇殿。

六月甲申，晉遣戶部尚書聶延祚等請上尊號，及歸雁門以北與幽、薊之地，仍歲貢帛三十萬疋，詔不許。庚戌，侍中列率言，范延廣叛晉，引兵南向。

秋七月辛亥朔，詔諸部治兵甲。癸丑，幸懷州，謁奉陵。甲子，晉遣使來告范延廣反。庚午，遣耶律裏古里使晉議軍事。

八月癸未，晉遣使復請上尊號，不許。庚寅，晉及太原劉知遠、南唐李昇各遣使來貢。庚子，晉遣使以都汴及范延廣降來告。

九月壬子，鼻骨德來貢。庚申，遣直里古使晉及南唐。癸亥，朮不姑、女直來貢。辛未，遣使高麗、鐵驪。癸酉，回鶻來貢。

冬十月庚辰朔，皇太后永寧節，晉及回鶻、燉煌諸國皆遣使來賀。壬午，詔回鶻使胡離只、阿刺保，問其風俗。丁亥，諸國使還，就遣蒲里骨皮室胡末里使其國。

十一月己未，遣使求醫于晉。丁卯，鐵驪來貢。

十二月甲申，東幸，祀木葉山。己丑，醫來。

校勘記

〔一〕册皇弟李胡爲壽昌皇太弟 弟，原誤「子」。據下文八年正月、卷七二本傳及皇子表改。

〔二〕六月己亥 六月二字原脫。按卷四四朔考，五月甲子朔，是月無己亥、乙卯、丁巳、己未。此四日應屬六月，據補。

〔三〕六月己巳朔 按朔考，六月庚午朔。

〔四〕南府夷離董曷魯恩 羅繼祖遼史校勘記（以下稱羅校）云：府當作院。

〔五〕范延廣以兵二萬屯遼州 延廣，新五代史五一本傳作延光。此避太宗德光名改。

〔六〕出次河陽 河陽，原作「河橋」。據新五代史七及通鑑改。

〔七〕復奏西有兵至 奏，原作「於」。據永樂大典（以下稱大典）四八〇改。

〔八〕唐將張敬達在圍八十餘日 「唐將張」三字原脫，據大典四八〇補。

〔九〕唐大同軍節度判官吳巒閉城拒命至巒降 按下卷會同七年正月吳巒投井死，與此歧。厲鶚遼史拾遺（以下稱拾遺）引通鑑、新五代史俱稱巒守雲中不下，後守貝州，城破投井死。此有脫誤。

遼史卷四

本紀第四

太宗下

會同元年春正月戊申朔，晉及諸國遣使來賀。晉使且言已命和凝撰聖德神功碑。戊辰，遣人使晉。

二月壬午，室韋進白麋。戊子，鐵驪來貢。丁酉，獵松山。戊戌，幸遼河東。丙申，上思人皇王，遣惕隱率宗室以下祭其行宮。丁未，詔增晉使所經供億戶。

三月壬戌，將東幸，三剋言農務方興，請減輜重，促還朝，從之。丙寅，女直來貢。癸酉，東幸。

夏四月戊寅朔，如南京。甲申，女直來貢。乙酉，幸溫泉。己丑，還宮，朝于皇太后。丁酉，女直貢弓矢。己亥，西南邊大詳穩耶律魯不古奏党項捷。

五月甲寅，晉復遣使請上尊號，從之。

六月丙子朔，吐谷渾及女直來貢。辛卯，南唐來貢。癸巳，詔建日月四時堂，圖寫古帝王事于兩廡。

秋七月癸亥，遣使賜晉馬。丁卯，遣鶻離底使晉，梅里了古使南唐。戊辰，遣中臺省右相耶律述蘭、迭烈哥使晉，臨海軍節度使趙思溫副之，冊晉帝爲英武明義皇帝。

八月戊子，女直來貢。庚子，吐谷渾、烏孫、靺鞨皆來貢。

九月庚戌，黑車子室韋貢名馬。邊臣奏晉遣守司空馮道、左散騎常侍韋勳來上皇太后尊號，左僕射劉昫、右諫議大夫盧重上皇帝尊號，遂遣監軍寅你已充接伴。壬子，詔羣臣及高年，凡授大臣爵秩，皆賜錦袍、金帶、白馬、金飾鞍勒，著于令。

冬十月甲戌朔，遣郎君迪里姑等撫問晉使。壬寅，晉遣使來謝冊禮。是日，復有使進獨峯駝及名馬。

十一月甲辰朔，命南北宰相及夷離堇就館賜晉使馮道以下宴。丙午，上御開皇殿，召見晉使。壬子，皇太后御開皇殿，馮道、韋勳冊上尊號曰廣德至仁昭烈崇簡應天皇太后。甲子，行再生柴冊禮。丙寅，皇帝御宣政殿，劉昫、盧重冊上尊號曰睿文神武法天啓運明德章信至道廣敬昭孝嗣聖皇帝。大赦，改元會同。是月，晉復遣趙瑩奉表來賀，以幽、薊、瀛、

莫、涿、檀、順、媯、儒、新、武、雲、應、朔、寰、蔚十六州并圖籍來獻。於是詔以皇都爲上京，府曰臨潢。升幽州爲南京，南京爲東京。改新州爲奉聖州，武州爲歸化州。升北、南二院及乙室夷離董爲王，以主簿爲令，令爲刺史，刺史爲節度使，二部梯里已爲司徒，達刺干爲副使，麻都不爲縣令，縣達刺干爲馬步。置宣徽、閣門使，控鶴、客省、御史大夫、中丞、侍御、判官、文班牙署、諸宮院世燭，馬羣、遙輦世燭，南北府、國舅帳郎君官爲敝史，諸部宰相、節度使帳爲司空，二室韋闡林爲僕射，鷹坊、監冶等局官長爲詳穩。

十二月戊戌，遣同括、阿鉢等使晉，制加晉馮道守太傅，劉昫守太保，餘官各有差。

二年春正月乙巳，以受晉冊，遣使報南唐、高麗。丁未，御開皇殿，宴晉使馮道以下，賜物有差。戊申，晉遣金吾衛大將軍馬從斌、考功郎中劉知新來貢珍幣，命分賜羣臣。丙辰，晉遣使謝免沿邊四州錢幣。

二月戊寅，宴諸王及節度使來賀受冊禮者，仍命皇太子、惕隱迪輦餞之。癸巳，謁太祖廟，賜在京吏民物，及內外羣臣官賞有差。丁酉，加兼侍中、左金吾衛上將軍王郤檢校太尉。

三月，斂于褒潭之側。戊申，女直來貢。丁巳，封皇子述律爲壽安王，罽撒葛爲太平

王。己巳，大賚百姓。

夏四月乙亥，幸木葉山。癸巳，東京路奏狼食人。

五月乙巳，禁南京鬻牝羊出境。思奴古多里等坐盜官物，籍其家。南唐遣使來貢。丁未，以所貢物賜羣臣。戊申，回鶻單于使人乞授官，詔第加刺史、縣令。

六月丁丑，雨雪。是夏，駐蹕頻蹕淀。

秋七月戊申，晉遣使進犀帶。庚戌，吐谷渾來貢。乙卯，敝史阿鉢坐奉使失職，命笞之。

閏月癸未，乙室大王坐賦調不均，以木劍背撻而釋之；并罷南、北府民上供，及宰相、節度諸賦役非舊制者。乙酉，遣的烈賜晉烏古良馬。己丑，以南王府二刺史貪蠹，各杖一百，仍繫虞候帳，備射鬼箭；選羣臣爲民所愛者代之。

八月乙丑，晉遣使貢歲幣，奏輸戊、亥二歲金幣于燕京。

九月甲戌，阻卜阿離底來貢。己卯，遣使使晉。

冬十月丁未，上以烏古部水草肥美，詔北、南院徙三石烈戶居之。

十一月丁亥，鐵驪、燉煌並遣使來貢。

十二月庚子，鈎魚于土河。甲子，回鶻使者僉人有以刃相擊者，詔付其使處之。

三年春正月戊子，吳越王遣使來貢。庚寅，人皇王妃來朝。回鶻使乞觀諸國使朝見禮，從之。壬辰，遣陪謁、阿鉢使晉致生辰禮。晉以并、鎮、忻、代之吐谷渾來歸。

二月己亥，奚王勞骨寧率六節度使朝貢。庚子，烏古遣使獻伏鹿國俘，賜其部夷離董旗鼓以旌其功。壬寅，女直來貢。辛亥，墨離鶻末里使回鶻阿薩蘭還，賜對衣勞之。乙卯，鴨淶江女直遣使來觀。

三月戊辰，遣使使晉，報幸南京。己巳，如南京。辛未，命惕隱耶律涅離骨德率萬騎先驅。壬申，次石嶺，以奚王勞骨寧監軍寅你已朝謁不時，切責之。丙子，魯不姑上党項俘獲數。癸未，獵水門，獲白鹿。庚寅，詔扈從擾民者從軍律。甲午，幸薊州。乙未，晉及南唐各遣使來觀。

夏四月庚子，至燕，備法駕，入自拱辰門，御元和殿，行入閣禮。壬寅，遣人使晉。乙巳，幸留守趙延壽別墅。丙午，晉遣宣徽使楊端、王眺等來問起居。丁未，御便殿，宴晉及諸國使。丙辰，晉遣使進茶藥。壬戌，御昭慶殿，宴南京羣臣。癸亥，晉遣使賀端午，以所進節物賜羣臣。乙丑，南唐進白龜。

五月庚午，以端午宴羣臣及諸國使，命回鶻、燉煌二使作本俗舞，俾諸使觀之。庚辰，

晉遣使進弓矢。甲申，遣皇子天德及檢校司徒耶用和使晉。戊子，閱騎兵于南郊。

六月乙未朔，東京宰相耶律羽之言渤海相大素賢不法，詔僚佐部民舉有才德者代之。丙申，閱步卒于南郊。庚子，晉及轄刺骨只遣使來見。壬寅，駕發燕京，命中書令蕭僧隱部諸道軍于長坐營。癸丑，次奉聖州。甲寅，勞軍士。

秋七月己巳，獵猾底烈山。癸酉，朝于皇太后。丙子，從皇太后視人皇王妃疾。戊寅，人皇王妃蕭氏薨。己卯，以安重榮據鎮州叛晉，詔征南將軍柳嚴邊備。丙戌，徙人皇王行宮于其妃薨所。辛卯，晉遣使請行南郊禮，許之。

八月己亥，詔東丹吏民爲其王倍妃蕭氏服。庚子，阻卜來貢。壬寅，遣使南唐。乙巳，阻卜、黑車子、室韋、賃烈等國來貢。南唐遣使求青氊帳，賜之。戊申，以安端私城爲白川州。辛亥，鼻骨德使乞賜爵，以其國相授之。甲寅，阻卜來貢。乙卯，置白川州官屬。丙辰，詔以于諧里河、臚胸河之近地，給賜南院歐堇突呂、乙斯勃、北院溫納何刺三石烈人爲農田。〔三〕

九月庚午，侍中崔窮古言：「晉主聞陛下數游獵，意請節之。」上曰：「朕之畋獵，非徒從樂，所以練習武事也。」乃詔諭之。壬午，邊將奏破吐谷渾，擒其長，詔止誅其首惡及其丁壯，餘並釋之。丙戌，晉遣使貢名馬。戊子，女直及吳越王遣使來貢。

冬十月辛丑，遣剋郎使吳越，略姑使南唐。庚申，晉遣使貢布，及請親祠南嶽，從之。十一月己巳，南唐遣使奉蠟丸書言晉密事。丁丑，詔有司教民播種紡績。除姊亡妹續之法。

十二月壬辰朔，率百僚謁太祖行宮。甲午，燔柴，禮畢，祠于神帳。丙申，遣使使晉。丙辰，詔契丹人授漢官者從漢儀，聽與漢人婚姻。丁巳，詔燕京皇城西南堞建涼殿。是冬，駐蹕于傘淀。

四年春正月壬戌，以乙室、品卑、突軌三部鰥寡不能自存者，官爲之配。丙子，南唐遣使來貢。庚辰，涅刺、烏隗部獻党項俘獲數。己丑，詔定征党項功。

二月丙申，皇太子獲白麋。甲辰，晉遣使進香藥。丙子，鐵驪來貢。丁巳，詔有司編始祖奇首可汗事迹。己未，晉遣楊彥詢來貢，且言鎮州安重榮跋扈狀，遂留不遣。是月，晉鎮州安重榮執遼使者拽刺。

三月，特授回鶻使闊里于越，并賜旌旗、弓劍、衣馬，餘賜有差。癸酉，晉以許祀南郊，遣使來謝，進黃金十鎰。

夏四月己卯，晉遣使進櫻桃。

五月庚辰，吐谷渾夷離董蘇等叛入晉。遣牒蠟往諭晉及太原守臣。

六月辛卯，振武軍節度副使趙崇逐其節度使耶律晝里，以朔州叛，附晉。丙午，命宣徽使襲古只赴朔州，以兵圍其城，有晉使至，請開壁，即勿聽，驛送闕下。

秋七月癸亥，南唐遣使奉蠟丸書。丙寅，襲古只奏請遣使至朔令降，守者猶堅壁弗納。且言晉有貢物，命即以所貢物賜攻城將校。己巳，有司奏神蠶車有蜂集成蜜，史占之，吉。壬申，晉遣使進水晶硯。

八月癸巳，南唐奉蠟丸書。庚子，晉遣使進犀弓、竹矢。吳越王遣使奉蠟丸書。

九月壬申，有星孛于晉分。丁丑，幸歸化州。

冬十月辛丑，有司奏燕、薊大熟。癸卯，吳越王遣使來貢。

十一月丙寅，晉以討安重榮來告。庚午，吐谷渾請降，遣使撫諭。阻卜來貢，以其物賜左右。丙子，鴨淥江女直來貢。壬午，以永寧、天授二節及正旦、重午、冬至、臘並受賀，著令。

十二月戊子，晉遣使來告山南節度使安從進反。詔以便宜討之。庚寅，南唐遣使奉蠟丸書。戊戌，晉遣王升鸞來貢。戊申，晉以敗安重榮來告，遂遣楊彥詢歸。辛亥，晉遣使乞罷戍兵，詔惕隱朔古班師。甲寅，攻拔朔州，遣控鶴指揮使諧里勞軍。時襲古只戰歿城下，

上怒，命誅城中丁壯，仍以叛民上戶三十爲襄古只部曲。

五年春正月丙辰朔，上在歸化州，御行殿受羣臣朝。以諸道貢物進太后及賜宗室百僚。戊午，詔求直言，北王府郎君耶律海思應詔，召對稱旨，特授宣徽使。詔政事令僧隱等以契丹戶分屯南邊。戊辰，晉函安重榮首來獻。上數欲親討重榮，至是乃止。癸酉，遣使使晉。是月，晉以朔州平，遣使來賀，遂遣客省使耶律化哥使晉并致生辰禮。

二月壬辰，上將南幸，以諸路有未平者，召太子及羣臣議，皆曰：「今襄、鎮、朔三州雖已平，然吐谷渾爲安重榮所誘，猶未歸命，宜發兵討之，以警諸部。」上曰：「正與朕合。」遂詔以明王隈恩代于越信恩爲西南路招討使以討之，且諭明王宜先練習邊事，而後之官。甲午，如南京。遣使使晉索吐谷渾叛者。乙未，鼻骨德來貢。

三月乙卯朔，晉遣齊州防禦使宋暉業、翰林茶酒使張言來問起居。

閏月，駐蹕陽門。

夏四月甲寅朔，鐵驪來貢，以其物分賜羣臣。丙子，晉遣使進射柳鞍馬。

五月五日戊子，禁屠宰。

六月癸丑朔，晉齊王重貴遣使來貢。丁巳，徒覲古、素撒來貢。乙丑，晉主敬瑋殂，子

重貴立。戊辰，晉遣使告哀，輟朝七日。庚午，遣使往晉弔祭。丁丑，聞皇太后不豫，上馳入侍，湯藥必親嘗。仍告太祖廟，幸菩薩堂，飯僧五萬人。七月乃愈。

秋七月庚寅，晉遣金吾衛大將軍梁言、判四方館事朱崇節來謝，書稱「孫」，不稱「臣」，遣客省使喬榮讓之。景延廣答曰：「先帝則聖朝所立，今主則我國自冊。爲鄰爲孫則可，奉表稱臣則不可。」榮還，具奏之，上始有南伐之意。辛卯，阻卜、鼻骨德、烏古來貢。將軍闡德里、蒲骨等率降將轄德至闕，并獻所獲。丁未，晉遣使以祖母哀來告。

八月辛酉，女直、阻卜、烏古各貢方物。甲子，晉復襄州。戊辰，詔河東節度使劉知遠送叛臣烏古指揮使由燕京赴闕。癸酉，遣天城軍節度使蕭拜石弔祭于晉。

九月壬辰，遣使賀晉帝嗣位。

冬十月己巳，徵諸道兵。遣將軍密骨德伐党項。

十一月乙未，武定軍奏松生棗。

十二月癸亥，晉遣使來謝。

是冬，駐蹕赤城。

六年春二月乙卯，晉遣使進先帝遺物。辛酉，晉遣使請居汴，從之。

三月己卯朔，吳越王遣使來貢。甲申，梅里喘引來歸。戊子，南唐遣使奉蠟丸書。丁未，晉至汴，遣使來謝。

夏四月戊申朔，日有食之。

五月己亥，遣使如晉致生辰禮。

六月丁未朔，鐵驪來貢。己未，奚鋤骨里部進白麝。辛酉，莫州進白鵲。晉遣使貢金。

秋八月丁未朔，晉復貢金。己未，如奉聖州。晉遣其子延煦來朝。

冬十一月辛卯，上京留守耶律迪輦得晉諜，知有二心。甲辰，鐵驪來貢。

十二月丁未，如南京，議伐晉。命趙延壽、趙延昭、安端、解里等由滄、恒、易、定分道而進，大軍繼之。

是歲，楊彥昭請移鎮柰灤及新鎮，從之。

七年春正月甲戌朔，趙延壽、延昭率前鋒五萬騎次任丘。丙子，安端入雁門，圍忻、代。己卯，趙延壽圍貝州，其軍校邵珂開南門納遼兵，太守吳巒投井死。己丑，次元城，授延壽魏、博等州節度使，封魏王，率所部屯南樂。丙申，遣兵攻黎陽，晉張彥澤來拒。辛丑，晉遣使來修舊好，詔割河北諸州，及遣桑維翰、景延廣來議。

二月甲辰朔，〔八〕攻博州，刺史周儒以城降。晉平盧軍節度使楊光遠密道遼師自馬家口濟河。晉將景延廣命石斌守麻家口，白再榮守馬家口。未幾，周儒引遼軍麻答營于河東，攻鄆州北津，以應光遠。晉遣李守貞、皇甫遇、梁漢璋、薛懷讓將兵萬人，緣河水陸俱進。遼軍圍晉別將于戚城，晉主自將救之，遼師解去。守貞等至馬家口，麻答遣步卒萬人築營壘，騎兵萬人守於外，餘兵屯河西。渡未已，晉兵薄之，遼軍不利。

三月癸酉朔，趙延壽言：「晉諸軍沿河置柵，皆畏怯不敢戰。若率大兵直抵澶淵，據其橋梁，晉必可取。」是日，晉兵駐澶淵，其前軍高行周在戚城。乃命延壽、延昭以數萬騎出行周右，上以精兵出其左。戰至暮，上復以勁騎突其中軍，晉軍不能戰。會有諜者言晉軍東面數少，沿河城柵不固，乃急擊其東偏，衆皆奔潰。縱兵追及，遂大敗之。壬午，留趙延昭守貝州，徙所俘戶于內地。

夏四月癸丑，還次南京。辛未，如涼陁。

五月癸酉，耶律拔里得奏破德州，擒刺史尹居璠及將吏二十七人。

六月甲辰，黑車子室韋來貢。乙巳，絁沒里、要里等國來貢。

秋七月己卯，晉楊光遠遣人奉蠟丸書。辛卯，晉遣張暉奉表乞和，留暉不遣。

八月辛酉，回鶻遣使請婚，不許。是月，晉鎮州兵來襲飛狐，大同軍節度使耶律孔阿戰

敗之。

九月庚午朔，北幸。

冬十月丁未，鼻骨德來貢。壬戌，天授節，諸國進賀，惟晉不至。

十一月壬申，詔徵諸道兵，以閏月朔會溫榆河北。

十二月癸卯，南伐。甲子，次古北口。

閏月己巳朔，閱諸道兵於溫榆河。己卯，圍恒州，下其九縣。

八年春正月庚子，分兵攻邢、洛、磁三州，殺掠殆盡。入鄴都境。張從恩、馬全節、安審琦兵悉陳于相州安陽水之南。皇甫遇與濮州刺史慕容彥超將兵千騎來覘遼軍。至鄴都，遇遼軍數萬，且戰且却，至榆林店。遼軍繼至，遇與彥超力戰百餘合，遇馬斃，步戰，審琦引騎兵踰水以救，遼軍乃還。

二月，圍魏，晉將杜重威率兵來救。戊子，晉將折從阮陷勝州。〔五〕

三月戊戌，師拔祁州，殺其刺史沈斌。庚戌，杜重威、李守貞攻秦州。戊子，趙延壽率前鋒薄秦城。己未，重威、守貞引兵南遁，追至陽城，大敗之。復以步卒爲方陣來拒，與戰二十餘合。壬戌，復搏戰十餘里。癸亥，圍晉兵于白團衛村。〔六〕晉兵下鹿角爲營。是夕大

風。至曙，命鐵鶴軍下馬，拔其鹿角，奮短兵入擊。順風縱火揚塵，以助其勢。晉軍大呼曰：「都招討何不用兵，令士卒徒死！」諸將皆奮出戰。張彥澤、藥元福、皇甫遇出兵大戰，諸將繼至，遼軍却數百步。風益甚，晝晦如夜。符彥卿以萬騎橫擊遼軍，率步卒並進，遼軍不利。上乘奚車退十餘里，晉追兵急，獲一橐駝乘之乃歸。晉兵退保定州。

夏四月甲申，還次南京，杖戰不力者各數百。庚寅，宴將士於元和殿。癸巳，如涼陁。

六月戊辰，回鶻來貢。辛未，吐谷渾、鼻骨德皆來貢。辛巳，黑車子室韋來貢。丁亥，趙延壽奏晉兵襲高陽，戍將擊走之。

秋七月乙卯，獵平地松林。晉遣孟守中奉表請和，仍以前事答之。

八月己巳，詔侍衛蕭素撒閱羣牧于北陁。

九月壬寅，次赤山，宴從臣，問軍國要務，對曰：「軍國之務，愛民爲本。民富則兵足，兵足則國強。」上以爲然。辛酉，還上京。

冬十月辛未，祠木葉山。

十一月戊戌，女直、鐵驪來貢。

十二月癸亥朔，朝謁太祖行宮。乙丑，雲州節度使耶律孔阿獲晉諜者。戊辰，臘，賜諸國貢使衣馬。

九年春正月庚子，回鶻來貢。丁未，女直來貢。

二月戊辰，鼻骨德奏軍籍。

三月己亥，吐谷渾遣軍校恤烈獻生口千戶，授恤烈檢校司空。

夏四月辛酉朔，吐谷渾白可久來附。是月，如涼陁。

五月庚戌，晉易州戍將孫方簡請內附。（二）

六月戊子，謁祖陵，更闕神殿爲長思。

秋七月辛亥，詔徵諸道兵，敢傷禾稼者，以軍法論。癸丑，女直來貢。乙卯，以阻卜酋

長曷刺爲本部夷離董。

八月丙寅，烏古來貢。是月，自將南伐。

九月壬辰，閱諸道兵于漁陽西棗林淀。是月，趙延壽與晉張彥澤戰于定州，敗之。

冬十一月戊子朔，進圍鎮州。丙申，先遣候騎報晉兵至，遣精兵斷河橋，晉兵退保武

強。南院大王迪輦、（三）將軍高模翰分兵由瀛州間道以進，（二）杜重威遣貝州節度使梁漢璋

率衆來拒。與戰，大敗之，殺梁漢璋。杜重威、張彥澤引兵據中渡橋，趙延壽以步卒前擊，

高彥溫以騎兵乘之，追奔逐北，殪屍數萬，斬其將王清，宋彥筠墮水死。重威等退保中渡

寨。義武軍節度使李殷以城降，遂進兵，夾漈沱而營。去中渡寨三里，分兵圍之。夜則列騎環守，晝則出兵抄掠，復命大內惕隱耶律朔骨里及趙延壽分兵圍守。自將騎卒夜渡河出，其後，攻下欒城，降騎卒數千。分遣將士據其要害。下令軍中預備軍食，三日不得舉煙火，但獲晉人，卽黥而縱之。諸饋運見者皆棄而走。於是晉兵內外隔絕，食盡勢窮。

十二月丙寅，杜重威、李守貞、張彥澤等率所部二十萬衆來降。上擁數萬騎，臨大阜，立馬以受之。授重威守太傅、鄴都留守，守貞天平軍節度使，餘各領舊職。分降卒之半付重威，半以隸趙延壽。命御史大夫解里、監軍傅桂兒（二）、張彥澤持詔入汴，諭晉帝母李氏，以安其意，且召桑維翰、景延廣先來。留騎兵千人守魏，自率大軍而南。壬申，解里等至汴，晉帝重貴素服拜命，與母李氏奉表請罪。初，重貴絕和好，維翰數諫止之，不從，至是彥澤殺維翰，給言自經死。詔收葬之，復其田園第宅，仍厚恤其家。甲戌，彥澤遷重貴及其母若妻於開封府署，以控鶴指揮使李榮督兵衛之。壬午，次赤岡。重貴舉族出封丘門，橐索牽羊以待。上不忍臨視，命改館封禪寺。晉百官縞衣紗帽，俯伏待罪。上曰：「其主負恩，其臣何罪。」命領職如故，卽授安叔千金吾衛上將軍。叔千出班獨立，上曰：「汝邢州之請，朕所不忘。」乃加鎮國軍節度使，蓋在邢嘗密請內附也。將軍康祥執景延廣來獻，詔以牙籌數其罪，凡八，繫送都，道自殺。

大同元年春正月丁亥朔，備法駕入汴，御崇元殿受百官賀。戊子，以樞密副使劉敏權知開封府，殺秦繼旻、李彥紳及鄭州防禦使楊承勳，以其弟承信爲平盧軍節度使，襲父爵。初，楊光遠在青州求內附，其子承勳不聽，殺其判官丘濤及弟承祚等自歸于晉，故誅之。己丑，以張彥澤擅徙重貴開封，殺桑維翰，縱兵大掠，不道，斬於市。晉人鬻食之。辛卯，降重貴爲崇祿大夫、〔二五〕檢校太尉，封負義侯。癸巳，以張礪爲平章事，晉李崧爲樞密使，馮道爲太傅，和凝爲翰林學士，趙瑩爲太子太保，劉昫守太保，馮玉爲太子少保。癸卯，遣趙瑩、馮玉、李彥韜將三百騎送負義侯及其母李氏、太妃安氏、〔二六〕妻馮氏、弟重睿、子延煦、延寶等于黃龍府安置。仍以其宮女五十人、內宦三人、東西班五十人、醫官一人、控鶴四人、庖丁七人、茶酒司三人、儀鸞三人、健卒十人從之。〔二七〕

二月丁巳朔，建國號大遼，大赦，改元大同。升鎮州爲中京。以趙延壽爲大丞相兼政事令、樞密使、中京留守，中外官僚將士爵賞有差。辛未，河東節度使北平王劉知遠自立爲帝，國號漢。詔以耿崇美爲昭義軍節度使，高唐英爲昭德軍節度使，崔廷勳爲河陽軍節度使，分據要地。

三月丙戌朔，以蕭翰爲宣武軍節度使，賜將吏爵賞有差。壬寅，晉諸司僚吏、嬪御、宦

寺、方技、百工、圖籍、曆象、石經、銅人、明堂刻漏、太常樂譜、諸宮縣、鹵簿、法物及鎧仗，悉送上京。磁州帥梁暉以相州降漢，己酉，命高唐英討之。

夏四月丙辰朔，發自汴州，以馮道、李崧、和凝、李漣、徐台符、張礪等從行。次赤岡，夜有聲如雷，起於御幄，大星復隕於旗鼓前。乙丑，濟黎陽渡，顧謂侍臣曰：「朕此行有三失：縱兵掠芻粟，一也；括民私財，二也；不遽遣諸節度還鎮，三也。」皇太弟遣使問軍前事，上報曰：「初以兵二十萬降杜重威、張彥澤，下鎮州。及入汴，視其官屬具員者省之，當其才者任之。司屬雖存，官吏廢墮，猶雛飛之後，徒有空巢。久經離亂，一至於此。所在盜賊屯結，土功不息，餽餉非時，民不堪命。河東尙未歸命，西路會帥亦相黨附，夙夜以思，制之之術，惟推心庶僚、和協軍情、撫綏百姓三者而已。今所歸順凡七十六處，得戶一百九萬百一十八。非汴州炎熱，水土難居，止得一年，太平可指掌而致。且改鎮州爲中京，以備巡幸。欲伐河東，姑俟別圖。其概如此。」戊辰，次高邑，不豫。丁丑，崩于欒城，年四十六。是歲九月壬子朔，葬于鳳山，陵曰懷陵，廟號太宗。統和二十六年七月，上尊諡孝武皇帝。重熙二十一年九月，增諡孝武惠文皇帝。

贊曰：太宗甫定多方，遠近向化。建國號，備典章，至於釐庶政，閱名實，錄囚徒，教耕

織，配鰥寡。求直言之士，得郎君海思卽擢宣徽。嘉唐張敬達忠於其君，卒以禮葬。輟遊豫而納三剋之請。憫士卒而下休養之令。親征晉國，重貴面縛。斯可謂威德兼弘，英略間見者矣。入汴之後，無幾微之驕，有「三失」之訓。傳稱鄭伯之善處勝，書進秦誓之能悔過，太宗蓋兼有之，其卓矣乎！

校勘記

〔一〕左僕射劉昫 昫原作煦，據新五代史八晉高祖紀及五五劉昫傳改。以下仿此改從昫。

〔二〕晉遣王眺等來問起居 眺，樂志作眺。

〔三〕于諧里河至溫納何刺 食貨志上，于諧里河作諧里河，溫納何刺作溫納河刺。營衛志下，五院部有歐昆，亦習本，卽此歐堇突呂、乙斯勃；六院部有幹納阿刺，卽溫納何刺。

〔四〕夏四月己卯 按朔考是月庚寅朔，不應有己卯。

〔五〕齊州防禦使宋暉業 暉業，舊五代史八〇作光鄴，此避太宗德光名改。

〔六〕五月五日戊子 子，原誤「午」。按朔考，五月甲申朔，五日爲戊子。據改。

〔七〕判四方館事朱崇節 新五代史九出帝紀作四方館使朱崇節。

〔八〕二月甲辰朔 朔字，據朔考補。

〔九〕晉將折從阮陷勝州 勝，原誤「滕」，據地理志五、舊五代史八三及通鑑改。

〔一〇〕圍晉兵于白團衛村 白團衛村，契丹國志（以下稱國志）三作白團村。

〔一一〕晉易州戍將孫方簡 孫方簡，國志三同。新五代史九出帝紀及四九本傳、冊府元龜作孫方諫。

通鑑後晉紀六胡注：「蓋孫方簡後避周太祖皇考諱，遂改名方諫也。」

〔一二〕南院大王迪輦 卷七七本傳，注字敵輦，會同中遷北院大王。紀天祿元年八月亦作北院大王注。

〔一三〕將軍高模翰 高模翰，新五代史七二、舊五代史一三七契丹傳並作高牟翰。

〔一四〕監軍傅桂兒 桂兒，新五代史七二、國志三及通鑑並作住兒。

〔一五〕降重貴爲崇祿大夫 崇祿大夫，舊五代史八五作光祿大夫，此避太宗德光名改。

〔一六〕太妃安氏 太、安二字原缺，道光殿本已據大典補入，與新五代史八五合，據補。

〔一七〕內宦三人至健卒十人 舊五代史八五作內官三十人、軍健二十人。餘同。

遼史卷五

本紀第五

世宗

世宗孝和莊憲皇帝，諱阮，小字兀欲。讓國皇帝長子，母柔貞皇后蕭氏。帝儀觀豐偉，內寬外嚴，善騎射，樂施予，人望歸之。太宗愛之如子。會同九年，從伐晉。

大同元年春二月，封永康王。

夏四月丁丑，太宗崩於欒城。戊寅，梓宮次鎮陽，卽皇帝位於柩前。甲申，次定州，命天德、朔古、解里等護梓宮先赴上京。太后聞帝卽位，遣太弟李胡率兵拒之。

六月甲寅朔，次南京，五院夷離董安端、詳穩劉哥遣人馳報，請爲前鋒；至泰德泉，遇李胡軍，戰敗之。上遣郎君勤德等詣兩軍諭解。

秋閏七月，次潢河，太后、李胡整兵拒於橫渡，相持數日。用屋質之謀，各罷兵趨上京。既而聞太后、李胡復有異謀，遷于祖州，誅司徒劃設及楚補里。

八月壬午朔，尊母蕭氏爲皇太后，以太后族刺只撒古魯爲國舅帳，立詳穩以總焉。以崇德宮戶分賜翼戴功臣，及北院大王洼、南院大王吼各五十，安搏、楚補各百。的魯、鐵刺子孫先以非罪籍沒者歸之。癸未，始置北院樞密使，以安搏爲之。

九月壬子朔，葬嗣聖皇帝於懷陵。丁卯，行柴冊禮，羣臣上尊號曰天授皇帝。大赦，改大同元年爲天祿元年。追諡皇考曰讓國皇帝。以安端主東丹國，封明王，察割爲泰寧王，劉哥爲惕隱，高勳爲南院樞密使。

二年春正月，天德、蕭翰、劉哥、益都等謀反。誅天德，杖蕭翰，遷劉哥於邊，罰益都使轄憂斯國。漢主劉知遠殂，子承祐立。

夏四月庚辰朔，南唐遣李朗、王祚來慰且賀，兼奉蠟丸書，議攻漢。秋七月壬申，皇子賢生。

冬十月壬午，南京留守魏王趙延壽薨，以中臺省右相牒螭爲南京留守，封燕王。十一月，駐蹕彰武南。

三年春正月，蕭翰及公主阿不里謀反，翰伏誅，阿不里瘐死獄中。庚申，肆赦。內外官各進一階。

夏六月戊寅，以敝史耶律胡離軫爲北院大王。己卯，惕隱頽昱封漆水郡王。

秋九月辛丑朔，召羣臣議南伐。

冬十月，遣諸將率兵攻下貝州高老鎮，徇地鄴都、南宮、堂陽，殺深州刺史史萬山，俘獲甚衆。

四年春二月辛未，泰寧王察割來朝，留侍。是月，建政事省。

三月戊戌朔，南唐遣趙延嗣、張福等來賀南征捷。

秋九月乙丑朔，如山西。

冬十月，自將南伐，攻下安平、內丘、束鹿等城，大獲而還。是歲，冊皇后蕭氏。

五年春正月癸亥朔，如百泉湖。漢郭威弒其主自立，國號周，遣朱憲來告。卽遣使致

良馬。漢劉崇自立於太原。

二月，周遣姚漢英、華昭胤來，以書辭抗禮，留漢英等。

夏五月壬戌朔，太子太傅趙瑩薨，輟朝一日，命歸葬于汴。詔州縣錄事參軍、主簿，委政事省銓注。

六月辛卯朔，劉崇爲周所攻，遣使稱姪，乞援，且求封冊。卽遣燕王牒螭、樞密使高勳冊爲大漢神武皇帝。南唐遣蔣洪來，乞舉兵應援。是夏，清暑百泉嶺。

九月庚申朔，自將南伐。壬戌，次歸化州祥古山。〔三〕癸亥，祭讓國皇帝于行宮。羣臣皆醉，察割反，帝遇弑，年三十四。應曆元年，葬於顯州西山，陵曰顯陵。二年，諡孝和皇帝，廟號世宗。統和二十六年七月，加諡孝和莊憲皇帝。

贊曰：世宗，中才之主也。入繼大統，曾未三年，納唐丸書，卽議南伐，旣乏持重，宜乖周防，蓋有致禍之道矣。然而孝友寬慈，亦有君人之度焉。未及師還，變起沉湎，豈不可哀也哉！

校勘記

〔一〕以太后族刺只撒古魯爲國舅帳 刺只撒古魯，羅校云，疑外戚表國舅別部北府宰相只魯卽此刺只撒古魯之省文。

〔二〕以崇德宮戶分賜翼戴功臣 按崇德宮爲景宗承天太后宮衛，不得出現于世宗朝。崇德宮應是長寧宮，卽應天太后宮衛。

〔三〕次歸化州祥古山 祥古山，卷一二二察割傳作詳古山。



遼史卷六

本紀第六

穆宗上

穆宗孝安敬正皇帝，諱璟，〔二〕小字述律。太宗皇帝長子，母曰靖安皇后蕭氏。會同二年，封壽安王。

天祿五年秋九月癸亥，世宗遇害。逆臣察割等伏誅。丁卯，卽皇帝位，羣臣上尊號曰天順皇帝，改元應曆。戊辰，如南京。是月，遣劉承訓告哀于漢。

冬十一月，漢、周、南唐各遣使來弔。乙亥，詔朝會依嗣聖皇帝故事，用漢禮。十二月甲辰，漢遣使獻弓矢、鞍馬。壬子，鐵驪、鼻骨德皆來貢。

二年春正月戊午朔，南唐遣使奉蠟丸書，及進犀兕甲萬屬。壬戌，太尉忽古質謀逆，伏誅。

二月癸卯，女直來貢。

三月癸亥，南唐遣使奉蠟丸書。丁卯，復遣使來貢。甲申，以耶律撻烈爲南院大王。

夏四月丙戌朔，日有食之。己亥，鐵驪進鷹鶻。

五月丙辰朔，視朝。壬午，南唐遣使來貢。

六月壬辰，國舅政事令蕭眉古得、宣政殿學士李澣等謀南奔，事覺，詔暴其罪。乙未，祭天地。壬寅，漢爲周所侵，遣使求援，命中臺省右相高模翰赴之。丁未，命乳媪之兄曷魯世爲阿速石烈夷離董。

秋七月乙亥，政事令婁國、林牙敵烈、侍中神都、郎君海里等謀亂就執。

八月己丑，眉古得、婁國等伏誅，杖李澣而釋之。

九月甲寅朔，雲州進嘉禾四莖，二穗。戊午，詔以先平察割日，用白黑羊、玄酒祭天，歲以爲常。壬戌，獵炭山。祭天。庚辰，敵烈部來貢。

冬十月甲申朔，漢遣使進葡萄酒。甲午，司徒老古等獻白雉。戊申，回鶻及轄戛斯皆遣使來貢。

十一月癸丑朔，視朝。己巳，地震。己卯，日南至，始用舊制行拜日禮。朔州民進黑兔。

十二月癸未朔，高模翰及漢兵圍晉州。辛卯，以生日，飯僧，釋繫囚。〔三〕甲辰，獵于近郊。祀天地。辛亥，明王安端薨。

三年春閏正月壬午朔，漢以高模翰却周軍，遣使來謝。

二月辛亥朔，詔用嗣聖皇帝舊璽。甲子，太保敵烈修易州城，鎮州以兵來挑戰，却之。

三月庚辰朔，南唐遣使來貢，因附書于漢，詔達之。庚寅，如應州擊鞠。丁酉，漢遣使進毬衣及馬。庚子，觀漁於神德湖。

夏四月庚申，鐵驪來貢。

五月壬寅，漢遣使言石晉樹先帝聖德神功碑爲周人所毀，請再刻，許之。

六月丁卯，應天皇后崩。

秋七月，不視朝。

八月壬子，以生日，釋囚。己未，漢遣使求援。三河烏古、吐蕃、吐谷渾、鼻骨德皆遣使來貢。

九月庚子，漢遣使貢藥。

冬十月己酉，命太師唐骨德治大行皇太后園陵。李胡子宛、郎君嵇幹、敵烈謀反，事覺，辭逮太平王罽撒葛、林牙華割、郎君新羅等，皆執之。

十一月辛丑，諡皇太后曰貞烈，葬祖陵。漢遣使來會。

是冬，駐蹕奉聖州。以南京水，詔免今歲租。

四年春正月戊寅，回鶻來貢。己丑，華割、嵇幹等伏誅，宛及罽撒葛皆釋之。是月，周主威殂，養子晉王柴榮嗣立。

二月丙午朔，周攻漢，命政事令耶律敵祿援之。丙辰，漢遣使進茶藥。幸南京。

夏五月乙亥，忻、代二州叛漢，遣南院大王撻烈助敵祿討之。丁酉，撻烈敗周將符彥卿於忻口。

六月癸亥，撻烈獻所獲。

秋七月乙酉，漢民有爲遼軍誤掠者，遣使來請，詔悉歸之。

九月丙申，漢爲周人所侵，遣使來告。

冬十一月，彰國軍節度使蕭敵烈、太保許從贊奏忻、代二州捷。

十二月辛酉朔，〔三〕謁祖陵。庚午，漢遣使來貢。
是冬，駐蹕杏塢。

五年春正月辛未朔，鼻骨德來貢。

二月庚子朔，日有食之。庚申，漢遣使請上尊號，不許。壬戌，如襄潭。

夏四月己酉，周侵漢，漢遣使求援。癸丑，命郎君蕭海瓊世爲北府宰相。

秋九月庚辰，漢主有疾，遣使來告。

冬十月壬申，女直來貢。丁亥，謁太宗廟。庚寅，南唐遣使來貢。

十一月乙未朔，漢主崇殂，子承鈞遣使來告，且求嗣立；遣使弔祭，遂封冊之。

十二月乙丑朔，謁太祖廟。辛巳，漢遣使來議軍事。

六年夏五月丁酉，謁懷陵。

六月甲子，漢遣使來議軍事。

秋七月，不視朝。

九月戊午，謁祖陵。

冬十一月壬寅，鼻骨德來貢。

十二月己未朔，謁太祖廟。

七年春正月庚子，鼻骨德來貢。

二月辛酉，南唐遣使奉蠟丸書。辛未，駐蹕潢河。

夏四月戊午朔，還上京。初，女巫肖古上延年藥方，當用男子膽和之。不數年，殺人甚多。至是，覺其妄。辛巳，射殺之。

五月辛卯，漢遣使來貢。

六月丙辰朔，周遣使來聘。南唐遣使來貢。

八月己未，周遣使來聘。

是秋，不聽政。

冬十月庚申，獵于七鷹山。

十二月丁巳，詔大臣曰：「有罪者，法當刑。朕或肆怒，濫及無辜，卿等切諫，無或面從。」辛巳，還上京。

八年春二月乙丑，駐蹕潢河。

夏四月甲寅，南京留守蕭思溫攻下沿邊州縣，遣人勞之。

五月，周陷束城縣。

六月辛未，蕭思溫請益兵，乞駕幸燕。

秋七月，獵于拽刺山。迄于九月，射鹿諸山，不視朝。

冬十一月辛酉，漢遣使來告周復來侵。乙丑，使再至。

十二月庚辰，又至。

九年春正月戊辰，駐蹕潢河。

夏四月丙戌，周來侵。戊戌，以南京留守蕭思溫爲兵馬都總管擊之。是月，周拔益津、

瓦橋、淤口三關。

五月乙巳朔，陷瀛、莫二州。癸亥，如南京。辛未，周兵退。

六月乙亥朔，視朝。戊寅，復容城縣。庚申，西幸，如懷州。是月，周主榮殂，子宗

訓立。

秋七月，發南京軍戍范陽。

冬十二月戊寅，還上京。庚辰，王子敵烈、前宣徽使海思及蕭達干等謀反，事覺，鞠之。辛巳，祀天地、祖考，告逆黨事敗。丙申，召羣臣議時政。

十年春正月，周殿前都點檢趙匡胤廢周自立，建國號宋。

夏五月乙巳，謁懷陵。壬子，漢以潞州歸附來告。丙寅，至自懷陵。

六月庚申，漢以宋兵圍石州來告，遣大同軍節度使阿剌率四部往援，詔蕭思溫以三部兵助之。

秋七月己亥朔，宋兵陷石州，潞州復叛，漢使來告。辛酉，政事令耶律壽遠、太保楚阿不等謀反，伏誅。以酒脯祠天地于黑山。

八月，如秋山，幸懷州。庚午，以鎮茵石狻猊擊殺近侍古哥。

冬十月丙子，李胡子喜隱謀反，辭連李胡，下獄死。

十一月，海思獄中上書，陳便宜。

十一年春二月丙寅，釋喜隱。辛亥，司徒烏里只子迭刺哥誣告其父謀反，復詐乘傳及殺行人，以其父請，杖而釋之。

三月丙辰，〔八〕蕭思溫奏老人星見，乞行赦宥。

閏月甲子朔，〔五〕如潢河。

夏四月癸巳朔，日有食之。是月，射鹿，不視朝。

五月乙亥，司天王白、李正等進曆。

六月甲午，赦。

冬十一月，歲星犯月。

十二年春正月甲戌，夜觀燈。

二月己丑朔，以御史大夫蕭護思爲北院樞密使，賜對衣、鞍馬。

夏五月庚午，以旱，命左右以水相沃，頃之，果雨。

六月甲午，祠木葉山及潢河。

秋，如黑山、赤山射鹿。

十三年春正月，自丁巳，晝夜酣飲者九日。丙寅，宋欲城益津關，命南京留守高勳、統軍使崔廷勳以兵擾之。〔二〇〕癸酉，殺獸人海里。

二月庚寅，漢遣使來告，欲巡邊徼，乞張聲援。壬辰，如潢河。癸巳，觀羣臣射，賜物有差。乙巳，老人星見。

三月癸丑朔，殺鹿人彌里吉，梟其首以示掌鹿者。

夏四月壬寅，獵于潢河。

五月壬戌，視幹朗改國所進花鹿生麋。〔二〕

六月癸未，近侍傷獐，杖殺之。甲申，殺獐人霞馬。壬辰，詔諸路錄囚。

秋七月辛亥朔，漢以宋侵來告。乙丑，薦時羞於廟。

八月甲申，以生日，縱五坊鷹鶻。戊戌，幸近山，呼鹿射之，旬有七日而後返。

九月庚戌朔，以青牛白馬祭天地。飲于野次，終夕乃罷。辛亥，以酒脯祭天地，復終夜酣飲。

冬十月丙申，漢以宋侵來告。

十一月庚午，獵，飲于虞人家，凡四日。

十二月戊子，射野鹿，賜虞人物有差。庚寅，殺彘人曷主。

校勘記

〔一〕穆宗孝安敬正皇帝諱璟。按國志五，穆宗名璟，後更名明。通鑑亦稱璟曾更名明。李燾續資治通鑑長編（以下稱長編），開寶二年，契丹主明爲帳下所殺，卽指穆宗。

〔二〕國舅政事令蕭眉古得。蕭眉古得，舊五代史一一二作蕭海真，國志五及通鑑並作蕭海真。

〔三〕以生日飯僧釋繫囚。按紀天顯六年八月稱「皇子述律生」，下文應曆三年、十三年、十四年、十七年生日亦在八月，此作十二月，誤，或「生日」上有脫文。

〔四〕治大行皇太后園陵。按皇太后爲穆宗祖母，是太皇太后。此沿舊稱。

〔五〕十二月辛酉朔。按次年正月辛未朔，本年十二月是辛丑朔。辛酉誤。

〔六〕六月丙辰朔。朔字，據朔考補。

〔七〕六月庚申漢以宋兵圍石州來告。至宋兵陷石州。按長編，本年六月宋攻陷潞州、澤州，不言石州。此繫于七月，或是報到日期。

〔八〕三月丙辰。三月二字原缺。按朔考二月乙丑朔，推至丙辰五十二日，已入三月，據補。

〔九〕閏月甲子朔。朔字，據朔考補。

〔一〇〕統軍使崔廷勳以兵擾之。廷，原誤「延」，據紀天顯十二年正月、大同元年二月及國志十九、舊五代史九八改。

〔一一〕視幹朗改國所進花鹿生麋。視字原脫，據屬國表及文義補。

遼史卷七

本紀第七

穆宗下

十四年春正月戊寅朔，奉安神燾。戊戌，漢以宋將來襲，馳告。

二月壬子，詔西南面招討使撻烈進兵援漢。癸亥，如潢河。戊辰，支解鹿人沒答、海里等七人于野，封土識其地。己巳，如老林東灤。壬申，漢以敗宋兵石州來告。

夏四月丁巳，漢以擊退宋軍，遣使來謝。是月，黃龍府甘露降。

五月，射舐鱗鹿于白鷹山，至于浹旬。

六月丙午朔，獵于玉山，竟月忘返。

秋七月壬辰，以酒脯祀黑山。

八月乙巳，如磴子嶺，呼鹿射之，獲鹿四，賜虞人女瓊等物有差。丁未，還宮。戊申，以

生日值天赦，不受賀，曲赦京師囚。乙卯，錄囚。

九月，黃室韋叛。

冬十月丙午，近侍烏古者進石錯，賜白金二百五十兩。丙辰，以掌鹿矧思代斡里爲聞撒狻，賜金帶、金盞，銀二百兩。所隸死罪以下得專之。

十一月壬午，日南至，宴飲達旦。自是晝寢夜飲。殺近侍小六於禁中。

十二月丙午，以黑兔祭神。烏古叛，掠民財畜。詳穩僧隱與戰，敗績，僧隱及乙實等死之。

十五年春正月己卯，以樞密使雅里斯爲行軍都統，虎軍詳穩楚思爲行軍都監，益以突呂不部軍三百，合諸部兵討之。烏古夷離董子勃勒底獨不叛，詔褒之。是月，老人星見。

二月壬寅朔，日有食之。上東幸。甲寅，以獲鴨，除鷹坊刺面、腰斬之刑，復其徭役。是月，烏古殺其長宰離底，餘衆降，復叛。

三月癸酉，近侍東兒進匕筯不時，手刃刺之。丁丑，大黃室韋酋長寅尼吉叛。癸未，五坊人四十戶叛入烏古。癸巳，虞人沙刺迭偵鵝失期，〔二〕加炮烙、鐵梳之刑而死。

夏四月乙巳，小黃室韋叛，雅里斯、楚思等擊之，爲室韋所敗，遣使詰之。乙卯，以禿里

代雅里斯爲都統，以女古爲監軍，率輕騎進討，仍令撻馬尋吉里持詔招諭。

五月壬申，尋吉里奏，諭之不從。雅里斯以撻凜、蘇二羣牧兵追至柴河，與戰不利。甲申，庫古只奏室韋長寅尼吉亡入敵烈。

六月辛亥，兪魯古獻良馬，賜銀二千兩。以近侍忽刺比馬至先以聞，賜銀千兩。是月，敵烈來降。

秋七月甲戌，雅里斯奏烏古至河德濼，遣夷離董畫里、夷離畢常思擊之。丁丑，烏古掠上京北榆林峪居民，遣林牙蕭幹討之。庚辰，雅里斯等與烏古戰，不利。

冬十月丁未，常思與烏古戰，敗之。

十二月甲辰，以近侍喜哥私歸，殺其妻。丁未，殺近侍隨魯。駐蹕黑山平淀。

十六年春正月丁卯朔，被酒，不受賀。甲申，微行市中，賜酒家銀絹。乙酉，殺近侍白海及家僕衫福、押刺葛、樞密使門吏老古、撻馬失魯。

三月己巳，東幸。庚午獲鴨，甲申獲鵝，皆飲達旦。

五月甲申，以歲旱，泛舟于池禱雨；不雨，捨舟立水中而禱，俄頃乃雨。
六月丙申，以白海死非其罪，賜其家銀絹。

秋七月壬午，諭有司：凡行幸之所，必高立標識，令民勿犯，違以死論。

八月丁酉，漢遣使貢金器、鎧甲。

閏月乙丑，觀野鹿入馴鹿羣，立馬飲至哺。

九月庚子，以重九宴飲，夜以繼日，至壬子乃罷。己未，殺狼人裏里。

冬十月庚辰，漢主有母喪，遣使賻弔。

十二月甲子，幸酒人拔刺哥家，復幸殿前都點檢耶律夷臘葛第，宴飲連日。賜金盃、細

錦及孕馬百疋，左右授官者甚衆。戊辰，漢遣使來貢。

是冬，駐蹕黑山平淀。

十七年春正月庚寅朔，林牙蕭幹、三郎君耶律賢適討烏古還，帝執其手，賜卮酒，授賢適右皮室詳穩。雅里斯、楚思、霞里三人賜醕酒以辱之。乙卯，夷離畢骨欲獻烏古俘。

二月甲子，高勳奏宋將城益津關，請以偏師擾之，上從之。

夏四月戊辰，殺鷹人敵魯。丙子，射柳祈雨，復以水沃羣臣。

五月辛卯，殺鹿人札葛。壬辰，北府宰相蕭海陵薨，輟朝，罷重五宴。

六月己未，支解雉人壽哥、念古，殺鹿人四十四人。

是夏，駐蹕裏潭。

秋八月辛酉，生日，以政事令阿不底病亟，不受賀。

九月自丙戌朔，獵于黑山、赤山，至于月終。

冬十月乙丑，殺酒人粹你。

十一月辛卯，殺近侍廷壽。壬辰，殺豕人阿不札、曷魯、朮里者、涅里括。庚子，司天臺

奏月當食不虧，上以爲祥，歡飲達旦。壬寅，殺鹿人唐果、直哥、撒刺。

十二月辛未，手殺賽人海里，復戀之。

是冬，駐蹕黑河平淀。

十八年春正月乙酉朔，宴于宮中，不受賀。己亥，觀燈于市。以銀百兩市酒，命羣臣亦市酒，縱飲三夕。

二月乙卯，幸五坊使霞實里家，宴飲達旦。

三月甲申朔，如潢河。乙酉，獲駕鵝，祭天地。造大酒器，刻爲鹿文，名曰「鹿甌」，貯酒以祭天。庚戌，殺鶻人胡特魯、近侍化葛及監囚海里，仍剝海里之尸。

夏四月癸丑朔，殺彘人抄里只。己巳，詔左右從班有材器幹局者，不次擢用；老耄

者，增俸以休于家。

五月丁亥，重五，以被酒不受賀。壬辰，獲鵝于述古水，野飲終夜。丁酉，與政事令蕭排押、南京留守高勳、太師昭古、〔三〕劉承訓等酣飲，連日夜。己亥，殺鹿人頗德、騰哥、陶瑰、札不哥、蘇古涅、雛保、彌古特、敵答等。

六月丙辰，殺彘人屯奴。己未，爲殿前都點檢夷臘葛置神帳，曲赦京畿囚。甲戌，撻烈於鵬窠中得牝犬來進。

是夏，清暑褻潭。

秋七月辛丑，漢主承鈞殂，子繼元立，〔三〕來告，遣使弔祭。

九月戊子，殺詳穩八刺、拽刺痕篤等四人。己丑，登小山祭天地。戊戌，知宋欲襲河東，諭西南面都統、南院大王撻烈豫爲之備。己亥，獵熊，以喚鹿人鋪姑并掖庭戶賜夷臘葛。甲辰，以夷臘葛兼政事令，仍以黑山東抹真之地數十里賜之，以女瓌爲近侍，女直詳穩憂陌爲本部夷離董。

是秋，獵于西京諸山。〔三〕

冬十月辛亥朔，宋圍太原，詔撻烈爲兵馬總管，發諸道兵救之。十一月癸卯，冬至，被酒，不受賀。

十二月丁丑，殺酒人搭烈葛。

是冬，駐蹕黑山東川。

十九年春正月己卯朔，宴宮中，不受賀。己丑，立春，被酒，命殿前都點檢夷臘葛代行擊土牛禮。甲午，與羣臣爲葉格戲。戊戌，醉中驟加左右官。乙巳，詔太尉化哥曰：「朕醉中處事有乖，無得曲從。酒解，可覆奏。」自立春飲至月終，不聽政。

二月甲寅，〔七〕漢劉繼元嗣立，遣使乞封冊。辛酉，遣韓知範冊爲皇帝。〔八〕癸亥，殺前導末及益刺，剉其屍，棄之。甲子，漢遣使進白鹿。己巳，如懷州，獵獲熊，歡飲方醉，馳還行宮。是夜，近侍小哥、盃人花哥、庖人辛古等六人反，帝遇弒，年三十九。廟號穆宗。後附葬懷陵。重熙二十一年，諡曰孝安敬正皇帝。

贊曰：穆宗在位十八年，知女巫妖妄見誅，諭臣下濫刑切諫，非不明也。而荒耽于酒，畋獵無厭。偵鵝失期，加炮烙鐵梳之刑；獲鴨甚歡，除鷹坊刺面之令。賞罰無章，朝政不視，而嗜殺不已。變起肘腋，宜哉！

校勘記

〔一〕偵鵝失期 鵝，大典二四〇七作「天鵝」。

〔二〕林牙蕭幹 蕭幹原作蕭幹，卷八四有傳，傳文作幹，卷首目錄作幹。檢上文十五年七月，下文乾亨二年十一月，及卷八三休哥傳並作蕭幹。據改。

〔三〕夏四月癸丑朔 朔字，據朔考補。

〔四〕太師昭古 昭古，遊幸表作女古。

〔五〕子繼元立 繼元，應是繼恩。新五代史七〇東漢世家，承鈞卒，子繼恩立，繼恩卒，繼元立。考異已言繼元立在九月，七月立者爲繼恩。

〔六〕西京諸山 按紀重熙十三年十一月始改雲州爲西京，此「西京」應是京西倒誤或追稱。

〔七〕二月甲寅 二月，原誤「三月」。按三月戊寅朔，無甲寅，己巳；二月戊申朔，七日甲寅，二十二日己巳。下卷景宗紀敘「穆宗遇弒」亦在二月。據改。

〔八〕遣韓知範冊爲皇帝 韓知範，新五代史七〇東漢世家及長編並作韓知璠。

遼史卷八

本紀第八

景宗上

景宗孝成康靖皇帝，諱賢，字賢寧，小字明辰。〔一〕世宗皇帝第二子，母曰懷節皇后蕭氏。察割之亂，帝甫四歲。穆宗卽位，養永興宮。既長，穆宗酗酒怠政。帝一日與韓匡嗣語及時事，耶律賢適止之。帝悟，不復言。

應曆十九年春二月戊辰，入見，穆宗曰：「吾兒已成人，可付以政。」己巳，穆宗遇弒，帝率飛龍使女里、侍中蕭思溫、南院樞密使高勳率甲騎千人馳赴。黎明，至行在，哭之慟。羣臣勸進，遂卽皇帝位於柩前。百官上尊號曰天贊皇帝，大赦，改元保寧。以殿前都點檢耶律夷臘〔二〕右皮室詳穩蕭烏里只宿衛不嚴，斬之。

三月丙戌，入上京，以蕭思溫爲北院樞密使。太平王罽撒葛亡入沙陀。己丑，夷離畢粘木袞以陰附罽撒葛伏誅。癸巳，罽撒葛入朝。甲午，以北院樞密使蕭思溫兼北府宰相。己亥，南院樞密使高勳封秦王。

夏四月戊申朔，進封太平王罽撒葛爲齊王，改封趙王喜隱爲宋王，封隆先爲平王，稍爲吳王，道隱爲蜀王，必攝爲越王，敵烈爲冀王，宛爲衛王。

五月戊寅，立貴妃蕭氏爲皇后。丙申朔，射柳祈雨。〔三〕有司請以帝生日爲天清節，從之。壬寅，漢遣李匡弼、劉繼文、李元素等來賀。〔四〕

冬十月，東幸裏潭。

十一月甲辰朔，行柴冊禮，祠木葉山，駐蹕鶴谷。乙巳，蕭思溫封魏王，北院大王屋質加于越。

二年春正月丁未，如潢河。

夏四月，幸東京，致奠于讓國皇帝及世宗廟。

五月癸丑，西幸。乙卯，次盤道嶺，盜殺北院樞密使蕭思溫。

六月，還上京。

秋七月，以右皮室詳穩賢適爲北院樞密使。

九月辛丑，得國舅蕭海只及海里殺蕭思溫狀，皆伏誅，流其弟神覲于黃龍府。
冬十二月庚午，漢遣使來貢。

三年春正月甲寅，右夷離畢奚底遣人獻敵烈俘，詔賜有功將士。庚申，置登聞鼓院。
辛酉，南京統軍使魏國公韓匡美封鄴王。

二月癸酉，東幸。壬午，遣鐸遏使阿薩蘭回鶻。己丑，以青牛白馬祭天地。

三月丁未，以飛龍使女里爲契丹行宮都部署。

夏四月丁卯，世宗妃啜里及蒲哥厭魅，賜死。己卯，祠木葉山，行再生禮。丙戌，至自東幸。戊子，蕭神覲伏誅。

六月丙子，漢遣使問起居。自是繼月而至。丁丑，回鶻遣使來貢。

秋七月辛丑，以北院樞密使賢適爲西北路招討使。

八月甲戌，如秋山。辛卯，祭皇兄吼墓，追冊爲皇太子，諡莊聖。

九月乙巳，賜傅父侍中達里迭、太保楚補、太保婆兒、保母回室、押雅等戶口、牛羊有差。又以潛邸給使者爲撻馬部，置官掌之。壬子，幸歸化州。甲寅，如南京。

冬十月己巳，以黑白羊祀神。癸未，漢遣使來貢。丙戌，鼻骨德、吐谷渾來貢。

十一月庚子，臚胸河于越延尼里等率戶四百五十來附，乞隸宮籍。詔留其戶，分隸敦睦、積慶、永興三宮，優賜遣之。

十二月癸酉，以青牛白馬祭天地。己丑，皇子隆緒生。

是冬，駐蹕金川。

四年春二月癸亥，漢以皇子生，遣使來賀。

閏月戊申，齊王 罽撒 葛薨。

三月庚申朔，追冊爲皇太叔。

夏四月庚寅朔，追封蕭思溫爲楚國王。

是夏，駐蹕冰井。

秋七月，如雲州。丁丑，鼻骨德來貢。

冬十月丁亥朔，如南京。

十二月甲午，詔內外官上封事。

五年春正月甲子，惕隱休哥伐党項，破之，以俘獲之數來上。漢遣使來貢。庚午，御鳳樓觀燈。

二月丁亥，近侍實魯里誤觸神纛，法論死，杖釋之。壬辰，越王必攝獻党項俘獲之數。戊申，以青牛白馬祭天地。辛亥，幸新城。

三月乙卯朔，復幸新城。追封皇后祖胡母里爲韓王，贈伯胡魯古兼政事令，尼古只兼侍中。

夏四月丙申，白氣晝見。

五月癸亥，于越屋質薨，輟朝三日。辛未，女直侵邊，殺都監達里迭、拽刺幹里魯，驅掠邊民牛馬。己卯，阿薩蘭回鶻來貢。

六月庚寅，女直宰相及夷離董來朝。丙申，漢遣人以宋事來告。

秋七月庚辰，以保大軍節度使耶律斜里底爲中臺省左相。是月，駐蹕燕子城。

九月壬子，鼻骨德部長曷魯撻覽來貢。

冬十月丁酉，如南京。

十一月辛亥朔，始獲應曆逆黨近侍小哥、花哥、辛古等，誅之。

十二月戊戌，漢將改元，遣使稟命。是月，如歸化州。

六年春正月癸未，幸南京。

三月，宋遣使請和，以涿州刺史耶律昌尤加侍中與宋議和。〔六〕

夏四月，宋王喜隱坐謀反廢。

秋七月丁未朔，閣門使酌古加檢校太尉兼御史大夫，男海里以告喜隱事，遙授隴州防禦使。庚申，獵于平地松林。

冬十月乙亥朔，還上京。

十二月戊子，以沙門昭敏爲三京諸道僧尼都總管，加兼侍中。

七年春正月甲戌朔，宋遣使來賀。壬寅，望祠木葉山。

二月癸亥，漢雁門節度使劉繼文來朝，貢方物。丙寅，以青牛白馬祭天地。

三月壬午，耶律速撒等獻党項俘，分賜羣臣。

夏四月，遣郎君矧思使宋。〔七〕己酉，祠木葉山。辛亥，射柳祈雨。如頻蹕淀清暑。五月丙戌，祭神姑。

秋七月，黃龍府衛將燕頰殺都監張琚以叛，遣敝史耶律曷里必討之。〔八〕

九月，敗燕頗於治河，遣其弟安搏追之。燕頗走保兀惹城，安搏乃還，以餘黨千餘戶城通州。

是秋，至白頻蹕淀。

冬十月，釣魚土河。

八年春正月癸酉，宋遣使來聘。

二月壬寅，諭史館學士，書皇后言亦稱「朕」暨「予」，著爲定式。

三月辛未，遣五使廉問四方鰥寡孤獨及貧乏失職者，振之。

夏六月，以西南面招討使耶律斜軫爲北院大王。〔九〕

秋七月丙寅朔，寧王只沒妻安只伏誅，只沒、高勳等除名。辛未，宋遣使來賀天清節。

八月癸卯，漢遣使言天清節設無遮會，飯僧祝釐。丁未，如秋山。己酉，漢以宋事來告。

是月，女直侵貴德州東境。

九月己巳，謁懷陵。辛未，東京統軍使察鄰、詳穩涸奏女直襲歸州五寨，剽掠而去。乙

亥，鼻骨德來貢。壬午，漢爲宋人所侵，遣使求援，命南府宰相耶律沙、冀王敵烈赴之。戊子，漢以宋師壓境，遣駙馬都尉盧俊來告。

冬十月辛丑，漢以遼師退宋軍來謝。

十一月丙子，宋主匡胤殂，其弟昞自立，遣使來告。辛卯，遣郎君王六、撻馬涅木古等使宋弔慰。

十二月壬寅，遣蕭只古、馬哲賀宋卽位。丁未，漢以宋軍復至，掠其軍儲來告，且乞賜糧爲助。戊午，詔南京復禮部貢院。是月，轄戛斯國遣使來貢。

校勘記

〔一〕諱賢字賢寧小字明辰 國志六、長編及東都事略並作「諱明記，更名賢。」

〔二〕殿前都點檢耶律夷臘 按卽上卷應曆十六年十二月之殿前都點檢耶律夷臘葛，百官志四作耶律夷刺葛。卷七八有傳。

〔三〕丙申朔射柳祈雨 按朔考，五月丁丑朔。上文戊寅已是初二日，丙申爲二十日，朔字衍。宏簡錄作壬午。

〔四〕漢遣李匡弼劉繼文李元素等來賀 十國春秋北漢紀記此次遣使僅匡弼、元素，無繼文。

〔五〕置官掌之 掌，原誤「堂」，據張校改。

〔六〕涿州刺史耶律昌朮 耶律昌朮，卷八六本傳作耶律合住。

〔七〕遣郎君矧思使宋。矧思，長編、宋史二並作慎思。又均繫此事于三月。

〔八〕遣敝史耶律曷里必討之。按卷七七本傳作何魯不，討燕頗時，已官北院大王。

〔九〕以西南面招討使耶律斜軫爲北院大王。按卷八三本傳作「命節制西南諸軍，仍援河東，改南院大王」。



遼史卷九

本紀第九

景宗下

九年春正月丙寅，女直遣使來貢。

二月庚子，宋遣使致其先帝遺物。甲寅，以青牛白馬祭天地。

三月癸亥，耶律沙、敵烈獻援漢之役所獲宋俘。戊辰，詔以粟二十萬斛助漢。

夏五月庚午，漢遣使來謝，且以宋事來告。己丑，女直二十一人來請宰相、夷離堇之職，以次授之。

六月丙辰，以宋王喜隱爲西南面招討使。

秋七月庚申朔，回鶻遣使來貢。甲子，宋遣使來聘。壬申，漢以宋侵來告。丙子，遣使助漢戰馬。

八月，漢遣使進葡萄酒。

冬十月甲子，耶律沙以党項降會可醜、買友來見，賜詔撫諭。丁卯，以可醜爲司徒，買友爲太保，各賜物遣之。壬申，女直遣使來貢。乙酉，漢復遣使以宋事來告。

十一月丁亥朔，司天奏日當食不虧。戊戌，吐谷渾叛入太原者四百餘戶，索而還之。癸卯，祠木葉山。乙巳，遣太保迭烈割等使宋。乙卯，漢復遣使以宋事來告。十二月戊辰，獵于近郊，以所獲祭天。

十年春正月癸丑，如長瀝。

二月庚午，阿薩蘭回鶻來貢。

三月庚寅，祭顯陵。

夏四月丁卯，西幸。己巳，女直遣使來貢。

五月癸卯，賜女里死，遣人誅高勳等。

六月己未，駐蹕沿柳湖。

秋七月庚戌，享太祖廟。

九月癸未朔，平王隆先子陳哥謀害其父，車裂以徇。

是冬，駐蹕金川。

乾亨元年春正月乙酉，遣撻馬長壽使宋，問興師伐劉繼元之故。丙申，長壽還，言「河東逆命，所當問罪。若北朝不援，和約如舊；不然則戰」。

二月丁卯，漢以宋兵壓境，遣使乞援。詔南府宰相耶律沙爲都統、冀王敵烈爲監軍赴之；又命南院大王斜軫以所部從，樞密副使抹只督之。

三月辛巳，速撒遣人以別部化哥等降，納之。丙戌，漢遣使謝撫諭軍民，詔北院大王奚底、乙室王撒合等以兵戍燕。己丑，漢復告宋兵入境，詔左千牛衛大將軍韓侗、大同軍節度使耶律善補以本路兵南援。辛卯，女直遣使來貢。丁酉，耶律沙等與宋戰於白馬嶺，不利。冀王敵烈及突呂不部節度使都敏、黃皮室詳穩唐筈皆死之，士卒死傷甚衆。

夏四月辛亥，漢以行軍事宜來奏，盧俊自代州馳狀告急。辛酉，敵烈來貢。

五月己卯朔，宋兵至河東，漢與戰，不利，劉繼文、盧俊來奔。

六月，劉繼元降宋，漢亡。甲子，封劉繼文爲彭城郡王，盧俊同政事門下平章事。宋主來侵。丁卯，北院大王奚底、統軍使蕭討古、乙室王撒合擊之。戰于沙河，失利。己巳，宋主圍南京。丁丑，詔諭耶律沙及奚底、討古等軍中事宜。

秋七月癸未，沙等及宋兵戰于高粱河，少却；休哥、斜軫橫擊，大敗之。宋主僅以身免，至涿州，竊乘驢車遁去。甲申，擊宋餘軍，所殺甚衆，獲兵仗、器甲、符印、糧饋、貨幣不可勝計。辛丑，耶律沙遣人上俘獲，以權知南京留守事韓德讓、權南京馬步軍都指揮使耶律學古、知三司事劉弘皆能安人心，捍城池，並賜詔褒獎。

八月壬子，阻卜惕隱曷魯、夷離堇阿里覲等來朝。乙丑，耶律沙等獻俘。丙寅，以白馬之役責沙、抹只，復以走宋主功釋之；奚底遇敵而退，以劍背擊之；撒合雖却，部伍不亂，宥之；冀王敵烈麾下先遁者斬之，都監以下杖之。壬申，宴沙、抹只等將校，賜物有差。

九月己卯，燕王韓匡嗣爲都統，南府宰相耶律沙爲監軍，惕隱休哥、南院大王斜軫、權奚王抹只等各率所部兵南伐，仍命大同軍節度使善補領山西兵分道以進。

冬十月乙丑，韓匡嗣與宋兵戰於滿城，敗績。辛未，太保矧思與宋兵戰於火山，敗之。乙亥，詔數韓匡嗣五罪，赦之。

十一月戊寅，宴賞休哥及有功將校。乙未，南院樞密使兼政事令郭襲上書諫畋獵，嘉納之。辛丑，冬至，赦，改元乾亨。

十二月乙卯，燕王韓匡嗣遙授晉昌軍節度使，降封秦王。壬戌，蜀王道隱南京留守，徙封荆王。

是冬，駐蹕南京。

二年春正月丙子朔，封皇子隆緒爲梁王，隆慶爲恒王。丁亥，以惕隱休哥爲北院大王，前樞密使賢適封西平郡王。

二月戊辰，如清河。

三月丁亥，西南面招討副使耶律王六、太尉化哥遣人獻党項俘。

閏月庚午，有鴉飛止御帳，獲以祭天。

夏四月庚辰，祈雨。戊子，清暑燕子城。

五月，雷火乾陵松。

六月己亥，喜隱復謀反，囚于祖州。

秋七月戊午，王六等獻党項俘。

八月戊戌，東幸。

冬十月辛未朔，命巫者祠天地及兵神。辛巳，將南伐，祭旗鼓。癸未，次南京。丁亥，獲敵人，射鬼箭。庚寅，次固安，以青牛白馬祭天地。己亥，圍瓦橋關。

十一月庚子朔，宋兵夜襲營，突呂不部節度使蕭幹及四捷軍詳穩耶律痕德戰却之。〔四〕

壬寅，休哥敗宋兵於瓦橋東，守將張師引兵出戰，休哥奮擊，敗之。戊申，宋兵陣於水南，休哥涉水擊破之，追至莫州，殺傷甚衆。己酉，宋兵復來，擊之殆盡。丙辰，班師。乙丑，還次南京。

十二月庚午朔，休哥拜于越。大饗軍士。

三年春二月丙子，東幸。己丑，復幸南京。

三月乙卯，皇子韓八卒。辛酉，葬潢、土二河之間，置永州。以秦王韓匡嗣爲西南面招討使。

夏五月丙午，上京漢軍亂，劫立喜隱不克，僞立其子留禮壽，上京留守除室擒之。

秋七月甲子，留禮壽伏誅。

冬十月，如蒲瑰坡。

十一月辛亥，加除室同政事門下平章事。是月，以南院樞密使郭襲爲武定軍節度使。十二月，以遼興軍節度使韓德讓爲南院樞密使。

四年春正月己亥，如華林、天柱。

三月乙未，清明。與諸王大臣較射，宴飲。

夏四月，自將南伐。至滿城，戰不利，守太尉奚瓦里中流矢死。統軍使善補爲伏兵所圍，樞密使斜軫救免，詔以失備杖之。

五月，班師。清暑燕子城。

秋七月壬辰，遣使賜喜隱死。

八月，如西京。

九月庚子，幸雲州。甲辰，獵于祥古山，帝不豫。壬子，次焦山，崩於行在。年三十五，在位十三年。遺詔梁王隆緒嗣位，軍國大事聽皇后命。統和元年正月壬戌，上尊諡孝成皇帝，廟號景宗。重熙二十一年，加諡孝成康靖皇帝。

贊曰：遼興六十餘年，神冊、會同之間，日不暇給；天祿、應曆之君，不令其終；保寧而來，人人望治。以景宗之資，任人不疑，信賞必罰，若可與有爲也。而竭國之力以助河東，破軍殺將，無救滅亡。雖一取償於宋，得不償失。知匡嗣之罪，數而不罰；善郭襲之諫，納而不用；沙門昭敏以左道亂德，寵以待中。不亦惑乎！

校勘記

〔一〕九月癸未朔 朔字，據朔考補。

〔二〕五月己卯朔 朔字，據朔考補。

〔三〕北院大王奚底 按卷八四蕭幹傳作五院糾詳穩奚底。

〔四〕突呂不部節度使蕭幹及四捷軍詳穩耶律痕德戰却之 按卷八四蕭幹傳作「宋兵圍瓦橋，夜襲我營，幹及耶律勻骨戰却之」。

〔五〕皇子韓八卒 韓八，紀統和元年五月、皇子表並作藥師奴。

遼史卷十

本紀第十

聖宗一

聖宗文武大孝宣皇帝，諱隆緒，小字文殊奴。景宗皇帝長子，母曰睿智皇后蕭氏。帝幼喜書翰，十歲能詩。既長，精射法，曉音律，好繪畫。

乾亨二年，封梁王。

四年秋九月壬子，景宗崩。癸丑，即皇帝位於柩前，時年十二。皇后奉遺詔攝政，詔諭諸道。

冬十月己未朔，帝始臨朝。辛酉，羣臣上尊號曰昭聖皇帝，尊皇后爲皇太后，大赦。以南院大王勃古哲總領山西諸州事，北院大王、于越休哥爲南面行軍都統，奚王和朔奴副之，

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



同政事門下平章事蕭道寧領本部軍駐南京。乙丑，如顯州。

十一月甲午，置乾州。

十二月戊午朔，耶律速撒討阻卜。辛酉，南京留守荆王道隱奏宋遣使獻犀帶請和，詔以無書却之。甲子，撻刺干乃万十醉言宮掖事，〔一〕法當死，杖而釋之。辛未，西南面招討使秦王韓匡嗣薨。〔二〕癸酉，奉大行皇帝梓宮于敢塗殿。庚辰，省置中臺省官。

統和元年春正月戊午朔，以大行在殯，不受朝。乙丑，奉遺詔，召先帝庶兄質睦于敢塗殿前，復封寧王。加宰相室昉、宣徽使普領等恩。丙寅，荆王道隱有疾，詔遣使存問。是日，皇太后幸其邸視疾。戊辰，以烏隈烏骨里部節度使耶律章瓦同政事門下平章事。甲戌，荆王道隱薨，輟朝三日，追封晉王，遣使撫慰其家。丙子，以于越休哥爲南京留守，仍賜南面行營總管印綬，總邊事。渤海撻馬解里以受先帝厚恩，乞殉葬，詔不許，賜物以旌之。戊寅，遣使賜于越休哥及奚王籌寧、統軍使頗德等湯藥。命懇篤持送休哥下車榜，以諭燕民。辛巳，速撒獻阻卜俘。壬午，涿州刺史安吉奏宋築城河北，詔留守于越休哥撓之，勿令就功。趙妃及公主胡骨典、奚王籌寧、宰相安寧、北大王普奴寧、惕隱屈烈、吳王稍、寧王只沒與橫帳、國舅、契丹、漢官等並進助山陵費。癸未，齊國公主率內外命婦進物如之。甲申，西南

面招討使韓德威奏党項十五部侵邊，以兵擊破之。乙酉，以速撒破阻卜，下詔褒美，仍諭與大漢討党項諸部。丁亥，樞密使兼政事令室昉以年老請解兼職，詔不允。

二月戊子朔，禁所在官吏軍民不得無故聚衆私語及冒禁夜行，違者坐之。己丑，南京奏，聞宋多聚糧邊境及宋主將如臺山，詔休哥嚴爲之備。甲午，葬景宗皇帝於乾陵，以近幸朗、掌飲伶人撻魯爲殉。上與皇太后因爲書附上大行。丙申，皇太后詣陵置奠，命繪近臣於御容殿，賜山陵工人物有差。庚子，以先帝遺物賜皇族及近臣。辛丑，南京統軍使耶律善補奏宋邊七十餘村來附，詔撫存之。乙巳，以御容殿爲玉殿，酒谷爲聖谷。速撒奏討党項捷，遣使慰勞。戊申，以惕隱化哥爲北院大王，解頴爲南府宰相。辛亥，幸聖山，遂謁三陵。甲寅，以皇女長壽公主下嫁國舅宰相蕭婆項之子吳留。

三月戊午，天德軍節度使頽刺父子戰歿，以其弟涅離襲爵。己未，次獨山。遣使賞西南面有功將士。辛酉，以大父帳太尉耶律曷魯寧爲惕隱。甲子，駐蹕遼河之平淀。辛巳，以國舅、同平章事蕭道寧爲遼興軍節度使，仍賜號忠亮佐理功臣。壬午，以青牛白馬祭天地。

夏四月丙戌朔，幸東京。以樞密副使耶律末只兼侍中，爲東京留守。庚寅，謁太祖廟。癸巳，詔賜物命婦寡居者。丙申，南幸。辛丑，謁三陵，以東京所進物分賜陵寢官吏。復詔

賜西南路招討使大漢劍，不用命者得專殺。壬寅，致享于凝神殿。癸卯，謁乾陵。乙巳，遣人以酒脯祭平章耶律河陽墓。庚戌，幸夫人烏骨里第，謁太祖御容，禮畢，幸公主胡古典第飲，賜與甚厚。壬子，大臣以太后預政，宜有尊號，請下有司詳定冊禮。詔樞密院諭沿邊節將，至行禮日，止遣子弟奉表稱賀，恐失邊備。樞密請詔北府司徒頗德譯南京所進律文，從之。遂如徽州。以耶律慶朗爲信州節度使。

五月丙辰朔，國舅、政事門下平章事蕭道寧以皇太后慶壽，請歸父母家行禮，而齊國公主及命婦、羣臣各進物。設宴，賜國舅帳者年物有差。壬戌，西南路招討請益兵討西突厥諸部，詔北王府耶律蒲奴寧以敵畢、迭烈二部兵赴之。癸亥，以于越休哥在南院過用吏人，詔南大王毋相循襲。庚午，耶律善補招亡入宋者，得千餘戶歸國，詔令撫慰。辛未，次永州，祭王子藥師奴墓。乙亥，詔近臣議皇太后上尊號冊禮，樞密使韓德度以後漢太后臨朝故事草定上之。丙子，以青牛白馬祭天地。戊寅，幸木葉山。西南路招討使大漢奏，近遣拽刺跋刺哥諭党項諸部，來者甚衆，下詔褒美。

六月乙酉朔，詔有司，冊皇太后日，給三品以上法服，三品以下用大射柳之服。西南路招討使奏党項酋長執夷離董子隈引等乞內附，詔撫納之，仍察其誠僞，謹邊備。丙戌，還上京。己丑，有司奏，同政事門下平章事、駙馬都尉盧俊與公主不協，詔離之，遂出俊爲興國

軍節度使。辛卯，有事于太廟。甲午，上率羣臣上皇太后尊號曰承天皇帝太后，羣臣上皇帝尊號曰天輔皇帝，大赦，改元統和。丁未，覃恩中外，文武官各進爵一級。以樞密副使耶律斜軫守司徒。

秋七月甲寅朔，皇太后聽政。乙卯，上親錄囚。王子司徒婁國坐稱疾不赴山陵，笞二十。辛酉，行再生禮。癸酉，臨潢尹裹袞進飲饌。上與諸王分朋擊鞠。丙子，韓德威遣詳穩轄馬上破党項俘獲數，并送夷離董之子來獻。辛巳，賞西南面有功將士。

八月戊子，上西巡。己丑，謁祖陵。辛卯，皇太后祭楚國王蕭思溫墓。癸巳，上與皇太后謁懷陵，遂幸懷州。甲午，上與斜軫於太后前易弓矢鞍馬，約以爲友。己亥，獵赤山，遣使薦熊肪、鹿脯于乾陵之凝神殿。以政事令孫楨無子，詔國舅小翁帳郎君桃隈爲之後。乙巳，詔于越休哥提點元城。壬子，韓德威表請伐党項之復叛者，詔許之；仍發別部兵數千以助之。

九月癸丑朔，以東京、平州旱、蝗，詔振之。乙卯，謁永興、長寧、敦睦三宮。丙辰，南京留守奏，秋霖害稼，請權停關征，以通山西糴易，從之。庚申，謁宣簡皇帝廟。辛酉，幸祖州，謁祖陵。壬戌，還上京。辛未，有司請以帝生日爲千齡節，從之。皇太后言故于越屋只有傳導功，宜錄其子孫；遂命其子泮泱爲林牙。丙子，如老翁川。

冬十月癸未朔，司天奏老人星見。戊子，以公主淑哥下嫁國舅詳穩照姑。〔三〕癸巳，速撒奏敵烈部及叛蕃來降，悉復故地。乙未，以燕京留守于越休哥言，每歲諸節度使貢獻，如契丹官例，止進鞍馬，從之。丁酉，以吳王稍爲上京留守，行臨潢尹事。上將征高麗，親閱東京留守耶律末只所總兵馬。丙午，命宣徽使兼侍中蒲領、林牙肯德等將兵東討，賜旗鼓及銀符。

十一月壬子朔，觀漁撿馬濼。癸丑，應州奏，獲宋諜者，言宋除道五臺山，將入靈丘界。詔諜者及居停人並磔于市。庚辰，上與皇太后祭乾陵，下詔諭三京左右相、左右平章事、副留守判官、諸道節度使判官、諸軍事判官、錄事參軍等，當執公方，毋得阿順。諸縣令佐如遇州官及朝使非理徵求，毋或畏徇。恆加采聽，以爲殿最。民間有父母在，別籍異居者，聽鄰里覺察，坐之。有孝于父母，三世同居者，旌其門閭。

十二月壬午朔，謁凝神殿，遣使分祭諸陵，賜守殿官屬酒。是日，幸顯州。丁亥，以顯州歲貢綾錦分賜左右。甲午，東幸。己亥，皇太后觀漁于玉盆灣。辛丑，觀漁于濬淵。甲辰，敕諸刑辟已結正決遣而有冤者，聽詣臺訴。是夕，然萬魚燈于雙溪。戊申，千齡節，祭日月，禮畢，百僚稱賀。

二年春正月甲子，如長樂。

二月癸巳，國舅帳彰德軍節度使蕭闡覽來朝。甲午，賜將軍耶律敵不春衣、束帶。丙申，東路行軍、宣徽使耶律蒲寧奏討女直捷，〔六〕遣使執手獎諭。庚子，朝皇太后，太后因從觀獵于饒樂川。乙巳，五國烏隈于厥節度使耶律隗注以所轄諸部難治，〔七〕乞賜詔給劍，便宜行事，從之。丙午，上與諸王大臣較射。丁未，韓德威以征党項回，遂襲河東，獻所俘，賜詔褒美。

三月乙卯，割離部請今後詳穩止從本部選授爲宜，上曰：「諸部官惟在得人，豈得定以所部爲限。」不允。贈故同平章事趙延煦兼侍中。

夏四月丁亥，宣徽使、同平章事耶律普寧、都監蕭勤德獻征女直捷，授普寧兼政事令，勤德神武衛大將軍，各賜金器諸物。庚寅，皇太后臨決滯獄。辛卯，祭風伯。壬辰，以宣徽南院使劉承規爲承德軍節度使，崇德宮都部署、保義軍節度使張德筠爲宣徽北院使。

五月乙卯，祠木葉山。丁丑，駐蹕沿柳湖。

六月己卯朔，皇太后決獄，至月終。

秋七月癸丑，皇太后行再生禮。

八月辛卯，東京留守兼侍中耶律末只奏，女直朮不直、賽里等八族乞舉衆內附，詔

納之。

九月戊申朔，駐蹕土河。辛未，以景宗忌日，詔諸道京鎮遣官行香飯僧。

冬十月丁丑朔，以歸化州刺史耶律普寧爲彰德軍節度使，右武衛大將軍韓倬爲彰國軍節度使兼侍衛親軍兵馬都指揮使。

十一月壬子，以樞密直學士、給事中鄭嘏爲儒州刺史。是月，速撒等討阻卜，殺其會長撻刺干。

十二月辛丑，以翰林學士承旨馬得臣爲宣政殿學士，耶律頗德南京統軍使，耶律瑤昇大內惕隱，大仁靖東京中臺省右平章事。

三年春正月丙午朔，如長瀼。丁巳，以翰林學士邢抱朴爲尙書、禮部侍郎、知制誥，左拾遺知制誥劉景、吏部郎中知制誥牛藏用並政事舍人。

二月丙子朔，以牛藏用知樞密直學士。

三月乙巳朔，樞密奏契丹諸役戶多困乏，請以富戶代之。上因閱諸部籍，涅刺、烏隈二部戶少而役重，并量免之。

夏四月乙亥朔，祠木葉山。壬午，以鳳州刺史趙匡符爲保靜軍節度使。癸未，以左監

門衛大將軍王庭勗爲奉先軍節度使，彰武軍節度使韓德凝爲崇義軍節度使。

五月壬子，還上京。癸酉，以國舅蕭道寧同平章事、知瀋州軍州事。

六月甲戌朔，如栢坡。皇太后親決滯獄。乙亥，以歸義軍節度使王希嚴爲興國軍節度使。

秋七月甲辰朔，詔諸道繕甲兵，以備東征高麗。甲寅，東幸。甲子，遣郎君班襲賜秦王韓匡嗣葬物。丙寅，駐蹕土河。以暴漲，命造船橋，明日乘步輦出聽政。老人星見。丁卯，遣使閱東京諸軍兵器及東征道路。以平章事蕭道寧爲昭德軍節度使，武定軍節度使、守司空兼政事令郭襲爲天平軍節度使，大同軍節度使、守太子太師兼政事令劉延構爲義成軍節度使，贈尙父秦王韓匡嗣尙書令。

八月癸酉朔，以遼澤沮洳，罷征高麗。命樞密使耶律斜軫爲都統，駙馬都尉蕭懇德爲監軍，以兵討女直。丁丑，次橐城。庚辰，至顯州，謁凝神殿。辛巳，幸乾州，觀新宮。癸未，謁乾陵。甲申，命南、北面臣僚分巡山陵林木，及令乾、顯二州上所部里社之數。丙戌，北皮室詳穩進勇敢士七人。戊子，故南院大王諧領已里婉妻蕭氏奏夫死不能葬，詔有司助之。庚寅，東征都統所奏路尙陷濘，未可進討，詔俟澤涸深入。癸巳，皇太后謁顯陵。庚子，謁乾陵。辛丑，西幸。

閏九月癸酉，〔二〇〕命邢抱朴勾檢顯陵。丙子，行次海上。庚辰，重九，駱駝山登高，賜羣臣菊花酒。辛巳，詔諭東征將帥，乘水涸進討。丙申，女直宰相朮不里來貢。戊戌，駐蹕東古山。己亥，速撒奏朮不姑諸部至近淀，夷離董易魯姑請行俘掠，〔二一〕上曰：「諸部於國無惡，何故俘掠，徒生事耳。」不允。

冬十一月甲戌，詔吳王稍領秦王韓匡嗣葬祭事。丁丑，詔以東北路兵馬監軍妻婆底里存撫邊民。戊寅，賜公主胡骨典葬夫金帛、工匠。辛卯，以韓德讓兼政事令。癸巳，禁行在市易布帛不中尺度者。丙申，東征女直，都統蕭闡覽、菩薩奴以行軍所經地里、物產來上。

校勘記

〔一〕撻刺干乃万十 乃万十，刑法志作乃方十。

〔二〕西南面招討使秦王韓匡嗣 西字原脫，據紀乾亨三年三月及卷七四本傳補。

〔三〕宋主將如臺山 臺山，按下文本年十一月，應作五臺山。

〔四〕以皇女長壽公主下嫁國舅宰相蕭婆項之子吳留 按蕭婆項卽蕭幹，吳留卽蕭恒德。檢公主表，景宗第一女長壽，封衛國公主，嫁蕭排押；第三女延壽，封越國公主，嫁蕭恒德。又卷八八蕭排押傳及蕭恒德傳，排押「尙衛國公主」，恒德「統和元年尙越國公主」。則此長壽應作延壽。

〔五〕以公主淑哥下嫁國舅詳穩照姑。照姑，公主表作蕭神奴。

〔六〕東路行軍宣徽使耶律蒲寧奏討女直捷。耶律蒲寧原誤「蕭蒲寧」。下文又作耶律普寧。卷七九

耶律阿沒里傳：「阿沒里，字蒲鄰。」蒲寧、普寧均蒲鄰異譯，卽耶律阿沒里一人。又據本傳，「行軍」下應有「都統」二字。

〔七〕五國烏隈于厥節度使耶律隗注。按部族表作「五國隈烏古部節度使耶律隈注」。

〔八〕十一月壬子。十一月上原有「冬」字，衍文從刪。

〔九〕六月甲戌朔。朔字，據朔考補。

〔一〇〕閏九月癸酉。按是年遼閏八月，閏字下當有脫文。閏八月壬寅朔，九月壬申朔，癸酉爲九月初二，丙子初五，庚辰爲重九，正合。大典一二〇四三引亦作「九月丙子，行次海上。庚辰重九，

次駱駝山登高，賜羣臣菊花酒」。

〔一一〕夷離董易魯姑請行俘掠。易，疑是曷字之誤。

遼史卷十一

本紀第十一

聖宗二

四年春正月甲戌，觀漁土河。林牙耶律謀魯姑、彰德軍節度使蕭闡覽上東征俘獲，賜詔獎諭。丙子，樞密使耶律斜軫、林牙勤德等上討女直所獲生口十餘萬、馬二十餘萬及諸物。己卯，朝皇太后。決滯訟。壬午，樞密使斜軫、林牙勤德、謀魯姑、節度使闡覽、統軍使室羅、侍中抹只、奚王府監軍迪烈與安吉等克女直還軍，遣近侍泥里吉詔旌其功，仍執手撫諭，賜酒果勞之。甲午，幸長瀼。

二月壬寅，以四番都統軍李繼忠爲檢校司徒、上柱國。〔一〕癸卯，西夏李繼遷叛宋來降，以爲定難軍節度使、銀夏綏宥等州觀察處置等使、特進檢校太師、都督夏州諸軍事。西番會帥瓦泥乞移爲保大軍節度使、鄜坊等州觀察處置等使。甲寅，耶律斜軫、蕭闡覽、謀魯姑

等族帥來朝，^{〔三〕}行飲至之禮，賞賚有差。丙寅，行次裏里井。

三月甲戌，于越休哥奏宋遣曹彬、崔彥進、米信由雄州道，田重進飛狐道，潘美、楊繼業雁門道來侵，岐溝、涿州、固安、新城皆陷。詔宣徽使蒲領馳赴燕南，與休哥議軍事；分遣使者徵諸部兵益休哥以擊之；復遣東京留守耶律抹只以大軍繼進，賜劍專殺。乙亥，以親征告陵廟、山川。丙子，統軍使耶律頗德敗宋軍于固安，休哥絕其糧餉，擒將吏，獲馬牛、器仗甚衆。庚辰，寰州刺史趙彥章以城叛，^{〔三〕}附于宋。辛巳，宋兵入涿州。順義軍節度副使趙希贊以朔州叛，^{〔四〕}附于宋。時上與皇太后駐兵駝羅口，詔趣東征兵馬以爲應援。壬午，詔林牙勤德以兵守平州之海岸以備宋。仍報平州節度使迪里姑，若勤德未至，遣人趣行；馬乏則括民馬；鎧甲闕，則取於顯州之甲坊。癸未，遼軍與宋田重進戰于飛狐，不利，冀州防禦使大鵬翼、康州刺史馬贊、^{〔五〕}馬軍指揮使何萬通陷焉。丁亥，以北院樞密使耶律斜軫爲山西兵馬都統，以北院宣徽使蒲領爲南征都統，^{〔六〕}以副于越休哥。彰國軍節度使艾正、觀察判官宋雄以應州叛，附于宋。庚寅，遣飛龍使亞刺、文班吏亞達哥閱馬以給先發諸軍，詔駙馬都尉蕭繼遠領之。辛卯，武定軍馬步軍都指揮使、郢州防禦使呂行德、副都指揮使張繼從、馬軍都指揮使劉知進等以飛狐叛，附于宋。癸巳，賜林牙謀魯姑旗鼓四、劍一，率禁軍之驍銳者南助休哥。丙申，步軍都指揮使穆超以靈丘叛，附于宋。詔遣使賜樞密使

斜軫密旨及彰國軍節度使杓窠印以趣征討。

夏四月己亥朔，次南京北郊。庚子，惕隱瑤昇、西南面招討使韓德威以捷報。辛丑，宋潘美陷雲州。壬寅，遣抹只、謀魯姑、勤德等領偏師以助休哥，仍賜旗鼓、杓窠印撫諭將校。癸卯，休哥復以捷報，上以酒脯祭天地，率羣臣賀于皇太后。詔勤德還軍。丙午，頗德上所獲鎧仗數。戊申，監軍、宣徽使蒲領奏敵軍引退，而奚王籌寧、北大王蒲奴寧、統軍使頗德等以兵追躡，皆勝之。遣敝史勤德持詔褒美，及詔侍中抹只統諸軍赴行在所。頻不部節度使和盧覲、黃皮室詳穩解里等各上所獲兵甲。又詔兩部突騎赴蔚州，以助闡覽。橫帳郎君老君奴率諸郎君巡徼居庸之北。將軍化哥統平州兵馬，橫帳郎君奴哥爲黃皮室都監，〔七〕郎君謁里爲北府都監，各以步兵赴蔚州以助斜軫。庚戌，以斜軫爲諸路兵馬都統，闡覽兵馬副部署，迪子都監，〔八〕以代善補、韓德威。癸丑，以艾正、趙希贊及應州、朔州節度副使、奚軍小校隘離轄、渤海小校貫海等叛入于宋，籍其家屬，分賜有功將校。宋將曹彬、米信北渡拒馬河，與于越休哥對壘，挑戰，南北列營長六七里。時上次涿州東五十里。甲寅，詔于越休哥、奚王籌寧、宣徽使蒲領、南、北二王等嚴備水道，無使敵兵得潛至涿州。乙卯，休哥等敗宋軍，獻所獲器甲、貨財，賜詔褒美。蔚州左右都押衙李存璋、許彥欽等殺節度使蕭嘏里，執監城使、銅州節度使耿紹忠，〔九〕以城叛，附于宋。丙辰，復涿州，告天地。戊午，上次

沙姑河之北淀，召林牙勤德議軍事。諸將校各以所俘獲來上。奚王籌寧、南、北二王率所部將校來朝。以近侍粘米里所進自落鴉祭天地。己未，休哥、蒲領來朝，詔三司給軍前夏衣布。庚申，上朝皇太后。辛酉，大軍次固安。壬戌，圍固安城，統軍使頗德先登，城遂破，大縱俘獲。居民先被俘者，命以官物贖之。甲子，賞攻城將士有差。

五月庚午，遼師與曹彬、米信戰于岐溝關，大敗之，追至拒馬河，溺死者不可勝紀；餘衆奔高陽，又爲遼師衝擊，死者數萬，棄戈甲若丘陵。輓漕數萬人匿岐溝空城中，圍之。壬申，以皇太后生辰，縱還。癸酉，班師，還次新城。休哥、蒲領奏宋兵奔逃者皆殺之。甲戌，以軍捷，遣使分諭諸路京鎮。丁丑，詔諸將校，論功行賞，無有不實。己卯，次固安南，以青牛白馬祭天地。庚辰，以所俘宋人射鬼箭。詔遣詳穩排亞率弘義宮兵及南、北皮室、郎君、拽刺四軍赴應、朔二州界，與惕隱瑤昇、招討韓德威等同禦宋兵在山西之未退者。辛巳，以瑤昇軍赴山西。壬午，還次南京。癸未，休哥、籌寧、蒲奴寧進俘獲。斜軫遣判官蒲姑奏復蔚州，斬首二萬餘級，乘勝攻下靈丘、飛狐，賜蒲姑酒及銀器。丙戌，御元和殿，大宴從軍將校，封休哥爲宋國王，加蒲領、籌寧、蒲奴寧及諸有功將校爵賞有差。丁亥，發南京，詔休哥備器甲，儲粟，待秋大舉南征。戊子，斜軫奏宋軍復圍蔚州，擊破之。詔以兵授瑤昇、韓德威等。壬辰，以宋兵至平州，瑤昇、韓德威不盡追殺，降詔詰責。仍諭，據城未降者，必盡掩殺，

無使遁逃。癸巳，以軍前降卒分賜屬從。乙未，賞頗德諸將校士卒。

六月戊戌朔，詔韓德威赴闕，加統軍使頗德檢校太師。甲辰，詔南京留守休哥遣礮手西助斜軫。乙巳，以夷離畢姪里古部送輜重行宮，暑行日五十里，人馬疲乏，遣使讓之。丁未，度居庸關。壬子，南京留守奏百姓歲輸三司鹽鐵錢，折絹不如直，詔增之。甲寅，斜軫奏復寰州。乙卯，皇太妃、諸王、公主迎上嶺表，設御幄道傍，置景宗御容，率從臣進酒，陳俘獲于前，遂大宴。戊午，幸涼陁。以所俘分賜皇族及乳母。己未，聞所遣宣諭回鶻、覈列哥國度里、亞里等爲朮不姑邀留，詔速撒賜朮不姑貨幣，諭以朝廷來遠之意，使者由是乃得行。癸亥，以節度使韓毗哥、翰林學士邢抱朴等充雲州宣諭招撫使。丙寅，以太尉王八所俘生口分賜趙妃及于越迪輦乙里婉。

秋七月丙子，樞密使斜軫遣侍御涅里底、幹勤哥奏復朔州，擒宋將楊繼業，及上所獲將校印綬、誥敕，賜涅里底等酒及銀器。辛巳，以捷告天地。以宋歸命者二百四十人分賜從臣。又以殺敵多，詔上京開龍寺建佛事一月，飯僧二萬人。辛卯，斜軫奏：大軍至蔚州，營于州左。得諜報，敵兵且至，乃設伏以待。敵至，縱兵逆擊，追奔逐北，至飛狐口。遂乘勝鼓行而西，入寰州，殺守城吏卒千餘人。宋將楊繼業初以驍勇自負，號楊無敵，北據雲、朔數州。至是，引兵南出朔州三十里，至狼牙村，惡其名，不進；左右固請，乃行。遇斜軫，伏

四起，中流矢，墮馬被擒。瘡發不食，三日死。遂函其首以獻。詔詳穩轄麥室傳其首于越休哥，以示諸軍，仍以朔州之捷宣諭南京、平州將吏。自是宋守雲、應諸州者，聞繼業死，皆棄城遁。

八月丁酉朔，三置先離闕覽官六員，領于骨里、女直、迪烈于等諸部人之隸宮籍者。以北大王蒲奴寧爲山後五州都管。乙巳，韓德讓奏宋兵所掠州郡，其逃民禾稼，宜募人收穫，以其半給收者，從之。乙卯，斜軫還自軍，獻俘。己未，用室昉、韓德讓言，復山西今年租賦。詔第山西諸將校功過而賞罰之。乙室帳宰相安寧以功過相當，追告身一通，歸居部節度使佛奴答五十。惕隱瑤昇、拽刺欵烈、朔州節度使慎思、應州節度使骨只、雲州節度使化哥、軍校李元迪、蔚州節度使佛留、都監崔其、劉繼琛，皆以聞敵逃遁奪官，欵烈仍配隸本貫，三領國舅軍王六答五十。壬戌，以斜軫所部將校前破女直，後有宋捷，第功加賞。癸亥，加斜軫守太保。

九月丙寅朔，皇太妃以上納后，進衣物、駝馬，以助會親頒賜。甲戌，次黑河，以重九登高于高水南阜，祭天。賜從臣命婦菊花酒。丁丑，次河陽北。戊寅，內外命婦進會親禮物。辛巳，納皇后蕭氏。丙戌，次儒州，以大軍將南征，詔遣皮室詳穩乞的、郎君拽刺先赴本軍繕甲兵。三己丑，召北大王蒲奴寧赴行在所。甲午，皇太后行再生禮。

冬十月丙申朔，党項、阻卜遣使來貢。丁酉，皇太后復行再生禮，爲帝祭神祈福。己亥，以乙室王帳郎君吳留爲御史大夫。政事令室昉奏山西四州自宋兵後，（一）人民轉徙，盜賊充斥，乞下有司禁止。命新州節度使蒲打里選人分道巡檢。北大王帳郎君曷葛只里言本府王蒲奴寧十七罪，詔橫帳太保覈國底鞫之。蒲奴寧伏其罪十一，答二十釋之。曷葛只里亦伏誣告六事，命詳酌罪之。知事勤德連坐，杖一百，免官。甲辰，出居庸關。乙巳，詔諸京鎮相次軍行，諸細務權停理問。庚戌，分遣拽刺沿邊偵候。辛亥，命皇族廬帳駐東京延芳淀。（二）壬子，詔以敕勝付于越休哥，以南征諭拒馬河南六州。乙卯，幸南京。戊午，以南院大王留寧言，復南院部民今年租賦。壬戌，以銀鼠、青鼠及諸物賜京官、僧道、耆老。甲子，上與大臣分朋擊鞠。

十一月丙寅朔，党項來貢。庚午，以政事令韓德讓守司徒。壬申，以古北、松亭、榆關征稅不法，致阻商旅，遣使鞫之。女直請以兵從征，許之。癸酉，御正殿，大勞南征將校。丙子，南伐，次狹底塌，皇太后親閱輜重兵甲。丁丑，以休哥爲先鋒都統。戊寅，日南至，上率從臣祭酒景宗御容。辛巳，詔以北大王蒲奴寧居奉聖州，山西五州公事，並聽與節度使蒲打里共裁決之。癸未，祭日月，爲駙馬都尉勤德祈福。乙酉，置諸部監，勒所部各守營伍，毋相錯雜。丙戌，遣謀魯姑、蕭繼遠沿邊巡徼。以所獲宋卒射鬼箭。丁亥，以青牛白馬祭天

地。辛卯，次白佛塔川，獲自落馴狐，以爲吉徵，祭天地。詔駙馬都尉蕭繼遠、林牙謀魯姑、太尉林八等固守封疆，毋漏間諜。軍中無故不得馳馬，及縱諸軍殘南境桑果。壬辰，至唐興縣。時宋軍屯滹沱橋北，選將亂射之，橋不能守，進焚其橋。癸巳，涉沙河，休哥來議事。北皮室詳穩排亞獻所獲宋諜二人，上賜衣物，令還招諭秦州。楮特部節度使盧補古、都監耶律盼與宋戰于秦州，不利。甲午，祭廡鹿神。以盧補古臨陣遁逃，奪告身一通，其判官、都監各杖之。郎君拽刺雙骨里遇宋先鋒於望都，擒其士卒九人，獲甲馬十一，賜酒及銀器。乙未，以盧補古等罪詔諭諸軍。以御蓋郎君化哥權楮特部節度使，橫帳郎君佛留爲都監，代盧補古。權領國舅軍桃畏請置二校領散卒，詔以郎君世音、頗德等充。命彰德軍節度使蕭闡覽、將軍迪子略地東路。詔休哥、排亞等議軍事。

十二月己亥，休哥敗宋軍於望都，遣人獻俘。壬寅，營于滹沱北，詔休哥以騎兵絕宋兵，毋令入邢州，命太師王六謹偵候。癸卯，小校曷主遇宋輜重，引兵殺獲甚衆，并焚其芻粟。甲辰，詔南大王與休哥合勢進討，宰相安寧領迪離部及三剋軍殿。上率大軍與宋將劉廷讓、李敬源戰于莫州，敗之。乙巳，擒宋將賀令圖、楊重進等；國舅詳穩撻烈哥、宮使蕭打里死之。丙午，詔休哥以下入內殿，賜酒勞之。丁未，築京觀。復以南京禁軍擊楊團城，守將以城降。詔禁侵掠。己酉，營神榆村，詔上楊團城粟麥、兵甲之數。辛亥，以黑白二牲

祭天地。癸丑，拔馮母鎮，大縱俘掠。丙辰，邢州降。丁巳，拔深州，以不卽降，誅守將以下，縱兵大掠。李繼遷引五百騎款塞，願婚大國，永作藩輔。詔以王子帳節度使耶律襄之女汀封義成公主下嫁，賜馬三千疋。

校勘記

〔一〕以四番都統軍李繼忠爲檢校司徒。繼忠，百官志二作繼冲。

〔二〕耶律斜軫蕭闡覽謀魯姑等族帥來朝。「族」，疑應作諸。

〔三〕寰州刺史趙彥章以城叛。彥章，長編、宋史五並作彥辛。

〔四〕順義軍節度副使趙希贊以朔州叛。順義，原誤「義順」。據地理志五及遼文匯四張正嵩墓誌改。

〔五〕康州刺史馬贊。馬贊，國志卷七、卷十均作馬碩，長編及宋史五、通考三四六並作馬頹。

〔六〕以北院宣徽使蒲領爲南征都統。蒲領，又作蒲寧、普寧，卽耶律阿沒里。卷七九本傳作蒲鄰。都統，本傳作都監，下文本年四月亦稱監軍。

〔七〕橫帳郎君奴哥爲黃皮室都監。奴哥，卷八五本傳作奴瓜，「統和四年，宋楊繼業來侵，奴瓜爲黃皮室紮都監，擊敗之。」

〔八〕迪子都監。迪子，卷八五本傳作題子，「授西南面招討都監」。

〔九〕銅州節度使 銅州，長編作同州。

〔一〇〕飯僧萬人 飯僧，原倒訛「僧飯」。據前後文例改。

〔一一〕八月丁酉朔 朔字，據朔考補。

〔一二〕歟烈仍配隸本貫 歟，原誤「配」。據上文及大典五二四九改。

〔一三〕遣皮室詳穩乞的郎君拽刺先赴本軍繕甲兵 按乞的，下卷六年十二月作乞得。郎君拽刺爲官名，下疑脫一人名，或卽下文本年十一月之郎君拽刺雙骨里。

〔一四〕山西四州 州，原誤「川」。按下文有「山西五州」，據改。

〔一五〕東京延芳淀 此淀在居庸關至南京途中，非東京之延芳淀。「東京」當作南京或京東。

〔一六〕毋令入邢州 邢州，國志七作祁州。長編，是年契丹長驅入深、祁。下文云「拔深州」。邢應作祁。

〔一七〕復以南京禁軍擊楊團城 以，原作「入」。據大典五二四九改。

遼史卷十二

本紀第十二

聖宗三

五年春正月乙丑，破東城縣，縱兵大掠。丁卯，次文安，遣人諭降，不聽，遂擊破之。盡殺其丁壯，俘其老幼。戊寅，上還南京。己卯，御元和殿，大賚將士。壬辰，如華林、天柱。

二月甲午朔，至自天柱。

三月癸亥朔，幸長春宮，賞花釣魚，以牡丹徧賜近臣，歡宴累日。丁丑，以諦居部下拽刺解里偵候有功，命入御蓋郎君班祇候。

夏四月癸巳朔，幸南京。丁酉，上率百僚册上皇太后尊號曰睿德神略應運啓化承天皇太后；禮畢，羣臣上皇帝尊號曰至德廣孝昭聖天輔皇帝。〔一〕戊戌，詔有司條上勳舊，等第加恩。癸丑，清暑冰井。

六月壬辰朔，三召大臣決庶政。丙申，以耶律蘇爲遙郡刺史。
秋七月戊辰，涅刺部節度使撒葛里有惠政，民請留，從之。是月，獵平地松林。
九月丙戌，幸南京。是冬止焉。

六年春正月庚申，如華林、天柱。

二月丁未，奚王籌寧殺無罪人李浩，所司議貴，請貸其罪，令出錢贍浩家，從之。甲寅，大同軍節度使、同平章政事劉京致仕。

三月己未，三休哥奏宋事宜，上親覽之。丙寅，以司天趙宗德、齊泰、王守平、邵祺、闞梅從征四載，言天象數有徵，賜物有差。癸未，李繼遷遣使來貢。

夏四月乙未，幸南京。丁酉，胡里室橫突韓德讓墮馬，皇太后怒，殺之。戊戌，幸宋國王休哥第。

五月癸亥，南府宰相耶律沙薨。

閏月丙戌朔，奉聖州言太祖所建金鈴閣壞，乞加修繕。詔以南征，恐重勞百姓，待軍還治之。壬寅，阿薩蘭回鶻來貢。甲寅，烏隈于厥部以歲貢貂鼠、青鼠皮非土產，皆於他處貿易以獻，乞改貢。詔自今止進牛馬。

六月癸亥，党項太保阿剌恍來朝，貢方物。乙丑，諭諸道兵馬備南征攻城器具。乙酉，夷離董阿魯勃送沙州節度使曹恭順還，〔四〕授于越。

秋七月丙戌，觀市。己亥，遣南面招討使韓德威討河、湟諸蕃違命者。〔五〕賜休哥、排亞部諸軍戰馬。己酉，駐蹕于洛河。壬子，加韓德威開府儀同三司兼政事令、門下平章事，東京留守兼侍中、漆水郡王耶律抹只爲大同軍節度使。癸丑，排亞請增置涿州驛傳。

八月丙辰，〔六〕以青牛白馬祭天地。戊午，休哥與排亞、裊里曷捉生，將至易州，遇宋兵，殺其指揮使而還。庚申，幸黎園溫湯。癸亥，以將伐宋，遣使祭木葉山。丁丑，瀕海女直遣使速魯里來朝。西北路管押詳穩速撒哥以伐折立、助里二部，上所俘獲。東路林牙蕭勤德及統軍石老以擊敗女直兵，獻俘。大同軍節度使耶律抹只奏今歲霜早乏食，乞增價折粟，以利貧民。詔從之。濱海女直遣廝魯里來修土貢。〔七〕

九月丙申，〔八〕化哥與朮不姑春古里來貢。休哥遣詳穩意德里獻所獲宋諜者。丁酉，皇太后幸韓德讓帳，厚加賞賚，命從臣分朋雙陸以盡歡。戊戌，幸南京。己亥，有事于太宗皇帝廟。以唐元德爲奉陵軍節度使。癸卯，祭旗鼓南伐。庚戌，次涿州，射帛書諭城中降，不聽。

冬十月乙卯，〔九〕縱兵四面攻之，城破乃降，因撫諭其衆。駙馬蕭勤德、太師闡覽皆中

流矢。勤德載帝車中以歸。聞宋軍退，遣斜軫、排亞等追擊，大敗之。戊午，攻沙堆驛，破之。己巳，以黑白羊祭天地。庚午，以宋降軍分置七指揮，號歸聖軍。壬申，行軍參謀、宣政殿學士馬得臣言諭降宋軍，恐終不爲用，請並放還。詔不允。丙子，籌寧奏破狼山捷。辛巳，復奏敗宋兵于益津關。癸未，進軍長城口，宋定州守將李興以兵來拒，休哥擊敗之，追奔五六里。

十一月甲申朔，二〇上以將攻長城口，詔諸軍備攻具。庚寅，駐長城口，督大軍四面進攻。士潰圍，委城遁，二二斜軫招之，不降；上與韓德讓邀擊之，殺獲殆盡，獲者分隸燕軍。辛卯，攻滿城，圍之。甲午，拔其城，軍士開北門遁，上使諭其將領，乃率衆降。戊戌，攻下祁州，縱兵大掠。己亥，拔新樂。庚子，破小狼山砦。丁未，宋軍千人出益津關，國舅郎君桃委、詳穩十哥擊走之，殺副將一人。己酉，休哥獻黃皮室詳穩徇地莫州所獲馬二十四，士卒二十人。命賜降者衣帶，使隸燕京。辛亥，西路又送降卒二百餘人，給寒者裘衣。以馬得臣權宣徽院事。

十二月甲寅朔，賜皮室詳穩乞得、禿骨里戰馬。橫帳郎君達打里劫掠，命杖之。丙辰，畋于沙河。休哥獻奚詳穩耶魯所獲宋諜。丁巳，遣北宰相蕭繼遠等往覘安平。侍衛馬軍司奏攻祁州、新樂，都頭劉贊等三十人有功，乞加恩賞。是月，大軍駐宋境。

是歲，詔開貢舉，放高舉一人及第。（三）

七年春正月癸未朔，班師。戊子，宋雞壁砦守將郭榮率衆來降，詔屯南京。庚寅，次長城口。三卒出營劫掠，笞以徇衆，以所獲物分賜左右。壬辰，李繼遷與兄繼捧有怨，乞與通好，上知其非誠，不許。癸巳，諭諸軍趣易州。己亥，禁部從伐民桑梓。癸卯，攻易州，宋兵出遂城來援，遣鐵林軍擊之，擒其指揮使五人。甲辰，大軍齊進，破易州，降刺史劉墀，守陣士卒南遁，上帥師邀之，無敢出者。卽以馬質爲刺史，趙質爲兵馬都監。遷易州軍民于燕京。以東京騎將夏貞顯之子仙壽先登，授高州刺史。乙巳，幸易州，御五花樓，撫諭士庶。丙午，以青牛白馬祭天地。詔諭三京諸道。戊申，次涑水，（三）謁景宗皇帝廟。詔遣涿州刺史耶律守雄護送易州降人八百，還隸本貫。己酉，次岐溝，射鬼箭。辛亥，還次南京，六軍解嚴。

二月壬子朔，上御元和殿受百官賀。詔雞壁砦民二百戶徙居檀、順、薊三州。甲寅，回鶻、于闐、師子等國來貢。乙卯，大饗軍士，爵賞有差。樞密使韓德讓封楚國王，駙馬都尉蕭寧遠同政事門下平章事。是日，幸長春宮。甲子，詔南征所俘有親屬分隸諸帳者，給官錢贖之，使相從。乙丑，賞南征女直軍，使東還。丙寅，禁舉人匿名飛書，謗訕朝廷。癸酉，

吐蕃、党項來貢。甲戌，雲州租賦請止輸本道，從之。丙子，以女直活骨德爲本部相。分遣巫覡祭名山大川。丁丑，皇子佛寶奴生。戊寅，阿薩蘭、于闐、轄烈並遣使來貢。

三月壬午朔，遣使祭木葉山。禁芻牧傷禾稼。宋進士十七人挈家來歸，命有司考其中第者，補國學官，餘授縣主簿、尉。李繼遷遣使來貢。丁亥，詔知易州趙質收戰亡士卒骸骨，〔一〕築京觀。戊子，賜于越宋國王紅珠筋線，命入內神帳行再生禮，皇太后賜物甚厚。以雞壁砦民成廷朗等八戶隸飛狐。己丑，詔免雲州逋賦。乙室王貫寧擊鞠，爲所部郎君高四縱馬突死，詔訊高四罪。丙申，詔開奇峰路通易州市。戊戌，以王子帳耶律襄之女封義成公主，下嫁李繼遷。〔二〕

是春，駐蹕延芳淀。

夏四月甲寅，還京。乙卯，國舅太師蕭闡覽爲子排亞請尙皇女延壽公主，〔三〕許之。丙辰，謁太宗皇帝廟。以御史大夫烏骨領乙室大王。己未，幸延壽寺飯僧。甲子，諫議大夫馬得臣以上好擊毬，上疏切諫：「臣伏見陛下聽朝之暇，以擊毬爲樂。臣思此事有三不宜：上下分朋，君臣爭勝，君得臣奪，君輸臣喜，一不宜也；往來交錯，前後遮約，爭心競起，禮容全廢，若貪月杖，誤拂天衣，臣旣失儀，君又難責，二不宜也；輕萬乘之貴，逐廣場之娛，地雖平，至爲堅确，馬雖良，亦有驚蹶，或因奔擊，失其控御，聖體寧無虧損？太后豈不驚懼？三

不宜也。臣望陛下念繼承之重，止危險之戲。」疏奏，大嘉納之。丁卯，吐渾還金、回鶻安進、吐蕃獨朶等自宋來歸，皆賜衣帶。皇太后謁奇首可汗廟。丙子，以舍利軍耶律杳爲常袞。己卯，駐蹕儒州龍泉。

五月庚辰朔，^{〔二七〕}遣宣徽使蒲頴等率兵分道備宋。以遙輦副使控骨離爲舍利拽刺詳穩。辛巳，祭風伯于儒州白馬村。休哥引軍至滿城，招降卒七百餘人，遣使來獻，詔隸東京。辛卯，獵桑乾河。壬辰，燕京奏宋兵至邊，時暑未敢與戰，且駐易州，俟彼動則進擊，退則班師。從之。

六月庚戌朔，以太師柘母迎合，擿之二十。辛酉，詔燕樂、密雲二縣荒地許民耕種，^{〔二八〕}免賦役十年。甲戌，宣政殿學士馬得臣卒，詔贈太子少保，賜錢十萬，粟百石。乙亥，詔出諸畜賜邊部貧民。是月，休哥、排亞破宋兵于秦州。^{〔二九〕}

秋七月乙酉，御含涼殿視朝。丙戌，以中丞耶律覈麥哥權夷離畢，橫帳郎君耶律延壽爲御史大夫。癸巳，遣兵南征。甲午，以迪離畢、涅刺、烏濊三部各四人益東北路夫人婆里德，^{〔三〇〕}仍給印綬。丁酉，勞南征將士。是日，帝與皇太后謁景宗皇帝廟。

八月庚午，放進士高正等二人及第。
冬十月，禁置網捕兔。

十一月甲申，于闐張文寶進內丹書。
十二月甲寅，釣魚于沈子灤。癸亥，獵于好草嶺。

校勘記

〔一〕册上皇太后尊號至上皇帝尊號 按本年所上皇太后及聖宗「尊號」與二十四年所上同。考卷七一后妃傳，事在二十四年，五年無此事。疑此係重出。

〔二〕六月壬辰朔 朔字，據朔考補。

〔三〕三月己未 三月二字，原誤在下文「癸未」上。按朔考，二月戊子朔，無己未，丙寅，三月戊午朔，己未初二日。據改。

〔四〕送沙州節度使曹恭順還 恭順，長編、通考作賢順，此避景宗賢名改恭順。羅校，此殆開泰六年事誤繫於此。

〔五〕南面招討使韓德威 卷八二本傳作西南面招討使。

〔六〕八月丙辰 八月二字，原誤在下文「戊午」上。按朔考，八月乙卯朔，丙辰初二日。據改。

〔七〕濱海女直遣廝魯里來修土貢 按此與上文「瀕海女直遣使速魯里來朝」爲一事重出。

〔八〕九月丙申 九月二字，原誤在下文「戊戌」上。按朔考，九月乙酉朔，丙申十二日。據改。

〔九〕冬十月乙卯 冬十月三字，原誤在下文「戊午」上。按朔考，十月甲寅朔，乙卯初二日。據改。

〔一〇〕十一月甲申朔 朔字，據朔考補。

〔一一〕士潰圍委城遁 羅校，士上奪軍字。

〔一二〕放高舉一人及第 「放高舉」三字原缺，據大典五二四九補。

〔一三〕次涑水 涑水原作「漆水」，據地理志四改。

〔一四〕知易州趙質 按上文正月甲辰馬質爲刺史，趙質爲兵馬都監，此趙質應是馬質。

〔一五〕以耶律襄之女封義成公主下嫁李繼遷 按以襄女出嫁事，已見四年十二月。檢卷一一五西夏外記出嫁在本年。或是請婚在四年，七年成行。

〔一六〕蕭闔覽爲子排亞請尙延壽公主 按公主表，排亞作排押，娶長壽公主，延壽公主嫁蕭恒德。延壽應作長壽。參見卷一〇校勘記〔四〕。

〔一七〕五月庚辰朔 五月二字，原誤在下文「辛巳」上；「庚辰」下脫朔字。按朔考，五月庚辰朔。今並補正。

〔一八〕燕樂密雲二縣 按地理志四，檀州，隋開皇十八年以燕樂、密雲二縣置。遼無燕樂縣，此係用舊名。

〔一九〕破宋兵于秦州 按秦州此時已改保州，此用舊稱。類此者不備舉。

〔三〇〕婆里德 按上文統和三年十一月、百官志二並作婆底里。

遼史卷十三

本紀第十三

聖宗四

八年春正月辛巳，如臺湖。庚寅，詔決滯獄。庚子，如沈子灤。

二月丁未朔，于闐、回鶻各遣使來貢。壬申，女直遣使來貢。

三月丁丑，李繼遷遣使來貢。庚辰，太白、熒惑鬪，凡十有五次。乙酉，城杏塢，以宋俘實之。辛丑，置宜州。

夏四月丙午朔，嚴州刺史李壽英有惠政，民請留，從之。庚戌，女直遣使來貢。庚午，以歲旱，諸部艱食，振之。

五月戊子，以宋降卒分隸諸軍。庚寅，女直宰相阿海來貢，封順化王。丙申，清暑胡土白山。詔括民田。

六月丙午，以北面林牙磨魯古爲北院大王。阿薩蘭回鶻于越、達刺干各遣使來貢。甲寅，月掩天駟第一星。丙辰，女直遣使來貢。

秋七月庚辰，改南京熊軍爲神軍。詔東京路諸宮分提轄司，分置定霸、保和、宣化三縣，〔二〕白川州置洪理，儀坤州置廣義，遼西州置長慶，乾州置安德各一縣。〔三〕省遂、媯、松、饒、寧、海、瑞、玉、鐵里、奉德等十州，〔三〕及玉田、遼豐、松山、弘遠、懷清、雲龍、平澤、平山等八縣，以其民分隸他郡。

八月乙卯，以黑白羊祭天地。

九月乙亥，北女直四部請內附。壬辰，李繼遷獻宋俘。

冬十月丙午，以大敗宋軍，復遣使來告。己酉，阻卜等遣使來貢。是月，駐蹕大王川。〔四〕

十一月庚寅，以吐谷渾民饑，振之。丁酉，太白晝見。

十二月癸卯，李繼遷下宋麟、鄜等州，遣使來告。女直遣使來貢。庚戌，遣使封李繼遷爲夏國王。癸丑，回鶻來貢。

是歲，放鄭雲從等二人及第。

九年春正月甲戌，女直遣使來貢。丙子，詔禁私度僧尼。庚辰，如臺湖。乙酉，樞密使、監修國史室昉等進實錄，賜物有差。戊子，選宋降卒五百置爲宣力軍。辛卯，詔免三京諸道租賦，仍罷括田。

二月丙午，夏國遣使告伐宋捷。丁未，以涿州刺史耶律王六爲惕隱。甲子，建威寇、振化、來遠三城，屯戍卒。

閏月辛未朔，日有食之。壬申，遣翰林承旨邢抱朴、三司使李嗣、給事中劉京、政事舍人張幹、南京副留守吳浩分決諸道滯獄。

三月庚子朔，振室韋、烏古諸部。戊申，復遣庫部員外郎馬守琪、倉部員外郎祁正、虞部員外郎崔祐、薊北縣令崔簡等分決諸道滯獄。甲子，幸南京。

夏四月甲戌，回鶻來貢。乙亥，夏國王李繼遷遣杜白來謝封冊。丙戌，清暑炭山。五月己未，以秦王韓匡嗣私城爲全州。

六月丁亥，突厥來貢。是月，南京霖雨傷稼。

秋七月癸卯，通括戶口。乙巳，詔諸道舉才行、察貪酷、撫高年、禁奢僭，有歿於王事者官其子孫。己未，夏國以復綏、銀二州，遣使來告。

八月癸酉，銅州嘉禾生，東京甘露降。戊寅，女直進喚鹿人。壬午，東京進三足鳥。

九月庚子，鼻骨德來貢。己酉，駐蹕廟城。南京地震。

冬十月丁卯，阿薩蘭回鶻來貢。壬申，夏國王李繼遷遣使來上宋所授敕命。丁丑，定難軍節度使李繼捧來附，授推忠効順啓聖定難功臣、開府儀同三司、檢校太師兼侍中，封西平王。

十一月己亥，以青牛白馬祭天地。

十二月，夏國王李繼遷潛附于宋，遣招討使韓德威持詔諭之。是歲，放進士石用中一人及第。

十年春正月丁酉，禁喪葬禮殺馬，及藏甲冑、金銀、器玩。丙午，如臺湖。

二月乙丑朔，日有食之。韓德威奏李繼遷稱故不出，至靈州俘掠以還。壬申，兀惹來貢。壬午，免雲州租賦。庚寅，夏國以韓德威俘掠，遣使來奏，賜詔安慰。辛卯，給復雲州流民。

三月甲辰，鐵驪來貢。丙辰，如炭山。

夏四月乙丑，以臺湖爲望幸里。庚寅，命羣臣較射。

五月癸巳，朔州流民給復三年。

七月辛酉，鐵驪來貢。

八月癸亥，觀稼，仍遣使分閱苗稼。

九月癸卯，幸五臺山金河寺飯僧。

冬十月壬申，夏國王遣使來貢。戊寅，鐵驪來貢。

十一月壬辰，回鶻來貢。

十二月庚辰，獵儒州東川。拜天。是月，以東京留守蕭恒德等伐高麗。

十一年春正月壬寅，回鶻來貢。丙午，出內帑錢賜南京統軍司軍。高麗王治遣朴

良柔奉表請罪，詔取女直鴨綠江東數百里地賜之。

二月癸亥，霸州民妻王氏以妖惑衆，伏誅。

夏四月，幸炭山清暑。

六月，大雨。

秋七月己丑，桑乾、羊河溢居庸關西，害禾稼殆盡，奉聖、南京居民廬舍多墊溺者。

八月，如秋山。

冬十月甲申朔，駐蹕蒲瑰坂。

是年，放進士王熙載等二人及第。〔六〕

十二年春正月癸丑朔，灤陰鎮水，漂溺三十餘村，詔疏舊渠。甲寅，以同政事門下平章事耶律頌老爲惕隱。詔復行在五十里內租。乙卯，幸延芳淀。戊午，蜀宜州賦調。庚申，郎君耶律鼻舍等謀叛，伏誅。壬戌，以南院大王耶律景爲上京留守，封漆水郡王。霸州民李在宥年百三十有三，賜束帛、錦袍、銀帶，月給羊酒，仍復其家。

二月甲申，免南京被水戶租賦。己丑，高麗來貢。甲午，免諸部歲輸羊及關征。庚子，回鶻來貢。

三月丁巳，高麗遣使請所俘人畜，詔贖還。戊午，幸南京。丙寅，遣使撫諭高麗。己巳，涿州木連理。壬申，如長春宮觀牡丹。是月，復置南京統軍都監。

夏四月辛卯，幸南京。壬辰，樞密直學士劉恕爲南院樞密副使。戊戌，以景宗石像成，幸延壽寺飯僧。

五月甲寅，詔北皮室軍老不任事者免役。戊午，如炭山清暑。庚辰，武定軍節度使韓德冲秩滿，其民請留，從之。

六月辛巳朔，詔州縣長吏有才能無過者，減一資考任之。癸未，可汗州刺史賈俊進新

曆。庚子，錄囚。甲辰，詔龍、鳳兩軍老疾者代之。是月，太白、歲星相犯。

秋七月辛亥朔，日有食之。甲寅，遣使視諸道禾稼。辛酉，南院樞密使室昉爲中京留守，加尙父。丙寅，女直遣使來貢。戊辰，觀穫。庚午，詔契丹人犯十惡者依漢律。己卯，以翰林承旨邢抱朴參知政事。

八月庚辰朔，詔皇太妃領西北路烏古等部兵及永興宮分軍，撫定西邊，以蕭撻懶督其軍事。乙酉，宋遣使求和，不許。戊子，以國舅帳剋蕭徒骨爲夷離畢。乙未，下詔戒諭中外官吏。丁酉，錄囚，雜犯死罪以下釋之。

九月壬子，室韋、党項、吐谷渾等來貢。辛酉，宋復遣使求和，不許。壬戌，行拜奧禮。癸酉，阻卜等來貢。

冬十月乙酉，獵可汗州之西山。乙巳，詔定均稅法。丁未，大理寺置少卿及正。

十一月戊申朔，行再生禮。鐵驪來貢。詔諸部所俘宋人有官吏儒生抱器能者，諸道軍有勇健者，具以名聞。庚戌，詔郡邑貢明經、茂材異等。甲寅，詔南京決滯獄。己未，官宋俘衛德升等六人。

十二月戊寅朔，日有食之。詔并奚王府奧理、〔八〕墮隗、梅只三部爲一，其二剋各分爲部，以足六部之數。甲申，賜南京統軍司貧戶耕牛。戊子，高麗進妓樂，却之。庚寅，禁游

食民。癸巳，女直以宋人浮海賂本國及兀惹叛來告。丁未，幸南京。

是年，放進士呂德懋等二人及第。

十三年春正月壬子，幸延芳淀。甲寅，置廣靈縣。丁巳，增泰州、遂城等縣賦。庚申，詔諸道勸農。癸亥，長寧軍節度使蕭解里秩滿，民請留，從之。庚午，如長春宮。

二月丁丑朔，〔五〕女直遣使來貢。甲辰，高麗遣李周楨來貢。

三月癸丑，夏國遣使來貢。戊辰，武清縣百餘人入宋境剽掠，命誅之，還其所獲人畜財物。

夏四月己卯，參知政事邢抱朴以母憂去官，起復。丙戌，詔諸道民戶應曆以來脅從爲部曲者，仍籍州縣。甲午，如炭山清暑。

五月壬子，高麗進鷹。乙亥，北、南、乙室三府請括富民馬以備軍需，不許，給以官馬。

六月丙子朔，啓聖軍節度使劉繼琛秩滿，民請留，從之。丁丑，詔減前歲括田租賦。甲申，以宣徽使阿沒里私城爲豐州。丙戌，詔許昌平、懷柔等縣諸人請業荒地。

秋七月乙巳朔，女直遣使來貢。丁巳，兀惹烏昭度、〔二〇〕渤海燕頗等侵鐵驪，遣奚王和朔奴等討之。壬戌，詔蔚、朔等州龍衛、威勝軍更戍。

八月丙子，夏國遣使進馬。壬辰，詔修山澤祠宇、先哲廟貌，以時祀之。

九月戊午，以南京太學生員浸多，特賜水磴莊一區。丁卯，奉安景宗及皇太后石像于延芳淀。

冬十月乙亥，置義倉。辛巳，回鶻來貢。甲申，高麗遣李知白來貢。戊子，兀惹歸款，詔諭之。庚子，鼻骨德來貢。

十一月乙巳，阿薩蘭回鶻遣使來貢。辛酉，遣使冊王治爲高麗國王。戊辰，高麗遣童子十人來學本國語。

十二月己卯，鐵驪遣使來貢鷹、馬。辛巳，夏國以敗宋人遣使來告。是年，放進士王用極等二人。

十四年春正月己酉，漁于潞河。丁巳，蠲三京及諸州稅賦。丙寅，夏國遣使來貢。庚午，以宣徽使阿沒里家奴閻貴爲豐州刺史。

二月庚寅，回鶻遣使來貢。

三月壬寅，高麗王治表乞爲婚，許以東京留守、駙馬蕭恒德女嫁之。庚戌，高麗復遣童子十人來學本國語。甲寅，韓德威奏討党項捷。甲子，詔安集朔州流民。

夏四月甲戌，東邊諸紮各置都監。（三）庚寅，如炭山清暑。己亥，鑿大安山，取劉守光所藏錢。（三）是月，奚王和朔奴、東京留守蕭恒德等五人以討兀惹不克，削官。改諸部令穩爲節度使。

五月癸卯，詔參知政事邢抱朴決南京滯獄。庚戌，朔州威勝軍一百七人叛入宋。

六月辛未，如炭山清暑。鐵驪來貢。乙酉，回鶻來貢。己丑，高麗遣使來問起居。後至無時。

秋七月戊午，回鶻等來貢。

閏月丁丑，五院部進穴地所得金馬。

冬十月丙辰，命劉遂教南京神武軍士劍法，賜袍帶錦幣。戊午，烏昭度乞內附。

十一月甲戌，詔諸軍官毋非時畋獵妨農。乙酉，奉安景宗及太后石像于乾州。是月，回鶻阿薩蘭遣使爲子求婚，不許。

十二月甲寅，以南京道新定稅法太重，減之。甲子，撻凜誘叛酋阿魯敦等六十人斬之，封蘭陵郡王。幸南京。

是年，放進士張儉等三人。

十五年春正月庚午，幸延芳淀。丙子，以河西党項叛，詔韓德威討之。庚辰，詔諸道勸民種樹。癸未，兀惹長武周來降。戊子，女直遣使來貢。己丑，詔南京決滯囚。乙未，免流民稅。

二月丙申朔，如長春宮。戊戌，勸品部富民出錢以贍貧民。庚子，徙梁門、遂城、泰州、北平民於內地。丙午，夏國遣使來貢。甲寅，問安皇太后。丙辰，韓德威奏破党項捷。丁巳，詔品部曠地令民耕種。

三月乙丑朔，党項來貢。戊辰，募民耕灤州荒地，免其租賦十年。己巳，夏國破宋兵，遣使來告。己卯，封夏國王李繼遷爲西平王。壬午，通括宮分人戶，免南京逋稅及義倉粟。甲申，河西党項乞內附。庚寅，兀惹烏昭度以地遠，乞歲時免進鷹、馬、貂皮，詔以生辰、正旦貢如舊，餘免。癸巳，宋主昞殂，子恒嗣位。甲午，皇太妃獻西邊捷。

夏四月乙未朔，罷奚五部歲貢麇。戊戌，錄囚。壬寅，發義倉粟振南京諸縣民。丙午，廣德軍節度使韓德凝有善政，秩滿，其民請留，從之。己酉，幸南京。丁巳，致奠于太宗皇帝廟。己未，如炭山清暑。

五月甲子朔，日有食之。己巳，詔平州決滯獄。是月，敵烈八部殺詳穩以叛，蕭撻凜追擊，獲部族之半。

六月丙申，鐵驪來貢。壬子，夏國遣使來謝封冊。

秋七月戊辰，党項來貢。辛未，禁吐谷渾別部鬻馬於宋。丙子，高麗遣韓彥敬奉幣弔越國公主之喪。辛卯，詔南京疾決獄訟。

八月丁酉，獵于平地松林，皇太后誡曰：「前聖有言：欲不可縱。吾兒爲天下主，馳騁田獵，萬一有銜橛之變，適遺予憂。其深戒之！」

九月丙寅，罷東邊戍卒。庚午，幸饒州，致奠太祖廟。戊子，蕭撻凜奏討阻卜捷。

冬十月壬辰朔，駐蹕駝山，罷奚王諸部貢物。乙未，賜宿衛時服。丁酉，禁諸山寺毋濫度僧尼。戊戌，弛東京道魚鰲之禁。戊申，以上京獄訟繁冗，詰其主者。辛酉，錄囚。

十一月壬戌朔，錄囚。丙戌，幸顯州。戊子，謁顯陵。庚寅，謁乾陵。是月，高麗王治薨，姪誦遣王同穎來告。

十二月乙巳，鈎魚土河。己酉，駐蹕駝山。壬子，夏國遣使來貢。甲寅，遣使祭高麗王治，詔其姪權知國事。丙辰，錄囚。

是年，放進士陳鼎等二人。

校勘記

〔一〕分置定霸保和宣化三縣。分置，原誤「置分」。據大典五二四九改。

〔二〕白川州置洪理至乾州置安德各一縣。按地理志三洪理作弘理，地理志二乾州無安德縣。

〔三〕省遂嬌松饒寧海瑞玉鐵里奉德等十州。地理志二鐵里作鐵利。松卽地理志三之松山州。

〔四〕大王川。川，原誤「州」。據遊幸表及大典五二四九改。

〔五〕春正月。正，原誤「三」。據遊幸表及大典五二四九改。

〔六〕是年放進士王熙載等。年，原誤「時」。據大典五二四九改。

〔七〕詔皇太妃至撫定西邊。陳漢章遼史索隱（以下稱索隱）謂「皇太妃」當作王太妃。長編，「景宗后姊爲齊王褰撒葛妃，王死，稱齊妃，領兵屯西鄙驢胸兒河，西捍達靼。後謀奔骨歷札國，結兵以篡。」卽此人。骨歷札卽卷九二蕭奪刺傳之北阻卜耶覲刮。

〔八〕奧理。營衛志下、百官志二並作奧里。

〔九〕二月丁丑朔。朔字，據朔考補。

〔一〇〕兀惹烏昭度。下文十七年六月、二十二年九月及屬國表並作烏昭慶。

〔一一〕置義倉。按食貨志上：「統和十三年詔諸道置義倉。」

〔一二〕東邊諸糺。糺字，本史所見並同。金史屢見，俱作糺。應從金史。

〔一三〕劉守光所藏錢。畢沅續資治通鑑作劉仁恭所藏錢。拾遺亦稱大安山藏錢，唐書、御覽俱作劉仁

恭事。非劉守光。

遼史卷十四

本紀第十四

聖宗五

十六年春正月乙丑，如長瀝。

二月庚子，夏國遣使來貢。丙午，以監門衛上將軍耶律喜羅爲中臺省左相。

三月甲子，女直遣使來貢。乙亥，鼻骨德會長來貢。

夏四月癸卯，振崇德宮所隸州縣民之被水者。丁未，罷民輸官俸，給自內帑。己酉，祈雨。乙卯，如木葉山。

五月甲子，祭白馬神。丁卯，祠木葉山，告來歲南伐。庚辰，鐵驪來貢。乙酉，還上京。婦人年踰九十者賜物。

六月戊子朔，致奠於祖、懷二陵。是月，清暑炭山。

秋七月丁巳朔，錄囚，聽政。

八月丁亥朔，東幸。

九月丁巳朔，駐蹕得勝口。

冬十一月，遣使册高麗國王誦。

十二月丙戌朔，〔二〕宋國王休哥薨，輟朝五日。進封皇弟恒王隆慶爲梁國王、南京留

守，鄭王隆祐爲吳國王。

是年，放進士楊又玄等二人。〔三〕

十七年春正月乙卯朔，如長春宮。

夏四月，如炭山清暑。

六月，兀惹烏昭慶來。

秋七月，以伐宋詔諭諸道。

九月庚辰朔，幸南京。己亥，南伐。癸卯，射鬼箭。北院樞密使魏王耶律斜軫薨，以韓德讓兼知北院樞密使事。

冬十月癸酉，攻遂城，不克。遣蕭繼遠攻狼山鎮石砦，破之。次瀛州，與宋軍戰，擒其

將康昭裔、宋順，獲兵仗、器甲無算。進攻樂壽縣，拔之。次遂城，敵衆臨水以拒，縱騎兵突之，殺戮殆盡。

是年，放進士初錫等四人及第。

十八年春正月，還次南京，賞有功將士，罰不用命者。詔諸軍各還本道。

二月，幸延芳淀。

夏四月己未，駐蹕于清泉淀。

五月丁酉，清暑炭山。

六月，阻卜叛，酋鶻碾之弟鐵刺不率部衆來附，鶻碾無所歸，遂降，詔誅之。秋七月，駐蹕于湯泉。

九月乙亥朔，駐蹕黑河。

冬十一月甲戌朔，授西平王李繼遷子德昭朔方軍節度使。〔三〕

十二月，回鶻來貢。

是年，放進士南承保等三人及第。

十九年春正月辛巳，以祇候郎君班詳穩觀音爲奚六部大王。甲申，回鶻進梵僧名醫。三月乙亥，夏國遣李文貴來貢。乙酉，西南面招討司奏党項捷。壬辰，皇后蕭氏以罪降爲貴妃。賜大丞相韓德讓名德昌。

夏四月乙巳，幸吳國王隆祐第視疾。丙午，問安皇太后。

五月癸酉，清暑炭山。丙戌，冊蕭氏爲齊天皇后。庚寅，以千拽刺詳穩耶律王奴爲乙室大王。辛卯，以青牛白馬祭天地。

六月乙巳，以所俘宋將康昭裔爲昭順軍節度使。戊午，夏國奏下宋恒、環、慶等三州，賜詔褒之。

秋七月丙戌，以東京統軍使耶律奴瓜爲南府宰相。

八月庚戌，達盧骨部來貢。

九月己巳朔，問安皇太后。戊子，駐蹕昌平。庚寅，西南面招討司奏討吐谷渾捷。辛卯，幸南京。

冬十月己亥，南伐。壬寅，次鹽溝。徙封吳國王隆祐爲楚國王，留守京師。丁未，梁國王隆慶統先鋒軍以進。辛亥，射鬼箭。壬子，以青牛白馬祭天地。甲寅，遼軍與宋兵戰于遂城，敗之。庚申，以黑白羊祭天地。丙寅，次滿城，以泥淖班師。

十一月庚午，射鬼箭。丙子，宋兵出淤口、益津關來侵，偵候謀洼、虞人招古擊敗之。己卯，觀漁儒門灤。

閏月己酉，鼻骨德來貢。己未，減關市稅。

十二月庚辰，免南京、平州租稅。

二十年春正月庚子，如延芳淀。癸丑，東方五色虹見。詔安撫西南面向化諸部。甲寅，夏國遣使貢馬、駝。辛酉，女直宰相夷離底來貢。

二月丁丑，女直遣其子來朝。高麗遣使賀伐宋捷。

三月甲寅，遣北府宰相蕭繼遠等南伐。壬戌，駐蹕鴛鴦灤。

夏四月丙寅朔，文班太保達里底敗宋兵于梁門。甲戌，南京統軍使蕭撻凜破宋軍於秦州。乙酉，南征將校獻俘，賜爵賞有差。戊子，鐵驪遣使來貢。

五月乙卯，幸炭山清暑。

六月，夏國遣劉仁勗來告下靈州。

秋七月甲午朔，日有食之。丁酉，以邢抱朴爲南院樞密使。辛丑，高麗遣使來貢本國

地理圖。

九月癸巳朔，謁顯陵，告南伐捷。

冬十月癸亥朔，至自顯陵。

十二月，奚王府五帳六節度獻七金山土河川地，賜金幣。

是歲，南京、平州麥秀兩岐。放進士邢祥等六人及第。

二十一年春正月，如鴛鴦灤。

三月壬辰，詔修日曆官毋書細事。甲午，朝皇太后。戊午，鐵驪來貢。

夏四月乙丑，女直遣使來貢。戊辰，兀惹、渤海、奧里米、越里篤、越里吉等五部遣使來貢。〔四〕是月，耶律奴瓜、蕭撻凜獲宋將王繼忠于望都。

五月庚寅朔，清暑炭山。丁巳，西平王李繼遷薨，其子德昭遣使來告。

六月己卯，贈繼遷尙書令，遣西上閣門使丁振弔慰。辛巳，党項來貢。乙酉，阻卜鐵刺里率諸部來降。是月，修可敦城。〔五〕

秋七月庚戌，阻卜、烏古來貢。甲寅，以奚王府監軍耶律室魯爲南院大王。〔六〕

八月乙酉，阻卜鐵刺里來朝。丙戌，朝皇太后。

九月己亥，夏國李德昭遣使來謝弔贈。癸丑，幸女河湯泉，改其名曰松林。

冬十月丁巳朔，〔三〕駐蹕七渡河。戊辰，以楚國王隆祐爲西南面招討使。

十一月壬辰，故于越耶律休哥之子道士奴、高九等謀叛，伏誅。丙申，通括南院部民。十二月癸未，罷三京諸道貢。

二十二年春正月丁亥，如鴛鴦灤。

二月乙卯朔，女直遣使來貢。丙寅，南院樞密使邢抱朴薨，輟朝三日。

三月己丑，罷番部賀千齡節及冬至、重五貢。乙未，西夏李德昭遣使上繼遷遺物。

夏四月丁卯，朝皇太后。

五月，清暑炭山。

六月戊午，〔三〕以可敦城爲鎮州，軍曰建安。

秋七月甲申，遣使封夏國李德昭爲西平王。丁亥，兀惹、蒲奴里、剖阿里、越里篤、奧里

米等部來貢。

八月丙辰，党項來貢。庚申，阻卜酋鐵刺里來朝。戊辰，鐵刺里求婚，不許。〔三〕丙子，駐蹕犬牙山。

九月己丑，以南伐諭高麗。丙午，幸南京。女直遣使獻所獲烏昭慶妻子。丁未，致祭

于太宗皇帝廟。以北院大王磨魯古、太尉老君奴監北、南王府兵。庚戌，命楚國王隆祐留守京師。

閏月己未，南伐。癸亥，次固安。以所獲諜者射鬼箭。甲子，以青牛白馬祭天地。丙寅，遼師與宋兵戰于唐興，大破之。丁卯，蕭撻凜與宋軍戰于遂城，敗之。庚午，軍于望都。冬十月乙酉，以黑白羊祭天地。丙戌，攻瀛州，不克。甲午，下祁州，賚降兵。以酒脯祭天地。己酉，西平王李德昭遣使謝封冊。

十一月癸亥，馬軍都指揮使耶律課里遇宋兵于洺州，擊退之。甲子，東京留守蕭排押獲宋魏府官吏田逢吉、郭守榮、常顯、劉綽等以獻。丁卯，南院大王善補奏宋遣人遺王繼忠弓矢，密請求和。詔繼忠與使會，許和。庚午，攻破德清軍。壬申，次澶淵。蕭撻凜中伏弩死。乙亥，攻破通利軍。丁丑，宋遣崇儀副使曹利用請和，卽遣飛龍使韓杞持書報聘。〔九〕

十二月庚辰朔，日有食之，旣。癸未，宋復遣曹利用來，以無還地之意，遣監門衛大將軍姚柬之持書往報。〔一〇〕戊子，宋遣李繼昌請和，以太后爲叔母，願歲輸銀十萬兩，絹二十萬匹。許之，卽遣閤門使丁振持書報聘。己丑，詔諸軍解嚴。是月，班師。皇太后賜大丞相齊王韓德昌姓耶律，徙王晉。

是年，放進士李可封等三人。

二十三年春正月戊午，還次南京。庚申，大饗將卒，爵賞有差。

二月丙戌，復置權場於振武軍。丁巳，夏國遣使告下宋青城。辛酉，朝皇太后。以惕隱化哥爲南院大王，行軍都監老君奴爲惕隱。乙丑，振党項部。丁卯，回鶻來貢。丁丑，改易州飛狐招安使爲安撫使。

夏四月丙戌，女直及阿薩蘭回鶻各遣使來貢。乙未，鐵驪來貢。己亥，党項來侵。

五月戊申朔，宋遣孫僅等來賀皇太后生辰。乙卯，以金帛賜陣亡將士家。丙寅，高麗以與宋和，遣使來賀。

六月壬辰，清暑炭山。甲午，阻卜酋鐵刺里遣使賀與宋和。己亥，達旦國九部遣使來聘。

秋七月癸丑，問安皇太后。戊午，党項來貢。辛酉，以青牛白馬祭天地。壬戌，烏古來貢。丁卯，女直遣使來貢。阿薩蘭回鶻遣使來請先留使者，皆遣之。

九月甲戌，遣太尉阿里、太傅楊六賀宋主生辰。

冬十月丙子朔，鼻骨德來貢。戊子，朝皇太后。甲午，駐蹕七渡河。癸卯，宋歲幣始至，後爲常。

十一月戊申，上遣太保合住、頡給使韓椅，太后遣太師益奴、政事舍人高正使宋賀正旦。辛亥，觀漁桑乾河。丁巳，詔大丞相耶律德昌出宮籍，屬于橫帳。

十二月丙申，宋遣周漸等來賀千齡節。丁酉，復遣張若谷等來賀正旦。

二十四年春正月，如鴛鴦澤。

夏五月壬寅朔，幸炭山清暑。幽皇太妃胡輦于懷州，囚夫人夷懶于南京，餘黨皆生瘞之。

秋七月辛丑朔，南幸。

八月丙戌，改南京宮宣教門爲元和，外三門爲南端，左掖門爲萬春，右掖門爲千秋。是月，沙州燉煌王曹壽遣使進大食國馬及美玉，以對衣、銀器等物賜之。

九月，幸南京。

冬十月庚午朔，帝率羣臣上皇太后尊號曰睿德神略應運啓化承天皇太后，羣臣上皇帝尊號曰至德廣孝昭聖天輔皇帝。大赦。

是年，放進士楊佶等二十三人及第。

二十五年春正月，建中京。

二月，如鴛鴦灤。

夏四月，清暑炭山。

六月，賜皇太妃胡輦死于幽所。

秋七月壬申，西平王李德昭母薨，遣使弔祭。甲戌，遣使起復。

九月，西北路招討使蕭圖玉討阻卜，破之。

冬十月丙申，駐蹕中京。

十二月己酉，振饒州饑民。

二十六年春二月，如長灤。

夏四月辛卯朔，祠木葉山。

五月庚申朔，還上京。丙寅，高麗進龍鬚草席。己巳，遣使賀中京成。庚午，致祭祖、

懷二陵。辛未，駐蹕懷州。

秋七月，增太祖、太宗、讓國皇帝、世宗諡，仍諡皇太弟李胡曰欽順皇帝。〔二四〕
冬十月戊子朔，幸中京。

十二月，蕭圖玉奏討甘州回鶻，降其王耶刺里，撫慰而還。
是年，放進士史克忠等一十三人。

二十七年春正月，釣魚土河。獵于瑞鹿原。

夏四月丙戌朔，駐蹕中京，營建宮室。庚戌，廢霸州處置司。

秋七月甲寅朔，霖雨，潢、土、幹刺、陰涼四河皆溢，漂沒民舍。

八月甲申，北幸。

冬十一月壬子朔，行柴冊禮。

十二月乙酉，南幸。皇太后不豫。戊子，肆赦。辛卯，皇太后崩于行宮。壬辰，遣使報
哀于宋、夏、高麗。戊申，如中京。己酉，詔免賀千齡節。

是歲，御前引試劉二宜等三人。

校勘記

〔一〕十二月丙戌朔 朔字，據朔考補。

〔二〕楊又玄 又玄，原作「又立」，大典五二四九同。紀開泰七年十一月作「人玄」，殿本作又玄。太平

二年十月，百、殿兩本並作又玄。核其事蹟，確是一人。按道德經「玄之又玄」，似爲取名所本，據改。下同。

〔三〕李繼遷子德昭 德昭，宋史夏國傳作德明。此避穆宗明名改。西夏外記作德明，應屬漏改或後人回改者。

〔四〕越里吉 吉，原作「古」。按屬國表作越里吉，紀重熙六年八月作越棘，知「古」是吉之訛，據改。

〔五〕耶律室魯爲南院大王 卷八一本傳作北院大王，下文二十九年三月亦稱室魯爲北院大王，「南」字疑誤。

〔六〕冬十月丁巳朔 朔字，據朔考補。

〔七〕六月戊午 午，原誤「子」。南、北、殿各本同，惟大典五二四九作戊午。按本年六月甲寅朔，戊午初五日，月內無戊子。據改。

〔八〕鐵刺里求婚不許 按屬國表作「鐵刺里求婚，許之」。

〔九〕飛龍使韓杞 按長編作左飛龍使韓杞。

〔一〇〕監門衛大將軍姚柬之 監門衛大將軍，長編作右監門衛大將軍。柬，原作「東」，據長編改。

〔一一〕頒給使韓椅 椅，原誤「簡」，據遼文匯六韓椅墓誌改。

〔一二〕幽皇太妃胡輦于懷州 按「皇太妃」應作王太妃，參卷一三校勘記〔七〕。

- 〔二二〕 沙州燉煌王曹壽 宋史四九〇、通考三三五並作曹宗壽。 此避興宗宗真名，省宗字。
- 〔二四〕 諡皇太弟李胡曰欽順皇帝 按欽順當作恭順，陳大任避金章宗父允恭名改。

遼史卷十五

本紀第十五

聖宗六

二十八年春正月辛亥朔，不受賀。甲寅，如乾陵。癸酉，奉安大行皇太后梓宮于乾州 敢塗殿。

二月丙戌，宋遣王隨、王儒等來弔祭。己亥，高麗遣魏守愚等來祭。是月，遣左龍虎衛上將軍蕭合卓饋大行皇太后遺物于宋，仍遣臨海軍節度使蕭虛列、左領軍衛上將軍張崇濟謝宋弔祭。

三月癸卯，上大行皇太后諡爲聖神宣獻皇后。是月，宋、高麗遣使來會葬。

夏四月甲子，葬太后於乾陵。賜大丞相耶律德昌名曰隆運。庚午，賜宅及陪葬地。

五月己卯朔，如中京。辛卯，清暑七金山。乙巳，西北路招討使蕭圖玉奏伐甘州回鶻，

破肅州，盡俘其民。詔修土隗口故城以實之。丙午，高麗西京留守康肇弑其主誦，擅立誦從兄詢，詔諸道繕甲兵，以備東征。

秋八月戊申，振平州饑民。辛亥，幸中京。丙寅，謁顯乾二陵。丁卯，自將伐高麗，遣使報宋。以皇弟楚國王隆祐留守京師，北府宰相、駙馬都尉蕭排押爲都統，北面林牙僧奴爲都監。

九月乙酉，遣使冊西平王李德昭爲夏國王。辛卯，遣樞密直學士高正、引進使韓杞宣問高麗王詢。

冬十月丙午朔，女直進良馬萬匹，乞從征高麗，許之。王詢遣使奉表乞罷師，不許。

十一月乙酉，大軍渡鴨綠江，康肇拒戰，敗之，退保銅州。丙戌，肇復出，右皮室詳穩耶律敵魯擒肇及副將李立，追殺數十里，獲所棄糧餉、鎧仗。戊子，銅、霍、貴、寧等州皆降。排押至奴古達嶺，遇敵兵，戰敗之。辛卯，王詢遣使上表請朝，許之。禁軍士俘掠。以政事舍人馬保佑爲開京留守，安州團練使王八爲副留守。遣太子太師乙凜將騎兵一千，送保佑等赴京。壬辰，守將卓思正殺遼使者韓喜孫等十人，領兵出拒，保佑等還。遣乙凜領兵擊之，思正遂奔西京。圍之五日不克，駐蹕城西。高麗禮部郎中渤海陀失來降。庚子，遣排押、益奴等攻開京，遇高麗兵，敗之。王詢棄城遁去，遂焚開京，至清江，還。

二十九年春正月乙亥朔，班師，所降諸城復叛。至貴州南峻嶺谷，大雨連日，馬駝皆疲，甲仗多遺棄，霽乃得渡。己丑，次鴨淥江。庚寅，皇后及皇弟楚國王隆祐迎于來遠城。壬辰，詔罷諸軍。己亥，次東京。

二月己酉，謁乾、顯二陵。戊午，所俘高麗人分置諸陵廟，餘賜內戚、大臣。

三月己卯，大丞相晉國王耶律隆運薨。庚辰，皇弟楚國王隆祐權知北院樞密使事，樞密直學士高正爲北院樞密副使。庚寅，南京、平州水，振之。己亥，以北院大王耶律室魯爲北院樞密使，封韓王，北院郎君耶律世良爲北院大王，前三司使劉慎行參知政事兼知南院樞密使事。

夏四月，清暑老古塌。

五月甲戌朔，詔已奏之事送所司附日曆。又詔帳族有罪，黥墨依諸部人例。乙未，以劉慎行爲南院樞密使，南府宰相邢抱質知南院樞密使事。

六月庚戌，升蔚州、利州爲觀察使。乙卯，韓王耶律室魯薨。丙辰，以南院大王化哥爲北院樞密使。丁巳，詔西北路招討使、駙馬都尉蕭圖王安撫西鄙。置阻卜諸部節度使。

是秋，獵于平地松林。

冬十月庚子朔，〔四〕駐蹕廣平淀。甲寅，贈大丞相晉國王耶律隆運尙書令，諡文忠。十一月庚午朔，幸顯州。

十二月庚子朔，〔五〕復如廣平淀。癸丑，以知南院樞密使事邢抱質年老，詔乘小車入朝。是月，置歸、寧二州。

是年，御試，放高承顏等二人及第。

開泰元年春正月己巳朔，宋遣趙湘、符成翰來賀。〔六〕癸未，長白山三十部女直酋長來貢，乞授爵秩。甲申，駐蹕王子院。丙戌，望祠木葉山。丁亥，女直太保蒲撚等來朝。戊子，獵于買曷魯林。〔七〕庚寅，祠木葉山。辛卯，曷蘇館大王曷里喜來朝。

二月壬子，駐蹕瑞鹿原。

三月甲戌，以蔚州爲觀察，不隸武定軍。乙亥，如葦深。丁丑，詔封皇女八人爲郡主。乙酉，詔卜日行拜山、大射柳之禮，命北宰相、駙馬、蘭陵郡王蕭寧，樞密使、司空邢抱質督有司具儀物。丁亥，皇弟楚國王隆祐徙封齊國王，留守東京。

夏四月庚子，高麗遣蔡忠順來，乞稱臣如舊，詔王詢親朝。壬寅，夏國遣使進良馬。己酉，祀風伯。辛酉，以前孟父房敝穩蕭佛奴爲左夷離畢。

五月戊辰朔，還上京。詔裴玄感、邢祥知禮部貢舉，放進士史簡等十九人及第。以駙馬蕭紹宗爲鄭州防禦使。乙亥，以邢抱質爲大同軍節度使。

六月，駐蹕上京。

秋七月丙子，以耶律遂貞爲遼興軍節度使，遂正北院宣徽使，張昭瑩南院宣徽使，耶律受益上京副留守，寇卿彰德軍節度使。命耶律釋身奴、李操充賀宋生辰國信使副，蕭涅衰、齊泰賀宋正旦使副。進士康文昭、張素臣、郎玄達坐論知貢舉裴玄感、邢祥私曲，祕書省正字李萬上書，辭涉怨訕，皆杖而徒之，萬役陷河治。

八月丙申朔，〔八〕鐵驪那沙等送兀惹百餘戶至賓州，賜絲絹。是日，那沙乞賜佛像、儒書，詔賜護國仁王佛像一，〔易、詩、書、春秋、禮記各一部。〕己未，高麗王詢遣田拱之奉表稱病不能朝，詔復取六州地。是月，齊國王隆祐薨，輟朝五日。

冬十月辛亥，如中京。

閏月丁卯，贈隆祐守太師，諡仁孝。

十一月甲午朔，〔九〕文武百官加上尊號曰弘文宣武尊道至德崇仁廣孝聰睿昭聖神贊天輔皇帝。大赦，改元開泰。改幽都府爲析津府，薊北縣爲析津縣，幽都縣爲宛平縣，覃恩中外。己亥，賜夏國使、東頭供奉官曹文斌、呂文貴、竇珪祐、守榮、武元正等爵有差。癸卯，

前遼州錄事張庭美六世同居，儀坤州劉興胤四世同居，各給復三年。甲辰，西北招討使蕭圖玉奏七部太師阿里底因其部民之怨，殺本部節度使霸暗并屠其家以叛，阻卜執阿里底以獻，而沿邊諸部皆叛。

十二月丙寅，奉遷南京諸帝石像于中京觀德殿，景宗及宣獻皇后于上京五鸞殿。壬申，振奉聖州饑民。庚辰，賜皇弟秦晉國王隆慶鐵券。癸未，劉晨言殿中高可垣、中京留守推官李可舉治獄明允，詔超遷之。甲申，詔諸道水災饑民質男女者，起來年正月，日計傭錢十文，價折傭盡，遣還其家。歸州言其居民本新羅所遷，未習文字，請設學以教之，詔允所請。貴德、龍化、儀坤、雙、遼、同、祖七州，至是有詔始征商。己丑，詔諸鎮建宣敕樓。

二年春正月癸巳朔，以裴玄感爲翰林承旨，邢祥給事中，石用中翰林學士，呂德推樞密直學士，張儉政事舍人，邢抱質加開府儀同三司、守司空兼侍中，王繼忠中京留守、檢校太師，戶部侍郎劉涇加工部尙書，駙馬蕭紹宗加檢校太師，耶律控溫加政事令，封幽王。丁未，如瑞鹿原。北院樞密使耶律化哥封幽王。以馬氏爲麗儀，耿氏淑儀，尙寢白氏昭儀，尙服李氏順儀，尙功艾氏芳儀，尙儀孫氏和儀。己未，錄囚。烏古、敵烈叛，右皮室詳穩延壽率兵討之。是月，達旦國兵圍鎮州，州軍堅守，尋引去。

二月丙子，詔以麥務川爲象雷縣，女河川爲神水縣，羅家軍爲閭山縣，山子川爲富庶縣，習家砦爲龍山縣，阿覽峪爲勸農縣，松山川爲松山縣，金甸子爲金原縣。〔二〕壬午，遣北院樞密副使高正按察諸道獄。

三月壬辰朔，化哥以西北路略平，留兵戍鎮州，赴行在。

夏四月甲子，拜日。詔從上京請，以韓斌所括贍國、撻魯河、奉、豪等州戶二萬五千四百有奇，置長霸、興仁、保和等十縣。丙子，如緬山。

五月辛卯朔，復命化哥等西討。

六月辛酉朔，遣中丞耶律資忠使高麗，取六州舊地。

秋七月壬辰，烏古、敵烈皆復故疆。乙未，西南招討使、政事令斜軫奏，党項諸部叛者皆遁黃河北模赧山，其不叛者曷黨、烏迷兩部因據其地，今復西遷，詰之則曰逐水草。不早圖之，後恐爲患。又聞前後叛者多投西夏，西夏不納。詔遣使再問西遷之意，若歸故地，則可就加撫諭。使不報，上怒，欲伐之。遂詔李德昭：「今党項叛，我欲西伐，爾當東擊，毋失犄角之勢。」仍命諸軍各市肥馬。丁酉，以惕隱耶律滌冽爲南府宰相，太尉五哥爲惕隱。〔三〕癸卯，鈎魚曲溝。戊申，詔以敦睦宮子錢振貧民。己酉，化哥等破阻卜酋長烏八之衆。丁卯，封皇子宗訓大內惕隱。

八月壬戌，遣引進使李延弘賜夏國王李德昭及義成公主車馬。己丑，耶律資忠使高麗還。

冬十月己未朔，敗廐井之北。命耶律阿營等使宋賀生辰。辛酉，駐蹕長樂。丙寅，詳穩張馬留獻女直人知高麗事者。上問之，曰：「臣三年前爲高麗所虜，爲郎官，故知之。自開京東馬行七日，有大砦，廣如開京，旁州所貢珍異，皆積于此。勝、羅等州之南，亦有二大砦，所積如之。若大軍行由前路，取曷蘇館女直北，直渡鴨綠江，並大河而上，至郭州與大路會，高麗可取而有也。」上納之。

十一月甲午，錄囚。癸丑，樞密使幽王化哥以西征有罪，削其官封，出爲大同軍節度使。

十二月甲子，以北院大王耶律世良爲北院樞密使，封岐王。以宰臣劉晟監修國史，牛璘爲彰國軍節度使，蕭孝穆爲西北路招討使。

放進士鮮于茂昭等六人及第。

三年春正月己丑，錄囚。阻卜會長烏八來朝，封爲王。乙未，如渾河。丁酉，女直及鐵驪各遣使來貢。是夕，彗星見西方。丙午，敗潢河濱。壬子，帝及皇后獵瑞鹿原。

二月戊午，詔增樞密使以下月俸。甲子，遣上京副留守耶律資忠復使高麗取六州舊地。

三月庚子，遣耶律世良城招州。戊申，南京、奉聖、平、蔚、雲、應、朔等州置轉運使。

夏四月戊午，詔南京管內毋淹刑獄，以妨農務。癸亥，烏古叛。乙亥，沙州回鶻曹順遣使來貢。丙子，以西北路招討都監蕭孝穆爲北府宰相。

五月乙酉朔，清暑緬山。

六月乙亥，合拔里、乙室二國舅爲一帳，以乙室夷離畢蕭敵烈爲詳穩以總之。甲申，封皇姪胡都古爲廣平郡王。

是夏，詔國舅詳穩蕭敵烈、東京留守耶律團石等討高麗，造浮梁于鴨淥江，城保、宣義、定遠等州。（二四）

秋七月乙酉朔，如平地松林。壬辰，詔政事省、樞密院，酒間授官釋罪，毋卽奉行，明日覆奏。

八月甲寅朔，幸沙嶺。

九月丁酉，八部敵烈殺其詳穩稍瓦，皆叛，詔南府宰相耶律吾刺葛招撫之。辛亥，釋敵烈數人，令招諭其衆。壬子，耶律世良遣使獻敵烈俘。

冬十月甲寅朔，幸中京。丙子，以旗鼓拽刺詳穩題里姑爲奚六部大王。〔二五〕
放進士張用行等三十一人及第出身。

四年春正月乙酉，如瑞鹿原。丙戌，詔耶律世良再伐迪烈得。戊子，命詳穩拔姑瀦水
瑞鹿原，〔二六〕以備春蒐。丁酉，獵馬蘭淀。壬寅，東征。東京留守善寧、平章涅里袞奏，已總
大軍及女直諸部兵分道進討，遂遣使齎密詔軍前。

二月壬子朔，如薩堤灤。于闐國來貢。

夏四月癸丑，以林牙建福爲北院大王。甲寅，蕭敵烈等伐高麗還。丙辰，曷蘇館部請
括女直王殊只你戶舊無籍者，會其丁入賦役，從之。樞密使貫寧奏大破八部迪烈得，詔侍
御撒刺獎諭，代行執手之禮。丙寅，耶律世良等上破阻卜俘獲數。戊辰，駐蹕沿柳湖。己
巳，女直遣使來貢。壬申，耶律世良討烏古，破之。甲戌，遣使賞有功將校。世良討迪烈得
至清泥塌。時于厥旣平，朝廷議內徙其衆，于厥安土重遷，遂叛。世良懲創，旣破迪烈得，
輒殲其丁壯。勒兵渡曷刺河，進擊餘黨，斥候不謹，其將勃括聚兵稠林中，擊遼軍不備。遼
軍小却，結陣河曲。勃括是夜來襲。翌日，遼後軍至，勃括誘于厥之衆皆遁，世良追之，軍至
險阨。勃括方阻險少休，遼軍偵知其所，世良不亟掩之，勃括輕騎遁去。獲其輜重及所誘

于厥之衆，併遷迪烈得所獲轄麥里部民，城臚胸河上以居之。是月，蕭楊哥尙南平郡主。

五月辛巳，命北府宰相劉晟爲都統，樞密使耶律世良爲副，殿前都點檢蕭屈烈爲都監以伐高麗。晟先携家置邊郡，致緩師期，追還之。以世良、屈烈總兵進討。以耶律德政爲遼興軍節度使，蕭年骨烈天城軍節度使。李仲舉卒，詔賻恤其家。

六月庚戌，上拜日如禮。以麻都骨世勳，易衣馬爲好。以上京留守耶律八哥爲北院樞密副使。

秋七月，上又拜日，遂幸秋山。

自八月射鹿至于九月，復自癸丑至于辛酉，連獵于有柏、碎石、太保、響應、松山諸山。丁卯，與夷離畢、兵部尙書蕭榮寧定爲交契，以重君臣之好。丙子，以旗鼓拽刺詳穩題里姑爲六部奚王。

冬十月，駐蹕撻刺割濼。

十一月庚申，詔汰東京僧，二百七及命上京、中京泊諸宮選精兵五萬五千人以備東征。十二月，南巡海徼。還，幸顯州。

五年春正月丁未，北幸。庚戌，耶律世良、蕭屈烈與高麗戰于郭州西，破之，斬首數萬

級，盡獲其輜重。乙卯，師次南海軍，耶律世良薨于軍。癸酉，駐蹕雪林。

二月己卯，阻卜長來朝。辛巳，如薩堤濼。庚寅，以前東京統軍使耶律韓留爲右夷離畢。戊戌，皇子宗眞生。

三月乙卯，鼻骨德長撒保特、賽刺等來貢。辛酉，諸道獄空，詔進階賜物。丙寅，以前北院大王耶律敬溫爲阿扎割只。辛未，党項魁可來降。

夏四月乙亥，振招州民。戊寅，以左夷離畢蕭合卓爲北院樞密使，曷魯寧爲副使。庚辰，清暑孤樹淀。

五月甲子，尙書蕭姬隱坐出使後期，削其官。丁卯，以耿元吉爲戶部使。

六月，以政事舍人吳克昌按察霸州刑獄。丁丑，回鶻獻孔雀。

秋七月甲辰，獵于赤山。

八月丙子，幸懷州，有事于諸陵。戊寅，還上京。

九月癸卯，皇弟南京留守秦晉國王隆慶來朝，上親出迎勞至實德山，因同獵于松山。乙丑，駐蹕杏塌。

冬十月甲午，封秦晉國王隆慶長子查割中山郡王，次子遂哥樂安郡王。

十一月辛丑朔，以參知政事馬保忠同知樞密院事、監修國史。丁巳，以北面林牙蕭

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



隈注爲國舅詳穩。

十二月乙酉，秦晉國王隆慶還，至北安薨，訃聞，上爲哀慟，輟朝七日。丁酉，宋遣張遜、王承德來賀千齡節。

是歲，放進士孫傑等四十八人及第。

六年春正月癸卯，如錐子河。

二月甲戌，以公主賽哥殺無罪婢，駙馬蕭圖玉不能齊家，降公主爲縣主，削圖玉同平章事。丁丑，詔國舅帳詳穩蕭隗注將本部兵東征高麗，其國舅司事以都監攝之。庚辰，以南面林牙涅合爲南院大王。

三月乙巳，如顯州，葬秦晉國王隆慶。有事于顯、乾二陵。追冊隆慶爲太弟。

夏四月辛卯，封隆慶少子謝家奴爲長沙郡王，以樞密使漆水郡王耶律制心權知諸行宮都部署事。壬辰，禁命婦再醮。丙申，如涼陁。

五月戊戌朔，命樞密使蕭合卓爲都統，漢人行宮都部署王繼忠爲副，殿前都點檢蕭屈烈爲都監以伐高麗。翌日，賜合卓劍，俾得專殺。丙午，錄囚。己酉，設四帳都詳穩。甲寅，以南京統軍使蕭惠爲右夷離畢。乙卯，祠木葉山、潢河。乙丑，駐蹕九層臺。

六月戊辰朔，德妃蕭氏賜死，葬免兒山西。後數日，大風起塚上，晝暝，大雷電而雨不止者踰月。是月，南京諸縣蝗。

秋七月辛亥，如秋山。遣禮部尙書劉京、翰林學士吳叔達、知制誥仇正己、起居舍人程翥、吏部員外郎南承顏、禮部員外郎王景運分路按察刑獄。辛酉，以西南路招討請，置寧仁縣于勝州。

九月庚子，還上京，以皇子屬思生，大赦。丁未，以駙馬蕭璉、節度使化哥、知制誥仇正己、楊佶充賀宋生辰正旦使副。乙卯，蕭合卓等攻高麗興化軍不克，還師。

冬十月丁卯，南京路饑，輓雲、應、朔、弘等州粟振之。辛未，獵鑊子河。庚寅，駐蹕達離山。

十一月乙卯，建州節度使石匡弼卒。

十二月丁卯，上輕騎還上京。戊子，宋遣李行簡、張信來賀千齡節。〔三〕翌日，宋馮元、張綸來賀正旦。

校勘記

〔一〕王儒 長編作王曙，宋史二八六有傳。

〔二〕銅州 銅州，卷一一五高麗外記同，高麗史四作通州。

〔三〕右皮室詳穩耶律敵魯擒肇及副將李立 敵魯，卷八八本傳作的珠，右皮室詳穩作左皮室詳穩。
李立，的珠傳及卷八八耶律益奴傳並作李玄蘊。

〔四〕十月庚子朔 朔字，據朔考補。

〔五〕十二月庚子朔 朔字，據朔考補。

〔六〕宋遣符成翰來賀 符成翰，長編作符承翰。

〔七〕買曷魯林 遊幸表作賈曷魯林。

〔八〕八月丙申朔 朔字，據朔考補。

〔九〕十一月 原誤「十月」，據大典五二四九及前後文改。

〔一〇〕耶律控溫封幽王 「幽」當作「幽」。卷九四耶律化哥傳，化哥字弘隱，弘隱即控溫，開泰元年代阻卜，後封幽王。此與下文文化哥封幽王爲重出。

〔一一〕金原縣 按地理志三與金史地理志並作金源縣。

〔一二〕五哥爲惕隱 五哥即吳哥，漢名宗訓。惕隱即大內惕隱。此與下文封宗訓大內惕隱爲重出。

〔一三〕耶律阿營 「營」，大典五二四九作管，長編作果。管、果音近，應作阿管。

〔一四〕城保宣義定遠等州 按地理志二，保州宣義軍是一州，定遠是宣州軍號，非州名。

〔二五〕題里姑爲奚六部大王 按此事另見于四年九月，檢部族表亦在四年，疑此係重出。

〔二六〕瀦水瑞鹿原 瀦，原作「溺」。據大典五二四九改。

〔二七〕（四年十一月）詔汰東京僧 按大典八七〇六此事在開泰五年十一月。

〔二八〕十一月辛丑朔 朔字，據朔考補。

〔二九〕耶律制心 卽上文開泰元年七月之耶律遂貞。耶律，下文亦作韓。本姓韓，賜姓耶律。制心，紀文原作愬，卷八二本傳作制心。遼文滙六韓椅墓誌稱「諱遂貞，賜名直心」，直心卽制心。今改愬作制心。

〔三〇〕命樞密使蕭合卓爲都統 命字原脫，依上文例補。

〔三一〕張信 長編作張佶，宋史三〇八有傳。

遼史卷十六

本紀第十六

聖宗七

七年春正月甲辰，如達離山。

二月乙丑朔，拜日，如渾河。

三月辛丑，命東北越里篤、剖阿里、奧里米、蒲奴里、鐵驪等五部歲貢貂皮六萬五千，馬三百。丙午，烏古部節度使蕭普達討叛命敵烈，滅之。

夏四月，拜日。丙寅，振川、饒二州饑。辛未，振中京貧乏。癸酉，禁匿名書。壬辰，以三司使呂德懋爲樞密副使。

閏月壬子，以蕭進忠爲彰武軍節度使兼五州制置。戊午，吐蕃王并里尊奏，凡朝貢，乞假道夏國，從之。

五月丙寅，皇子宗眞封梁王，宗元永清軍節度使，宗簡右衛大將軍，宗愿左驍衛大將軍，宗偉右衛大將軍，皇姪宗範昭義軍節度使，宗熙鎮國軍節度使，宗亮絳州節度使，宗弼濮州觀察使，宗奕曹州防禦使，宗顯、宗肅皆防禦使。以張儉守司徒兼政事令。

六月丙申，〔一〕品打魯瑰部節度使勃魯里至鼻洒河，遇微雨，忽天地晦冥，大風飄四十人飛旋空中，良久乃墮數里外。勃魯里幸獲免。一酒壺在地乃不移。八月丙午，〔二〕行大射柳之禮。庚申，以耶律留寧、吳守達使宋賀生辰，蕭高九、馬貽謀使宋賀正旦。加平章蕭弘義開府儀同三司、尚父兼政事令。

秋七月甲子，詔翰林待詔陳升寫南征得勝圖於上京五鸞殿。丁卯，蒲奴里部來貢。

九月庚申朔，〔三〕蒲昵國使奏本國與烏里國封壤相接，數侵掠不寧，賜詔諭之。戊辰，詔內外官，因事受賅，事覺而稱子孫僕從者，禁之。庚午，錄囚。括馬給東征軍。是月，駐蹕土河川。

冬十月，名中京新建二殿曰延慶，曰永安。壬寅，以順義軍節度使石用中爲漢人行宮都部署。丙辰，詔以東平郡王蕭排押爲都統，殿前都點檢蕭虛列爲副統，東京留守耶律八哥爲都監伐高麗。仍諭高麗守吏，能率衆自歸者，厚賞；堅壁相拒者，追悔無及。

十一月壬戌，以呂德懋知吏部尙書，楊又玄知詳覆院，劉晟爲霸州節度使，北府宰相劉

慎行爲彰武軍節度使。〔四〕庚辰，禁服用明金、縷金、貼金。戊子，幸中京。

十二月丁酉，宋遣呂夷簡、曹瑋來賀千齡節。是月，蕭排押等與高麗戰于茶、陀二河，遼軍失利，天雲、右皮室二軍沒溺者衆，遙輦帳詳穩阿果達、客省使酌古、渤海詳穩高清明、天雲軍詳穩海里等皆死之。

放進士張克恭等三十七人及第。

八年春正月，宋遣陳堯佐、張羣來賀。〔五〕壬戌，鐵驪來貢。建景宗廟于中京。封沙州節度使曹順爲燉煌郡王。

二月丁未，以前南院樞密使韓制心爲中京留守，漢人行宮都部署王繼忠南院樞密使。丙辰，祭風伯。

三月己未，以契丹弘義宮使赫石爲興聖宮都部署，前遙恩拈部節度使控骨里積慶宮都部署，左祇候郎君耶律罕四捷軍都監。乙亥，東平王蕭韓寧、東京留守耶律八哥、國舅平章事蕭排押、林牙要只等討高麗還，〔六〕坐失律，數其罪而釋之。己卯，詔加征高麗有功渤海將校官。壬午，閱飛龍院馬。癸未，回跋部太師踏刺葛來貢。丙戌，置東京渤海承奉官都知押班。

夏四月戊子朔，如緬山。

五月壬申，以駙馬蕭克忠爲長寧軍節度使。乙亥，遷寧州渤海戶于遼、土二河之間。己卯，曷蘇館惕隱阿不葛、宰相賽刺來貢。

六月戊子，錄征高麗戰歿將校子弟。己丑，以左夷離畢蕭解里爲西南面招討使，御史大夫蕭要只爲夷離畢。己亥，惕隱耶律合葛爲南府宰相，南面林牙耶律韓留爲惕隱。癸卯，弛大擺山猿嶺採木之禁。乙巳，以南皮室軍校等討高麗有功，賜金帛有差。

秋七月己未，征高麗戰歿諸將，詔益封其妻。庚申，以東北路詳穩耶律獨迭爲北院大王。辛酉，肴里、涅哥二奚軍征高麗有功，皆賜金帛。癸亥，詔阻卜依舊歲貢馬千七百，駝四百四十，貂鼠皮萬，青鼠皮二萬五千。戊辰，觀稼。己巳，回跋部太保麻門來貢。庚午，觀市，曲赦市中繫囚。命解寧、馬翼充賀宋生辰使副。

八月庚寅，遣郎君曷不呂等率諸部兵會大軍討高麗。

九月己巳，以石用中參知政事。宋遣崔遵度、王應昌來賀千齡節。壬申，錄囚。甲戌，復錄囚。庚辰，曷蘇館惕隱阿不割來貢。壬午，駐蹕土河川。

冬十月乙酉，詔諸道，事無巨細，已斷者，每三月一次條奏。戊子，遣耶律繼崇、鄭玄瑗賀宋正旦。〔七〕癸巳，詔橫帳三房不得與卑小帳族爲婚；凡嫁娶，必奏而後行。癸卯，以前北

院大王建福爲阿扎割只。甲辰，改東路耗里太保城爲咸州，建節以領之。

十一月甲寅，置雲州宣德縣。

十二月辛卯，駐蹕中京。乙巳，以廣平郡王宗業爲中京留守、大定尹，韓制心爲惕隱。辛亥，高麗王詢遣使乞貢方物，詔納之。

九年春正月，宋遣劉平、張元普來賀。

二月，如鴛鴦灤。

五月庚午，耶律資忠使高麗還，王詢表請稱藩納貢，歸所留王人只刺里。〔只刺里在高麗六年，忠節不屈，以爲林牙。辛未，遣使釋王詢罪，並允其請。癸酉，以耶律宗教檢校太傅，宗誨啓聖軍節度使，劉晟太子太傅，仍賜保節功臣。〕

秋七月庚戌朔，日有食之，詔以近臣代拜救日。甲寅，遣使賜沙州回鶻燉煌郡王曹順衣物。以查刺、耿元吉、韓九、宋璋爲來年賀宋生辰正旦使副。

九月戊午，以駙馬蕭紹宗平章事。丁卯，文武百僚奉表上尊號，不許；表三上，乃從之。乙亥，沙州回鶻燉煌郡王曹順遣使來貢。括諸道漢民馬賜東征軍。以夷離畢延寧爲兵馬副都部署，總兵東征。是月，駐蹕金鉉灤。宋遣宋綬、駱繼倫賀千齡節。

冬十月戊寅朔，〔五〕以涅里爲奚王都監，突迭里爲北王府舍利軍詳穩。郎君老使沙州還，詔釋宿累。國家舊使遠國，多用犯徒罪而有才略者，使還，卽除其罪。戊子，西南招討奏党項部有宋犀族輸貢不時，常有他意，宜以時遣使督之。詔曰：「邊鄙小族，歲有常貢。邊臣驕縱，徵斂無度，彼懷懼不能自達耳。第遣清慎官將，示以恩信，無或侵漁，自然效順。」復奏諦居、迭烈德部言節度使韓留有惠政，今當代，請留。上命進其治狀。辛丑，如中京。壬寅，大食國遣使進象及方物，爲子册割請婚。

十一月丁巳，以漆水郡王韓制心爲南京留守、析津尹、兵馬都總管。己未，以夷離畢蕭孝順爲南面諸行宮都部署，加左僕射。

十二月丁亥，禁僧燃身煉指。戊子，詔中京建太祖廟，制度、祭器皆從古制。乙巳，詔來年冬行大册禮。

放進士張仲舉等四十五人。

太平元年春正月丁丑朔，宋使魯宗道、成吉來賀。〔六〕如渾河。

二月乙卯，幸鉢河。壬戌，獵高柳林。

三月戊戌，皇子勃已只生。庚子，駙馬都尉蕭紹業建私城，賜名陸州，軍曰長慶。是

月，大食國王復遣使請婚，封王子班郎君胡思里女可老爲公主，嫁之。

夏四月戊申，東京留守奏，女直三十部會長請各以其子詣闕祇候。詔與其父俱來受約。乙卯，錄囚。丁卯，置來州。是月，清暑緬山。

秋七月甲戌朔，賜從獵女直人秋衣。乙亥，遣骨里取石晉所上玉璽于中京。阻卜來貢。辛巳，如沙嶺。是月，獵潢河。

九月，幸中京。

冬十月丁未，敵烈會長頗白來貢馬、駝。戊申，錄囚。壬子，宋使李懿、王仲賓來賀千齡節，及蘇惟甫、周鼎賀來歲元正，卽遣蕭善、程翥報聘。党項長曷魯來貢。己未，以薩敏解里爲都點檢，高六副點檢，耶律羅漢奴左皮室詳穩，噪姑右皮室詳穩，聊了西北路金吾，耶律僧隱御史大夫，求哥駙馬都尉，蕭春、骨里並大將軍。庚申，幸通天觀，觀魚龍曼衍之戲。翌日，再幸。還，升玉輅，自內三門入萬壽殿，奠酒七廟御容，因宴宗室。

十一月癸未，上御昭慶殿，文武百僚奉册上尊號曰睿文英武遵道至德崇仁廣孝功成治定昭聖神贊天輔皇帝，大赦，改元太平，中外官進級有差。宋遣使來聘，夏、高麗遣使來貢。甲申，册皇子梁王宗眞爲皇太子。

二年春正月，如納水釣魚。

二月辛丑朔，駐蹕魚兒灤。

三月甲戌，如長春州。丁丑，宋使薛貽廓來告宋主恒殂，子禎嗣位。遣都點檢耶律僧隱等充宋祭奠使副，林牙蕭日新、觀察馮延休充宋后弔慰使副。戊寅，遣金吾耶律諧領、引進姚居信充宋主弔慰使副。戊子，爲宋主飯三京僧。是月，地震，雲、應二州屋摧地陷，鬼白山裂數百步，泉湧成流。

夏四月，如緬山清暑。

五月乙亥，〔二二〕參知政事石用中薨。庚辰，鐵驪遣使獻兀惹十六戶。

六月己未，〔二四〕宋遣使薛由等來饋其先帝遺物。〔二五〕

秋七月己卯，以耶律信寧爲奉陵軍節度使，高麗國參知政事王同顯靜海軍節度使，〔二六〕耶律遂忠長寧軍節度使，耿延毅昭德軍節度使，高守貞河西軍節度使。

九月癸巳，遣尙書僧隱、韓格賀宋主即位。

冬十月壬寅，〔二七〕遣堂後官張克恭充賀夏國王李德昭生日使，耶律掃古、韓王充賀宋太后生日使副，〔二八〕耶律仙寧、史克忠充賀宋正旦使副。是月，駐蹕胡魯古思淀。癸卯，〔二九〕賜宰臣呂德懋、參知政事吳叔達、樞密副使楊又玄、右丞相馬保忠錢物有差。辛亥，至上京，

曲赦畿內囚。

十一月丙戌，宋遣使來謝。

十二月辛丑，高麗王詢薨，其子欽遣使來報，即命使冊欽爲高麗國王。〔三〇〕甲寅，宋遣劉燁、郭志言來賀千齡節。

是年，放進士張漸等四十七人。

三年春正月丙寅朔，如納水釣魚。以僧隱爲平章事。乙亥，以蕭臺德爲南王府都監，林牙耶律信寧西北路招討都監。辛巳，賜越國公主私城之名曰懿州，軍曰慶懿。

二月丙申，以丁振爲武信軍節度使，改封蘭陵郡王。戊申，以東平郡王蕭排押爲西南面都招討，進封幽王。

夏四月，以耶律守寧爲都點檢。

五月，清暑緬山。

六月戊申，以南院宣徽使劉涇參知政事，蕭孝惠爲副點檢，蕭孝恭東京統軍兼沿邊巡檢使。戊午，以蕭璉爲左夷離畢，蕭琳爲詳穩。

秋七月戊寅，以南府宰相耶律合葛爲上京留守，封漆水郡王。丙戌，以皇后生辰爲順

天節。丁亥，賜緬山名曰永安。是月，獵赤山。

閏九月壬辰朔，^{〔三〕}以蕭伯達、韓紹雍充賀宋正旦使副，唐骨德、程昭文賀宋生辰使副。冬十月庚辰，宋遣薛奎、郭盛來賀順天節，王臻、慕容惟素賀千齡節。東征軍奏：「統帥諸領、常袞課奴率師自毛母國嶺入，林牙高九、裨將大匡逸等率師鼓山嶺入。閏月未至撻離河，^{〔三〕}不遇敵而還。以是月會於弘怕只嶺，駝、馬死者甚衆。」駐蹕遼河。

十一月辛卯朔，以皇姪宗範爲歸德軍節度使，北府宰相蕭孝穆南京留守，封燕王，南京留守韓制心南院大王、兵馬都總管，仇正燕京轉運使。^{〔三〕}

十二月壬戌，以宗範爲平章事，封三韓郡王，仇道衡中京副留守，馮延休順州刺史，郎玄化西山轉運使，^{〔三〕}趙其樞密直學士。丁卯，以蕭永爲太子太師。己卯，封皇子重元素國王。

四年春正月庚寅朔，宋遣張傳、張士禹、程琳、丁保衡來賀。如鴨子河。

二月己未朔，^{〔三〕}獵撻魯河。詔改鴨子河曰混同江，撻魯河曰長春河。

三月戊子朔，^{〔三〕}千齡節，詔賜諸宮分耆老食。

夏四月癸酉，以右丞相馬保忠之子世弘使嶺表，至平地松林爲盜所殺，特贈昭信軍節

度使。

五月，清暑永安山。

六月己未，〔三七〕南院大王韓制心薨。戊辰，以鄭弘節爲兵部郎中，劉慎行順義軍節度使。辛未，以燕王蕭孝穆子順爲千牛衛將軍。甲戌，以中山郡王查哥爲保靜軍節度使，樂安郡王遂哥廣德軍節度使，蕭解里彰德軍節度使。庚辰，以遼興軍節度使周王胡都古爲臨海軍節度使，漆水郡王敵烈南院大王。

秋七月，如秋山。

八月丙辰朔，〔三八〕以韓紹芳爲樞密直學士，駙馬蕭匹敵都點檢。

九月，以駙馬蕭紹宗爲武定軍節度使，耶律宗福安國軍節度使。

冬十月，駐蹕遼河。宋遣蔡齊、李用和來賀千齡節。

十一月，追封南院大王韓制心爲陳王。

十二月，以蕭從政爲歸義軍節度使，康筠監門衛，充賀宋正旦使副。是年，放進士李炯等四十七人。

校勘記

〔一〕六月丙申 「六月」二字原脫。按朔考，五月壬戌朔，六月壬辰朔，丙申已入六月。據補。

〔二〕八月丙午 「八月丙午」四字夾於上文六月與下文七月之間，六月壬辰朔，丙午是十五日，「八月」二字疑衍，或是八月一段應在七月、九月之間。

〔三〕九月庚申朔 朔字，據朔考補。

〔四〕劉晟爲霸州節度使北府宰相劉慎行爲彰武軍節度使 按劉慎行卽劉晟，彰武軍卽霸州，一事重出。

〔五〕宋遣張羣來賀 張羣，長編作張君平。

〔六〕東平王蕭韓寧東京留守耶律八哥國舅平章事蕭排押林牙要只等討高麗還 按卷八八蕭排押傳，排押字韓隱，開泰五年進王東平。隱、寧音近，蕭韓寧卽蕭排押，重出。

〔七〕遣耶律繼崇鄭玄瑕賀宋正旦 繼崇，長編作繼宗。玄瑕，長編作去瑕。

〔八〕歸所留王人只刺里 按卷八八耶律資忠傳，資忠小字札刺。只刺里卽札刺異譯。

〔九〕十月戊寅朔 朔字，據朔考補。

〔一〇〕宋使魯宗道成吉來賀 成吉，長編作侯成吉。

〔一一〕來州 來，原作「萊」。據地理志三、營衛志上及卷一一〇乙辛傳改。

〔二二〕宋使李懿王仲賓來賀千齡節。李懿，長編作李懿。王仲賓，長編作王仲寶。

〔二三〕五月乙亥。原作「五月乙亥朔」。按朔考，五月己巳朔，乙亥是初七日。「朔」字衍，今刪。

〔二四〕六月己未。己未，原誤「乙未」。按朔考，六月己亥朔，有己未，無乙未。據改。

〔二五〕宋遣薛由等來饋其先帝遺物。薛由，長編作薛田，宋史三〇一有傳。

〔二六〕高麗國參知政事王同顯靜海軍節度使。羅校，王同顯，疑卽統和十五年之高麗使者王同穎。

（穎，殿本作穎。）

〔二七〕冬十月壬寅。冬十月三字原脫。按朔考，九月戊辰朔，無壬寅；十月丁酉朔，壬寅初六日。

據補。

〔二八〕耶律掃古韓王充賀宋太后生日使副。「王」字疑誤。長編作韓玉。

〔二九〕癸卯。原誤「冬十月癸卯朔」。按朔考，十月丁酉朔，癸卯初七日。「冬十月」已見於壬寅，則此

「冬十月」三字與「朔」字均衍文。並刪。

〔三〇〕高麗王詢薨其子欽遣使來報卽命使冊欽爲高麗國王。按高麗史四，本年是冊高麗太子王欽爲

高麗國公。此時王詢尙未卒。

〔三一〕閏九月壬辰朔。「九」、「朔」二字原脫，據朔考補。

〔三二〕閏月末至撻離河。按「閏月末至」費解。未字或係「末」字之訛，卽指閏九月末而言。若是「未」

字，則未字上應脫一天干字。

〔三三〕南京留守韓制心南院大王兵馬都總管仇正燕京轉運使 按遼文匯六韓椅墓誌稱制心爲「四十萬兵馬都總管兼侍中、南大王」，則此「兵馬都總管」當屬制心所任官。仇正，疑是上文開泰六年七月及九月之仇正己。

〔三四〕郎玄化西山轉運使 西山，疑是「山西」之倒誤。

〔三五〕二月己未朔 朔字，據朔考補。

〔三六〕三月戊子朔 朔字，據朔考補。

〔三七〕六月己未 六月二字原脫。按朔考，六月丁巳朔，己未是初三日。下文戊辰、辛未、甲戌、庚辰，均屬六月。據補。

〔三八〕八月丙辰朔 朔字，據朔考補。

遼史卷十七

本紀第十七

聖宗八

五年春正月乙酉，如混同江。

二月戊午，禁天下服用明金及金線綺；國親當服者，奏而後用。是月，如魚兒灤。

三月壬辰，以左丞相張儉爲武定軍節度使、同政事門下平章事，鄭弘節臨潢少尹，劉愼行遼興軍節度使，武定軍節度使蕭匹敵契丹行宮都部署，樞密副使楊又玄吏部尙書、參知政事兼樞密使。是月，如長春河魚兒灤，其水一夕有聲如雷，越沙岡四十里，別爲一陂。

夏五月，清暑永安山。以蕭從順爲太子太師，〔一〕吳叔達翰林學士，道士馮若谷加太子中允，耶律晨武定軍節度使，張儉彰信軍節度使，〔二〕呂士宗禮部員外郎，李可舉順義軍節度使。

秋七月，獵平地松林。

九月，駐蹕南京。己亥，以蕭迪烈、李紹琪充賀宋太后生辰使副，耶律守寧、劉四端充賀宋主生辰使副。

冬十月辛未，宋太后遣馮元宗、史方來賀順天節。〔三〕

十一月庚子，幸內果園宴，京民聚觀。求進士得七十二人，命賦詩，第其工拙，以張昱等一十四人爲太子校書郎，韓欒等五十八人爲崇文館校書郎。辛丑，以左祗候郎君詳穩蕭羅羅爲右夷離畢。

十二月丁巳，以漢人行宮都部署蕭孝先爲上京留守，皇姪長沙郡王謝家奴匡義軍節度使，耶律仁舉興國軍節度使。甲子，蕭守寧爲點檢侍衛親軍馬步軍。乙丑，北院樞密使蕭合卓薨。戊辰，〔四〕以北府宰相蕭普古爲北院樞密使。己巳，遣蕭諧、李琪充賀宋正旦使副。庚午，以參知政事劉京爲順義軍節度使。乙亥，宋使李維、張綸來賀千齡節。

是歲，燕民以年穀豐熟，車駕臨幸，爭以土物來獻。上禮高年，惠鰥寡，賜酺飲。至夕，六街燈火如晝，士庶嬉遊，上亦微行觀之。丁丑，禁工匠不得銷毀金銀器。

六年春正月己卯朔，宋遣徐奭、裴繼起、張若谷、崔準來賀。庚辰，如鴛鴦澤。

二月己酉，以迷離己同知樞密院，黃翮爲兵馬都部署，達骨只副之，赫石爲都監，引軍城混同江、疎木河之間。黃龍府請建堡障三、烽臺十，詔以農隙築之。東京留守八哥奏黃翮領兵入女直界徇地，俘獲人、馬、牛、豕，不可勝計，得降戶二百七十，詔獎諭之。戊午，以耶律野爲副點檢，以國舅帳蕭柳氏、徒魯骨領西北路十二班軍、奚王府舍利軍。己巳，南京水，遣使振之。庚午，詔党項別部塌西設契丹節度使治之。

三月戊寅朔，〔三〕以大同軍節度使張儉入爲南院樞密使、左丞相兼政事令，參知政事吳叔達責授將作少監，出爲東州刺史。〔六〕是月，阻卜來侵，西北路招討使蕭惠破之。

夏四月丁未朔，以武定軍節度使耶律洪古爲惕隱。〔七〕戊申，蒲盧毛朶部多兀惹戶，詔索之。丙寅，如永安山。

五月辛卯，以東京統軍使蕭慥古爲契丹行宮都部署。癸卯，遣西北路招討使蕭惠將兵伐甘州回鶻。

六月辛丑，詔凡官畜並印其左以識之。

秋七月戊申，獵黑嶺。

八月，蕭惠攻甘州不克，師還。自是阻卜諸部皆叛，遼軍與戰，皆爲所敗，監軍涅里姑、國舅帳太保曷不呂死之。詔遣惕隱耶律洪古、林牙化哥等將兵討之。

九月，駐蹕遼河澚。

冬十月丙子，曷蘇館諸部長來朝。庚辰，遣使問夏國五月與宋交戰之故。辛巳，以前南院大王直魯袞爲烏古敵烈都詳穩。庚寅，以蕭孝順、蕭紹宗兼侍中，駙馬蕭紹業平章政事，前南院大王胡覲董同知上京留守，安哥通化州節度使。

十一月乙丑，〔八〕宋遣韓翼、田承說來賀順天節。〔九〕戊辰，西北路招討司小校掃姑訴招討蕭惠三罪，詔都監奧骨禎按之。

十二月庚辰，曷蘇館部乞建旗鼓，許之。辛巳，詔北南諸部廉察州縣及石烈、彌里之官，不治者罷之。詔大小職官有貪暴殘民者，立罷之，終身不錄；其不廉直，雖處重任，卽代之；能清勤自持者，在卑位亦當薦拔；其內族受賂，事發，與常人所犯同科。戊戌，遣杜防、蕭蘊充賀宋生辰使副。庚子，駐蹕遼河。

七年春正月壬寅朔，宋遣張保維、孫繼業、孔道輔、馬崇至來賀。如混同江。辛亥，以女直白縷爲惕隱，蒲馬爲巖母部太師。甲寅，蒲盧毛朶部遣使來貢。

夏四月乙未，獵黑嶺。

五月，清暑永安山。西南路招討司奏陰山中產金銀，請置冶，從之。復遣使循遼河源

求產金銀之礦。

六月，禁諸屯田不得擅貨官粟。癸巳，詔蕭惠再討阻卜。

秋七月己亥朔，詔更定法令。庚子，詔諭駙馬蕭鈕不、公主粘米袞：「爾於后有父母之尊，后或臨幸，祇謁先祖，祇拜空帳，失致敬之禮，今後可設像拜謁。」乙巳，詔輦路所經，旁三十步內不得耕種者，不在訴訟之限。

九月，駐蹕遼河。

冬十月丁卯朔，詔諸帳院庶孽，並從其母論貴賤。

十一月，宋遣石中立、石貽孫來賀千齡節，王博文、王雙賀順天節。辛亥，以楊又玄、邢祥知貢舉。己未，〔一〇〕匡義軍節度使中山郡王查葛、保寧軍節度使長沙郡王謝家奴、〔一一〕廣德軍節度使樂安郡王遂哥奏，各將之官，乞選伴讀書史，從之。癸亥，以三韓王欽爲啓聖軍節度使，楊佶刑部侍郎。甲子，以左千牛衛上將軍耶律古昱爲北院大王。

十二月丁卯朔，〔一二〕遣耶律遂英、王永錫充賀宋太后生辰，蕭速撒、馬保永充賀正旦使副。癸酉，以金吾蕭高六爲奚舍利軍詳穩。

八年春正月己亥，如混同江。庚申，党項侵邊，破之。甲子，詔州縣長吏勸農。

二月戊子，燕京留守蕭孝穆乞于拒馬河接宋境上置戍長巡察，詔從之。

三月，駐蹕長春河。

夏五月，清暑永安山。

六月，以韓寧、劉湘充賀宋太后生辰使副，吳克荷充賀夏國王李德昭生辰使。癸巳，權北院大王耶律鄭留奏，今歲十一月皇太子納妃，諸族備會親之帳。詔以豪盛者三十戶給其費。

秋七月丁酉，以遙輦帳郎君陳哥爲西北路巡檢，與蕭諧領同管二招討地。以南院大王耶律敵烈爲上京留守。戊戌，獵平地松林。

九月壬辰朔，以渤海宰相羅漢權東京統軍使。壬子，幸中京。北敵烈部節度使耶律延壽請視諸部，賜旗鼓，詔從之。癸丑，阻卜別部長胡懶來降。乙卯，阻卜長春古來降。

冬十月，宋遣唐肅、葛懷愍來賀順天節。樞密使、魏王耶律斜軫孫婦阿聒指斥乘輿，其孫骨欲爲之隱，事覺，乃并坐之，仍籍其家。詔燕城將士，若敵至，總管備城之東南，統軍守其西北，馬步軍備其野戰，統軍副使繕壁壘，課士卒，各練其事。

十一月丙申，皇太子納妃蕭氏。以耶律求翰爲北院大王。

十二月辛酉朔，以遙輦太尉謝佛留爲天雲軍詳穩。壬申，以前北院大王耶律留寧

爲雙州節度使，康筠崇德宮都部署，謝十永興宮都部署，旅墳宜州節度使，菴遼州節度使，耶律野同知中京留守，耶律曷魯突媿爲大將軍。丁丑，詔庶孽雖已爲良，不得預世選。丁亥，宋遣寇瑊、康德來賀千齡節，朱諫、曹英、張逸、劉永釗賀來歲兩宮正旦。詔兩國舅及南、北王府乃國之貴族，賤庶不得任本部官。

是歲，放進士張宥等五十七人。

九年春正月，至自中京。

二月戊辰，遣使賜高麗王欽物。如幹凜河。

夏五月，清暑永安山。

六月戊子朔，以長沙郡王謝家奴爲廣德軍節度使，樂安郡王遂哥匡義軍節度使，中山郡王查葛保定軍節度使，進封潞王，豫章王貼不長寧軍節度使。以耶律思忠、耶律荷、耶律曷、遙輦謝佛留、陳邈、韓紹一、韓知白、張震充賀宋兩宮生辰及來歲正旦使副。秋七月戊午朔，如黑嶺。

八月己丑，東京舍利軍詳穩大延琳囚留守、駙馬都尉蕭孝先及南陽公主，殺戶部使韓紹勳、副使王嘉、四捷軍都指揮使蕭頗得，延琳遂僭位，號其國爲興遼，年爲天慶。初，東遼

之地，自神冊來附，未有椎酤鹽麩之法，關市之征亦甚寬弛。馮延休、韓紹勳相繼以燕地平山之法繩之，民不堪命。燕又仍歲大饑，戶部副使王嘉復獻計造船，使其民諳海事者，漕粟以振燕民，水路艱險，多至覆沒。雖言不信，鞭楚撈掠，民怨思亂。故延琳乘之，首殺紹勳、嘉，以快其衆。延琳先事與副留守王道平謀，道平夜棄其家，踰城走，與延琳所遣召黃龍府黃翹者，俱至行在告變。上卽徵諸道兵，以時進討。時國舅詳穩蕭匹敵治近延琳，先率本管及家兵據其要害，絕其西渡之計。渤海太保夏行美亦舊主兵，戍保州，延琳密馳書，使圖統帥耶律蒲古。行美乃以實告，蒲古得書，遂殺渤海兵八百人，而斷其東路。延琳知黃龍、保州皆不附，遂分兵西取瀋州，其節度使蕭王六初至，其副張傑聲言欲降，故不急攻。及知其詐，而已有備，攻之不克而還。時南、北女直皆從延琳，高麗亦稽其貢。及諸道兵次第皆至，延琳嬰城固守。

冬十月丙戌朔，以南京留守燕王蕭孝穆爲都統，國舅詳穩蕭匹敵爲副統，奚六部大王蕭蒲奴爲都監以討之。

十一月乙卯朔，如顯陵。丙寅，以瀋州節度副使張傑爲節度使，其皇城進士張人紀、趙睦等二十二入入朝，_{二七}試以詩賦，皆賜第，超授保州戍將夏行美平章事。壬申，以駙馬劉四端權知宣徽南院事。

十二月丁未，宋遣仇永、韓永錫來賀千齡節。〔一八〕命耶律育、吳克荷、蕭可觀、趙利用充賀宋生辰使副，耶律元吉、崔閏、蕭昭古、竇振充來歲賀宋正旦使副。〔一九〕

十年春正月乙卯朔，〔二〇〕宋遣王夷簡、竇處約、張易、張士宜來賀。〔二一〕
二月，幸龍化州。

三月甲寅朔，詳穩蕭匹敵至自遼東，言都統蕭孝穆去城四面各五里許，築城堡以圍之。駙馬延寧與其妹穴地道去，惟公主崔八在後，爲守陴者覺而止。

夏四月，如乾陵。以耶律行平爲廣平軍節度使，夏行美爲忠順軍節度使，〔二二〕李延弘知易州，蕭從順加太子太師。

五月戊申，〔二三〕清暑栢坡。

秋七月壬午，詔來歲行貢舉法。

八月丙午，東京賊將楊詳世密送款，夜開南門納遼軍。擒延琳，渤海平。
冬十月，駐蹕長寧淀。

十一月辛亥，南京留守燕王蕭孝穆以東征將士凱還，戎服見上，上大加宴勞。翌日，以孝穆爲東平王、東京留守，國舅詳穩、駙馬都尉蕭匹敵封蘭陵郡王，奚王蒲奴加侍中；以權

燕京留守兼侍中蕭惠爲燕京統軍使，前統軍委廋大將軍、節度使，宰相兼樞密使馬保忠權知燕京留守，奚王府都監蕭阿古軫東京統軍使。詔渤海舊族有勳勞材力者敍用，餘分居來、隰、遷、潤等州。〔三〕

十二月乙巳，宋遣梅詢、王令傑來賀千齡節。漆水郡王耶律敵烈加尙父，烏古部節度使蕭普達爲乙室部大王，尙書左僕射蕭琳爲臨海軍節度使。

十一年春正月己酉朔，如混同江。

二月，如長春河。

三月，上不豫。

夏五月，大雨水，諸河橫流，皆失故道。

六月丁丑朔，駐蹕大福河之北。己卯，帝崩于行宮，年六十一，在位四十九年。景福元年閏十月壬申，上尊諡曰文武大孝宣皇帝，廟號聖宗。

贊曰：聖宗幼冲嗣位，政出慈闈。及宋人二道來攻，親御甲冑，一舉而復燕、雲，破信、彬，再舉而躡河、朔，不亦偉歟！旣而侈心一啓，佳兵不祥，東有茶、陀之敗，西有甘州之喪，

此狃於常勝之過也。然其踐阼四十九年，理冤滯，舉才行，察貪殘，抑奢僭，錄死事之子孫，振諸部之貧乏，責迎合不忠之罪，却高麗女樂之歸。遼之諸帝，在位長久，令名無窮，其唯聖宗乎！

校勘記

- 〔一〕以蕭從順爲太子太師 按下文太平十年四月又有蕭從順加太子太師，與此重複。檢百官志三，太平十一年見太子少師蕭從順。此或誤少師爲太師，百官志殆誤五年爲十一年。
- 〔二〕張儉彰信軍節度使 按遼文匯續編張儉墓誌，張儉是彰國軍節度使。
- 〔三〕宋太后遣馮元宗來賀順天節 馮元宗，錢大昕奉使年表謂應從長編作馬宗元。
- 〔四〕戊辰 原作「十一月戊辰」。按「十一月」三字已見前，衍文從刪。
- 〔五〕三月戊寅朔 朔字，據朔考補。
- 〔六〕出爲東州刺史 東州，卷八〇張儉傳作康州。
- 〔七〕以耶律洪古爲惕隱 洪古原誤「漢古」，據下文八月惕隱耶律洪古改。卷九五本傳作弘古。
- 〔八〕十一月乙丑 「十一月」三字，原在下文「戊辰」上。按朔考，十一月癸卯朔，乙丑是二十三日。據改。

〔九〕宋遣韓翼來賀順天節。按翼原名億，因奉使遼廷避太祖耶律億名改意，遼史又改翼。

〔一〇〕己未 己原誤「乙」。按朔考，十一月丁酉朔，無乙未。檢此日在辛亥、癸亥之間，乙卯十九日，己未二十二日，己易誤乙，據改。

〔一一〕匡義軍節度使中山郡王查葛及保寧軍節度使長沙郡王謝家奴。按上文太平四年六月，查哥（即查葛）爲保靜軍節度使，五年十二月，謝家奴爲匡義軍節度使，與此互歧。

〔一二〕十二月丁卯朔。朔字，據朔考補。

〔一三〕十二月辛酉朔。原作「冬十二月辛酉朔」，「冬」字已見前文十月，衍文從刪。

〔一四〕六月戊子朔。朔字，據朔考補。

〔一五〕保定軍節度使。地理志無保定軍。上文太平四年六月作保靜軍。

〔一六〕充賀宋兩宮生辰及正旦使副。使副二字原脫，據文義補。下文十二月耶律元吉等充來歲賀宋正旦使副，使副二字亦同此例補。

〔一七〕其皇城進士張人紀等入朝。道光殿本改皇城爲防城，按曰：「防城原作皇城，與下文『入朝』文義不屬。蓋張人紀與張傑同守瀋州拒大延琳者，故與張傑、夏行美同加恩擢。今據永樂大典改。」

〔一八〕宋遣仇永韓永錫來賀千齡節。仇永，長編作鞠詠。韓永錫，長編作王永錫。

〔一九〕命耶律育吳克荷蕭可觀趙利用充賀宋生辰使副耶律元吉崔閏蕭昭古寶振充來歲賀宋正旦使

副 蕭可觀，長編作蕭可親。崔閏，長編作崔潤。

〔二〇〕正月乙卯朔 乙，原誤「己」。據朔考改。

〔二一〕宋遣張易張士宜來賀 張易，長編作張億，此避耶律億名改。張士宜，長編作士宣。

〔二二〕夏行美爲忠順軍節度使 忠，原誤「中」。據卷八七本傳及地理志五改。

〔二三〕五月戊申 按朔考五月癸丑朔，無戊申日，當有誤字。

〔二四〕餘分居來隰遷潤等州 潤，原誤「閏」。據地理志三改。

遼史卷十八

本紀第十八

興宗一

興宗神聖孝章皇帝，諱宗真，字夷不董，小字只骨。聖宗長子，母曰欽哀皇后蕭氏。上始生，齊天皇后取養之。幼而聰明，長而魁偉，龍顏日角，豁達大度。善騎射，好儒術，通音律。三歲封梁王，太平元年冊爲皇太子，十年六月判北南院樞密使事。

十一年夏六月己卯，聖宗崩，卽皇帝位於柩前。壬午，尊母元妃蕭氏爲皇太后。甲申，遣使告哀于宋及夏、高麗。是年，御宣政殿放進士劉貞等五十七人。〔一〕辛卯，大赦，改元景福。乙未，奉大行皇帝梓宮，殯于永安山太平殿。辛丑，皇太后賜駙馬蕭鈕不里、蕭匹敵死，圍場都太師女直著骨里、右祇候郎君詳穩蕭延留等七人皆棄市，籍其家，遷齊天皇后于

上京。

秋七月丙午朔，皇太后率皇族大臨于太平殿。高麗遣使弔慰。上召晉王蕭普古等飲博，夜分乃罷。丁未，擊鞠。戊申，以耶律韓八爲左夷離畢，特末里爲左祇候郎君詳穩，橫帳郎君樂古權右祇候郎君詳穩。己酉，以耶律鄭留爲于厥迪烈都詳穩，高八爲右皮室詳穩。庚戌，振薊州饑民。癸丑，詔寫大行皇帝御容。甲寅，錄囚。以觀察姚居信爲上將軍。建慶州于慶陵之南，徙民實之，充奉陵邑。乙卯，以比歲豐稔，罷給東京統軍司糧。丁巳，上謁大行皇帝御容，哀慟久之，因詔寫北府宰相蕭孝先、南府宰相蕭孝穆像于御容殿。以蕭阿姑軫爲東京留守。丁卯，謁太平殿，焚先帝所御弓矢。幸晉王普古第視疾。辛未，錄囚。壬申，上謁神主帳，時奧隈蕭氏始入宮，亦命拜之。八月壬午，遷大行皇帝梓宮於菽塗殿。

九月戊申，躬視慶陵。庚戌，問安于皇太后。辛亥，宋遣王隨、曹儀致祭，王巖、許懷信、梅詢、張綸來慰兩宮，范諷、孫繼業賀卽位，孔道輔、魏昭文賀皇太后冊禮。戊午，焚弧矢、鞍勒于菽塗殿。庚申，夏國遣使來慰。庚午，以宋使弔祭，喪服臨菽塗殿。甲戌，遣御史中丞耶律翥、司農卿張確、詳穩耶律勵、四方館使高維翰謝宋弔慰。

冬十月戊寅，宰臣呂德懋薨。癸未，殺鉏不里黨彌勒奴、觀音奴等。丙戌，遣工部尙書

高德順、崇祿卿李可封致先帝遺物于宋；三以右領軍衛上將軍耶律遜、少府監馬憚充皇太后謝宋使；右監門衛上將軍耶律元載、引進使魏永充皇帝謝宋使。丁酉，夏國遣使來賻。戊戌，以蕭革、趙爲果、耶律郁、馬保業充來歲賀宋正旦使副。

閏月辛亥，謁敢塗殿，閱玄宮闕器。有司請以生辰爲永壽節，皇太后生辰爲應聖節，從之。辛酉，閱新造鎧甲。丁卯，振黃龍府饑民。

十一月壬辰，上率百僚奠于敢塗殿。出大行皇帝服御、玩好焚之，縱五坊鷹鶻。甲午，葬文武大孝宣皇帝于慶陵。乙未，祭天地。問安皇太后。丙申，謁慶陵，以遺物賜羣臣，名其山曰慶雲，殿曰望仙。

十二月癸丑，至自慶陵。皇太后聽政，帝不親庶務，羣臣表請，不從。

是歲，以興平公主下嫁夏國王李德昭子元昊，以元昊爲夏國公、駙馬都尉。

重熙元年春正月壬申朔，皇太后御正殿，受帝與羣臣朝。宋遣任布、王遵範、陳琰、王克善來賀。乙亥，宋遣鄭向、郭遵範來賀永壽節。丁丑，如雪林。

二月，大蒐。

三月壬申朔，尙父、漆水郡王敵烈復爲惕隱。

是春，皇太后誣齊天皇后以罪，遣人卽上京行弒。后請具浴以就死，許之。有頃，后崩。

夏四月乙巳，清暑別輦斗。

秋七月，獵平地松林。以蕭達溥、王英秀、蕭麓、張素羽充來歲賀宋正旦生辰使。

八月丙午，駐蹕刺河源。皇子洪基生。

冬十月己酉，幸中京。

十一月己卯，帝率羣臣上皇太后尊號曰法天應運仁德章聖皇太后；羣臣上皇帝尊號曰文武仁聖昭孝皇帝。大赦，改元重熙。癸未，宋遣劉隨、王德本來賀應聖節。〔三〕以楊佶爲翰林承旨。丙戌，夏國遣使來賀。辛卯，五國會長來貢。夏國王李德昭薨，冊其子夏國公元昊爲夏國王。

十二月庚戌，宋遣胥偃、王從益、崔暨、張懷志來賀來歲正旦；又遣楊日嚴、王克纂來賀永壽節。〔四〕以北大王耶律求翰同平章事。

是年，放進士劉師貞等五十七人。

二年春正月庚辰，東幸。乙酉，夏國遣使來貢。壬辰，女直詳穩臺押率所部來貢。宋

遣曹琮來告母后劉氏哀，章得象、安繼昌來饋母后遺物。卽遣興聖宮使耶律壽寧、給事中知制誥李奎充祭奠使；天德軍節度使耶律卿寧、大理卿和道亨、河西軍節度使耶律嵩、引進使馬世卿充兩宮弔慰使。

秋七月甲子朔，以耶律寔、高升、耶律迪、王惟允充兩宮賀宋生辰使副，以耶律師古、劉五常充賀宋來歲正旦使副。

八月丁酉，幸溫泉宮。乙卯，遣使閱諸路禾稼。

冬十一月甲申，宋遣劉寶、符忠、李昭述、張茂實等來謝慰奠。〔六〕

十二月乙未，宋遣丁度、王繼凝來賀應聖節。己酉，禁夏國使沿路私市金、鐵。甲寅，宋遣章頻、李懿、王冲睦、張緯、李紘、李繼一來賀永壽節及來歲正旦。庚申，以北府宰相蕭孝先爲樞密使。

三年春正月丁卯，宋使章頻卒，詔有司賻贈，命近侍護喪以歸。辛卯，如春水。二月壬辰朔，〔七〕以北院樞密使蕭普古爲東京留守。戊申，耶律大師奴有侍襁褓恩，詔入屬籍。

夏四月甲寅，振耶迷只部。

五月庚申朔，清暑沿柳湖。是月，皇太后還政于上，躬守慶陵。

六月己亥，以蕭普古爲南院樞密使。

秋七月戊子朔，上始親政，以耶律庶徵、劉六符、耶律睦、薄可久充賀宋來歲正旦使副。〔八〕壬辰，如秋山。

冬十月己未，駐蹕中會川。

十二月，宋遣段少連、杜仁贊來賀來歲正旦，楊偕、李守忠來賀永壽節。

四年春正月庚寅，如耶迷只里。

三月乙酉朔，立皇后蕭氏。

夏四月甲寅朔，如涼陁。

五月庚子，清暑散水源。

六月癸丑朔，皇子寶信奴生。以耶律信、呂士宗、蕭袞、郭揆充賀宋生辰及來歲正旦使副。

秋七月壬午朔，獵于黑嶺。

九月己酉，駐蹕長寧淀。

冬十月，如王子城。

十一月壬午，改南京總管府爲元帥府。乙酉，行柴冊禮于白嶺，大赦。加尙父耶律信寧、政事令耶律求翰耆宿贊翊功臣。

十二月癸丑，詔諸軍砲、弩、弓、劍手以時閱習。庚申，宋遣鄭戩、柴貽範、楊日華、張士禹來賀永壽節及正旦。

五年春正月甲申，如魚兒灤。樞密使蕭延寧請改國舅乙室小功帳敝史爲將軍，從之。

夏四月庚申，以路王查葛爲南府宰相，崇德宮使耶律馬六爲惕隱。甲子，幸后弟蕭無曲第，曲水泛觴賦詩。丁卯，頒新定條制。己巳，上與大臣分朋擊鞠。

五月甲午，南幸。丁未，如胡土白山消暑。庚申，幸北院大王高十行帳拜輿，賜銀絹。壬戌，詔修南京宮闕府署。

秋七月辛丑，錄囚。耶律把八誣其弟韓哥謀殺己，有司奏當反坐。臨刑，其弟泣訴：「臣惟一兄，乞貸其死。」上憫而從之。

九月癸巳，獵黃花山，獲熊三十六，賞獵人有差。

冬十月丁未，幸南京。辛亥，曲赦析津府境內囚。壬子，御元和殿，以日射三十六熊

賦、幸燕詩試進士于廷；賜馮立、趙徽四十九人進士第。以馮立爲右補闕，趙徽以下皆爲太子中舍，賜緋衣、銀魚，遂大宴。御試進士自此始。宋遣宋郊、王世文來賀永壽節。〔九〕甲子，宰臣張儉等請幸禮部貢院，歡飲至暮而罷，賜物有差。以耶律祥、張素民、耶律甫、王澤充賀宋生辰正旦使副。

六年春正月丁丑，西幸。

三月戊寅，以秦王蕭孝穆爲北院樞密使，徙封吳王；晉王蕭孝先爲南京留守。

夏四月，獵野狐嶺。

閏月，獵龍門縣西山。

五月己酉，清暑炭山。以耶律韓八爲北院大王，蕭把哥左夷離畢，王子郎君詳穩鼻姑得林牙，簽北面事耶律涅哥同簽點檢司。甲寅，錄囚。以南大王耶律信寧故匿重囚及侍婢賊污，命撻以劍脊而奪其官；都監坐阿附及侍婢罪，皆論死，詔貸之。丙辰，以耶律信寧爲西南路招討使。庚申，出飛龍厩馬，賜皇太弟重元及北、南面侍臣有差。癸亥，以上京留守耶律胡覩袞爲南大王，平章事蕭查刺寧上京留守，侍中管寧行宮都部署，耶律蒲奴寧烏古迪烈得都詳穩。甲子，以上京留守耶律洪古爲北院大王。〔一〇〕

六月壬申朔，以善寧爲殿前都點檢，護衛太保耶律合住兼長寧宮使，蕭阿刺里、耶律烏魯幹、耶律和尚、蕭韓家奴、蕭特里、蕭求翰爲各宮都部署。上酒酣賦詩，吳國王蕭孝穆、北宰相蕭撒八等皆屬和，〔二〕夜中乃罷。己卯，祀天地。癸未，賜南院大王耶律胡覩袞命，上親爲製誥詞，并賜詩以寵之。丙申，以北院大王侯哂爲南京統軍使。

秋七月辛丑朔，以北、南樞密院獄空，賞賚有差。壬寅，以皇太弟重元生子，賜詩及寶玩器物，曲赦死罪以下。癸卯，如秋山。

八月己卯，北樞密院言越棘部民苦其酋帥坤長不法，多流亡，詔罷越棘等五國酋帥，以契丹節度使一員領之。

冬十月癸酉，駐蹕石寶岡。

十一月己亥朔，阻卜酋長來貢。辛亥，以契丹行宮都部署蕭惠爲南院樞密使。壬子，以管寧爲南院樞密使，〔三〕蕭掃古諸行宮都部署，耶律裏里知南面行宮副部署，蕭阿刺里左祇候郎君詳穩，耶律曷主右祇候郎君詳穩。庚申，幸晉國公主行帳視疾。封皇子洪基爲梁王。

十二月，以楊佶爲忠順軍節度使。遣耶律幹、秦鑑、耶律德、崔繼芳賀宋生辰及正旦。

七年春正月戊戌朔，宋遣高若訥、夏元正、謝絳、張茂實來賀正旦及永壽節。辛丑，如混同江。

二月庚午，如春州。乙亥，駐蹕東川。丁丑，高麗遣使來貢。壬午，幸五坊閱鷹鶻。乙酉，遣使慶州問安皇太后。

三月戊戌朔，幸皇太弟重元行帳。壬寅，如蒲河淀。辛亥，夏國遣使來貢。甲寅，錄囚。

夏四月己巳，以興平公主薨，遣北院承旨耶律庶成持詔問夏國王李元昊，公主生與元昊不睦，沒，詰其故。己卯，獵白馬塢。甲申，射兔新淀井。乙未，獵金山，遣楊家進鹿尾茸于大安宮。

六月乙亥，御清涼殿試進士，賜邢彭年以下五十五人第。

秋七月甲辰，錄囚。乙巳，阻卜酋長屯禿古斯來朝。戊申，如黑嶺。

九月丁未，駐蹕平淀。

冬十月甲子朔，渡遼河。丙寅，駐蹕白馬淀。壬申，錄囚。

十一月癸巳朔，以耶律元方、張泥、韓至德、蕭傅充賀宋生辰正旦使副。辛丑，問安皇太后，進珍玩。庚申，錄囚。

十二月，召善擊鞠者數十人于東京，令與近臣角勝，上臨觀之。己巳，以皇太弟重元判北南院樞密使事，北府宰相撒八寧再任兼知東京留守事，耶律應穩南府宰相，查割折大內惕隱，乙室已帳蕭翰乾州節度使，劉六符參知政事，王子帳冠哥王子郎君詳穩，鈕審大王平州節度使，宰臣張克恭守司空，宰臣韓紹芳加侍中，惕隱耶律馬六北院宣徽使，傅父耶律喜孫南府宰相。癸未，宋遣王舉正、張士禹來賀永壽節。甲申，命日進酒于大安宮，致薦慶陵。丁亥，錄囚。非故殺者減科。南面侍御壯骨里詐取女直貢物，罪死；上以有吏能，鯨而流之。

八年春正月壬辰朔，宋遣韓琦、王從益來賀。丙申，如混同江觀漁。戊戌，振品部。庚戌，又魚于率沒里河。丁巳，禁朔州鬻羊于宋。

二月丙子，駐蹕長春河。

夏六月乙丑，詔括戶口。

秋七月丁巳，謁慶陵，致奠于望仙殿；迎皇太后至顯州，謁園陵，還京。

冬十月，駐蹕東京。

十一月甲午，詔有言北院處事失平，擊鐘及邀駕告者，悉以奏聞。戊戌，朝皇太后，召

僧論佛法。戊申，皇太后行再生禮，大赦。己酉，城長春。

閏十二月壬辰，視吳國王蕭孝穆疾。宋遣龐籍、杜贊來賀永壽節。

九年春正月丙辰朔，上進酒于皇太后宮，御正殿。宋遣王拱辰、彭再思來賀。庚申，如鴨子河。

二月，駐蹕魚兒濼。

三月辛未，以應聖節，大赦。

五月乙卯朔，清暑永安山。

六月，射柳祈雨。

秋七月癸酉，宋遣郭禎以伐夏來報，〔二五〕遣樞密使杜防報聘。〔二六〕丁丑，如秋山。

冬十月癸未朔，駐蹕中會川。

十一月甲子，女直侵邊，發黃龍府鐵驪軍拒之。宋遣蘇伸、向傳範來賀應聖節。〔二七〕

十二月庚寅，以北大王府布猥帳郎君自言先世與國聯姻，許置敝史，命本帳蕭胡覩爲之。辛卯，以所得女直戶置肅州。以蕭迪、劉三嘏、耶律元方、王惟吉、耶律庶忠、孫文昭、蕭紹筠、秦德昌充賀宋生辰及來歲正旦使副。詔諸犯法者，不得爲官吏。諸職官非婚祭，

不得沉酗廢事。有治民安邊之略者，悉具以聞。

校勘記

- 〔一〕放進士劉貞等五十七人 羅校謂是次年放進士劉師貞等五十七人之複出。
- 〔二〕八月壬午 壬午，遼文匯五聖宗哀冊作壬寅。
- 〔三〕遣工部尙書高德順致先帝遺物于宋 高德順，長編作蕭德順。
- 〔四〕宋遣王德本來賀應聖節 王德本，長編作王德基。此避道宗洪基名改。
- 〔五〕又遣王克纂來賀永壽節 王克纂，長編作王克基。此避道宗洪基名改。
- 〔六〕宋遣劉寶符忠來謝慰奠 劉寶，長編作劉賽。符忠，長編作符惟忠。
- 〔七〕二月壬辰朔 朔字，據朔考補。
- 〔八〕以耶律庶徵至充賀宋來歲正旦使副 庶徵，長編作庶幾。又按長編庶幾、六符爲賀乾元節使副，此脫「生辰」二字。
- 〔九〕宋遣宋郊來賀永壽節 宋郊，長編作宋祁。
- 〔一〇〕以上京留守耶律洪古爲北院大王 按卷九五本傳，洪古作弘古，本年由上京留守遷南院大王。又弘古字胡覲董，此與上文以上京留守耶律胡覲袞爲南大王係一事重出，北院應作南院。

〔二〕吳國王蕭孝穆北宰相蕭撒八等皆屬和撒八，原誤「八撒」。按卷八一蕭孝忠傳：「字撒板，……太平中擢北府宰相，重熙七年爲東京留守。」撒八卽撒板之異譯。據改。下文重熙七年十二月「北府宰相撒八寧再任兼知東京留守事」，亦卽此人。

〔三〕辛亥以契丹行宮都部署蕭惠爲南院樞密使及壬子以管寧爲南院樞密使。按連日以一官任二人，不合。檢上文本年五月，以侍中管寧爲行宮都部署，卷九三蕭惠傳云：「興宗卽位，兼侍中」，「重熙六年，復爲契丹行宮都部署」，「徙王趙，拜南院樞密使」，是管寧卽蕭惠，一事重出。

〔三〕耶律元方張泥韓至德蕭傅。長編作耶律九方、張渥、韓志德、蕭溥。

〔四〕耶律應穩南府宰相至耶律喜孫南府宰相。按一官同時任二人，不合。卷九七耶律喜孫傳，字盈隱。應穩卽盈隱異譯，一事重出。

〔五〕宋遣郭禎以伐夏來報。郭禎，長編作郭禎。

〔六〕遣樞密使杜防報聘。樞密使，卷八六本傳作樞密副使，長編作「契丹遣工部尙書、修國史杜防來聘」。

〔七〕宋遣蘇伸來賀應聖節。蘇伸，長編作蘇紳。

遼史卷十九

本紀第十九

興宗二

十年春正月辛亥朔，宋遣梁適、張從一、富弼、趙日宣來賀。甲子，復遣吳育、馮戴來賀永壽節。

二月庚辰朔，詔蒲盧毛朶部歸曷蘇館戶之沒入者使復業。甲申，北樞密院言，南、北二王府及諸部節度侍衛祇候郎君，皆出族帳，既免與民戍邊，其祇候事，請亦得以部曲代行。詔從其請。

夏四月，詔罷修鴨綠江浮梁及漢兵屯戍之役。又以東京留守蕭撒八言，弛東京擊鞠之禁。

六月戊寅朔，蕭寧、耶律坦、崔禹稱、馬世良、耶律仁先、劉六符充賀宋生辰使副；

耶律庶成、趙成、耶律烈、張旦充來歲賀宋正旦使副。

秋七月壬戌，詔諸職官私取官物者，以正盜論。諸敢以先朝已斷事相告言者，罪之。諸帳郎君等於禁地射鹿，決三百，不徵償；小將軍決二百以下；及百姓犯者，罪同郎君論。

八月丙戌，以醫者鄧延貞治詳穩蕭留寧疾驗，贈其父母官以獎之。

九月辛亥，朝皇太后。國舅留寧薨。庚申，皇太后射獲熊，上進酒爲壽。癸亥，上獵馬孟山，草木蒙密，恐獵者誤射傷人，命耶律迪姑各書姓名于矢以志之。丙寅，夏國獻宋俘。以石硬砮太保郭三避虎不射，三免官。

冬十月丙戌，詔東京留守蕭孝忠察官吏有廉幹清強者，具以名聞。庚寅，以女直太師臺押爲曷蘇館都大王。辛卯，以皇子胡盧幹里生，北宰相、駙馬撒八寧迎上至其第宴飲，上命衛士與漢人角觝爲樂。壬辰，復飲皇太后殿，以皇子生，肆赦。夕，復引公主、駙馬及內族大臣入寢殿劇飲。甲午，幸中京。庚子，以駙馬都尉蕭忽列爲國舅詳穩。

十一月丙辰，回鶻遣使來貢。

十二月丙子朔，宋遣劉沆、王整來賀應聖節。乙未，置撻朮不姑會長。以胡撻刺爲平章事。上聞宋設關河，治壕塹，恐爲邊患，與南、北樞密吳國王蕭孝穆、趙國王蕭貫寧謀取宋舊割關南十縣地，三遂遣蕭英、劉六符使宋。四庚寅，宋遣張沔、侯宗亮、薛申、侍其濬、

施昌言、潘永照來賀永壽節及來歲正旦。以宣政殿學士楊佖爲吏部尙書、判順義軍節度使事。〔五〕丁酉，議伐宋，詔諭諸道。

十一年春正月戊申，奉迎皇太后于內殿。庚戌，遣南院宣徽使蕭特末、翰林學士劉六符使宋，取晉陽及瓦橋以南十縣地；且問興師伐夏及沿邊疏濬水澤，增益兵戍之故。

二月壬寅，如鴛鴦灤。

夏四月甲戌朔，頒南征賞罰令。

六月乙亥，宋遣富弼、張茂實奉書來聘，以書答之。壬午，御含涼殿，放進士王寔等六十四人。禁氈、銀鬻入宋。

秋七月壬寅朔，詔盜易官馬者減死論。外路官勤瘁正直者，考滿代；不治事者卽易之。

八月丙申，宋復遣富弼、張茂實奉書來聘，乞增歲幣銀絹，以書答之。

九月壬寅，遣北院樞密副使耶律仁先、漢人行宮副部署劉六符使宋約和。是時，富弼爲上言，大意謂遼與宋和，坐獲歲幣，則利在國家，臣下無與；與宋交兵，則利在臣下，害在國家。上感其言，和好始定。

閏月癸未，耶律仁先遣人報，宋歲增銀、絹十萬兩、匹，文書稱「貢」，送至白溝；帝喜，宴

羣臣于昭慶殿。是日，振恤三父族之貧者。辛卯，仁先、劉六符還，進宋國誓書。

冬十一月丁亥，羣臣加上尊號曰聰文聖武英略神功睿哲仁孝皇帝，冊皇后蕭氏曰貞懿宣慈崇聖皇后。大赦。梁王洪基進封燕國王。

十二月癸卯，朝皇太后。甲辰，封皇太弟重元子涅魯古爲安定郡王。己酉，以宣獻皇后忌日，上與皇太后素服，飯僧于延壽、憫忠、三學三寺。辛亥，詔蠲預備伐宋諸部租稅一年。壬子，以吐渾、党項多鬻馬夏國，詔謹邊防。己未，宋遣賀正旦及永壽節使居邸，帝微服往觀。丁卯，禁喪葬殺牛馬及藏珍寶。

十二年春正月辛未，遣同知析津府事耶律敵烈、樞密院都承旨王惟吉諭夏國與宋和。壬申，以吳國王蕭孝穆爲南院樞密使，北府宰相蕭孝忠北院樞密使，封楚王，韓國王蕭惠北府宰相、同知元帥府事，韓八南院大王，〔六〕耶律侯哂東京留守，〔七〕北院樞密副使耶律仁先同知東京留守事，〔八〕北面林牙蕭革北院樞密副使。甲戌，如武清寨葦淀。

二月壬寅，禁關南漢民弓矢。己酉，夏國以加上尊號，遣使來賀。甲寅，耶律敵烈等使夏國還，奏元昊罷兵，卽遣使報宋。

三月辛卯，幸南京。壬辰，高麗國以加上尊號，遣使來賀。

夏四月己亥，置回跋部詳穩、都監。庚子，夏國遣使進馬、駝。

五月辛卯，幹魯、蒲盧毛朶部二使來貢失期，宥而遣還。乙未，詔復定禮制。是月，幸山西。

六月丙午，詔世選宰相、節度使族屬及身為節度使之家，許葬用銀器，仍禁殺牲以祭。庚戌，詔漢人宮分戶絕，恆產以親族繼之。辛亥，阻卜大王屯禿古斯弟太尉撒葛里來朝。丙辰，回鶻遣使來貢。甲子，以南院樞密使吳國王蕭孝穆為北院樞密使，徙封齊國王。

秋七月丙寅朔，北院樞密使蕭孝忠薨，特釋繫囚。庚寅，夏國遣使上表，請伐宋，不從。八月丙申，謁慶陵。辛丑，燕國王洪基加尙書令，知北南院樞密使事，進封燕趙國王。戊午，以前西北路招討使蕭塔烈葛為右夷離畢。庚申，于越耶律洪古薨。甲子，阻卜來貢。

九月壬申，朝皇太后，謁望仙殿。壬午，謁懷陵。

冬十月丁酉，駐蹕中會川。己亥，北院樞密使蕭孝穆薨，追贈大丞相、晉國王。庚子，詔諸路上重囚，遣官詳讞。辛亥，參知政事韓紹芳為廣德軍節度使，三司使劉六符長寧軍節度使。壬子，以夏人侵党項，遣延昌宮使高家奴讓之。甲子，北府宰相蕭惠為北院樞密使，幽王遂哥為惕隱，惕隱敵魯古封漆水郡王、西北路招討使，樞密副使蕭阿剌同知北院宣徽事。出飛龍廐馬，分賜羣臣。

十一月丁丑，追封楚王蕭孝忠爲楚國王。丁亥，以上京歲儉，復其民租稅。癸巳，朝皇太后。

十二月戊申，改政事省爲中書省。

十三年春正月甲子朔，朝皇太后。戊辰，如混同江。辛未，獵兀魯館岡。

二月庚戌，如魚兒灤。丙辰，以參知政事杜防爲南府宰相。

三月丁亥，高麗遣使來貢。以宣政殿學士楊佖參知政事。是月，置契丹警巡院。

夏四月己酉，遣東京留守耶律侯哂、知黃龍府事耶律歐里斯將兵攻蒲盧毛朶部。甲寅，南院大王耶律高十奏党項等部叛附夏國。丙辰，西南面招討都監羅漢奴、詳穩幹魯母等奏，山西節度使屈烈以五部叛入西夏，乞南、北府兵援送實威塞州戶。詔富者遣行，餘留屯田天德軍。

五月壬戌朔，羅漢奴奏所發部兵與党項戰不利，招討使蕭普達、四捷軍詳穩張佛奴歿于陣。李元昊來援叛黨。戊辰，詔徵諸道兵會西南邊以討元昊。

六月甲午，阻卜會長烏八遣其子執元昊所遣求援使窰邑改來，乞以兵助戰，從之。駐蹕永安山。以將伐夏，遣延昌宮使耶律高家奴告宋。丙申，詔前南院大王耶律谷欲、翰

林都林牙耶律庶成等編集國朝上世以來事蹟。丙午，高麗遣使來貢。丁未，錄囚。

秋七月辛酉，香河縣民李宜兒以左道惑衆，伏誅。庚午，行再生禮。庚辰，夏國遣使來朝。

八月乙未，以夏使對不以情，羈之。丁巳，夏國復遣使來，詢以事宜，又不以實對，答之。

九月戊辰，宋以親征夏國，遣余靖致贐禮。壬申，會大軍于九十九泉，以皇太弟重元、北院樞密使韓國王蕭惠將先鋒兵西征。

冬十月庚寅，祭天地。丙申，獲党項偵人，射鬼箭。丁酉，李元昊上表謝罪。己亥，元昊遣使來奏，欲收叛黨以獻，從之。辛亥，元昊遣使來進方物，詔北院樞密副使蕭革逐之。壬子，軍于河曲。革言元昊親率党項三部來，詔革詰其納叛背盟，元昊伏罪，賜酒，許以自新，遣之。召羣臣議，皆以大軍既集，宜加討伐。癸丑，督數路兵掩襲，殺數千人，駙馬都尉蕭胡覩爲夏人所執。丁巳，元昊遣使以先被執者來歸，詔所留夏使亦還其國。

十一月辛酉，賜有功將校有差。甲子，班師。丁卯，改雲州爲西京。辛巳，朝皇太后。十二月己丑，幸西京。戊戌，以北院樞密副使耶律敵烈爲右夷離畢。己亥，高麗遣使來貢。戊申，蕭胡覩自夏來歸。

十四年春正月庚申，以侍中蕭虛烈爲南院統軍使，封遼西郡王。庚午，如鴛鴦濼。壬午，以金吾衛大將軍敵魯古爲乙室大王。甲申，夏國遣使進鶻。以常侍幹古得戰歿，命其子習羅爲帥。

二月庚子，朝皇太后。駐蹕撒刺濼。

三月己卯，宋以伐夏師還，遣使來賀。

四月辛亥，高麗遣使來貢。

閏五月癸丑，清暑永安山。

六月丁卯，謁慶陵。己卯，阻卜大王屯禿古斯率諸酋長來朝。庚辰，夏國遣使來貢。辛巳，以西南面招討使蕭普達戰歿，贈同中書門下平章事。

秋七月戊申，駐蹕中會川。

冬十月甲子，望祀木葉山。

十一月壬午朔，回鶻阿薩蘭遣使來貢。甲辰，以同知北院宣徽事蕭阿剌爲北府宰相。十二月癸丑，觀漢軍習砲射擊刺。癸亥，決滯獄。

十五年春正月乙酉，如混同江。禁契丹以奴婢鬻與漢人。

二月乙卯，如長春河。丙寅，蒲盧毛朶界曷懶河戶來附，詔撫之。

三月甲申，朝皇太后。乙酉，以應聖節，減死罪，釋徒以下。辛卯，朝皇太后。丁酉，高麗遣使來貢。詔諸道歲具獄訟以聞。

夏四月辛亥朔，二禁五京吏民擊鞠。戊午，罷遙輦帳戍軍。壬戌，以北女直詳穩蕭高六爲奚六部大王。甲子，清暑永安山。甲戌，蒲盧毛朶曷懶河百八十戶來附。

六月癸丑，以西京留守耶律馬六爲漢人行宮都部署，參知政事楊佖出爲武定軍節度使。戊辰，御清涼殿，放進士王棠等六十八人。甲戌，西北路招討使耶律敵魯古坐贓免官。

秋七月乙酉，幽王遂哥薨。戊子，觀穫。乙未，以北院宣徽使旅墳爲左夷離畢，前南府宰相耶律喜孫東北路詳穩。丙申，籍諸路軍。丁酉，如秋山。辛丑，禁扈從踐民田。丁未，以女直部長遮母率衆來附，加大師。

八月癸丑，高麗王欽薨，二遣使來告。

九月甲辰，禁以罝網捕狐兔。

冬十月己酉，駐蹕中會川。

十一月丁亥，以南院樞密使蕭孝友爲北府宰相，契丹行宮都部署耶律仁先南院大王，

北府宰相蕭革同知北院樞密使事，知夷離畢事耶律信先漢人行宮都部署，左夷離畢旅墳惕隱，漢人行宮都部署耶律敵烈左夷離畢。己亥，渤海部以契丹戶例通括軍馬。乙巳，振南京貧民。

十二月壬申，曲赦徒以下罪。是日爲聖宗在時生辰。

校勘記

〔一〕六月戊寅朔 朔字，據朔考補。

〔二〕石硬砦太保 硬砦太保卽硬寨太保，官名，見百官志一及紀保大三年四月，「石」字衍。

〔三〕趙國王蕭貫寧 按蕭貫寧卽蕭惠，卷九三有傳。上文六年五月、十一月並作管寧。

〔四〕遂遣蕭英劉六符使宋 按明年正月，遣南院宣徽使蕭特末、翰林學士劉六符使宋，取晉陽及瓦

橋以南十縣地，與此爲一事。英卽特末漢名。此記定議遣使，明年正月成行。

〔五〕判順義軍節度使事 義，原誤「度」。順義爲朔州軍號。據地理志五及卷八九楊佖傳改。

〔六〕韓八南院大王 卷九一本傳作北院大王，是。

〔七〕耶律侯晒東京留守 侯，原誤「遼」。據下文及卷九二本傳改。

〔八〕同知東京留守事 卷九六本傳作同知南京留守事。

〔九〕烏八遣其子執元昊所遣求援使窰邑改來 求，原誤「來」。據屬國表改。


〔一〇〕四月辛亥 「四月」二字原脫。朔考三月丁巳朔，無辛亥；四月丁亥朔，辛亥爲二十五日。檢屬國表高麗來貢正在四月，據補。

〔一一〕六月丁卯 「六月」二字原脫。朔考閏五月丙戌朔，無丁卯；六月乙卯朔，丁卯爲十三日。檢屬國表阻卜來貢正在六月，據補。

〔一二〕辛巳 原誤「辛亥」。按六月乙卯朔，無辛亥。庚辰之後，七月之前，只有辛巳，據改。

〔一三〕夏四月辛亥朔 朔字，據朔考補。

〔一四〕高麗王欽薨 卷一一五高麗外記同。按高麗史五，欽立于辛未（遼景福元年），卒于甲戌（重熙三年）。卒于本年（丙戌、重熙十五年）之高麗王是亨，非欽。



遼史卷二十

本紀第二十

興宗三

十六年春正月己卯，如混同江。

二月庚申，如魚兒濼。辛酉，禁羣臣遇宴樂奏請私事。詔世選之官，從各部耆舊擇材能者用之。

三月丁亥，如黑水濼。癸巳，遣使審決雙州囚。壬寅，大雪。

夏四月乙巳朔，皇太后不豫，上馳往視疾。丙午，皇太后愈，復如黑水濼。丁卯，肆赦。六月戊申，清暑永安山。丁巳，阻卜大王屯禿古斯來朝，獻方物。戊午，詔士庶言事。秋七月辛卯，幸慶州。自是月至于九月，日射獵于楚不溝霞列、繫輪、石塔諸山。

冬十月辛亥，幸中京謁祖廟。丙辰，定公主行婦禮於舅姑儀。庚午，鐵驪仙門來朝，以

始入貢，加右監門衛大將軍。

十一月戊寅，祠木葉山。己丑，幸中京，朝皇太后。壬辰，禁漏泄宮中事。

十二月辛丑朔，女直遣使來貢。辛亥，謁太祖廟，觀太宗收晉圖。癸丑，問安皇太后。乙卯，以太后愈，雜犯死罪減一等論，徒以下免。庚申，南府宰相杜防、韓紹榮奏事有誤，各以大杖決之。出防爲武定軍節度使。壬戌，高麗遣使來貢。

十七年春正月丁亥，如春水。

閏月癸丑，射虎于候里吉。

二月辛巳，振瑤穩、嘲穩部。是月，詔士庶言國家利便，不得及己事，奴婢所見，許白其主，不得自陳。夏國王李元昊薨，其子諒祚遣使來告，卽遣永興宮使耶律裏里、右護衛太保耶律興老、將作少監王全慰奠。

三月癸卯，以同知南京留守事蕭塔烈葛爲左夷離畢，知右夷離畢事唐古爲右夷離畢。丙午，夏國李諒祚遣使上其父元昊遺物。丁卯，鐵不得國使來，乞以本部軍助攻夏國，不許。

夏四月辛未，武定軍節度使杜防復爲南府宰相。丙子，高麗遣使來貢。甲申，蒲盧毛

朶部大王蒲輦以造舟人來獻。

六月庚辰，阻卜獻馬、駝二萬。辛卯，長白山太師柴葛、回跋部太師撒刺都來貢方物。

秋七月丁未，于越摩梅欲之子不葛一及婆離八部夷離董虎馘等內附。甲寅，錄囚，減雜犯死罪。

八月丙戌，復南京貧戶租稅。戊子，以殿前都點檢耶律義先爲行軍都部署，忠順軍節度使夏行美副部署，東北面詳穩耶律朮者爲監軍，〔二〕伐蒲奴里會陶得里。

冬十月甲申，南院大王耶律韓八薨。甲午，駐蹕獨盧金。

十一月乙未朔，遣使括馬。丁巳，賜皇太弟重元金券。封皇子和魯幹爲越王，阿璉許王，忠順軍節度使謝家奴陳王，西京留守貼不漢王，惕隱旅墳遼西郡王，行宮都部署別古得柳城郡王，〔三〕奉陵軍節度使侯古饒樂郡王，安定郡王涅魯古進封楚王。

十八年春正月甲午朔，日有食之。戊戌，留夏國賀正使不遣。己亥，遣北院樞密副使蕭惟信以伐夏告宋。辛丑，錄囚。丙午，如鴛鴦灤。丙辰，獵霸特山。耶律義先奏蒲奴里捷。

二月庚辰，幸燕趙國王洪基帳視疾。乙酉，耶律義先等執陶得里以獻。

三月乙巳，高昌國遣使來貢。壬子，以洪基疾愈，赦雜犯死罪以下。丁巳，烏古遣使送款。

夏四月癸酉，以南府宰相耶律高十爲南京統軍使。

五月甲辰，五國會長各率其部來附。庚戌，回跋部長兀迭臺扎等來朝。戊午，五國節度使耶律仙童以降烏古叛人，授左監門衛上將軍。

六月壬戌朔，以韓國王蕭惠爲河南道行軍都統，趙王蕭孝友、漢王貼不副之。乙丑，錄囚。丙寅，行十二神纛禮。己巳，宋以遼師伐夏，遣錢逸致贐禮。庚辰，阻卜來貢馬、駝、珍玩。辛巳，夏國使來貢，留之不遣。丁亥，行再生禮。

秋七月戊戌，親征。

八月辛酉朔，渡河。夏人遁，乃還。

九月丁未，蕭惠等爲夏人所敗。

冬十月，北道行軍都統耶律敵魯古率阻卜諸軍至賀蘭山，獲李元昊妻及其官僚家屬，遇夏人三千來戰，殪之；烏古敵烈部都詳穩蕭慈氏奴、南剋耶律幹里死焉。

十二月戊寅，慶陵林木火。己卯，錄囚。有弟從兄爲強盜者，兄弟俱無子，特原其弟。

十九年春正月庚寅，僧惠鑑加檢校太尉。庚子，耶律敵魯古復封漆水郡王，諸將校及阻卜等部酋長各進爵有差。贈蕭慈氏奴同中書門下平章事。辛丑，遣使問罪于夏國。壬寅，如魚兒濼。

二月丁亥，夏將注普、猥貨、乙靈紀等來攻金肅城，南面林牙耶律高家奴等破之。注普被創遁去，殺猥貨、乙靈紀。

三月戊戌，殿前都點檢蕭迭里得與夏戰于三角川，敗之。癸卯，命西南招討使蕭蒲奴、北院大王宜新、林牙蕭撒抹等帥師伐夏，以行宮都部署別古得監戰。甲辰，遣同知北院樞密使蕭革按軍邊城，以爲聲援。己酉，駐蹕息雞淀。丙辰，幸殿前都點檢蕭迭里得、駙馬都尉蕭胡覩帳視疾。

夏四月丙寅，如魚兒濼。壬申，蒲盧毛朶部惕隱信篤來貢。甲申，高麗遣使來貢。

五月己丑，如涼陁。癸巳，蕭蒲奴等入夏境，不與敵遇，縱軍俘掠而還。丁酉，夏國注普來降。己亥，遠夷拔思母部遣使來貢。

六月丙辰朔，置倒塌嶺都監。丙寅，謁慶陵。庚午，幸慶州，謁大安殿。壬申，詔醫卜、屠販、奴隸及倍父母或犯事逃亡者，不得舉進士。回跋、曷蘇館、蒲盧毛朶部各遣使貢馬。甲戌，宋遣使來賀伐夏捷，高麗使俱至。辛巳，御金鑾殿試進士。

秋七月壬辰，駐蹕括里蒲盃。癸巳，以燕趙國王洪基領北南樞密院。乙未，阻卜長豁得刺弟幹得來朝，加太尉遣之。戊戌，錄囚。戊申，以左夷離畢蕭唐古爲北院樞密副使。壬子，獵候里吉。

八月丁卯，阻卜會長喘只葛拔里斯來朝。

九月壬寅，夏人侵邊，敵魯古遣六院軍將海里擊敗之。

冬十月庚午，還上京。辛未，夏國王李諒祚母遣使乞依舊稱藩。使還，詔諭別遣信臣詣闕，當徐思之。壬申，釋臨潢府役徒。甲戌，如中會川。

十一月甲午，阻卜會長豁得刺遣使來貢。庚戌，錄囚。壬子，出南府宰相韓知白爲武定軍節度使，樞密副使楊績長寧軍節度使，翰林學士王綱澤州刺史，張宥徽州刺史，知制誥周白海北州刺史。

閏月乙卯，以漢王貼不爲中京留守。辛未，以同知北院樞密使事蕭革爲南院樞密使，南院大王耶律仁先知北院樞密使事，封宋王。〔五〕

十二月丁亥，北府宰相、趙王蕭孝友出爲東京留守，東京留守蕭塔列葛爲北府宰相，南院樞密使、潞王查葛爲南院大王。庚戌，韓國王蕭惠徙封魏王，致仕。壬子，夏國王諒祚遣使上表，乞依舊臣屬。

二十年春正月戊戌，駐蹕混同江。

二月甲申，遣前北院都監蕭友括等使夏國，索党項叛戶。己丑，如蒼耳濼。甲辰，吐蕃遣使來貢。

三月壬子朔，幸黑水。

夏五月癸丑，蕭友括等使夏還，李諒祚母表乞如党項權進馬、駝、牛、羊等物。己巳，夏國遣使求唐隆鎮及乞罷所建城邑，以詔答之。

六月丙戌，詔以所獲李元昊妻及前後所俘夏人，安置蘇州。以伐夏所獲物遣使遺宋。秋七月，如秋山。

九月，詔更定條制。駐蹕中會川。

冬十月己卯朔，括諸道軍籍。

十一月庚申，以惕隱都監蕭謨魯爲左夷離畢。甲子，命東京留守司總領戶部、內省事。丁卯，罷中丞記錄職官過犯，令承旨總之。

十二月乙酉，以皇太后行再生禮，肆赦。

二十一年春正月辛亥，如混同江。

二月，如魚兒灤。

夏四月癸未，以國舅詳穩蕭阿剌爲西北路招討使，封西平郡王。

六月丙子，駐蹕永安山。

秋七月甲辰朔，召北府宰相蕭塔烈葛、南府宰相漢王貼不、南院樞密使蕭革、知北院樞密使事仁先等，賜坐，論古今治道。戊申，祀天地。己酉，詔北、南樞密院，日再奏事。壬子，

追尊太祖之祖爲簡獻皇帝，廟號玄祖，祖妣爲簡獻皇后；太祖之考爲宣簡皇帝，廟號德祖，妣爲宣簡皇后。追封太祖伯父夷離堇巖木爲蜀國王，于越釋魯爲隋國王。以燕趙國王洪基爲天下兵馬大元帥、知惕隱事，賜詔諭之。癸亥，近侍小底盧寶僞學御書，免死，配役終身。甲子，如秋山。戊辰，謁慶陵。以南院樞密使蕭革爲北院樞密使，封吳王。辛未，如慶州。壬申，追封太祖弟寅底石爲許國王。

八月戊子，太尉烏者薨，詔配享聖宗廟。九月乙卯，平州進白兔。己未，謁懷陵。庚申，追上嗣聖皇帝、天順皇帝尊諡，及更諡彰德皇后曰靖安。癸亥，諡齊天皇后曰仁德皇后。甲子，謁祖陵。增太祖諡大聖大明神烈天皇帝，更諡貞烈皇后曰淳欽，恭順皇帝曰章肅，后蕭氏諡曰和敬。

冬十月戊寅，駐蹕中會川。丁亥，夏國李諒祚遣使乞弛邊備，卽遣蕭友括奉詔諭之。戊子，幸顯、懿二州。甲午，遼興軍節度使蕭虛烈封鄭王，南院大王、潞王查葛爲南院樞密使，進封越國王。〔三〕戊戌，射虎于南撒葛柏。辛丑，謁乾陵。

十一月壬寅朔，增諡文獻皇帝爲文獻欽義皇帝，及諡二后曰端順，曰柔貞。復更諡世宗孝烈皇后爲懷節。丁未，增孝成皇帝諡曰孝成康靖皇帝，更諡聖神宣獻皇后爲睿智。甲子，次中會川。回鶻阿薩蘭遣使貢名馬、文豹。丙寅，錄囚。

十二月戊戌，以北府宰相塔烈葛爲南京統軍使，鄭王虛烈北府宰相，契丹行宮都部署耶律義先惕隱。釋役徒限年者。

二十二年春正月乙巳，如混同江。

二月丙子，回鶻阿薩蘭爲隣國所侵，遣使求援。庚辰，如春水。

三月癸亥，李諒祚以賜詔許降，遣使來謝。丙寅，如黑水濼。

夏四月戊子，獵鶴淀。

五月壬寅，詔內地州縣植果。

六月壬申，駐蹕胡呂山。癸未，高麗遣使來貢。

秋七月己酉，阻卜大王屯禿古斯率諸部長獻馬、駝。庚申，如黑嶺。

閏月庚午，烏古來貢。癸巳，長春州置錢帛司。

九月壬辰，夏國李諒祚遣使進降表。甲午，遣南面林牙高家奴等奉詔撫諭。

冬十月丙申朔，日有食之。

十一月辛卯，詔諸職事官以禮受代及以罪去者置籍，歲申樞密院。

十二月丙申朔，詔回鶻部副使以契丹人充。庚子，應聖節，曲赦徒以下罪。壬子，詔大

臣曰：「朕與宋主約爲兄弟，歡好歲久，欲見其繪像，可諭來使。」

二十三年春正月己巳，如混同江。癸酉，獵雙子淀。戊子，夏國遣使貢方物。壬辰，如

春水。甲午，獵盤直坡。

三月丁亥，幸皇太弟重元帳。

夏四月癸卯，高麗遣使來貢。癸丑，獵合只忽里。

五月己巳，李諒祚乞進馬、駝，詔歲貢之。庚寅，駐蹕永安山。壬辰，夏國遣使來貢。

六月丙申，如慶州。己亥，謁慶陵。壬寅，高麗王徽請官其子，詔加檢校太尉。辛亥，

吐蕃遣使來貢。

秋七月己巳，夏國李諒祚遣使來求婚。甲戌，如秋山。己卯，詔八房族巾幘。

九月庚寅，獵，遇三虎，縱犬獲之。

冬十月丁酉，駐蹕中京。戊戌，幸新建祕書監。辛丑，有事于祖廟。癸丑，以開泰寺鑄銀佛像，曲赦在京囚。丙辰，李諒祚遣使進誓表。

十一月乙丑，阻卜部長來貢。壬申，帝率羣臣上皇太后尊號曰仁慈聖善欽孝廣德安靜貞純懿和寬厚崇覺儀天皇太后，大赦。內外官進級有差。癸未，錄囚。甲申，羣臣上皇帝尊號曰欽天奉道祐世興曆武定文成聖神仁孝皇帝，冊皇后蕭氏曰貞懿慈和文惠孝敬廣愛崇聖皇后。

十二月丙申，如中會川。

二十四年春正月癸亥，如混同江。戊辰，朝皇太后。辛巳，宋遣使來賀，饋馴象。

二月己丑朔，召宋使釣魚、賦詩。癸巳，如長春河。甲寅，夏國遣使來賀。

三月癸亥，皇太弟重元生子，曲赦行在及長春、鎮北二州徒以下罪。

夏五月，駐蹕南崖。

秋七月壬午，如秋山。次南崖之北峪，不豫。

八月丁亥，疾大漸，召燕趙國王洪基，諭以治國之要。戊子，大赦，縱五坊鷹鶻，焚鈞魚之具。己丑，帝崩于行宮，年四十。遺詔燕趙國王洪基嗣位。清寧元年十月庚子，上尊諡爲神聖孝章皇帝，廟號興宗。

贊曰：興宗卽位年十有六矣，不能先尊母后而尊其母，以致臨朝專政，賊殺不辜，又不能以禮幾諫，使齊天死於弑逆，有虧王者之孝，惜哉！若夫大行在殯，飲酒博鞠，疊見簡書。及其謁遺像而哀慟，受宋弔而衰絰，所爲若出二人。何爲其然歟？至於感富弼之言而申南宋之好，許諒祚之盟而罷西夏之兵，邊鄙不聳，政治內修，親策進士，大修條制，下至士庶，得陳便宜，則求治之志切矣。于時左右大臣，曾不聞一賢之進，一事之諫，欲庶幾古帝王之風，其可得乎？雖然，聖宗而下，可謂賢君矣。

校勘記

〔一〕東北面詳穩耶律朮者爲監軍 按卷九一蕭朮哲傳：「蒲奴里會長陶得里叛，朮哲爲統軍都監，從都統耶律義先討之。」此耶律朮者應是蕭朮哲。

〔二〕行宮都部署別古得 別古得，皇子表作別古特，「行宮都部署」前有「契丹」二字。

〔三〕宋遣錢逸致贐禮。錢逸，長編作錢明逸，宋史三一七有傳。此避穆宗耶律明名改。

〔四〕八月辛酉朔。朔字，據朔考補。

〔五〕南院大王耶律仁先知北院樞密使事封宋王。按卷九六本傳，仁先於重熙間由北院大王遷北院樞密使，封吳王，清寧末始進封宋王。

〔六〕查葛進封越國王。越國，按下文清寧二年十一月作趙國。



遼史卷二十一

本紀第二十一

道宗一

道宗孝文皇帝，諱洪基，（二）字涅鄰，小字查刺。興宗皇帝長子，母曰仁懿皇后蕭氏。六歲封梁王，重熙十一年進封燕國，總領中丞司事。明年，總北南院樞密使事，加尙書令，進封燕趙國王。二十一年爲天下兵馬大元帥，知惕隱事，預朝政。帝性沉靜、嚴毅，每朝，興宗爲之斂容。

二十四年秋八月己丑，興宗崩，卽皇帝位於柩前，哀慟不聽政。辛卯，百僚上表固請，許之。詔曰：「朕以菲德，託居士民之上，第恐智識有不及，羣下有未信，賦斂妄興，賞罰不中；上恩不能及下，下情不能達上。凡爾士庶，直言無諱。可則擇用，否則不以爲愆。卿等

其體朕意。」壬辰，以皇太弟重元爲皇太叔，免漢拜，不名。癸巳，遣使報哀于宋及夏、高麗。甲午，遣重元安撫南京軍民。戊戌，以遺詔，命西北路招討使西平郡王蕭阿剌爲北府宰相，仍權知南院樞密使事，北府宰相蕭虛烈爲武定軍節度使。辛丑，改元清寧，大赦。

九月戊午，詔常所幸圍場外毋禁。庚申，詔除護衛士，餘不得佩刃入宮；非勳戚後及夷離董、副使、承應諸職事人不得冠巾。壬戌，詔夷離董及副使之族并民如賤，〔三〕不得服駝尼、水獺裘，刀柄、兔鶻、鞍勒、珮子不許用犀玉、骨突犀；惟大將軍不禁。乙丑，賜內外臣僚爵賞有差。庚午，尊皇太后爲太皇太后。辛未，遣左夷離畢蕭謨魯、翰林學士韓運以先帝遺物遺宋。〔三〕癸酉，遣使以卽位報宋。丙子，尊皇后爲皇太后，宴敢塗殿。以上京留守宿國王陳留爲南京留守。〔四〕壬午，遣使賜高麗、夏國先帝遺物。

冬十月丁亥，有司請以帝生日爲天安節，從之。以吳王仁先同知南京留守事，陳王塗特爲南府宰相，進封吳王。壬寅，以順義軍節度使十神奴爲南院大王。

十一月甲子，葬興宗皇帝於慶陵。宋及高麗遣使來會。名其山曰永興。丙寅，以南院大王侯古爲中京留守，北府宰相西平郡王蕭阿剌進封韓王。壬申，次懷州。有事於太宗、穆宗廟。甲戌，謁祖陵。戊寅，冬至，有事於太祖、景宗、興宗廟，不受羣臣賀。

十二月丙戌，詔左夷離畢曰：「朕以眇冲，獲嗣大位，夙夜憂懼，恐弗克任。欲聞直言，

以匡其失。今已數月，未見所以副朕委任股肱耳目之意。其令內外百官，比秩滿，各言一事。仍轉諭所部，無貴賤老幼，皆得直言無諱。」戊子，應聖節，上太皇太后壽，宴羣臣、命婦，册妃蕭氏爲皇后。進封皇弟越王和魯幹爲魯國王，許王阿璉爲陳國王，楚王涅魯古徙封吳王。辛卯，詔部署院，事有機密卽奏，其投謗訕書，輒受及讀者并棄市。癸巳，皇族十公悖母，伏誅。甲午，以樞密副使姚景行爲參知政事，翰林學士吳湛爲樞密副使，參知政事、同知樞密院事韓紹文爲上京留守。丙申，宋遣歐陽修等來賀卽位。戊戌，詔設學養士，頒五經傳疏，置博士、助教各一員。癸卯，以知涿州楊績參知政事兼同知樞密院事。庚戌，以聖宗在時生辰，赦上京囚。

是年，御清涼殿放進士張孝傑等四十四人。

二年春正月丙辰，詔州郡官及僚屬決囚，如諸部族例。己巳，詔二女古部與世預宰相、節度使之選者免皮室軍。是月，幸魚兒濼。

二月乙酉，以左夷離畢蕭謨魯知西南面招討都監事。乙巳，以興宗在時生辰，宴羣臣，命各賦詩。

三月丁巳，應聖節，曲赦百里內囚。己卯，御製放鷹賦賜羣臣，諭任臣之意。

閏月己亥，始行東京所鑄錢。乙巳，南京獄空，進留守以下官。

夏四月甲子，詔曰：「方夏，長養鳥獸孳育之時，不得縱火於郊。」

五月戊戌，謁慶陵。甲辰，有事于興宗廟。

六月丁巳，詔宰相舉才能之士。戊午，命有司籍軍補邊戍。辛酉，阻卜會長來朝，貢方

物。丁卯，高麗遣使來貢。辛未，罷史官預聞朝議，俾問宰相而後書。乙亥，中京蝗蝻爲

災。丙子，詔強盜得實者，聽諸路決之。丁丑，南院樞密使趙國王查葛爲上京留守，同知南

京留守事吳王仁先爲南院樞密使。乙酉，遣使分道平賦稅，繕戎器，勸農桑，禁盜賊。

八月辛未，如秋山。

九月庚子，幸中京，祭聖宗、興宗於會安殿。

冬十月丙子，如中會川。

十一月戊戌，知左夷離畢事耶律劃里爲夷離畢，北院大王耶律仙童知黃龍府事。甲辰，

文武百僚上尊號曰天祐皇帝，后曰懿德皇后。大赦。乙巳，以皇太叔重元爲天下兵馬大元

帥，徙封趙國王查葛爲魏國王、魯國王和魯幹爲宋國王、陳國王阿璉爲秦國王，吳王涅魯古

進封楚國王，百官進遷有差。

十二月戊申朔，以韓王蕭阿剌爲北院樞密使，東京留守宿國王陳留北府宰相，宋國王

和魯幹上京留守，秦國王阿璉知中丞司事。甲寅，上皇太后尊號曰慈懿仁和文惠孝敬廣愛宗天皇太后。

三年春正月庚辰，如鴨子河。丙戌，置倒場嶺節度使。乙未，五國部長來貢方物。二月己未，如大魚灤。

三月辛巳，以楚國王涅魯古爲武定軍節度使。

夏四月丙辰，清暑永安山。

五月己亥，如慶陵，獻酎於金殿、同天殿。

六月辛未，以魏國王查葛爲惕隱，同知樞密院事蕭唐古南府宰相，魏國王貼不東京留守。

秋七月甲申，南京地震，赦其境內。乙酉，如秋山。

八月辛亥，帝以君臣同志華夷同風詩進皇太后。

九月庚子，幸中會川。

冬十月己酉，謁祖陵。庚申，謁讓國皇帝及世宗廟。辛酉，奠酎于玉殿。

十一月丙子，以左夷離畢蕭謨魯爲契丹行宮都部署。庚子，高麗遣使來貢。

十二月庚戌，禁職官於部內假貸貿易。戊辰，太皇太后不豫，曲赦行在五百里內囚。己巳，太皇太后崩。

四年春正月壬申朔，遣使報哀于宋、夏。如鴨子河釣魚。癸酉，宋遣使奉宋主繪像來。丁亥，知易州事耶律頗得秩滿，部民乞留，許之。

二月丙午，詔夷離畢諸路鞠死罪，獄雖具，仍令別州縣覆按，無冤，然後決之；稱冤者，卽具奏。庚戌，如魚兒濼。

三月戊寅，募天德、鎮武、東勝等處勇捷者，籍爲軍。〔三〕甲午，肆赦。

夏四月甲辰，謁慶陵。丁卯，宋遣使弔祭。

五月庚午朔，上大行太皇太后尊諡曰欽哀皇后。癸酉，葬慶陵。夏國、高麗遣使來會。乙酉，如永安山清暑。

六月乙丑，以北院樞密使鄭王蕭革爲南院樞密使，徙封楚王，南院樞密使吳王仁先爲北院樞密使。

秋七月辛巳，制諸掌內藏庫官盜兩貫以上者，許奴婢告。壬午，獵于黑嶺。

冬十月戊戌朔，以同知東京留守事侯古爲南院大王，保安軍節度使奚底爲奚六部大

王。

十一月癸酉，行再生及柴冊禮，宴羣臣於八方陂。庚辰，御清風殿受大冊禮。大赦。以吳王仁先爲南京兵馬副元帥，徙封隋王。壬午，謁太祖及諸帝宮。丙戌，祠木葉山。禁造玉器。

十二月辛丑，弛駝尼、水獺裘之禁。乙巳，許士庶畜鷹。辛亥，南院樞密使楚王蕭革復爲北院樞密使。

閏月己巳，賜皇太叔重元金券。是歲，皇子濟生。

五年春，如春州。

夏六月甲子朔，駐蹕納葛濼。己丑，以南院樞密使蕭阿速爲北府宰相，樞密副使耶律乙辛南院樞密使，惕隱查葛遼興軍節度使，魯王謝家奴武定軍節度使，東京留守吳王貼不西京留守。

秋七月丁酉，以烏古敵烈詳穩蕭謨魯爲左夷離畢。冬十月壬子朔，幸南京，祭興宗於嘉寧殿。

十一月，禁獵。

十二月壬戌，以北院林牙奚馬六爲右夷離畢，參知政事吳湛以弟洵冒入仕籍，削爵爲民。

是年，上御百福殿，放進士梁援等百一十五人。

六年春，如鴛鴦澤。

夏五月戊子朔，監修國史耶律白請編次御製詩賦，仍命白爲序。己酉，駐蹕納葛澤。

六月戊午朔，以東北路女直詳穩高家奴爲惕隱。壬戌，遣使錄囚。丙寅，中京置國子監，命以時祭先聖先師。癸未，以隋王仁先爲北院大王，賜御製誥。

冬十月甲子，駐蹕藕絲淀。

七年春三月庚戌，如春州。以耶律乙辛知北院樞密使事。

夏四月辛未，禁吏民畜海東青鶻。

五月丙戌，清暑永安山。丙午，謁慶陵。辛亥，殺東京留守陳王蕭阿剌。

六月壬子朔，日有食之。甲子，以蕭謨魯爲順義軍節度使。丁卯，幸弘義、永興、崇德

三宮致祭。射柳，賜宴，賞賚有差。戊辰，行再生禮，復命羣臣分朋射柳。丁丑，以楚國王 涅魯古知南院樞密使事。

秋九月丁丑，駐蹕藕絲淀。

冬十二月壬午，以知黃龍府事耶律阿里只爲南院大王。

校勘記

〔一〕道宗諱洪基 洪，遼文匯二聖宗欽哀皇后哀册及仁德皇后哀册均作弘。

〔二〕并民如賤 疑「民如」二字倒舛，應作「并如民賤」。

〔三〕左夷離畢蕭謨魯及翰林學士韓運 長編作：右宣徽使、左金吾衛上將軍蕭運，翰林學士、給事中、史館修撰史運。

〔四〕以上京留守宿國王陳留爲南京留守 按卷八七蕭孝友傳，孝友小字陳留，改上京留守，更王秦，頃之，復守東京。檢下文二年又以東京留守宿國王陳留爲北府宰相。則此南京應是東京之訛。

〔五〕鎮武東勝等處 鎮武，應作振武。索隱：「唐朔州軍額本作振武，遼已改爲順義軍，此仍舊名。」東勝，地理志五作勝州。

〔六〕冬十二月壬午 十二，原作「十一」。按十一月庚戌朔，無壬午；十二月庚辰朔，初三日爲壬午。
據改。

遼史卷二十二

本紀第二十二

道宗二

八年春正月癸丑，如鴨子河。

二月，駐蹕納葛濼。

三月戊申朔，楚王蕭革致仕，進封鄭國王。

夏五月，吾獨婉惕隱屯禿葛等乞歲貢馬、駝，許之。

六月丙子朔，駐蹕拖古烈。辛丑，以右夷離畢奚馬六爲奚六部大王。是月，御清涼殿放進士王鼎等九十三人。

秋七月甲子，射熊于外室刺。

冬十月甲戌朔，駐蹕獨盧金。

十二月庚辰，以知北院樞密使事蕭圖古辭爲北院樞密使。癸未，幸西京。戊子，以皇太后行再生禮，曲赦西京囚。

九年春正月辛亥，幸鴛鴦濼。辛未，禁民鬻銅。

三月辛未，宋主禎殂，以姪曙爲子嗣位。

夏五月丙午，以隋王仁先爲南院樞密使，徙封許王。是月，清暑曷里狘。

秋七月丙辰，如太子山。戊午，皇太叔重元與其子楚國王涅魯古及陳國王陳六、同知

北院樞密使事蕭胡覩、衛王貼不、林牙涅刺溥古、統軍使蕭迭里得、駙馬都尉參及弟朮者、

圖骨、旗鼓拽刺詳穩耶律郭九、文班太保奚叔、內藏提點烏骨、護衛左太保敵不古、按答、副

宮使韓家奴、寶神奴等凡四百人，誘脅弩手軍犯行宮。時南院樞密使許王仁先、知北樞密

院事趙王耶律乙辛、南府宰相蕭唐古、北院宣徽使蕭韓家奴、北院樞密副使蕭惟信、敦睦宮

使耶律良等率宿衛士卒數千人禦之。涅魯古躍馬突出，將戰，爲近侍詳穩渤海阿斯、

護衛蘇射殺之。己未，族逆黨家。庚申，重元亡入大漠，自殺。辛酉，詔諭諸道。壬戌，以仁

先爲北院樞密使，進封宋王，加尙父，耶律乙辛南院樞密使，蕭韓家奴殿前都點檢，封荆王。

蕭惟信、耶律馮家奴並加太子太傅。宿衛官蕭乙辛、回鶻海隣、裏里、耶律撻不也、阿斯、宮

分人急里哥、霞抹、乙辛、只魯並加上將軍。諸護衛及士卒、庖夫、弩手、傘子等三百餘人，各授官有差。耶律良密告重元變，命籍橫帳夷離堇房，爲漢人行宮都部署。癸亥，貼不訴爲重元等所脅，詔削爵爲民，流鎮州。戊辰，以黑白羊祭天。

八月庚午朔，遣使安撫南京吏民。癸酉，以永興宮使耶律塔不也有定亂功，爲同知點檢司事。

冬十月戊辰朔，幸興王寺。庚午，以六院部太保耶律合尤知南院大王事。是月，駐蹕藕絲淀。

十一月辛丑，以南院宣徽使蕭九哥爲北府宰相。己未，追封故富春郡王耶律義先爲許王。

是歲，封皇子濬爲梁王。

十年春正月己亥，北幸。

二月，禁南京民決水種粳稻。

秋七月壬申，詔決諸路囚。辛巳，禁僧尼私詣行在，妄述禍福取財物。

九月壬寅，幸懷州，謁太宗、穆宗廟。

冬十月壬辰朔，駐蹕中京。戊午，禁民私刊印文字。

十一月甲子，定吏民衣服之制。辛未，禁六齋日屠殺。丁丑，詔求乾文閣所闕經籍，命儒臣校讐。庚辰，以彰國軍節度使韓謝十爲惕隱。詔南京不得私造御用綵緞，私貨鐵，及非時飲酒。命南京三司，每歲春秋以官錢饗將士。

十二月癸巳，以北院大王蕭兀古匿爲契丹行宮都部署。是歲，南京、西京大熟。

咸雍元年春正月辛酉朔，文武百僚加上尊號曰聖文神武全功大略廣智總仁睿孝天祐皇帝。改元，大赦。冊梁王濬爲皇太子，內外官賜級有差。甲子，如魚兒濼。庚寅，詔諸遇正旦、重午、冬至，別表賀東宮。（三）

三月丁亥，以知興中府事楊績知樞密院事。

夏四月辛卯，以知樞密院事張嗣復疾，改知興中府事。庚子，清暑拖古烈。五月辛巳，夏國遣使來貢。

秋七月丙子，以皇太后射獲熊，賞賚百官有差。

八月丙申，客星犯天廟，詔諸路備盜賊，嚴火禁。

九月乙亥，駐蹕藕絲淀。丁丑，左夷離畢慥古爲孟父斂穰。

冬十月丁亥朔，幸醫巫閭山。己亥，皇太后射獲虎，大宴羣臣，令各賦詩。

十一月壬戌，有星如斗，逆行，隱隱有聲。

十二月甲午，以遼王仁先爲南京留守，徙封晉王。辛亥，以南京留守蕭惟信爲左夷離畢。壬子，熒惑與月並行，自旦至午。

二年春正月丁巳，如鴨子河。宋賀正使王嚴卒，以禮送還。癸未，幸山榆淀。

二月甲午，詔武定軍節度使姚景行，問以治道，拜南院樞密使。

三月辛巳，以東北路詳穩耶律韓福奴爲北院大王。壬午，彗星見於西方。

夏四月，霖雨。

五月乙亥，駐蹕拖古烈。辛巳，以戶部使劉詵爲樞密副使。〔三〕

六月丙戌，回鶻來貢。甲辰，阻卜來貢。

秋七月癸丑朔，以西北路招討使蕭朮者爲北府宰相，左夷離畢蕭惟信南院樞密使，〔四〕同知南院樞密使事耶律白惕隱。丙辰，南院樞密使姚景行致仕。庚申，錄囚。辛酉，景行復前職。丁卯，如藕絲淀。以歲旱，遣使振山後貧民。

九月壬子朔，日有食之。以參知政事韓孚爲樞密副使。

冬十二月壬午，以知樞密院事楊績爲南院樞密使，樞密副使劉詵參知政事。戊子，僧守志加守司徒。丁酉，以西京留守合朮爲南院大王。辛丑，以蕭朮者爲武定軍節度使。

是年，御永安殿放進士張臻等百一人。

三年春正月辛亥，如鴨子河。甲子，御安流殿釣魚。

三月癸亥，宋主曙殂，子頊嗣位，遣使告哀，卽遣右護衛太保蕭撻不也、翰林學士陳覺等弔祭。

閏月丁亥，扈駕軍營火，賜錢、粟及馬有差。辛卯，駐蹕春州北淀。乙巳，以蕭兀古匿爲北府宰相。

夏五月壬辰，駐蹕納葛濼。壬寅，賜隨駕官諸工人馬。

六月戊申，有司奏新城縣民楊從謀反，僞署官吏。上曰：「小人無知，此兒戲爾。」獨流其首惡，餘釋之。庚戌，宋遣使饋其先帝遺物。辛亥，宋以卽位，遣陳襄來報，卽遣知黃龍府事蕭圖古辭、中書舍人馬鉉往賀。壬戌，南府宰相韓王蕭唐古致仕。壬申，以廣德軍節度使耶律藥奴爲南府宰相，度支使趙徽參知政事。

秋七月辛丑，熒惑晝見，凡三十五日。

九月戊戌，詔給諸路囚糧。癸卯，幸南京。

冬十一月壬辰，夏國遣使進回鶻僧、金佛、梵覺經。

十二月丁未，以參知政事劉詵爲樞密副使，東北路詳穩高八南院大王，樞密直學士張孝傑參知政事。己酉，以張孝傑同知樞密院事。丁巳，行再生禮，赦死罪以下。是月，夏國王李諒祚薨。

是歲，南京旱、蝗。

四年春正月甲戌朔，日有食之。丙子，如鴛鴦渚。辛巳，改易州兵馬使爲安撫使。丁亥，獵炭山。辛卯，遣使振西京饑民。

二月甲辰朔，詔元帥府募軍。壬子，夏國王李諒祚子秉常遣使告哀。癸丑，頒行御製華嚴經贊。丁卯，北行。

三月丙子，遣使夏國弔祭。甲申，振應州饑民。乙酉，詔南京除軍行地，餘皆得種稻。庚寅，振朔州饑民。乙未，夏國李秉常遣使獻其父諒祚遺物。

夏四月戊午，阿薩蘭回鶻遣使來貢。

五月丙戌，駐蹕拖古烈。

六月壬子，西北路雨穀，方三十里。丙寅，以北院林牙耶律趙三爲北院大王，右夷離畢蕭素颯中京留守。

秋七月壬申，置烏古敵烈部都統軍司。丙子，獵黑嶺。是月，南京霖雨，地震。

九月己亥，駐蹕藕絲淀。

冬十月辛亥，曲赦南京徒罪以下囚。永清、武清、安次、固安、新城、歸義、容城諸縣水，復一歲租。戊辰，冊李秉常爲夏國王。

十二月辛亥，夏國遣使來貢。

五年春正月，阻卜叛，以晉王仁先爲西北路招討使，領禁軍討之。

夏六月己亥，駐蹕拖古烈。丙午，吐蕃遣使來貢。壬戌，以南院樞密使蕭惟信知北院樞密使事。

秋七月乙丑朔，日有食之。戊辰，夏國遣使來謝封冊。癸未，詔禁皇族恃勢侵漁細民。八月，謁慶陵。

九月戊辰，仁先遣人奏阻卜捷。

冬十月己亥，駐蹕藕絲淀。

十一月丁卯，詔四方館副使止以契丹人充。丁丑，五國剖阿里部叛，命蕭素颯討之。

閏月戊申，夏國王李秉常遣使乞賜印綬。己未，僧志福加守司徒。

十二月甲子，行皇太子再生禮，減諸路徒以下罪一等。乙丑，詔百官廷議國政。甲戌，五國來降，仍獻方物。

六年春正月甲午，如千鵝濼。

二月丙寅，阻卜來朝，貢方物。

夏四月癸未，西北路招討司以所降阻卜酋長至行在。

五月甲辰，清暑拖古烈。甲寅，設賢良科，詔應是科者，先以所業十萬言進。

六月辛巳，阻卜來朝。乙酉，以惕隱耶律白爲中京留守。是月，御永安殿放進士趙廷睦等百三十八人。

秋七月辛亥，獵于合魯聶特。

八月丙子，耶律白薨，追封遼西郡王。

九月庚戌，幸藕絲淀。甲寅，以馬希白詩才敏妙，十吏書不能給，召試之。

冬十月丁卯，五國部長來朝。壬申，西北路招討司擒阻卜酋長來獻。

十一月乙卯，禁鬻生熟鐵于回鶻、阻卜等界。

十二月戊午，加圓釋、法鈞二僧並守司空。己未，以坤寧節，赦死罪以下。辛酉，禁漢人捕獵。

七年春正月戊子，如鴨子河。

二月乙丑，女直進馬。丙寅，以南院樞密使姚景行知興中府事。

三月己酉，以討五國功，加知黃龍府事蒲延、懷化軍節度使高元紀、易州觀察使高正並千牛衛上將軍，五國節度使蕭陶蘇幹、寧江州防禦使大榮並靜江軍節度使。幸黑水。

夏四月癸酉，如納葛濼。乙亥，禁布帛短狹不中尺度者。

六月己卯，吐蕃來貢。癸未，南院大王高八致仕。

秋七月甲申朔，以東北路詳穩合里只爲南院大王，西南面招討使拾得奴爲奚六部大王。己丑，遣使按問五京囚。庚子，如藕絲淀。

八月辛巳，置佛骨于招仙浮圖，罷獵，禁屠殺。

冬十月己卯，如醫巫閭山。壬戌，以南府宰相耶律藥奴爲南京統軍使。戊辰，謁乾陵。庚辰，詔百官廷議軍國事。

十一月戊子，免南京流民租。己丑，振饒州饑民。丙午，高麗遣使來貢。

十二月壬子，以契丹行宮都部署耶律胡觀知北院樞密使事，知北院樞密使事蕭惟信爲南府宰相，兼契丹行宮都部署。丁巳，漢人行宮都部署李仲禧、北院宣徽使劉柔、樞密副使王觀、都承旨楊興工各賜國姓。戊寅，回鶻來貢。是歲，春州斗粟六錢。

校勘記

- 〔一〕近侍詳穩渤海阿厮 卷一一二涅魯古傳同。阿厮，卷九六本傳作阿思。「近侍詳穩渤海」，本傳作「渤海近侍詳穩」，檢百官志一有「渤海近侍詳穩司」，此處「渤海」與「近侍詳穩」互倒。
- 〔二〕詔諸遇正旦重午冬至別表賀東宮 按「諸」下疑脫「路」或「道」字。
- 〔三〕以戶部使劉詵爲樞密副使 按劉詵卽劉伸，字濟時，宛平人。卷九八有傳。
- 〔四〕蕭惟信南院樞密使 卷九六本傳作北院樞密副使。
- 〔五〕五年春正月阻卜叛 正，屬國表作三。

〔六〕五國剖阿里部叛 剖，原誤「部」。據營衛志下及部族表改。

遼史卷二十三

本紀第二十三

道宗三

八年春正月癸未，烏古敵烈部詳穩耶律巢等奏克北邊捷。以戰多殺人，飯僧南京、中京。甲申，如魚兒灤。壬寅，昏霧連日。

二月丙辰，北、南樞密院言無事可陳。壬戌，以討北部功，烏古敵烈部詳穩耶律巢知北院大王事，都監蕭阿魯帶烏古敵烈部詳穩，加左監門衛上將軍。戊辰，歲饑，免武安州租稅，振恩、蔚、順、惠等州民。

三月癸卯，有司奏春、泰、寧江三州三千餘人願爲僧尼，受具足戒，許之。

夏四月壬子，振義、饒二州民。丁巳，駐蹕塔里捨。己卯，清暑拖古烈。
五月壬午，晉王仁先薨。

六月甲寅，振易州貧民。己未，振中京。甲子，振興中府。甲戌，封北府宰相楊績爲趙王，樞密副使耶律觀參知政事兼知南院樞密使事。丁丑，高麗遣使來貢。

秋七月己卯，慶州斬文高八世同居，詔賜爵。丙申，振饒州饑民。丁酉，幸黑嶺。丁未，以御書華嚴經五頌出示羣臣。

閏月辛未，射熊于殺羊山。

八月庚辰，混同郡王侯古薨，遣使致祭。

九月甲子，駐蹕藕絲淀。

冬十月己丑，參知政事耶律觀矯制營私第，降爲庶人。癸巳，回鶻來貢。

十一月庚戌，免祖州稅。丙辰，大雪，許民樵採禁地。丁卯，賜延昌宮貧戶錢。

十二月戊辰，漢人行宮都部署耶律仲禧封韓國公，樞密副使、參知政事趙徽出爲武定軍節度使，樞密副使柴德滋參知政事，漢人行宮副部署耶律大悲奴陞都部署，同知南院樞密使事蕭韓家奴知左夷離畢事。丁丑，以坤寧節，大赦。庚寅，賜高麗佛經一藏。

九年春正月丁未，如雙灤。

夏四月壬辰，如旺國崖。

秋七月甲辰，獵大熊山。戊申，烏古敵烈統軍言，八石烈敵烈人殺其節度使以叛。己酉，詔隗烏古部軍分道擊之。丙寅，南京奏歸義、涑水兩縣蝗飛入宋境，餘爲蜂所食。

八月丙申，以耶律仲禧爲南院樞密使。

九月癸卯，駐蹕獨盧金。

冬十月，幸陰山，遂如西京。

十一月戊午，詔行幸之地免租一年。甲子，南院大王合理只致仕。

十二月辛未，以知北院樞密使事耶律宜新爲中京留守，南院宣徽使耶律撒刺爲南院大王。壬辰，高麗、夏國並遣使來貢。

十年春正月乙卯，如鴛鴦濼。

二月癸未，蠲平州復業民租賦。戊子，阻卜來貢。

三月甲子，如拖古烈。以耶律巢爲北院大王。

夏四月，旱。辛未，以奚人達魯三世同居，賜官旌之。

五月丙寅，錄囚。

六月戊辰，親出題試進士。壬申，詔臣庶言得失。丙子，御永定殿，策賢良。

秋七月丙辰，如秋山。癸亥，謁慶陵。

九月庚戌，幸東京，謁二儀、五鸞殿。癸亥，祠木葉山。

冬十月丁卯，駐蹕藕絲淀。丁丑，詔有司頒行史記、漢書。

十一月戊午，高麗遣使來貢。

十二月辛巳，改明年爲大康，大赦。

大康元年春正月乙未，如混同江。壬寅，振雲州饑。

二月丁卯，祥州火，遣使恤災。乙酉，駐蹕大魚濼。丁亥，以獲鵝，加鷹坊使耶律楊六

爲工部尙書。

三月乙巳，命皇太子寫佛書。

夏四月丙子，振平州饑。乙酉，如犢山。

閏月丙午，振平、灤二州饑。庚戌，皇孫延禧生。

五月甲子，賜妃之親及東宮僚屬爵有差。

六月癸巳，以興聖宮使奚謝家奴知奚六部大王事。戊戌，知三司使事韓操以錢穀增

羨，授三司使。癸卯，遣使按問諸路囚。以惕隱大悲奴爲始平軍節度使，參知政事柴德滋

武定軍節度使。乙卯，吐蕃來貢。丙辰，詔皇太子總領朝政，仍戒諭之。以武定軍節度使趙徽爲南府宰相，樞密副使楊遵勗參知政事。

秋七月辛酉朔，獵平地松林。丙寅，振南京貧民。

八月庚寅朔，日有食之。

九月乙亥，駐蹕藕絲淀。己卯，以南京饑，免租稅一年，仍出錢粟振之。

冬十月，西北路會長遐搭、雛搭、雙古等來降。

十一月辛酉，皇后被誣，賜死；殺伶人趙惟一、高長命，並籍其家屬。

十二月己丑朔，（三）以南京統軍使耶律藥奴爲惕隱，漢人行宮都部署耶律霖樞密副使，同知東京留守事蕭鐸刺夷離畢。庚寅，賜張孝傑國姓。壬辰，以西京留守蕭燕六爲左夷離畢。

二年春正月己未，如春水。庚辰，駐蹕雙灤。

二月戊子，振黃龍府饑。癸丑，南京路饑，免租稅一年。

三月辛酉，皇太后崩。壬戌，遣殿前副點檢耶律轄古報哀于宋。癸亥，遣使報哀于高麗、夏國。丁卯，大赦。戊寅，以皇太后遺物遣使遺宋、夏。

夏六月乙酉朔，上大行皇太后尊諡曰仁懿皇后。戊子，宋及高麗、夏國各遣使弔祭。甲午，葬仁懿皇后于慶陵。己亥，駐蹕拖古烈。壬寅，出北院樞密使魏王耶律乙辛爲中京留守。丁未，冊皇后蕭氏，封其父祗候郎君鼈里刺爲趙王，叔西北路招討使余里也遼西郡王，兄漢人行宮都部署、駙馬都尉霞抹柳城郡王，參知政事楊遵勗知南院樞密使事，北院樞密副使蕭速撒知北院樞密使事，漢人行宮副部署劉詵參知政事。己酉，南府宰相趙徽致仕。

秋七月戊辰，如秋山。癸酉，柳城郡王霞抹薨。

八月庚寅，獵，遇麝失其母，憫之，不射。

九月戊午，以南京蝗，免明年租稅。己卯，駐蹕藕絲淀。

冬十月戊戌，召中京留守魏王耶律乙辛復爲北院樞密使。

十一月甲戌，上欲觀起居注，修注郎不攬及忽突董等不進，各杖二百，罷之，流林牙蕭岩壽於烏隗部。是月，南京地震，民舍多壞。

十二月己丑，以左夷離畢蕭撻不也爲南京統軍使。

三年春正月癸丑，如混同江。乙卯，省諸道春貢金帛，及停周歲所輸尙方銀。

二月壬午朔，東北路統軍使蕭韓家奴加尙父，封吳王。甲申，詔北院樞密使魏王耶律乙辛同母兄大奴、同母弟阿思世預北、南院樞密之選，其異母諸弟世預夷離堇之選。己丑，如魚兒灤。辛卯，中京饑，罷巡幸。

夏四月乙酉，泛舟黑龍江。

五月丙辰，玉田、安次蝮傷稼。癸亥，日中有黑子。己巳，駐蹕犢山。乙亥，北院樞密使耶律乙辛奏，右護衛太保查刺等告知北院樞密使事蕭速撒等八人謀立皇太子，（臣）上以無狀，不治，出速撒等三人補外，護衛撒撥等六人各鞭百餘，徙于邊。丙子，以西北路招討使遼西郡王蕭余里也爲北府宰相，兼知契丹行宮都部署事。戊寅，詔告謀逆事者，重加官賞。

六月己卯朔，耶律乙辛令牌印郎君蕭訛都幹誣首嘗預速撒等謀，籍其姓名以告。卽命乙辛及耶律仲禧、蕭余里也、耶律孝傑、楊遵勗、燕哥、抄只、蕭十三等鞠治，杖皇太子，囚之宮中。辛巳，殺宿直官敵里刺等三人。壬午，殺宣徽使撻不也等二人。癸未，殺始平軍節度使撒刺等十人，又遣使殺上京留守速撒，及已徙護衛撒撥等六人。乙酉，殺耶律撻不也及其弟陳留。（臣）丙戌，廢皇太子爲庶人，囚之上京。己丑，回鶻來貢。殺東京留守同知耶律回里不。辛卯，殺速撒等諸子，籍其家。戊申，遣使按五京諸道獄。

秋七月辛亥，護衛太保查刺加鎮國大將軍，預突呂不部節度使之選，室韋查刺及蕭寶神奴、謀魯古並加左衛大將軍，牌印郎君訛都幹尙皇女趙國公主，授駙馬都尉、始平軍節度使，祇候郎君耶律撻不也及蕭圖古辭並加監門衛上將軍。壬子，知北院樞密副使蕭韓家奴爲漢人行宮都部署。乙丑，如秋山。丁丑，謁慶陵。

八月庚寅，漢人行宮都部署蕭韓家奴薨。辛丑，謁慶陵。

九月癸亥，玉田貢嘉禾。壬申，修乾陵廟。

冬十月辛丑，駐蹕藕絲淀。

十一月，北院樞密使耶律乙辛遣其私人盜殺庶人濬于上京。

閏十二月戊午，以北府宰相遼西郡王蕭余里也知北院樞密使事，左夷離畢耶律燕哥爲契丹行宮都部署。丙寅，預行正旦禮。

是歲，南京大熟。

四年春正月庚辰，如春水。甲午，振東京饑。

二月乙丑，駐蹕掃獲野。戊辰，以東路統軍使耶律王九爲惕隱。

夏四月辛亥，高麗遣使乞賜鴨綠江以東地，不許。

五月丙戌，駐蹕散水原。

六月甲寅，阻卜諸酋長進良馬。

秋七月甲戌，諸路奏飯僧尼三十六萬。

八月癸卯，詔有司決滯獄。

九月乙未，駐蹕藕絲淀。庚子，五國部長來貢。

冬十月癸卯，以參知政事劉仲爲保靜軍節度使。

十一月丁亥，禁士庶服用錦綺、日月、山龍之文。己丑，回鶻遣使來貢。庚寅，南院樞

密使耶律仲禧爲廣德軍節度使。辛卯，錦州民張寶四世同居，命諸子三班院祇候。

十二月丁卯，以北院樞密副使耶律霖知北院樞密使事。

校勘記

〔一〕駐蹕塔里捨 塔里捨，紀大安八年三月作撻里捨。

〔二〕十二月己丑朔 朔字，據朔考補。

〔三〕兄漢人行宮都部署駙馬都尉霞抹 兄字原脫，據卷七一道宗惠妃蕭氏傳及本句文義補。

〔四〕知北院樞密使事蕭速撒 「知」「事」二字原脫。按上下文任北院樞密使者爲耶律乙辛，蕭速撒

時爲知北院樞密使事，見上文二年六月。據補。

〔五〕壬午殺宣徽使撻不也等二人至乙酉殺耶律撻不也及其弟陳留。按蕭撻不也未嘗爲宣徽使，而耶律撻不也則以宣徽使見殺，見卷九九蕭撻不也傳及耶律撻不也傳。是死于壬午者爲耶律撻不也，乙酉被殺者爲蕭撻不也，紀文所記互倒。

遼史卷二十四

本紀第二十四

道宗四

五年春正月壬申，如混同江。癸酉，賜宰相耶律孝傑名仁傑。乙亥，如山榆淀。

三月辛未，以宰相仁傑獲頭鵝，加侍中。壬辰，以北院樞密使魏王耶律乙辛知南院大王事，加于越，知北院樞密使事耶律霖爲北院樞密使，北院樞密副使耶律特里底知北院樞密使事，左夷離畢耶律世遷同知北院樞密使事。

夏四月己未，如納葛濼。

五月丁亥，謁慶陵。以契丹行宮都部署耶律燕哥爲南府宰相，北面林牙耶律永寧爲夷離畢，同知南院樞密使事蕭撻不也及殿前副點檢、駙馬都尉蕭酬幹並封蘭陵郡王。

六月辛亥，阻卜來貢。丁巳，以北府宰相、遼西郡王蕭余里也爲西北路招討使。己未，

遣使錄囚。是月，放進士劉瓊等百一十三人。

秋七月己卯，獵夾山。

八月庚申，命有司撰太宗神功碑，立于南京。

九月己卯，詔諸路毋禁僧徒開壇。壬午，禁扈從擾民。

冬十月戊戌，夏國遣使來貢。己亥，駐蹕獨盧金。壬子，詔惟皇子仍一字王，餘並削

降。丁巳，振平州貧民。己未，以趙王楊績爲遼西郡王，魏王耶律乙辛降封混同郡王，吳王

蕭韓家奴蘭陵郡王，致仕。

十一月丁丑，召沙門守道開壇于內殿。癸未，復南京流民差役三年，被火之家免租稅一年。

十二月丙午，彗星犯尾。乙卯，幸西京。戊午，行再生禮，赦雜犯死罪以下。

六年春正月癸酉，如鴛鴦灤。辛卯，耶律乙辛出知興中府事。

三月庚寅，封皇孫延禧爲梁王，忠順軍節度使耶律頗德南院大王，耶律仲禧南院樞密使，戶部使陳毅參知政事。

夏四月乙卯，獵炭山。

五月壬申，免平州復業民租賦一年。庚寅，以旱，禱雨，命左右以水相沃，俄而雨降。

六月戊戌，駐蹕納葛濼。戊申，以度支使王績參知政事。庚戌，女直遣使來貢。

秋七月戊辰，觀市。癸未，爲皇孫梁王延禧設旗鼓拽刺六人衛護之。甲申，獵沙嶺。

闕九月壬寅，三祠木葉山。己酉，駐蹕藕絲淀。

冬十月己未朔，省同知廣德軍節度使事，命奉先軍節度使兼巡警乾、顯二州。丁卯，耶

律仁傑出爲武定軍節度使。庚午，參知政事劉詵致仕。癸酉，以陳毅爲漢人行宮都部署，

王績同知樞密院事。辛巳，回鶻遣使來貢。

十一月己丑朔，日有食之。癸卯，召羣臣議政。

十二月甲子，以耶律特里底爲孟父敞穩。乙丑，以蕭撻不也爲北府宰相，耶律世遷知

北院樞密使事，耶律慎思同知北院樞密使事。庚午，免西京流民租賦一年。甲戌，減民賦。

丁亥，豫行正旦禮。戊子，如混同江。

七年春正月戊申，五國部長來貢。甲寅，女直貢良馬。

二月甲子，如魚兒濼。

夏五月壬子，駐蹕嶺西。癸丑，有司奏永清、武清、固安三縣蝗。甲寅，以蕭撻不也兼

殿前都點檢，蕭酬幹爲漢人行宮都部署兼知樞密院事。

六月甲子，詔月祭觀德殿，歲寒食，諸帝在時生辰及忌日，詣景宗御容殿致奠。丙寅，阻卜余古赧來貢。丁卯，以翰林學士王言敷參知政事，封北院宣徽使石篤漆水郡王。

秋七月戊子，如秋山。丙申，謁慶陵。

八月丁卯，射鹿赤山，加圍場使涅葛爲靜江軍節度使。

九月戊子，次懷州，命皇后謁懷陵。辛卯，次祖州，命皇后謁祖陵。乙巳，駐蹕藕絲淀。

冬十月戊辰，以惕隱王九爲南院大王，夷離畢奚抄只爲彰國軍節度使。

十一月乙酉，詔歲出官錢，振諸宮分及邊戍貧戶。丁亥，幸駙馬都尉蕭酬幹第，方飲，

宰相梁穎諫曰：「天子不可飲人臣家。」上卽還宮。己亥，高麗遣使來貢。辛亥，除絹帛尺度狹短之令。

十二月丁卯，武定軍節度使耶律仁傑以罪削爵爲民。辛未，知興中府事耶律乙辛以罪囚于來州。〔三〕

八年春正月甲申，如混同江。丁酉，鐵驪、五國諸長各貢方物。

二月戊午，如山榆淀。辛酉，詔北、南院官，凡給驛者，必先奏聞。貢新及奏獄訟，方許

馳驛，餘並禁之。己巳，夏國獲宋將張天一，遣使來獻。壬申，以耶律頗德爲南府宰相兼知北院樞密使，燕哥爲惕隱，蕭撻不也兼知契丹行宮都部署事。

三月庚戌，黃龍府女直部長尤乃率部民內附，予官，賜印綬。是月，詔行柅黍所定升斗。

夏四月壬戌，以耶律世遷爲上京留守。

六月辛亥朔，駐蹕納葛濼。丙辰，夏國遣使來貢。丁巳，以耶律頗德爲北院樞密使，耶律巢哥南府宰相，劉筠南院樞密使，蕭撻不也兼知北院樞密使事，王績漢人行宮都部署，蕭酬幹國舅詳穩。乙丑，阻卜長來貢。丙子，以耶律慎思知右夷離畢事。

秋七月甲午，如秋山。南京霖雨，沙河溢永清、歸義、新城、安次、武清、香河六縣，傷稼。

九月庚寅，謁慶陵。丁未，駐蹕藕絲淀。大風雪，牛馬多死，賜扈從官以下衣馬有差。冬十月乙卯，詔化哥傅導梁王延禧，加金吾衛大將軍。丙子，謁乾陵。

十一月壬午，以乙室大王蕭何葛爲南院宣徽使，權知奚六部大王事圖趕爲本部大王。十二月癸丑，烏古敵烈統軍使耶律馬五爲北院大王。庚申，降皇后爲惠妃，出居乾陵。

九年春正月辛巳，如春水。

夏四月丙午朔，大雪，平地丈餘，馬死者十六、七。

五月，如黑嶺。

六月己未，駐蹕散水原。甲子，以耶律阿思爲契丹行宮都部署，耶律慎思北院樞密副使。庚午，詔諸路檢括脫戶，罪至死者，原之。

閏月丁丑，以漢人行宮副部署可汗奴爲南院大王。戊寅，追諡庶人濬爲昭懷太子。丁亥，阻卜來貢。己丑，以知興中府事邢熙年爲漢人行宮都部署，漢人行宮都部署王績爲南院樞密副使。

秋七月乙巳，獵馬尾山。丁巳，謁慶陵。癸亥，禁外官部內貸錢取息及使者館于民家。

八月，高麗王徽薨。〔五〕

九月癸卯朔，日有食之。己酉，射熊于白石山，加圍場使涅葛左金吾衛大將軍。己巳，以高麗王徽子三韓國公勳權知國事。辛未，五國部長來貢。壬申，召北、南樞密院官議政事。

冬十月丁丑，謁觀德殿。己卯，南院樞密使劉筠薨。壬辰，混同郡王耶律乙辛謀亡入宋，伏誅。

十一月丙午，進封梁王延禧爲燕國王，大赦。以南院宣徽使蕭何葛爲南府宰相，三司使王經參知政事兼知樞密事。甲寅，詔僧善知讎校高麗所進佛經，頒行之。己未，定諸令史、譯史遷敘等級。

十二月丁亥，以邢熙年知南院樞密使事。辛卯，以王言敷爲漢人行宮都部署。高麗三韓國公王勳薨。

是年，御前放進士李君裕等五十一人。

十年春正月辛丑朔，如春水。丙午，復建南京奉福寺浮圖。戊辰，如山榆淀。

二月庚午朔，萌古國遣使來聘。

三月戊申，遠萌古國遣使來聘。丁巳，命知制誥王師儒、牌印郎君耶律固傳導燕國王延禧。

夏四月丁丑，女直貢良馬。

五月壬戌，駐蹕散水原。乙丑，阻卜來貢。丙寅，降國舅詳穩班位在敝穩之下。

六月壬辰，禁毀銅錢爲器。

秋七月甲辰，如黑嶺。

九月癸亥，駐蹕藕絲淀。

冬十二月乙未，改慶州大安軍曰興平。是月，改明年爲大安，赦雜犯死罪以下。

大安元年春正月丁酉，如混同江。癸卯，王績知南院樞密使事，邢熙年爲中京留守。戊申，以樞密直學士杜公謂參知政事。庚戌，五國會長來貢良馬。

二月辛未，如山榆淀。

夏四月乙酉，宋主頊殂，子煦嗣位，使來告哀。辛卯，西幸。

六月戊辰，駐蹕拖古烈。壬申，以王績爲南府宰相，蕭撻不也兼知南院樞密使事。丁

丑，遣使弔祭于宋。戊寅，宋遣王眞、甄祐等饋其先帝遺物。〔六〕

秋七月乙巳，遣使賀宋主卽位。戊午，獵于赤山。

八月丁卯，幸慶州。戊辰，謁慶陵。

冬十月癸亥，駐蹕好草淀。戊辰，夏國王李秉常遣使報其母梁氏哀。甲申，以蕭撻不也爲南院樞密使。

十一月乙未，詔：「比者，外官因譽進秩，久而不調，民被其害。今後皆以資給遷轉。」丁酉，以南女直詳穩蕭袍里爲北府宰相。辛亥，史臣進太祖以下七帝實錄。丙辰，遣使册三

韓國公王勳弟運爲高麗國王。己未，詔僧尼無故不得赴闕。

十二月甲戌，宋遣蔡卞來謝弔祭。

二年春正月辛卯，如混同江。己酉，五國諸部長來貢。癸丑，召權翰林學士趙孝嚴、知制誥王師儒等講五經大義。

二月癸酉，駐蹕山榆淀。是月，太白犯歲星。

三月乙酉，女直貢良馬。

夏四月戊戌，北幸。癸丑，遣使加統軍使蕭訛都幹太子太保，裨將老古金吾衛大將軍，蕭雅哥靜江軍節度使，耶律燕奴右監門衛大將軍，仍賜賚諸軍士。

五月丁巳朔，以牧馬蕃息多至百萬，賞羣牧官，以次進階。乙亥，駐蹕納葛濛。戊寅，宰相梁穎出知興中府事。是月，放進士張穀等二十六人。

六月丁亥朔，以左夷離畢耶律坦爲惕隱，知樞密院事耶律幹特刺兼知左夷離畢事。丙申，阻卜來朝。癸卯，遣使按諸路獄。甲辰，以同知南京留守事耶律那也知右夷離畢事。乙巳，阻卜會長余古赧及愛的來朝，詔燕國王延禧相結爲友。戊申，以契丹行宮都部署耶律阿思兼知北院大王事。壬子，高墩以下、縣令、錄事兄弟及子，悉許敘用。

秋七月丁巳，惠妃母燕國夫人削古以厭魅梁王事覺，伏誅，子蘭陵郡王蕭酬幹除名，置邊郡，仍隸興聖宮。戊午，獵沙嶺。甲子，賜興聖、積慶二宮貧民錢。乙酉，出粟振遼州貧民。

八月戊子，以雪罷獵。

九月庚午，還上京。壬申，發粟振上京、中京貧民。丙子，謁二儀、五鸞二殿。己卯，出太祖、太宗所御鎧仗示燕國王延禧，諭以創業征伐之難。辛巳，召南府宰相議國政。

冬十月乙酉朔，以樞密副使寶景庸知樞密院事。丙戌，五國部長來貢。丁亥，以夏國王李秉常薨，遣使詔其子乾順知國事。

十一月甲戌，爲燕國王延禧行再生禮，曲赦上京囚。戊寅，高麗遣使謝封冊。癸未，出粟振乾顯、成懿四州貧民。

十二月辛卯，以蘭陵郡王蕭撻不也爲南院樞密使。己亥，夏國王李乾順遣使上其父遺物。

校勘記

〔一〕耶律仲禧南院樞密使 按此事已見咸雍九年八月。既非再任，當是重出。

〔三〕閏九月壬寅 閏字原脫。按朔考，九月庚申朔，無壬寅、己酉；閏九月庚寅朔，壬寅十三日，己酉二十日。據補。

〔三〕來州 來，原作「萊」。據地理志三改。參卷一六校勘記〔二〕。

〔四〕宋將張天一 卷一一五西夏外記作張天益。

〔五〕八月高麗王徽薨 按高麗史七，徽在位三十七年，死于是年七月辛酉。

〔六〕王眞 按長編作王震，宋史三二〇有傳。

〔七〕册三韓國公王勳弟運 弟，原誤「子」。據高麗史七改。

〔八〕蘭陵郡王蕭撻不也爲南院樞密使 按此與大安元年十月所記重出。

遼史卷二十五

本紀第二十五

道宗五

三年春正月乙卯，如魚兒灤。甲戌，出錢粟振南京貧民，仍復其租賦。己卯，大雪。

二月丙戌，發粟振中京饑。甲辰，以民多流散，除安泊逃戶徵償法。

三月乙卯，高麗遣使來貢。己未，免錦州貧民租一年。甲戌，免上京貧民租如錦州。庚辰，女直貢良馬。

夏四月戊子，賜中京貧民帛，及免諸路貢輸之半。丙申，賜隈烏古部貧民帛。〔二〕庚子，如涼陁。甲辰，南府宰相王績薨。乙巳，詔出戶部司粟，振諸路流民及義州之饑。

五月庚申，海雲寺進濟民錢千萬。

秋七月丙辰，獵黑嶺。丁巳，出雜帛賜興聖宮貧民。庚午，大雨，罷獵。丁丑，秦越國

王阿璉薨。

九月乙亥，駐蹕匣魯金。

冬十月庚辰，以參知政事王經爲三司使。壬辰，罷節度使已下官進珍玩。癸卯，追封秦越國王阿璉爲秦魏國王。

十一月甲寅，以惕隱耶律坦同知南京留守事，遼興軍節度使耶律王九爲南府宰相。十二月己卯朔，以樞密直學士呂嗣立參知政事。

四年春正月庚戌，如混同江。甲寅，太白晝見。甲子，五國部長來貢。庚午，免上京逋逃及貧戶稅賦。甲戌，以上京、南京饑，許良人自鬻。丁丑，曲赦西京役徒。

二月己丑，如魚兒濼。甲午，曲赦春州役徒，終身者皆五歲免。己亥，如春州。赦泰州役徒。

三月乙丑，免高麗歲貢。己巳，振上京及平、錦、來三州饑。

夏四月己卯，振蘇、吉、復、淶、鐵五州貧民，并免其租稅。甲申，振慶州貧民。乙酉，減諸路常貢服御物。丁酉，立入粟補官法。癸卯，西幸。召樞密直學士耶律儼講尚書洪範。

五月辛亥，命燕國王延禧寫尚書五子之歌。乙卯，振祖州貧民。丁巳，詔免役徒，終身

者五歲免之。己未，振春州貧民。丙寅，禁挾私引水犯田。

六月庚辰，駐蹕散水原。丁亥，命燕國王延禧知中丞司事，以同知南院樞密使事耶律聶里知右夷離畢，知右夷離畢事耶律那也同知南院樞密使事。庚寅，北院樞密使耶律頗德致仕。

秋七月戊申，曲赦奉聖州役徒。丙辰，遣使冊李乾順爲夏國王。庚申，如秋山。己巳，禁錢出境。

八月庚辰，有司奏宛平、永清蝗爲飛鳥所食。庚寅，謁慶陵。

冬十月丁丑，獵遼水之濱。己卯，駐蹕藕絲淀。癸未，免百姓所貸官粟。己丑，知北院樞密使事耶律阿思封漆水郡王。癸巳，以乙室大王耶律敵烈知西北路招討使事，權知西北路招討使事蕭朽哥知乙室大王事。壬寅，詔諸部長官親鞫獄訟。

十一月庚申，興中府民張化法以父兄犯盜當死，請代，皆免。

十二月戊寅，南府宰相耶律王九致仕。癸未，以孟父敵穩耶律慎思爲中京留守。閏十二月癸卯朔，預行正旦禮。丙午，如混同江。

五年春正月癸未，如魚兒灤。甲午，高麗遣使來貢。

三月癸酉，詔析津、大定二府精選舉人以聞，仍詔諭學者，當窮經明道。

夏四月甲辰，以知奚六部大王事涅葛爲本部大王。壬子，獵北山。甲子，霖雨，罷獵。

五月丁亥，駐蹕赤勒嶺。己丑，以阻卜磨古斯爲諸部長。癸巳，回鶻遣使貢良馬。己亥，以同知南院樞密使事耶律那也知右夷離畢事，左祗候郎君班詳穩耶律涅里知北院大王事。

六月甲寅，夏國遣使來謝封冊。壬戌，以參知政事王言敷爲樞密副使，前樞密副使賈士勳參知政事，兼同知樞密院事。〔三〕

秋七月庚午，獵沙嶺。

九月辛卯，遣使遺宋鹿脯。壬辰，駐蹕藕絲淀。

冬十月乙巳，以新定法令太煩，復行舊法。庚申，以遼興軍節度使何葛爲乙室大王。

十一月丁卯朔，燕國王延禧生子，大赦，妃之族屬進爵有差。

六年春正月，如混同江。

二月辛丑，駐蹕雙山。

三月辛未，女直遣使來貢。

夏四月丁酉，東北路統軍司設掌法官。庚子，以同知南院樞密使事耶律吐朶知左夷離畢事。

五月壬辰，駐蹕散水原。

六月甲寅，遣使決五京囚。

秋七月丙子，如黑嶺。

冬十月丁酉，駐蹕藕絲淀。

十一月壬戌，高麗遣使來貢。己巳，以南府宰相寶景庸爲武定軍節度使。

是年，放進士文充等七十二人。

七年春正月壬戌，如混同江。

二月己亥，駐蹕魚兒灤。壬寅，詔給渭州貧民耕牛、布絹。

三月丙戌，駐蹕黑龍江。

夏四月丙辰，以漢人行宮副部署耶律谷欲知乙室大王事。

五月己未朔，日有食之。

六月甲午，駐蹕赤勒嶺。己亥，倒塌嶺人進古鼎，有文曰「萬歲永爲寶用」。辛丑，回鶻

遣使貢方物。癸卯，以權知東京留守蕭陶隗爲契丹行宮都部署。丁未，端拱殿門災。

秋七月戊午朔，回鶻遣使來貢異物，不納，厚賜遣之。

八月庚寅，以霖雨，罷獵。壬寅，幸慶州，謁慶陵。

九月丙申，還上京。己亥，日本國遣鄭元、鄭心及僧應範等二十八人來貢。〔三〕

冬十月辛巳，命燕國王延禧爲天下兵馬大元帥，總北南院樞密使事。

十一月庚子，如藕絲淀。甲子，望祀木葉山。

八年春正月乙酉，如山榆淀。乙未，阻卜諸長來降。

三月己亥，駐蹕撻里捨淀。丁未，曲赦中京、蔚州役徒。

夏四月乙卯，阻卜長來貢。丁丑，獵西山。惕德酋長胡里只來附。

五月甲辰，駐蹕赤勒嶺。

六月乙丑，夏國爲宋侵，遣使乞援。

秋七月丁亥，獵沙嶺。

九月乙巳，駐蹕藕絲淀。丁未，日本國遣使來貢。

冬十月庚戌朔，遣使遺宋鹿脯。丙辰，振西北路饑。辛酉，阻卜磨古斯殺金吾吐古斯

以叛，遣奚六部禿里耶律郭三發諸蕃部兵討之。壬申，南府宰相王經薨。戊寅，以左夷離畢耶律涅里爲彰聖軍節度使。

十一月戊子，以樞密副使王是敦兼知樞密院事，權參知政事韓資讓參知政事，漢人行宮都部署奚回離保知奚六部大王事。丁酉，以通州潦水害稼，遣使振之。戊申，北院大王合魯薨。

是年，放進士冠尊文等五十三人。〔四〕

九年春正月庚辰，如混同江。

二月，磨古斯來侵。

三月，西北路招討使耶律阿魯掃古追磨古斯還，都監蕭張九遇賊，與戰不利。二室韋、拽刺、北王府、特滿羣牧、宮分等軍多陷沒。

夏四月乙卯，興中府甘露降，遣使祠佛飯僧。癸酉，獵西山。

六月丁未朔，駐蹕散水原。庚申，以遼興軍節度使榮哥爲南院大王，知左夷離畢事耶律吐朶爲左夷離畢。

秋七月辛卯，如黑嶺。壬寅，遣使賜高麗羊。

九月癸卯，振西北路貧民。

冬十月庚戌，有司奏磨古斯詣西北路招討使耶律撻不也僞降，既而乘虛來襲，撻不也死之。阻卜烏古札叛，〔五〕達里底、拔思母並寇倒場嶺。壬子，遣使籍諸路兵。癸丑，以南院大王特末同知南京留守事，命鄭家奴率兵往援倒場嶺。甲寅，駐蹕藕絲淀，以左夷離畢耶律禿朶、圍場都管撒八並爲西北路行軍都監。乙卯，詔以馬三千給烏古部。丙辰，有司奏阻卜長轄底掠西路羣牧。丁巳，振西北路貧民。己未，燕國王延禧生子，肆赦，妃之族屬並進級。壬戌，以樞密直學士趙廷睦參知政事兼同知南院樞密使事。癸亥，烏古敵烈統軍使蕭朽哥奏討阻卜等部捷。甲子，宋遣使告其母后曹氏哀，〔六〕卽遣使弔祭。己巳，詔廣積貯，以備水旱。

十一月辛巳，特抹等奏討阻卜捷。

十二月丙辰，宋遣使以母后遺留物來饋。

十年春正月，如春水。癸未，惕德來貢。戊子，烏古扎等來降，達里底、拔思母二部來侵，四捷軍都監特抹死之。

二月甲辰，以破阻卜，賞有功者。丙午，西南面招討司奏討拔思母捷。癸丑，排雅、僕

里、同葛、虎骨、僕果等來降。達里底來侵。

三月壬申朔，日有食之。山北路副部署蕭阿魯帶奏討達里底捷。〔七〕

夏四月壬寅朔，惕德萌得斯、老古得等各率所部來附，詔復舊地。甲辰，駐蹕春州北平淀。丙午，烏古部節度使耶律陳家奴奏討茶扎刺捷。庚戌，以知北院樞密使事耶律幹特刺爲都統，夷離畢耶律禿朶爲副統，龍虎衛上將軍耶律胡呂都監，討磨古斯，遣積慶宮使蕭紉里監戰。辛亥，朽哥奏頗里八部來侵。擊破之。己巳，除玉田、密雲流民租賦一年。

閏月庚子，賜西北路貧民錢。達里底、拔思母二部來降。

五月甲辰，駐蹕赤勒嶺。甲寅，括馬。戊午，西北路招討司奏敵烈等部來侵，統軍司出兵與戰，不利，招討司以兵擊破之，敦睦宮太師耶律愛奴及其子死之。辛酉，以知國舅詳穩事蕭阿烈同領西北路行軍事。

六月辛未，宋遣使來謝弔祭。乙酉，烏古敵烈統軍使朽哥有罪，除名。丙戌，和烈葛等部來聘。癸巳，惕德來貢。己亥，禁邊民與蕃部爲婚。

是夏，高麗國王運薨，子昱遣使來告，卽遣使賻贈。

秋七月庚子朔，獵赤山。是月，阻卜等寇倒場嶺，盡掠西路羣牧馬去，東北路統軍使耶律石柳以兵追及，盡獲所掠而還。

九月己未，以南院大王特末爲南院樞密使。甲子，敵烈諸酋來降，釋其罪。是月，斡特刺破磨古斯。

冬十月丙子，駐蹕藕絲淀。壬午，山北路副部署蕭阿魯帶以討達里底功，加左金吾衛上將軍。癸巳，西北路統軍司獲阻卜長拍撒葛、蒲魯等來獻。

十一月乙巳，惕德銅刮、阻卜的烈等來降。達里底及拔思母等復來侵，山北副部署阿魯帶擊敗之。

十二月癸酉，三河縣民孫賓及其妻皆百歲，復其家。甲戌，以參知政事趙廷睦兼同知樞密院事，樞密副使王師儒參知政事兼同知樞密院事。己卯，詔錄西北路有功將士及戰歿者，贈官。乙酉，詔改明年元，減雜犯死罪以下，仍除貧民租賦。戊子，西北路統軍司奏討磨古斯捷。

校勘記

〔一〕隈烏古部 按紀清寧九年七月及營衛志下並作隗烏古部。

〔二〕賈士勳參知政事兼同知樞密院事 賈士勳，近年有墓誌出土，作賈師訓。見遼文匯卷七。

〔三〕日本國遣鄭元鄭心及僧應範等二十八人來貢 應範，在日本古籍如百練抄等俱作明範。此似

避穆宗明名改。

〔四〕冠尊文 「冠」，疑當作「寇」。

〔五〕烏古札 按下文十年正月及屬國表並作烏古扎。

〔六〕宋遣使告其母后曹氏哀 按考異：是歲宋元祐八年，太皇太后高氏崩，非曹氏。

〔七〕山北路副部署蕭阿魯帶 山北路，羅校，山當作西。

十二月六日



遼史卷二十六

本紀第二十六

道宗六

壽隆元年春正月己亥，二如混同江。庚戌，西南面招討司奏拔思母來侵，蕭阿魯帶等擊破之。乙卯，振奉聖州貧民。

二月戊辰，賜左、右二皮室貧民錢。癸酉，高麗遣使來貢。乙亥，駐蹕魚兒濼。

三月丙午，賜東北路貧民絹。

夏四月丁卯，斡特剌奏討耶覩刮捷。乙亥，三女直遣使來貢。庚寅，錄西北路有功將士。

五月乙未朔，左夷離畢耶律吐朶爲惕隱，南京宣徽使耶律特末爲北院大王。癸卯，贈陣亡者官。丁巳，駐蹕特禮嶺。

六月己巳，以知奚六部大王事回里不爲本部大王，權參知政事趙孝嚴爲漢人行宮都部署，圍場都管撒八以討阻卜功，加鎮國大將軍。癸巳，阻卜長禿里底及圖木葛來貢。〔三〕

秋七月庚子，阻卜長猛達斯等來貢。癸卯，獵沙嶺。癸丑，頗里八部來附，進方物。甲寅，幹特刺奏磨古斯捷。

九月甲寅，祠木葉山。丙辰，詔西京砲人、弩人教西北路漢軍。

冬十月甲子，駐蹕藕絲淀。甲戌，以北面林牙耶律大悲奴爲右夷離畢。癸未，以參知政事王師儒爲樞密副使，漢人行宮都部署趙孝嚴參知政事。壬辰，錄討阻卜有功將士。

十一月丙申，女直遣使進馬。己亥，以都統幹特刺爲西北路招討使，封漆水郡王。甲辰，夏國進貝多葉佛經。庚申，高麗王昱疾，命其叔顓權知國事。〔四〕

十二月癸亥朔，以知北院樞密使事耶律阿思爲北院樞密使。

是年，放進士陳衡甫等百三十人。

二年春正月甲午，如春水。癸卯，西南面招討司討拔思母，破之。乙卯，駐蹕瑟尼思。辛酉，市牛給烏古、敵烈、隈烏古部貧民。

二月癸亥，振達麻里別古部。

夏四月己卯，振西北邊軍。

六月辛酉，駐蹕撒里乃。

秋七月甲午，阻卜來貢。丙午，獵赤山。

八月乙丑，頗里八部進馬。

九月丙午，徙烏古敵烈部于烏納水，以扼北邊之衝。

冬十月戊辰，駐蹕藕絲淀。庚辰，高麗遣使來貢。

十二月己未，幹特刺討梅里急，破之。壬戌，南府宰相耶律鐸魯幹致仕。癸亥，蕭撻不也爲北府宰相，耶律大悲奴殿前都點檢。乙亥，夏國獻宋俘。

三年春正月丁亥，如春水。壬寅，烏古部節度使耶律陳家奴以功加尙書右僕射。癸卯，

駐蹕雙山。

二月丙辰朔，〔三〕南京水，遣使振之。

閏月丙午，〔三〕阻卜長猛撒葛、粘八葛長禿骨撒、梅里急長忽魯八等請復舊地，貢方物，從之。

三月辛酉，燕國王延禧生子。癸亥，賜名撻魯。妃之父長哥遷左監門衛上將軍，仍賜

官屬錢。

是春，高麗王昱薨。

夏四月，南府宰相趙廷睦出知興中府事，參知政事牛溫舒兼同知樞密院事。

五月癸亥，斡特刺討阻卜，破之。己巳，駐蹕撒里乃。

六月甲申，詔罷諸路馳駟貢新。丙戌，詔每冬駐蹕之所，宰相以下構宅，毋役其民。辛丑，夏人來告宋城要地，遣使之宋，諭與夏和。庚戌，以契丹行宮都部署耶律吾也爲南院大王。

秋七月壬子朔，獵黑嶺。

八月己亥，蒲盧毛朶部長率其民來歸。乙巳，彗星見西方。

九月壬申，駐蹕藕絲淀。丁丑，以武定軍節度使梁援爲漢人行宮都部署。戊寅，斡特刺奏討梅里急捷。己卯，五國部長來貢。

冬十月庚戌，以西北路招討使斡特刺爲南府宰相。

十一月乙卯，蒲盧毛朶部來貢。戊午，以安車召醫巫闾山僧志達。己未，以中京留守韓資讓知樞密院事，同知南院樞密使事蕭藥師奴知右夷離畢。丁丑，西北路統軍司奏討梅里急捷。

四年春正月壬子，如魚兒濼。己巳，徙阻卜等貧民于山前。辛未，宋遣使來饋錦綺。

三月庚午，幸春州。丙子，有司奏黃河清。

夏四月辛丑，以雨，罷獵。

五月癸酉，那也奏北邊捷。甲戌，駐蹕撒里乃。

六月戊寅朔，夏國爲宋所攻，遣使求援。丁亥，以遼興軍節度使涅里爲惕隱，前知惕隱事耶律郭三爲南京統軍使。甲午，以參知政事牛溫舒兼知中京留守事。

秋七月戊午，如黑嶺。

冬十月乙亥朔，駐蹕藕絲淀。己卯，以南府宰相幹特刺兼契丹行宮都部署，以傅導燕國王延禧。

十一月乙巳朔，知右夷離畢事蕭藥師奴、樞密直學士耶律儼使宋，諷與夏和。辛酉，夏復遣使求援。

十二月壬辰，爲燕國王延禧行再生禮，曲赦三百里內囚。

五年春正月乙巳，如魚兒濼。己酉，詔夏國王李乾順伐拔思母等部。

夏五月壬戌，藥師奴等使宋回，奏宋罷兵。癸亥，謁乾陵。戊辰，以南府宰相幹特刺兼

西北路招討使，禁軍都統。己巳，駐蹕沿柳湖。

六月甲申，以奚六部大王回離保爲契丹行宮都部署，知右夷離畢事蕭藥師奴南面林牙，兼知契丹行宮都部署事。乙未，五國部長來朝。戊戌，阻卜來貢。己亥，以興聖宮使耶律郝家奴爲右夷離畢。

秋七月壬寅朔，惕德長禿的等來貢。辛亥，如大牢古山。

閏九月丙子，駐蹕獨盧金。

冬十月己亥朔，高麗王顒遣使乞封冊。丁巳，幹特刺奏討耶覲刮捷。丙寅，以同知南京留守事蕭得里底知北院樞密使事。丁卯，宋遣郭知章、曹平來聘。戊辰，振遼州饑，仍免租賦一年。

十一月甲戌，振南、北二紮。乙酉，夏國以宋罷兵，遣使來謝。

十二月甲子，以參知政事趙孝嚴爲漢人行宮都部署，漢人行宮都部署梁援爲遼興軍節度使。

六年春正月癸酉，南院大王耶律吾也薨。壬午，以太師致仕禿開起爲奚六部大王。丁亥，如春水。辛卯，幹特刺執磨古斯來獻。丙申，詔問民疾苦。

二月丁未，以烏古部節度使陳家奴爲南院大王。己酉，磔磨古斯于市。癸丑，出絹賜五院貧民。辛酉，宋遣使告宋主煦殂，弟佶嗣位，卽日遣使弔祭。

三月甲申，弛朔州山林之禁。

夏四月丁酉朔，日有食之。癸卯，如炭山。

五月壬午，烏古部討茶扎刺，破之。乙酉，漢人行宮都部署趙孝嚴薨。丙戌，駐蹕納葛灤。辛卯，宋遣使饋先帝遺物。乙未，以東京留守何魯掃古爲惕隱，南院宣徽使蕭常哥爲漢人行宮都部署。

六月庚子，遣使賀宋主。辛丑，以有司案牘書宋帝「嗣位」爲「登寶位」，詔奪宰相鄭顥以下官，出顥知興中府事，韓資讓爲崇義軍節度使，御史中丞韓君義爲廣順軍節度使。癸丑，阻卜長來貢。戊午，遣使決五京滯獄。己未，以遼興軍節度使梁援爲樞密副使。

秋七月庚午，如沙嶺。壬申，耶覲刮諸部寇西北路。

八月，斡特刺以兵擊敗之，使來獻捷。

九月癸未，望祠木葉山。戊子，駐蹕藕絲淀。

冬十月壬寅，以樞密副使王師儒監修國史。癸卯，五國諸部長來貢。甲寅，以平州饑，復其租賦一年。

十一月壬申，以天德軍民田世榮三世同居，詔官之，令一子三班院祇候。丙子，召醫巫閭山僧志達設壇於內殿。戊子，夏國王李乾順遣使請尙公主。

十二月乙未，女直遣使來貢。己亥，以知右夷離畢事郝家奴爲北面林牙。辛亥，詔燕國王延禧擬注大將軍以下官。庚申，鐵驪來貢。宋遣使來謝。帝不豫。

是歲，封高麗王顒長子僕爲三韓國公。〔七〕放進士康秉儉等八十七人。

七年春正月壬戌朔，力疾御清風殿受百官及諸國使賀。是夜，白氣如練，自天而降。黑雲起于西北，疾飛有聲。北有青赤黑白氣，相雜而落。癸亥，如混同江。甲戌，上崩于行宮，年七十。遺詔燕國王延禧嗣位。

六月庚子，上尊諡仁聖大孝文皇帝，廟號道宗。

贊曰：道宗初卽位，求直言，訪治道，勸農興學，救災恤患，粲然可觀。及夫謗訕之令旣行，告訐之賞日重。羣邪並興，讒巧競進。賊及骨肉，皇基寢危。衆正淪胥，諸部反側。甲兵之用無寧歲矣。一歲而飯僧三十六萬，一日而祝髮三千。徒勤小惠，蔑計大本。尙足與論治哉？

校勘記

〔一〕壽隆 錢大昕養新錄八稱，東北諸蕃紀要、北遼通書、歷代紀年、東都事略、通考以及各種石刻均作「壽昌」，遼人謹于避諱，道宗斷無取聖宗名紀元之理。錢說是，「隆」當作「昌」。壽昌，全史只閏考一見。今一律未改。

〔二〕乙亥 乙亥，原誤「己亥」。按朔考，四月丙寅朔，無己亥，初十日乙亥。據改。

〔三〕阻卜長禿里底來貢 禿里底，原誤「香里底」，據屬國表改。殿本作「杏里底」，亦誤。

〔四〕命其叔顛權知國事 叔，原誤「子」。按高麗史，徽三子：勳、運、顛。顯係運之子，于顛爲侄。據改。

〔五〕二月丙辰朔 丙，原誤「甲」。按正月丙戌朔，下推三十一日丙辰。朔考，二月丙辰朔。據改。

〔六〕閏月丙午 「閏月」二字原脫。按二月丙辰朔，無丙午；閏二月丙戌朔，丙午二十一日。據補。

〔七〕封高麗王顛長子俱爲三韓國公 「長子俱」三字原脫。按高麗史十一，顛册封爲高麗王在丁丑（壽昌三年），顛之長子俱册爲三韓國公在庚辰（壽昌六年）。據補。



遼史卷二十七

本紀第二十七

天祚皇帝一

天祚皇帝，諱延禧，字延寧，小字阿果。道宗之孫，父順宗大孝順聖皇帝，母貞順皇后蕭氏。大康元年生。六歲封梁王，加守太尉，兼中書令。後三年，進封燕國王。大安七年，總北南院樞密使事，加尙書令，爲天下兵馬大元帥。

壽隆七年正月甲戌，道宗崩，奉遺詔卽皇帝位于柩前。羣臣上尊號曰天祚皇帝。二月壬辰朔，改元乾統，大赦。詔爲耶律乙辛所誣陷者，復其官爵，籍沒者出之，流放者還之。乙未，遣使告哀于宋及西夏、高麗。乙巳，以北府宰相蕭兀納爲遼興軍節度使，加守太傅。

三月丁卯，詔有司以張孝傑家屬分賜羣臣。甲戌，召僧法頤放戒于內庭。夏四月，旱。

六月庚寅朔，如慶州。甲午，宋遣王潛等來弔祭。丙申，高麗、夏國各遣使慰奠。戊戌，以南府宰相幹特刺兼南院樞密使。庚子，追諡懿德皇后爲宣懿皇后。壬寅，以宋魏國王和魯幹爲天下兵馬大元帥。乙巳，以北平郡王淳進封鄭王。丁未，北院樞密使耶律阿思加于越。辛亥，葬仁聖大孝文皇帝、宣懿皇后于慶陵。〔二〕

秋七月癸亥，阻卜、鐵驪來貢。

八月甲寅，謁慶陵。

九月壬申，謁懷陵。乙亥，駐蹕藕絲淀。

冬十月壬辰，謁乾陵。甲辰，上皇考昭懷太子諡曰大孝順聖皇帝，廟號順宗，皇妣曰貞順皇后。

十二月戊子，以樞密副使張琳知樞密院事，翰林學士張奉珪參知政事兼同知樞密院事。癸巳，宋遣黃實來賀卽位。丁酉，高麗、夏國並遣使來賀。乙巳，詔先朝已行事，不得陳告。

初，以楊割爲生女直部節度使，其俗呼爲太師。是歲楊割死，傳于兄之子烏雅束，束

死，其弟阿骨打襲。〔三〕

二年春正月，如鴨子河。

二月辛卯，如春州。

三月，大寒，冰復合。

夏四月辛亥，詔誅乙辛黨，徙其子孫于邊；發乙辛、得里特之墓，剖棺，戮屍；以其家屬分賜被殺之家。

五月乙丑，幹特刺獻耶覲刮等部捷。

六月壬辰，以雨罷獵，駐蹕散水原。丙午，夏國王李乾順復遣使請尙公主。丁未，南院大王陳家奴致仕。壬子，李乾順爲宋所攻，遣李造福、田若水求援。

閏月庚申，策賢良。壬申，降惠妃爲庶人。

秋七月，獵黑嶺，以霖雨，給獵人馬。阻卜來侵，幹特刺等戰敗之。

冬十月乙卯，蕭海里叛，劫乾州武庫器甲。命北面林牙郝家奴捕之，蕭海里亡入陪尤水阿典部。丙寅，以南府宰相耶律幹特刺爲北院樞密使，參知政事牛溫舒知南院樞密使事。

十一月乙未，郝家奴以不獲蕭海里，免官。壬寅，以上京留守耶律慎思爲北院樞密副

使。有司請以帝生日爲天興節。

三年春正月辛巳朔，如混同江。女直函蕭海里首，遣使來獻。戊申，如春州。

二月庚午，以武清縣大水，弛其陂澤之禁。

夏五月戊子，以獵人多亡，嚴立科禁。乙巳，清暑赤勒嶺。丙午，謁慶陵。

六月辛酉，夏國王李乾順復遣使請尙公主。

秋七月，中京雨雹，傷稼。

冬十月甲辰，如中京。己未，吐蕃遣使來貢。庚申，夏國復遣使求援。己巳，有事于觀德殿。

十一月丙申，文武百官加上尊號曰惠文智武聖孝天祚皇帝，大赦，以宋魏國王和魯幹爲皇太叔，梁王撻魯進封燕國王，鄭王淳爲東京留守，進封越國王，百官各進一階。丁酉，以惕隱耶律何魯掃古爲南院大王。戊戌，以受尊號，告廟。乙巳，謁太祖廟，追尊太祖之高祖曰昭烈皇帝，廟號肅祖，妣曰昭烈皇后；曾祖曰莊敬皇帝，廟號懿祖，妣曰莊敬皇后。召監修國史耶律儼纂太祖諸帝實錄。

十二月戊申，如藕絲淀。

是年，放進士馬恭回等百三人。

四年春正月戊子，幸魚兒灤。壬寅，獵木嶺。癸卯，燕國王撻魯薨。

二月丁丑，鼻骨德遣使來貢。

夏六月甲辰，駐蹕旺國崖。甲寅，夏國遣李造福、田若水求援。癸亥，吐蕃遣使來貢。

秋七月，南京蝗。庚辰，獵南山。癸未，以西北路招討使蕭得里底、北院樞密副使耶律慎思並知北院樞密使事。辛卯，以同知南院樞密使事蕭敵里爲西北路招討使。

冬十月己酉，鳳凰見于灤陰。己未，幸南京。

十一月乙亥，御迎月樓，賜貧民錢。

十二月辛丑，以張琳爲南府宰相。

五年春正月乙亥，夏國遣李造福等來求援，且乞伐宋。庚寅，以遼興軍節度使蕭常哥爲北府宰相。丁酉，遣樞密直學士高端禮等諷宋罷伐夏兵。

二月癸卯，微行，視民疾苦。丙午，幸鴛鴦灤。

三月壬申，以族女南仙封成安公主，下嫁夏國王李乾順。

夏四月甲申，射虎炭山。

五月癸卯，清暑南崖。壬子，宋遣曾孝廣、王戩報聘。

六月甲戌，夏國遣使來謝，及貢方物。己丑，幸候里吉。

秋七月，謁慶陵。

九月辛亥，駐蹕藕絲淀。乙卯，謁乾陵。

冬十一月戊戌，禁商賈之家應進士舉。丙辰，高麗三韓國公王顥薨，子俱遣使來告。

十二月己巳，夏國復遣李造福、田若水求援。癸酉，宋遣林洙來議與夏約和。〔三〕

六年春正月辛丑，遣知北院樞密使事蕭得里底、〔四〕知南院樞密使事牛溫舒使宋，諷歸所侵夏地。

夏五月，清暑散水原。

六月辛巳，夏國遣李造福等來謝。

秋七月癸巳，阻卜來貢。甲午，如黑嶺。庚子，獵鹿角山。

冬十月乙亥，宋與夏通好，遣劉正符、曹穆來告。〔五〕庚辰，以皇太叔、南京留守和魯幹

兼惕隱，東京留守、越國王淳爲南府宰相。

十一月乙未，以謝家奴爲南院大王，馬奴爲奚六部大王。丙申，行柴册禮。戊戌，大赦。以和魯幹爲義和仁聖皇太叔，〔六〕越國王淳進封魏國王，封皇子敖盧幹爲晉王，習泥烈爲饒樂郡王。己亥，謁太祖廟。甲辰，祠木葉山。

十二月己巳，封耶律儼爲漆水郡王，餘官進爵有差。

七年春正月，釣魚于鴨子河。

二月，駐蹕大魚灤。

夏六月，次散水原。

秋七月，如黑嶺。

冬十月，謁乾陵，獵醫巫閭山。

是年，放進士李石等百人。

八年春正月，如春州。

夏四月丙申，封高麗王僕爲三韓國公，贈其父暉爲高麗國王。〔七〕
五月，清暑散水原。

六月壬辰，西北路招討使蕭敵里率諸蕃來朝。丙申，射柳祈雨。壬寅，夏國王李乾順以成安公主生子，遣使來告。丁未，如黑嶺。

秋七月戊辰，以雨罷獵。

冬十二月己卯，高麗遣使來謝。

九年春正月丙午朔，如鴨子河。

二月，如春州。

三月戊午，夏國以宋不歸地，遣使來告。

夏四月壬午，五國部來貢。

六月乙亥，清暑特禮嶺。

秋七月，隕霜，傷稼。甲寅，獵于候里吉。

八月丁酉，雪，罷獵。

冬十月癸酉，望祠木葉山。丁丑，詔免今年租稅。

十二月甲申，高麗遣使來貢。

是年，放進士劉楨等九十人。

十年春正月辛丑，預行立春禮。如鴨子河。

二月庚午朔，駐蹕大魚澤。

夏四月丙子，五國部長來貢。丙戌，預行再生禮。癸巳，獵于北山。

六月甲戌，清暑玉丘。癸未，夏國遣李造福等來貢。甲午，阻卜來貢。

秋七月辛丑，謁慶陵。

閏月辛亥，謁懷陵。己未，謁祖陵。壬戌，皇太叔和魯幹薨。

九月甲戌，免重九節禮。

冬十月，駐蹕藕絲淀。

十二月己酉，改明年元。

是歲，大饑。

天慶元年春正月，鈎魚于鴨子河。

二月，如春州。

三月乙亥，五國部長來貢。

夏五月，清暑散水原。

秋七月，獵。

冬十月，駐蹕藕絲淀。

二年春正月己未朔，如鴨子河。丁丑，五國部長來貢。

二月丁酉，如春州，幸混同江釣魚，〔八〕界外生女直酋長在千里內者，以故事皆來朝。適遇「頭魚宴」，酒半酣，上臨軒，命諸酋次第起舞；獨阿骨打辭以不能。諭之再三，終不從。他日，上密謂樞密使蕭奉先曰：「前日之燕，阿骨打意氣雄豪，顧視不常，可託以邊事誅之。否則，必貽後患。」奉先曰：「僉人不知禮義，無大過而殺之，恐傷向化之心。假有異志，又何能爲？」其弟吳乞買、粘罕、胡舍等嘗從獵，〔九〕能呼鹿，刺虎，搏熊。上喜，輒加官爵。

夏六月庚寅，清暑南崖。甲午，和州回鶻來貢。戊戌，成安公主來朝。甲辰，阻卜來貢。

秋七月乙丑，獵南山。

九月己未，射獲熊，燕羣臣，上親御琵琶。初，阿骨打混同江宴歸，疑上知其異志，遂稱兵，先併旁近部族。女直趙三、阿鶻產拒之，阿骨打虜其家屬。二人走訴咸州，詳穩司送北

樞密院。樞密使蕭奉先作常事以聞上，仍送咸州詰責，欲使自新。後數召，阿骨打竟稱疾不至。

冬十月辛亥，高麗三韓國公王俱之母死，來告，卽遣使致祭，起復。是月，駐蹕奉聖州。十一月乙卯，幸南京。丁卯，謁太祖廟。

是年，放進士韓昉等七十七人。

三年春正月丙寅，賜南京貧民錢。丁卯，如大魚灤。甲戌，禁僧尼破戒。丙子，獵狗牙山，大寒，獵人多死。

三月，籍諸道戶，徙大牢古山圍場地居民于別土。阿骨打一日率五百騎突至咸州，吏民大驚。翌日，赴詳穩司，與趙三等面折庭下。阿骨打不屈，送所司問狀。一夕遁去。遣人訴于上，謂詳穩司欲見殺，故不敢留。自是召不復至。

夏閏四月，李弘以左道聚衆爲亂，支解，分示五京。

六月乙卯，韓朗改國遣使來貢良犬。丙辰，夏國遣使來貢。

秋七月，幸秋山。

九月，駐蹕藕絲淀。

十一月甲午，以三司使虞融知南院樞密使事，西南面招討使蕭樂古爲南府宰相。

十二月庚戌，高麗遣使來謝致祭。癸丑，回鶻遣使來貢。甲寅，以樞密直學士馬人望參知政事。丙辰，知樞密院事耶律儼薨。癸亥，高麗遣使來謝起復。

四年春正月，如春州。初，女直起兵，以紇石烈部人阿疎不從，遣其部撤改討之。阿疎弟狄故保來告，詔諭使勿討，不聽，阿疎來奔。至是女直遣使來索，不發。

夏五月，清暑散水原。

秋七月，女直復遣使取阿疎，不發，乃遣侍御阿息保問境上多建城堡之故。女直以慢語答曰：「若還阿疎，朝貢如故；不然，城未能已。」遂發渾河北諸軍，益東北路統軍司。阿骨打乃與弟粘罕、胡舍等謀，以銀朮割、移烈、婁室、闍母等爲帥，集女直諸部兵，擒遼障鷹官。及攻寧江州，東北路統軍司以聞。時上在慶州射鹿，聞之略不介意，遣海州刺史高仙壽統渤海軍應援。蕭撻不也遇女直，戰于寧江東，敗績。

冬十月壬寅朔，以守司空蕭嗣先爲東北路都統，靜江軍節度使蕭撻不也爲副，發契丹奚軍三千人，中京禁兵及土豪二千人，別選諸路武勇二千餘人，以虞候崔公義爲都押官，控鶴指揮邢穎爲副，引軍屯出河店。兩軍對壘，女直軍潛渡混同江，掩擊遼衆。蕭嗣先軍

潰，崔公義、邢穎、耶律佛留、蕭葛十等死之，其獲免者十有七人。蕭奉先懼其弟嗣先獲罪，輒奏東征潰軍所至劫掠，若不肆赦，恐聚爲患。上從之，嗣先但免官而已。諸軍相謂曰：「戰則有死而無功，退則有生而無罪。」故士無鬪志，望風奔潰。

十一月壬辰，都統蕭敵里等營于幹鄰、濼東，又爲女直所襲，士卒死者甚衆。甲午，蕭敵里亦坐免官。^{〔三〕}辛丑，以西北路招討使耶律幹里朶爲行軍都統，^{〔二〕}副點檢蕭乙薛、同知南院樞密使事耶律章奴副之。

十二月，咸、賓、祥三州及鐵驪、兀惹皆叛入女直。乙薛往援賓州，南軍諸將實婁、特烈等往援咸州，並爲女直所敗。

校勘記

〔一〕辛亥葬仁聖大孝文皇帝宣懿皇后于慶陵 遼文匯八道宗哀册、宣懿哀册並作壬子將遷座于永

福陵。

〔二〕其弟阿骨打襲 按金史世紀，楊割（盈歌）卒于乾統三年癸未，烏雅束襲；烏雅束卒于天慶三年癸巳，阿骨打襲。此係帶叙，年份未合。

〔三〕宋遣林洙來議與夏約和 林洙，國志一〇、宋史二〇及長編並作林攄。

〔四〕知北院樞密使事蕭得里底 事字原脫，據上文四年六月及卷一〇〇本傳補。

〔五〕遣劉正符曹穆來告 劉正符，國志一〇、宋史二〇及長編並作劉正夫。

〔六〕以和魯幹爲義和仁聖皇太叔 按皇子表，聖作壽。和魯幹與天祚爲祖孫輩，「皇太叔」係封號。

〔七〕封高麗王俱爲三韓國公贈其父顒爲高麗國王 按高麗史一一，壽昌三年已封顒爲高麗王，六

年已封俱爲三韓國公。又卷一二，六年二月，遼遣使册俱爲高麗王，顒無追封之事。

〔八〕正月如鴨子河至二月幸混同江 按紀太平四年二月，「詔改鴨子河曰混同江」。但此後鴨子河

之名仍沿用未廢。

〔九〕其弟吳乞買粘罕胡舍等嘗從獵 按國志一〇云：「阿骨打有弟姪曰吳乞馬、粘罕、胡捨輩，天

祚歲入秋山，數人必從行。」吳乞馬卽吳乞買，漢名晟，爲阿骨打之弟。粘罕，本名粘沒喝，又作

粘哥，金史七四有傳作宗翰；胡捨卽胡舍，大金國志二七有傳作骨捨。二人均阿骨打之姪。

〔一〇〕阿骨打乃與弟粘罕胡舍等謀 「弟」應作姪。參校勘記〔九〕。

〔一一〕冬十月壬寅朔 冬字，依文例補。朔字，據朔考補。

〔一二〕蕭敵里亦坐免官 按蕭敵里卽上文蕭嗣先，金史作蕭紉里。

〔一三〕西北路招討使耶律幹里朶爲行軍都統 國志一〇作「北樞密副使耶律幹離朶涑流河路都統」。

遼史卷二十八

本紀第二十八

天祚皇帝二

五年春正月，下詔親征，遣僧家奴持書約和，斥阿骨打名。阿骨打遣賽刺復書，〔一〕若歸叛人阿疎，遷黃龍府於別地，然後議之。都統耶律幹里朶等與女直兵戰于達魯古城，敗績。

二月，饒州渤海古欲等反，自稱大王。

三月，以蕭謝佛留等討之。遣耶律張家奴等六人齎書使女直，斥其主名，冀以速降。

夏四月癸丑，蕭謝佛留等爲渤海古欲所敗，以南面副部署蕭陶蘇幹爲都統，赴之。

五月，陶蘇幹及古欲戰，敗績。張家奴等以阿骨打書來，復遣之往。

六月己亥朔，清暑特禮嶺。壬子，張家奴等還，阿骨打復書，亦斥名諭之使降。癸丑，

以親征諭諸道。丙辰，陶蘇幹招獲古欲等。癸亥，以惕隱耶律末里爲北院大王。是月，遣蕭辭刺使女直，以書辭不屈見留。

秋七月辛未，宋遣使致助軍銀絹。丙子，獵于嶺東。是月，都統幹里朶等與女直戰于白馬濼，敗績。

八月甲子，罷獵，趨軍中。以幹里朶等軍敗，免官。丙寅，以圍場使阿不爲中軍都統，耶律張家奴爲都監，率番、漢兵十萬，蕭奉先充御營都統，諸行營都部署耶律章奴爲副，以精兵二萬爲先鋒。餘分五部爲正軍，貴族子弟千人爲硬軍，扈從百司爲護衛軍，北出駱駝口，以都點檢蕭胡覩姑爲都統，樞密直學士柴誼爲副，將漢步騎三萬，南出寧江州。自長春州分道而進，發數月糧，期必滅女直。

九月丁卯朔，女直軍陷黃龍府。己巳，知北院樞密使蕭得里底出爲西南面招討使。辭刺還，女直復遣賽刺以書來報：若歸我叛人阿疎等，卽當班師。上親征。粘罕、兀朮等以書來上，陽爲卑哀之辭，實欲求戰。書上，上怒，下詔有「女直作過，大軍翦除」之語。女直主聚衆，勢面仰天慟哭曰：「始與汝等起兵，蓋苦契丹殘忍，欲自立國。今主上親征，奈何？非人死戰，莫能當也。不若殺我一族，汝等迎降，轉禍爲福。」諸軍皆曰：「事已至此，惟命是從。」乙巳，耶律章奴反，奔上京，謀迎立魏國王淳。上遣駙馬蕭昱領兵詣廣平淀護后妃，行

宮小底乙信持書馳報魏國王。時章奴先遣王妃親弟蕭諦里以所謀說魏國王。王曰：「此非細事，主上自有諸王當立，北、南面大臣不來，而汝言及此，何也？」密令左右拘之。有頃，乙信等賈御札至，備言章奴等欲廢立事。魏國王立斬蕭諦里等首以獻，單騎間道詣廣平淀待罪。上遇之如初。章奴知魏國王不聽，率麾下掠慶、饒、懷、祖等州，結渤海羣盜，衆至數萬，趨廣平淀犯行宮。順國女直阿鶻產以三百騎一戰而勝，擒其貴族二百餘人，並斬首以徇。其妻子配役繡院，或散諸近侍爲婢，餘得脫者皆奔女直。章奴詐爲使者，欲奔女直，爲邏者所獲，縛送行在，腰斬于市，剖其心以獻祖廟，支解以徇五路。

冬十一月，遣駙馬蕭特末、林牙蕭察刺等將騎兵五萬、步卒四十萬、親軍七十萬至駝門。

十二月乙巳，耶律張家奴叛。〔三〕戊申，親戰于護步答岡，敗績，盡亡其輜重。己未，錦州刺史耶律朮者叛應張家奴。〔四〕庚申，北面林牙耶律馬哥討張家奴。癸亥，以北院宣徽使蕭韓家奴知北院樞密使事，南院宣徽使蕭特末爲漢人行宮都部署。

六年春正月丙寅朔，東京夜有惡少年十餘人，乘酒執刃，踰垣入留守府，問留守蕭保先所在：「今軍變，請爲備。」蕭保先出，刺殺之。戶部使大公鼎聞亂，卽攝留守事，與副留守高

清明集奚、漢兵千人，〔五〕盡捕其衆，斬之，撫定其民。東京故渤海地，太祖力戰二十餘年，乃得之。而蕭保先嚴酷，渤海苦之，故有是變。其裨將渤海高永昌僭號，稱隆基元年。〔六〕遣蕭乙薛、高興順招之，不從。

閏月己亥，遣蕭韓家奴、張琳討之。戊午，貴德州守將耶律余覲以廣州渤海叛附永昌，我師擊敗之。

二月戊辰，侍御司徒撻不也等討張家奴，戰于祖州，敗績。乙酉，遣漢人行宮都部署蕭特末率諸將討張家奴。戊子，張家奴誘饒州渤海及中京賊侯槃等萬餘人，攻陷高州。

三月，東面行軍副統酬幹等擒侯槃于川州。

夏四月戊辰，親征張家奴。癸酉，敗之。甲戌，誅叛黨，饒州渤海平。丙子，賞平賊將士有差，而蕭韓家奴、張琳等復爲賊所敗。

五月，清暑散水原。女直軍攻下瀋州，復陷東京，擒高永昌。東京州縣族人痕孛、鐸刺、吳十、撻不也、道刺、酬幹等十三人皆降女直。

六月乙丑，籍諸路兵，有雜畜十頭以上者皆從軍。庚辰，魏國王淳進封秦晉國王，爲都元帥；上京留守蕭撻不也爲契丹行宮都部署兼副元帥。丁亥，知北院樞密使事蕭韓家奴爲上京留守。

秋七月，獵秋山。春州渤海二千餘戶叛，東北路統軍使勒兵追及，盡俘以還。

八月，烏古部叛，遣中丞耶律撻不也等招之。

九月丙午，謁懷陵。

冬十月丁卯，以張琳軍敗，奪官。庚辰，烏古部來降。

十一月，東面行軍副統馬哥等攻曷蘇館，敗績。

十二月乙亥，封庶人蕭氏爲太皇太妃。辛巳，削副統耶律馬哥官。

七年春正月甲寅，減廐馬粟，分給諸局。是月，女直軍攻春州，東北面諸軍不戰自潰，

女古、皮室四部及渤海人皆降，復下秦州。〔七〕

二月，涑水縣賊董龐兒聚衆萬餘，西京留守蕭乙薛、南京統軍都監查刺與戰于易水，破之。

三月，龐兒黨復聚，乙薛復擊破之于奉聖州。

夏五月庚寅，東北面行軍諸將涅里、合魯、涅哥、虛古等棄市。乙巳，諸圍場隙地，縱百姓樵採。

六月辛巳，以同知樞密院事余里也爲北院大王。

秋七月癸卯，獵秋山。

八月丙寅，獵狻斯那里山，命都元帥秦晉王赴沿邊，會四路兵馬防秋。

九月，上自燕至陰涼河，置怨軍八營：募自宜州者曰前宜、後宜，自錦州者曰前錦、後錦，自乾自顯者曰乾曰顯，又有乾顯大營、岩州營，凡二萬八千餘人，屯衛州蒺藜山。丁酉，獵輞子山。

冬十月乙卯朔，至中京。

十二月丙寅，都元帥秦晉國王淳遇女直軍，戰于蒺藜山，敗績。女直復拔顯州旁近州郡。庚午，下詔自責。癸酉，遣夷離畢查刺與大公鼎諸路募兵。丁丑，以西京留守蕭乙薛爲北府宰相，東北路行軍都統奚霞末知奚六部大王事。

是歲，女直阿骨打用鐵州楊朴策，卽皇帝位，建元天輔，國號金。楊朴又言，自古英雄開國或受禪，必先求大國封冊，遂遣使議和，以求封冊。

八年春正月，幸鴛鴦渚。丁亥，遣耶律奴哥等使金議和。庚寅，保安軍節度使張崇以雙州二百戶降金。東路諸州盜賊蜂起，掠民自隨以充食。

二月，耶律奴哥還自金，金主復書曰：「能以兄事朕，歲貢方物，歸我上、中京、興中府三

路州縣；以親王、公主、駙馬、大臣子孫爲質；還我行人及元給信符，并宋、夏、高麗往復書詔、表牒，則可以如約。」

三月甲午，復遣奴哥使金。

夏四月辛酉，以西南面招討使蕭得里底爲北院樞密使。

五月壬午朔，奴哥以書來，約不踰此月見報。戊戌，復遣奴哥使金，要以酌中之議。是月，至納葛濼。賊安生兒、張高兒聚衆二十萬，耶律馬哥等斬生兒于龍化州，高兒亡入懿州，與霍六哥相合。金主遣胡突袞與奴哥持書，報如前約。

六月丁卯，遣奴哥等齎宋、夏、高麗書詔、表牒至金。霍六哥陷海北州，趣義州，軍帥回離保等擊敗之。通、祺、雙、遼四州之民八百餘戶降于金。

秋七月，獵秋山。金復遣胡突袞來，免取質子及上京、興中府所屬州郡，裁減歲幣之數，「如能以兄事朕，冊用漢儀，可以如約」。

八月庚午，遣奴哥、突迭使金，議冊禮。

九月，突迭見留，遣奴哥還，謂之曰：「言如不從，勿復遣使。」

閏月丙寅，遣奴哥復使金，而蕭寶、訛里等十五人各率戶降于金。〔八〕

冬十月，奴哥、突迭持金書來。龍化州張應古等四人率衆降金。

十一月，副元帥蕭撻不也薨。

十二月甲申，議定冊禮，遣奴哥使金。寧昌軍節度使劉宏以懿州戶三千降金。時山前諸路大饑，乾、顯、宜、錦、興中等路，斗粟直數縑，民削榆皮食之，既而人相食。

是年，放進士王翬等百三人。

九年春正月，金遣烏林答贊謨持書來迎冊。

二月，至鴛鴦。賊張撒八誘中京射糧軍，僭號，南面軍帥余覲擒撒八。

三月丁未朔，遣知右夷離畢事蕭習泥烈等冊金主爲東懷國皇帝。己酉，烏林答贊謨、奴哥等先以書報。

夏五月，阻卜補疎只等叛，執招討使耶律幹里朶，都監蕭斜里得死之。

秋七月，獵南山。金復遣烏林答贊謨來，責冊文無「兄事」之語，不言「大金」而云「東懷」，乃小邦懷其德之義；及冊文有「渠材」二字，語涉輕侮；若「遙芬多戩」等語，皆非善意，殊乖體式。如依前書所定，然後可從。楊詢卿、羅子韋率衆降金。

八月，以趙王習泥烈爲西京留守。

九月，至西京。復遣習泥烈、楊立忠先持冊藁使金。〔九〕

冬十月甲戌朔，耶律陳圖奴等二十餘人謀反，伏誅。是月，遣使送烏林答贊謨持書以還。

十年春二月，幸鴛鴦濼。金復遣烏林答贊謨持書及冊文副本以來，仍責乞兵于高麗。三月己酉，民有羣馬者，十取其一，給東路軍。庚申，以金人所定「大聖」二字，與先世稱號同，復遣習泥烈往議。金主怒，遂絕之。

夏四月，獵胡土白山，聞金師再舉，耶律白斯不等選精兵三千以濟遼師。

五月，金主親攻上京，克外鄂，留守撻不也率衆出降。

六月乙酉，以北府宰相蕭乙薛爲上京留守、知鹽鐵內省兩司、東北統軍司事。

秋，獵沙嶺。

冬，復至西京。

校勘記

〔一〕阿骨打遣賽刺復書 賽刺，又見本年九月。屬國表並作塞刺。

〔二〕耶律張家奴至耶律章奴 按耶律章奴卽耶律張家奴，金史作張奴。紀事重複。

〔三〕耶律張家奴叛 按此卽上文九月乙巳耶律章奴反，奔上京，謀迎立魏國王淳事。以下章奴事重出不備舉。

〔四〕錦州刺史耶律朮者 按卷一〇〇本傳，左遷銀州刺史。錦州爲節度，非刺史。

〔五〕副留守高清明 按百官志四及國志一〇並作高清臣。

〔六〕稱隆基元年 按國志一〇，隆基作應順。

〔七〕女古皮室四部及渤海人皆降復下泰州 按金史七六杲傳：「杲以兵一萬攻泰州，下金山縣，女固、脾室四部及渤海人皆來降，遂克泰州。」

〔八〕蕭寶訛里等十五人各率戶降于金 按屬國表：「蕭寶、訛里野、特末、霍石、韓慶和、王伯龍等各率衆歸于金。」金史二太祖紀亦作蕭寶、訛里野。

〔九〕楊立忠使金 按屬國表，楊立忠作楊近忠。

遼史卷二十九

本紀第二十九

天祚皇帝三

保大元年春正月丁酉朔，改元，肆赦。初，金人興兵，郡縣所失幾半。上有四子：長趙王，母趙昭容；〔一〕次晉王，母文妃；次秦王、許王，皆元妃生。國人知晉王之賢，深所屬望。元妃之兄樞密使蕭奉先恐秦王不得立，潛圖之。文妃姊妹三人：長適耶律撻曷里，次文妃，次適余覲。一日，其姊若妹俱會軍前，奉先諷人誣駙馬蕭昱及余覲等謀立晉王，事覺，昱、撻曷里等伏誅，文妃亦賜死；獨晉王未忍加罪。余覲在軍中，聞之大懼，卽率千餘騎叛入金。〔二〕上遣知奚王府事蕭遐買、北府宰相蕭德恭、太常袁耶律諦里姑、歸州觀察使蕭和尚奴、四軍太師蕭幹將所部兵追之，及諸閭山縣。諸將議曰：「主上信蕭奉先言，奉先視吾輩蔑如也。余覲乃宗室豪俊，常不肯爲奉先下。若擒余覲，他日吾黨皆余覲也！不若縱之。」

還，卽給曰：「追襲不及。」奉先既見余覲之亡，恐後日諸校亦叛，遂勸驟加爵賞，以結衆心。以蕭遐買爲奚王，蕭德恭試中書門下平章事兼判上京留守事，耶律誦里姑爲龍虎衛上將軍，蕭和尚奴金吾衛上將軍，蕭幹鎮國大將軍。

二月，幸鴛鴦濼。

夏五月，至曷里狹。

秋七月，獵炭山。

九月，至南京。

冬十一月癸亥，以西京留守趙王習泥烈爲惕隱。

二年春正月乙亥，金克中京，進下澤州。上出居庸關，至鴛鴦濼。聞余覲引金人婁室孛董奄至，蕭奉先曰：「余覲乃王子班之苗裔，此來欲立甥晉王耳。若爲社稷計，不惜一子，明其罪誅之，可不戰而余覲自回矣。」上遂賜晉王死，素服三日，耶律撒八等皆伏誅。王素有人望，諸軍聞其死，無不流涕，由是人心解體。余覲引金人逼行宮，上率衛兵五千餘騎幸雲中，遺傳國璽于桑乾河。

二月庚寅朔，日有食之，旣。甲午，知北院大王事耶律馬哥、漢人行宮都部署蕭特末並

爲都統，太和宮使耶律補得副之，將兵屯鴛鴦灤。己亥，金師敗奚王霞末于北安州，遂降其城。

三月辛酉，上聞金師將出嶺西，遂趨白水灤。乙丑，羣牧使謨魯幹降金。丙寅，上至女古底倉。聞金兵將近，計不知所出，乘輕騎入夾山，方悟奉先之不忠。怒曰：「汝父子誤我至此，今欲誅汝，何益于事！恐軍心忿怨，爾曹避敵苟安，禍必及我，其勿從行。」奉先下馬，哭拜而去。行未數里，左右執其父子，縛送金兵。金人斬其長子昂，以奉先及其次子昱械送金主。道遇遼軍，奪以歸國，遂並賜死。逐樞密使蕭得里底。召撻不也典禁衛。丁卯，以北院樞密副使蕭僧孝奴知北院樞密使事，同知北院樞密使事蕭查刺爲左夷離畢。戊辰，同知殿前點檢事耶律高八率衛士降金。己巳，偵人蕭和尚、牌印郎君耶律晒斯爲金師所獲。癸酉，以諸局百工多亡，凡扈從不限吏民，皆官之。初，詔留宰相張琳、李處溫與秦晉國王淳守燕。處溫聞上入夾山，數日命令不通，卽與弟處能、子奭，外假怨軍，內結都統蕭幹，謀立淳。遂與諸大臣耶律大石、左企弓、虞仲文、曹勇義、康公弼集蕃漢百官、諸軍及父老數萬人詣淳府。處溫邀張琳至，白其事。琳曰：「攝政則可。」處溫曰：「天意人心已定，請立班耳。」處溫等請淳受禮，淳方出，李奭持赭袍被之，令百官拜舞山呼。淳驚駭，再三辭，不獲已而從之。以處溫守太尉，左企弓守司徒，曹勇義知樞密院事，虞仲文參知政事，張琳守太師，

李處能直樞密院，李爽爲少府少監、提舉翰林醫官，李爽、陳祕十餘人曾與大計，並賜進士及第，授官有差。蕭幹爲北樞密使，駙馬都尉蕭旦知樞密院事。改怨軍爲常勝軍。於是肆赦，自稱天錫皇帝，改元建福，降封天祚爲湘陰王。遂據有燕、雲、平及上京、遼西六路。天祚所有，沙漠已北，西南、西北路兩都招討府、諸蕃部族而已。

夏四月辛卯，西南面招討使耶律佛頂降金，雲內、寧邊、東勝等州皆降。阿疎爲金兵所擒。金已取西京，沙漠以南部族皆降。上遂遁於訛莎烈。時北部謨葛失驢馬、駝、食羊。

五月甲戌，都統馬哥收集散亡，會于漚里謹。丙子，以馬哥知北院樞密使事，兼都統。

六月，淳寢疾，聞上傳檄天德、雲內、朔、武、應、蔚等州，合諸蕃精兵五萬騎，約以八月入燕；并遣人問勞，索衣裘、茗藥。淳甚驚，命南、北面大臣議。而李處溫、蕭幹等有迎秦拒湘之說，集蕃漢百官議之。從其議者，東立；惟南面行營都部署耶律寧西立。處溫等問故，寧曰：「天祚果能以諸蕃兵大舉奪燕，則是天數未盡，豈能拒之？否則，秦、湘，父子也，拒則皆拒。自古安有迎子而拒其父者？」處溫等相顧微笑，以寧扇亂軍心，欲殺之。淳歛枕長歎曰：「彼忠臣也，焉可殺？」天祚果來，吾有死耳，復何面目相見耶！已而淳死，衆乃議立其妻蕭氏爲皇太后，主軍國事。奉遺命，迎立天祚次子秦王定爲帝。太后遂稱制，改元德興。處溫父子懼禍，南通童貫，欲挾蕭太后納土于宋，北通于金，欲爲內應，外以援立大功自陳。蕭

太后罵曰：「誤秦晉國王者，皆汝父子！」悉數其過數十，賜死，嚮其子爽而磔之；籍其家，得錢七萬緡，金玉寶器稱是，爲宰相數月之間所取也。謨葛失以兵來援，爲金人敗于洪灰水，擒其子陀古及其屬阿敵音。夏國援兵至，亦爲金所敗。

秋七月丁巳朔，敵烈部皮室叛，烏古部節度使耶律棠古討平之，加太子太保。乙丑，上京毛八十率二千戶降金。辛未，夏國遣曹价來問起居。

八月戊戌，親遇金軍，戰于石輦驛，敗績，都統蕭特末及其姪撒古被執。辛丑，會軍于歡撻新查刺，金兵追之急，棄輜重以遁。

九月，敵烈部叛，都統馬哥克之。

冬十月，金兵攻蔚州，降。

十一月乙丑，聞金兵至奉聖州，遂率衛兵屯于落昆髓。秦晉王淳妻蕭德妃五表于金，求立秦王，不許，以勁兵守居庸。及金兵臨關，厓石自崩，戍卒多壓死，不戰而潰。德妃出古北口，趨天德軍。

十二月，知金主撫定南京，上遂由掃里關出居四部族詳穩之家。

三年春正月丁巳，奚王回離保僭號，稱天復元年，命都統馬哥討之。甲子，初，張穀爲

遼興軍節度副使，民推穀領州事。秦晉王淳既死，蕭德妃遣時立愛知平州。穀知遼必亡，練兵畜馬，籍丁壯爲備。立愛至，穀弗納。金帥粘罕入燕，首問平州事於故參知政事康公弼。公弼曰：「穀狂妄寡謀，雖有鄉兵，彼何能爲？示之不疑，圖之未晚。」金人招時立愛赴軍前，加穀臨海軍節度使，仍知平州。既而又欲以精兵三千先下平州，擒張穀。公弼曰：「若加兵，是趣之叛也。」公弼請自往覘之。穀謂公弼曰：「遼之八路，七路已降，獨平州未解甲者，防蕭幹耳。」厚賂公弼而還。公弼復粘罕曰：「彼無足慮。」金人遂改平州爲南京，加穀試中書門下平章事，判留守事。庚辰，宜、錦、乾、顯、成、川、豪、懿等州相繼皆降，上京盧彥倫叛，殺契丹人。

二月乙酉朔，興中府降金。來州歸德軍節度使田顯、權隰州刺史杜師回、權遷州刺史高永昌、權潤州刺史張成，皆籍所管戶降金。丙戌，誅蕭德妃，降淳爲庶人，盡釋其黨。癸巳，興中、宜州復城守。

三月，駐蹕于雲內州南。

夏四月甲申朔，以知北院樞密使事蕭僧孝奴爲諸道大都督。丙申，金兵至居庸關，擒耶律大石。戊戌，金兵圍輜重于青塚，硬寨太保特母哥竊梁王雅里以遁，秦王、許王、諸妃、公主、從臣皆陷沒。庚子，梁宋大長公主特里亡歸。壬寅，金遣人來招。癸卯，答言請和。

丙午，金兵送族屬輜重東行，乃遣兵邀戰于白水灤，趙王習泥烈、蕭道寧皆被執。上遣牌印郎君謀盧瓦送免紐金印僞降，遂西遁雲內。駙馬都尉乳奴詣金降。己酉，金復以書來招，答其書。壬子，金帥書來，不許請和。是月，特母哥挈雅里至，上怒不能盡救諸子，詰之。

五月乙卯，夏國王李乾順遣使請臨其國。庚申，軍將耶律敵烈等夜劫梁王雅里奔西北部，立以爲帝，改元神曆。辛酉，渡河，止于金肅軍北。回離保爲衆所殺。

六月，遣使册李乾順爲夏國皇帝。

秋九月，耶律大石自金來歸。

冬十月，復渡河東還，居突呂不部。梁王雅里歿，耶律朮烈繼之。

十一月，朮烈爲衆所殺。

四年春正月，上趨都統馬哥軍。金人來攻，棄營北遁，馬哥被執。謨葛失來迎，驢馬、駝、羊，又率部人防衛。時侍從乏糧數日，以衣易羊。至烏古敵烈部，以都點檢蕭乙薛知北院樞密使事，封謨葛失爲神于越王。特母哥降金。

二月，耶律遙設等十人謀叛，伏誅。

夏五月，金人旣克燕，驅燕之大家東徙，以燕空城及涿、易、檀、順、景、薊州與宋以塞

盟。左企弓、康公弼、曹勇義、虞仲文皆東遷。燕民流離道路，不勝其苦，入平州，言於留守張穀曰：「宰相左企弓不謀守燕，使吾民流離，無所安集。公今臨巨鎮，握強兵，盡忠於遼，必能使我復歸鄉土，人心亦惟公是望。」穀遂召諸將領議。皆曰：「聞天祚兵勢復振，出沒漠南。公若仗義勤王，奉迎天祚，以圖中興，先責左企弓等叛降之罪而誅之，盡歸燕民，使復其業，而以平州歸宋，則宋無不接納，平州遂爲藩鎮矣。卽後日金人加兵，內用平山之軍，外得宋爲之援，又何懼焉！」穀曰：「此大事也，不可草草。翰林學士李石智而多謀，可召與議。」石至，其言與之合。乃遣張謙率五百餘騎，傳留守令，召宰相左企弓、曹勇義、樞密使虞仲文、參知政事康公弼至灤河西岸，遣議事官趙祕校往數十罪，〔七〕曰：「天祚播遷夾山，不卽奉迎，一也；勸皇叔秦晉王僭號，二也；詆訐君父，降封湘陰，三也；天祚遣知閣王有慶來議事而殺之，四也；檄書始至，有迎秦拒湘之議，五也；不謀守燕而降，六也；不顧大義，臣事于金，七也；根括燕財，取悅于金，八也；使燕人遷徙失業，九也；教金人發兵先下平州，十也。爾有十罪，所不容誅。」左企弓等無以對，皆縊殺之。仍稱保大三年，畫天祚象，朝夕謁，事必告而後行，稱遼官秩。

六月，榜諭燕人復業，恆產爲常勝軍所占者，悉還之。燕民旣得歸，大悅。翰林學士李石更名安弼，偕故三司使高黨往燕山，說宋王安中曰：「平州帶甲萬餘，穀有文武材，可用爲

屏翰；不然，將爲肘腋之患。」安中深然之，令安弼與黨詣宋。宋主詔帥臣王安中、詹度厚加安撫，與免三年常賦。穀聞之，自謂得計。

秋七月，金人屯來州，闍母聞平州附宋，以二千騎問罪，〔八〕先入營州。穀以精兵萬騎擊敗之。宋建平州爲泰寧軍，以穀爲節度使，以安弼、黨爲徽猷閣待制，令宣撫司出銀絹數萬犒賞。穀喜，遠迎。金人諜知，舉兵來襲，穀不得歸，奔燕。金人克三州，始來索穀，王安中諱之。索急，斬一人貌類者去。金人曰，非穀也，以兵來取。安中不得已，殺穀，函其首送金。〔九〕天祚旣得林牙耶律大石兵歸，又得陰山室韋謨葛失兵，自謂得天助，再謀出兵，復收燕、雲。大石林牙力諫曰：「自金人初陷長春、遼陽，則車駕不幸廣平淀，而都中京；及陷上京，則都燕山；及陷中京，則幸雲中；自雲中而播遷夾山。向以全師不謀戰備，使舉國漢地皆爲金有。國勢至此，而方求戰，非計也。當養兵待時而動，不可輕舉。」不從。大石遂殺乙薛及坡里括，置北、南面官屬，自立爲王，率所部西去。上遂率諸軍出夾山，下漁陽嶺，取天德、東勝、寧邊、雲內等州。南下武州，遇金人，戰于奄遏下水，復潰，直趨山陰。〔一〇〕

八月，國舅詳穩蕭撻不也、筆硯祇候察刺降金。是月，金主阿骨打死。〔一一〕

九月，建州降金。

冬十月，納突呂不部人訛哥之妻諳葛，以訛哥爲本部節度使。昭古牙率衆降金。金攻

興中府，降之。

十一月，從行者舉兵亂，北護衛太保朮者、舍利詳穩牙不里等擊敗之。

十二月，置二總管府。

校勘記

- 〔一〕上有四子長趙王母趙昭容。按皇子表，天祚六子。馮校：趙昭容「趙」字衍。
- 〔二〕即率千餘騎叛入金。按國志一一、金史太祖紀，余覩叛入金在本年五月。
- 〔三〕籍其家得錢七萬緡。按國志一一作「得見錢十萬餘貫」。
- 〔四〕毛八十率二千戶降金。按毛八十即毛子廉。金史七五本傳稱「率戶二千六百來歸」。
- 〔五〕石輦驛。卷一〇一耶律阿息保傳、卷一一四蕭特烈傳作石輦鐸，金史七四宗望傳作石輦驛。
- 〔六〕張穀爲遼興軍節度副使。穀，原誤「穀」。金史一一三本傳作覺，覺、穀音同，據改。
- 〔七〕遣議事官趙祕校往數十罪。趙祕校，國志一二作趙能。
- 〔八〕以二千騎問罪。按國志一二，二千騎作「三千騎」。
- 〔九〕夏五月金人既克燕，至秋七月函其首送金。按此一大段應屬三年。
- 〔一〇〕直趨山陰。山陰，地理志五作河陰。索隱：「遼置河陰縣，金改山陰。」
- 〔一一〕是月金主阿骨打死。按金史太祖紀，阿骨打死于天輔七年（保大三年）八月戊申。

遼史卷三十

本紀第三十

天祚皇帝四

五年春正月辛巳，党項小斛祿遣人請臨其地。戊子，趨天德，過沙漠，金兵忽至。上徒步出走，近侍進珠帽，却之，乘張仁貴馬得脫，至天德。己丑，遇雪，無禦寒具，朮者以貂裘帽進，途次絕糧，朮者進麩與棗，欲憩，朮者卽跪坐，倚之假寐。朮者輩惟齧冰雪以濟饑。過天德。至夜，將宿民家，給曰偵騎，其家知之，乃叩馬首，跪而大慟，潛宿其家。居數日，嘉其忠，遙授以節度使，遂趨党項。以小斛祿爲西南面招討使，總知軍事，仍賜其子及諸校爵賞有差。

二月，至應州新城東六十里，爲金人完顏婁室等所獲。

八月癸卯，至金。丙午，降封海濱王。以疾終，年五十有四，在位二十四年。金皇統元

年二月，改封豫王。五年，葬于廣寧府閭陽縣乾陵傍。

耶律淳者，世號爲北遼。淳小字涅里，興宗第四孫，南京留守、宋魏王和魯幹之子。清寧初，太后鞠育之。〔三〕既長，篤好文學。昭懷太子得罪，上欲以淳爲嗣。上怒耶律白斯，不知與淳善，出淳爲彰聖等軍節度使。

天祚卽位，進王鄭。〔三〕乾統二年，加越王。〔四〕六年，拜南府宰相，首議制兩府禮儀。上喜，徙王魏。其父和魯幹薨，卽以淳襲父守南京。冬夏入朝，寵冠諸王。

天慶五年，東征，都監章奴濟鴨子河，與淳子阿撒等三百餘人亡歸，先遣敵里等以廢立之謀報淳，淳斬敵里首以獻，進封秦晉國王，拜都元帥，賜金券，免漢拜禮，不名。許自擇將士，乃募燕、雲精兵。東至錦州，隊長武朝彥作亂，劫淳。淳匿而免，收朝彥誅之。會金兵至，聚兵戰于阿里軫斗，敗績，收亡卒數千人拒之。淳入朝，釋其罪，詔南京刻石紀功。

保大二年，天祚入夾山，奚王回離保、林牙耶律大石等引唐靈武故事，議欲立淳。淳不從，官屬勸進曰：「主上蒙塵，中原擾攘，若不立王，百姓何歸？宜熟計之。」遂卽位。百官上號天錫皇帝，改保大二年爲建福元年，大赦。放進士李寶信等一十九人，遙降天祚爲湘陰

王。以燕、雲、平、上京、中京、遼西六路，淳主之；沙漠以北、南北路兩都招討府、諸蕃部族等，仍隸天祚。自此遼國分矣。封其妻普賢女爲德妃，以回離保知北院樞密使事，軍旅之事悉委大石。又遣使報宋，免歲幣，結好。宋人發兵問罪，擊敗之。尋遣使奉表于金，乞爲附庸。事未決，淳病死，年六十。百官僞諡曰孝章皇帝，廟號宣宗，葬燕西香山永安陵。

遺命遙立秦王定以存社稷，德妃爲皇太后，稱制，改建福爲德興元年，放進士李球等百八人。時宋兵來攻，戰敗之，由是人心大悅，兵勢日振。宰相李純等潛納宋兵，居民內應，抱關者被殺甚衆。翌日，攻內東門，衛兵力戰，宋軍大潰，踰城而走，死者相藉。五表于金，求立秦王，不從。而金兵大至，德妃奔天德軍，見天祚。天祚怒，誅德妃，降淳庶人，除其屬籍。

耶律雅里者，天祚皇帝第二子也，字撒鸞。七歲，欲立爲皇太子，別置禁衛，封梁王。

保大三年，金師圍青塚寨，雅里在軍中。太保特母哥挾之出走，間道行至陰山。聞天祚失利趨雲內，雅里馳赴。時扈從者千餘人，多於天祚。天祚慮特母哥生變，欲誅之。責以不能全救諸王，將訊之。仗劍召雅里問曰：「特母哥教汝何爲？」雅里對曰：「無他言。」乃

釋之。

天祚渡河奔夏，隊帥耶律敵列等劫雅里北走。至沙嶺，見蛇橫道而過，識者以爲不祥。後三日，羣僚共立雅里爲主。雅里遂卽位，改元神曆，命士庶上便宜。

雅里性寬大，惡誅殺。獲亡者，答之而已。有自歸者，卽官之。因謂左右曰：「欲附來歸，不附則去。何須威逼耶？」每取唐貞觀政要及林牙資忠所作治國詩，令侍從讀之。烏古部節度使紮哲、迭烈部統軍撻不也、都監突里不等各率其衆來附。自是諸部繼至。而雅里日漸荒怠，好擊鞠。特母哥切諫，乃不復出。以耶律敵列爲樞密使，特母哥副之。敵列劾西北路招討使蕭紮里熒惑衆心，志有不臣，與其子麻涅並誅之。以遙設爲招討使，與諸部戰，數敗，杖免官。

從行有疲困者，輒振給之。直長保德諫曰：「今國家空虛，賜賚若此，將何以相給耶？」雅里怒曰：「昔畋於福山，卿誣獵官，今復有此言。若無諸部，我將何取？」不納。初，令羣牧運鹽灤倉粟，而民盜之，議籍以償。雅里乃自爲直：每粟一車，償一羊；三車一牛；五車一馬；八車一駝。左右曰：「今一羊易粟二斗且不可得，乃償一車！」雅里曰：「民有則我有。若令盡償，民何堪？」

後獵查刺山，一日而射黃羊四十，狼二十一，因致疾，卒，年三十。

耶律大石者，世號爲西遼。大石字重德，太祖八代孫也。通遼、漢字，善騎射，登天慶五年進士第，擢翰林應奉，尋陞承旨。遼以翰林爲林牙，故稱大石林牙。歷泰、祥二州刺史，遼興軍節度使。

保大二年，金兵日逼，天祚播越，與諸大臣立秦晉王淳爲帝。淳死，立其妻蕭德妃爲太后，以守燕。及金兵至，蕭德妃歸天祚。天祚怒誅德妃而責大石曰：「我在，汝何敢立淳？」對曰：「陛下以全國之勢，不能一拒敵，棄國遠遁，使黎民塗炭。卽立十淳，皆太祖子孫，豈不勝乞命於他人耶？」上無以答，賜酒食，赦其罪。

大石不自安，遂殺蕭乙薛、坡里括，自立爲王，率鐵騎二百宵遁。北行三日，過黑水，見白達達詳穩牀古兒。牀古兒獻馬四百，駝二十，羊若干。西至可敦城，駐北庭都護府，會威武、崇德、會蕃、新、大林、紫河、駝等七州及大黃室韋、敵刺、王紀刺、茶赤刺、也喜、鼻古德、尼刺、達刺乖、達密里、密兒紀、合主、烏古里、阻卜、普速完、唐古、忽母思、奚的、糺而畢十八部王衆，〔六〕諭曰：「我祖宗艱難創業，歷世九主，歷年二百。金以臣屬，逼我國家，殘我黎庶，屠翦我州邑，使我天祚皇帝蒙塵于外，日夜痛心疾首。我今仗義而西，欲借力諸蕃，翦

我仇敵，復我疆宇。惟爾衆亦有軫我國家，憂我社稷，思共救君父，濟生民於難者乎？」遂得精兵萬餘，置官吏，立排甲，具器仗。

明年二月甲午，以青牛白馬祭天地、祖宗，整旅而西。先遺書回鶻王畢勒哥曰：「昔我太祖皇帝北征，過卜古罕城，〔七〕即遣使至甘州，詔爾祖烏母主曰：『汝思故國耶，朕即爲汝復之；汝不能返耶，朕則有之。在朕，猶在爾也。』爾祖即表謝，以爲遷國于此，十有餘世，軍民皆安土重遷，不能復返矣。是與爾國非一日之好也。今我將西至大食，假道爾國，其勿致疑。」畢勒哥得書，即迎至邸，大宴三日。臨行，獻馬六百，駝百，羊三千，願質子孫爲附庸，送至境外。所過，敵者勝之，降者安之。兵行萬里，歸者數國，獲駝、馬、牛、羊、財物，不可勝計。軍勢日盛，銳氣日倍。

至尋思干，西域諸國舉兵十萬，號忽兒珊，來拒戰。兩軍相望二里許。諭將士曰：「彼軍雖多而無謀，攻之，則首尾不救，我師必勝。」遣六院司大王蕭幹里刺、招討副使耶律松山等將兵二千五百攻其右；樞密副使蕭刺阿不、〔八〕招討使耶律朮薛等將兵二千五百攻其左；自以衆攻其中。三軍俱進，忽兒珊大敗，僵屍數十里。駐軍尋思干凡九十日，回回國王來降，貢方物。

又西至起兒漫，文武百官册立大石爲帝，以甲辰歲二月五日即位，年三十八，號葛兒

罕。復上漢尊號曰天祐皇帝，改元延慶。追諡祖父爲嗣元皇帝，祖母爲宣義皇后，册元妃蕭氏爲昭德皇后。因謂百官曰：「朕與卿等行三萬里，跋涉沙漠，夙夜艱勤。賴祖宗之福，卿等之力，冒登大位。爾祖爾父宜加卹典，共享尊榮。」自蕭幹里刺等四十九人祖父，封爵有差。

延慶三年，班師東歸，馬行二十日，得善地，遂建都城，號虎思斡耳朵，改延慶爲康國元年。三月，以六院司大王蕭幹里刺爲兵馬都元帥，敵刺部前同知樞密院事蕭查刺阿不副之，茶赤刺部禿魯耶律燕山爲都部署，護衛耶律鐵哥爲都監，率七萬騎東征。以青牛白馬祭天，樹旗以誓于衆曰：「我大遼自太祖、太宗艱難而成帝業，其後嗣君耽樂無厭，不恤國政，盜賊蠡起，天下土崩。朕率爾衆，遠至朔漠，期復大業，以光中興。此非朕與爾世居之地。」申命元帥幹里刺曰：「今汝其往，信賞必罰，與士卒同甘苦，擇善水草以立營，量敵而進，毋自取禍敗也。」行萬餘里無所得，牛馬多死，勒兵而還。大石曰：「皇天弗順，數也。」康國十年歿，在位二十年，廟號德宗。

子夷列年幼，遺命皇后權國。后名塔不煙，號感天皇后，稱制，改元咸清，在位七年。子夷列卽位，改元紹興。籍民十八歲以上，得八萬四千五百戶。在位十三年歿，廟號仁宗。

子幼，遺詔以妹普速完權國，稱制，改元崇福，號承天太后。後與駙馬蕭朶魯不弟朴古

只沙里通，出駙馬爲東平王，羅織殺之。駙馬父幹里刺以兵圍其宮，射殺普速完及朴古只沙里。普速完在位十四年。

仁宗次子直魯古卽位，改元天禧，在位三十四年。時秋出獵，乃蠻王屈出律以伏兵八千擒之，而據其位。遂襲遼衣冠，尊直魯古爲太上皇，皇后爲皇太后，朝夕問起居，以待終焉。直魯古死，遼絕。

耶律淳在天祚之世，歷王大國，受賜金券，贊拜不名。一時恩遇，無與爲比。當天祚播越，以都元帥留守南京，獨不可奮大義以激燕民及諸大臣，興勤王之師，東拒金而迎天祚乎？乃自取之，是篡也。况忍王天祚哉？

大石旣帝淳而王天祚矣，復歸天祚。天祚責以大義，乃自立爲王而去之。幸藉祖宗餘威遺智，建號萬里之外。雖寡母弱子，更繼迭承，幾九十年，亦可謂難矣。

然淳與雅里、大石之立，皆在天祚之世。有君而復君之，其可乎哉？諸葛武侯爲獻帝發喪，而後立先主爲帝者，不可同年語矣。故著以爲戒云。

贊曰：遼起朔野，兵甲之盛，鼓行數外，席卷河朔，樹晉植漢，何其壯歟？太祖、太宗乘百戰之勢，輯新造之邦，英謀叡略，可謂遠矣。雖以世宗中才，穆宗殘暴，連遘弑逆，而神器不搖。蓋由祖宗威令猶足以震疊其國人也。

聖宗以來，內修政治，外拓疆宇。既而申固鄰好，四境乂安。維持二百餘年之基，有自來矣。

降臻天祚，既丁末運，又缺人望，崇信姦回，自秬國本，羣下離心。金兵一集，內難先作，廢立之謀，叛亡之迹，相繼蠡起。馴致土崩瓦解，不可復支，良可哀也！耶律與蕭，世爲甥舅，義同休戚。奉先挾私滅公，首禍構難，一至於斯。天祚窮蹙，始悟奉先誤己，不幾晚乎！

淳、雅里所謂名不正，言不順，事不成者也。大石苟延，彼善於此，亦幾何哉？

校勘記

〔一〕至天德 按金史八二蕭仲恭傳作「至霍里底泊」。

〔二〕清寧初太后鞠育之 按淳死于保大二年，若「年六十」無誤，則當生于清寧九年，「清寧初」有誤字。

〔三〕天祚卽位進王鄭 按紀乾統元年六月，以北平郡王淳進封鄭王。

〔四〕乾統二年加越王 按紀乾統三年十一月，鄭王淳進封越國王。

〔五〕宰相李純 按紀保大二年三月及卷一〇二本傳並作李處溫。

〔六〕大黃室韋等十八部 按敵刺，百官志二作敵烈；王紀刺卽金史之廣吉刺、元史之宏吉刺；茶赤刺，紀大安十年四月、百官志二並作茶札刺，卽元史之札只刺特；鼻古特，百官志二作鼻國德；密兒紀，紀壽隆三年二月作梅里急，卽元秘史之篋兒乞；忽母思，卽百官志二之胡母思山部，兵衛志下之胡母思山蕃；糺而畢，部族表作紀而畢。

〔七〕卜古罕城 羅校謂卽太祖紀之古回鶻城。

〔八〕蕭刺阿不 按下文作蕭查刺阿不。

遼史卷三十一

志第一

營衛志上

上古之世，草衣木食，巢居穴處，熙熙于于，不求不爭。爰自炎帝政衰，蚩尤作亂，始制干戈，以毒天下。軒轅氏作，戮之涿鹿之阿。處則象吻于宮，行則懸旄于纛，以爲天下萬世戒。於是師兵營衛，不得不設矣。

冀州以南，歷洪水之變，夏后始制城郭。其人士著而居綏服之中，外奮武衛，內揆文教，守在四邊。營衛之設，以備非常而已。并、營以北，勁風多寒，隨陽遷徙，歲無寧居，曠土萬里，寇賊竄宄乘隙而作。營衛之設，以爲常然。其勢然也。

有遼始大，設制尤密。居有宮衛，謂之幹魯朶；出有行營，謂之捺鉢；分鎮邊圉，謂之部族。有事則以攻戰爲務，閑暇則以畋漁爲生。無日不營，無在不衛。立國規模，莫重於此。

作營衛志。

宮衛

遼國之法：天子踐位置宮衛，分州縣，析部族，設官府，籍戶口，備兵馬。崩則扈從后妃宮帳，以奉陵寢。有調發，則丁壯從戎事，老弱居守。

太祖曰弘義宮，應天皇后曰長寧宮，太宗曰永興宮，世宗曰積慶宮，穆宗曰延昌宮，景宗曰彰愍宮，承天太后曰崇德宮，聖宗曰興聖宮，興宗曰延慶宮，道宗曰太和宮，天祚曰永昌宮。又孝文皇太弟有敦睦宮，丞相耶律隆運有文忠王府。凡州三十八，縣十，提轄司四十一，石烈二十三，瓦里七十四，抹里九十八，得里二，闡撒十九。爲正戶八萬，蕃漢轉戶十二萬三千，〔二〕共二十萬三千戶。

算斡魯朶，太祖置。國語心腹曰「算」，宮曰「斡魯朶」。是爲弘義宮。以心腹之衛置，益以渤海俘，錦州戶。其斡魯朶在臨潢府，陵寢在祖州東南二十里。正戶八千，蕃漢轉戶七千，出騎軍六千。

州五：錦、祖、嚴、祺、銀。

縣一：富義。

提轄司四：南京、西京、奉聖州、平州。

石烈二：曰須，曰速魯。

瓦里四：曰合不，曰撻撒，曰慢押，曰虎池。

抹里四：曰臚，曰預墩，曰鶻突，曰糾里闡。

得里二：曰述壘北，曰述壘南。

國阿輦幹魯朶，太宗置。收國曰「國阿輦」。是爲永興宮，初名孤穩幹魯朶。以太祖平渤海俘戶，東京、懷州提轄司及雲州懷仁縣、澤州灤河縣等戶置。其幹魯朶在游古河側，陵寢在懷州南三十里。正戶三千，蕃漢轉戶七千，出騎軍五千。

州四：懷、黔、開、來。

縣二：保和、灤河。

提轄司四：南京、西京、奉聖州、平州。

石烈一：北女古。

瓦里四：曰抹，曰母，曰合李只，曰述壘。

抹里十三：曰述墨軫，曰大隔蔑，曰小隔蔑，曰母，曰歸化不朮，曰唐括，曰吐谷，曰百爾瓜忒，曰合魯不只，曰移馬不只，曰臚，曰清帶，曰速穩。

開撒七：曰伯德部，曰守狨，曰穴骨只，曰合不頻尼，曰虎里狨，曰耶里只挾室，曰僧隱令公。

耶魯盃幹魯朶，世宗置。興盛曰「耶魯盃」。是爲積慶宮。以文獻皇帝衛從及太祖俘戶，及雲州提轄司，并高、宜等州戶置。其幹魯朶在土河東，陵寢在長寧宮北。正戶五千，蕃漢轉戶八千，出騎軍八千。

州三：康、顯、宜。

縣一：山東。

提轄司四。

石烈一：兮臘。

瓦里八：曰達撒，曰合不，曰吸烈，曰逼里，曰潭馬，曰槩不，曰耶里直，曰耶魯兀也。

抹里十：曰紇斯直，曰蠻葛，曰厥里，曰潭馬忒，曰出懶，曰速忽魯腕，曰牒里得，曰閻馬，曰迭里特，曰女古。

蒲速盃斡魯朶，應天皇太后置。興隆曰「蒲速盃」。是爲長寧宮。以遼州及海濱縣等戶置。其斡魯朶在高州，陵寢在龍化州東一百里。世宗分屬讓國皇帝宮院。正戶七千，蕃漢轉戶六千，出騎軍五千。

州四：遼、儀坤、遼西、顯。

縣三：奉先、歸義、定霸。

提轄司四。

石烈一：北女古。

瓦里六：曰潭馬，曰合不，曰達撒，曰慢押，曰耶里只，曰渾只。

抹里十三：曰渾得移鄰稍瓦只，曰合四卑臘因鐵里卑稍只，曰奪羅果只，曰拏葛只，曰

合里只，曰婆渾昆母溫，曰阿魯埃得本，曰東斯里門，曰西斯里門，曰東鑊里，曰西

鑊里，曰牒得只，曰滅母鄰母。

奪里本斡魯朶，穆宗置。是爲延昌宮。討平曰「奪里本」。以國阿輦斡魯朶戶及阻卜俘戶，中京提轄司、南京制置司、咸、信、韓等州戶置。其斡魯朶在紉雅里山南，陵寢在京南。

正戶一千，蕃漢轉戶三千，出騎軍二千。

州二：遂、韓。

提轄司三：中京、南京、平州。

石烈一：日須。

瓦里四：日抹骨古等，日兀沒，日潭馬，日合里直。

抹里四：日抹骨登兀沒滅，日土木直移鄰，日息州決里，日莫瑰奪石。

監母幹魯朶，景宗置。是爲彰愍宮。遺留曰「監母」。以章肅皇帝侍衛及武安州戶置。

其幹魯朶在合魯河，陵寢在祖州南。正戶八千，蕃漢轉戶一萬，出騎軍一萬。

州四：永、龍化、降聖、同。

縣二：行唐、阜俗。〔三〕

提轄司四。

石烈二：日監母，日南女古。

瓦里七：日潭馬，日奚烈，日埃合里直，日蠻雅葛，日特末，日烏也，日滅合里直。

抹里十一：日尼母曷烈因稍瓦直，日察改因麻得不，日移失鄰幹直，日辛古不直，日撒

改眞，曰牙葛直，曰虎狻阿里鄰，曰潑昆，曰潭馬，曰闌臘，曰楚兀眞果鄰。

孤穩幹魯朶，承天太后置。是爲崇德宮。玉曰「孤穩」。以乾、顯、雙三州戶置。其幹魯朶在土河東，陵祔景宗皇帝。正戶六千，蕃漢轉戶一萬，出騎軍一萬。

州四：乾、川、雙、貴德。

縣一：潑上京。

提轄司三：南京、西京、奉聖州。

石烈三：曰鑣里，曰滂，曰迭里特女古。

瓦里七：曰達撒，曰耶里，曰合不，曰歇不，曰合里直，曰慢押，曰耶里直。

抹里十一：曰阿里廝直述壘，曰預篤溫稍瓦直，曰潭馬，曰賃預篤溫一臘，曰牙葛直，曰

牒得直，曰虎溫，曰孤溫，曰撒里僧，曰阿里葛斯過鄰，曰鐵里乖穩鑣里。

闌撒五：曰合不直迷里幾頻你，曰牒耳葛太保果直，曰爪里阿本果直，曰僧隱令公果直，曰老昆令公果直。

女古幹魯朶，聖宗置。是爲興聖宮。金曰「女古」。以國阿輦、耶魯益、蒲速益三幹魯朶

戶置。其幹魯朶在女混活直，陵寢在慶州南安。正戶一萬，蕃漢轉戶二萬，出騎軍五千。

州五：慶、隰、烏上京、烏東京、霸。
提轄司四。

石烈四：曰毫兀真女姑，曰孛兀真女室，曰女特里特，曰女古滂。

瓦里六：曰女古，曰蒲速盃，曰鶻篤，曰乙抵，曰蒼，曰埃也。

抹里九：曰乙辛不只，曰鐵乖溫，曰埃合里只，曰嘲瑰，曰合魯山血古只，曰奪忒排登血

古只，曰勞骨，曰虛沙，曰土鄰。

闡撒五：曰達鄰頻你，曰和里懶你，曰爪阿不厥真，曰粘獨里僧，曰袍達夫人厥只。

窩篤盃幹魯朶，興宗置。是爲延慶宮。孳息曰「窩篤盃」。以諸幹魯朶及饒州戶置。其幹魯朶在高州西，陵寢在上京慶州。正戶七千，蕃漢轉戶一萬，出騎軍一萬。

州三：饒、長春、秦。

提轄司四。

石烈二：曰窩篤盃、曰鶻篤骨。

瓦里六：曰窩篤盃，曰厮把，曰厮阿，曰糺里，曰得里，曰歐烈。

抹里六：曰歐里本，曰燕廝，曰緬四，曰乙僧，曰北得里，曰南得里。

阿思斡魯朶，道宗置。是爲太和宮。寬大曰「阿思」。以諸斡魯朶御前承應人及與中府戶置。其斡魯朶在好水濼，陵寢在上京慶州。正戶一萬，蕃漢轉戶二萬，出騎軍一萬五千。

石烈二：曰阿廝，曰耶魯。

瓦里八：曰阿廝，曰耶魯，曰得里，曰糺里，曰撒不，曰鶻篤，曰蒲速斡，曰曷烈。

抹里七：曰恩州得里，曰斡奢得里，曰歐里本，曰特滿，曰查刺土鄰，曰糺里，曰阿里廝迷里。

阿魯盃斡魯朶，天祚皇帝置。是爲永昌宮。輔祐曰「阿魯盃」。以諸斡魯朶御前承應人，春、宣州戶置。正戶八千，蕃漢轉戶一萬，出騎軍一萬。

石烈二：曰阿魯盃，曰榆魯盃。

瓦里八：曰阿魯斡，曰合里也，曰鶻突，曰敵刺，曰謀魯斡，曰糺里，曰奪里刺，曰特末也。

抹里八：曰蒲速盃，曰移輦，曰斡篤盃，曰特滿，曰謀魯盃，曰移典，曰悅，曰勃得本。

孝文皇太弟敦陸宮，謂之赤寔得本幹魯朶。孝曰「赤寔得本」。文獻皇帝承應人及渤海俘，建、瀋、巖三州戶置。陵寢在祖州西南三十里。正戶三千，蕃漢轉戶五千，出騎軍五千。州三：建、瀋、巖。

提轄司一：南京。

石烈二：曰嘲，曰與敦。

瓦里六：曰乙辛，曰得里，曰奚烈直，曰大潭馬，曰小潭馬，曰與墩。

抹里二：曰潭馬抹乖，曰柳實。

闡撒二：曰聶里頻你，曰打里頻你。

大丞相晉國王耶律隆運，本韓氏，名德讓。以功賜國姓，出宮籍，隸橫帳季父房。贈尙書令，諡文忠。無子，以皇族魏王貼不子耶魯爲嗣，早卒；天祚皇帝又以皇子敖魯幹繼之。官給葬具，建廟乾陵側。擬諸宮例，建文忠王府。正戶五千，蕃漢轉戶八千，出騎軍一萬。

州一。〔四〕

提轄司六：上京、中京、南京、西京、奉聖州、平州。

著帳郎君

著帳郎君：初，遙輦痕德董可汗以蒲古只等三族害于越釋魯，籍沒家屬入瓦里。淳欽皇后宥之，以爲著帳郎君。世宗悉免。後族、戚、世官犯罪者沒入。

著帳戶

著帳戶：本諸幹魯朶析出，及諸罪沒入者。凡承應小底、司藏、鷹坊、湯藥、尙飲、盥漱、尙饌、尙衣、裁造等役，及宮中、親王祇從、伶官之屬，皆充之。

凡諸宮衛人丁四十萬八千，^{〔三〕}騎軍十萬一千。著帳釋宥、沒入，隨時增損，無常額。

校勘記

〔一〕正戶八萬蕃漢轉戶十二萬三千 按下文各宮戶數合計，正戶爲八萬二千，蕃漢轉戶十二萬四千。

〔二〕提轄司四 按此缺提轄司所在地名，應與弘義、永興兩宮同。下文長寧宮、彰愍宮、興聖宮、延慶宮仿此。

〔三〕縣二行唐阜俗 按地理志一，保和縣、宣化縣均于統和八年隸彰愍宮。

〔四〕州一 按地理志二：「宗州，耶律隆運以所俘漢民置。聖宗立爲州，隸文忠王府。王薨，屬提轄

司。」又地理志三：「川州，初隸崇德宮，統和中屬文忠王府。」

〔五〕諸宮衛人丁四十萬八千 永昌宮正戶八千，正丁一萬四千。若按其他各宮每戶二丁之例，則應是人丁一萬六千。諸宮衛人丁共爲四十一萬。

遼史卷三十二

志第二

營衛志中

行營

周官土圭之法：日東，景夕多風；日北，景長多寒。天地之間，風氣異宜，人生其間，各適其便。王者因三才而節制之。長城以南，多雨多暑，其人耕稼以食，桑麻以衣，宮室以居，城郭以治。大漠之間，多寒多風，畜牧畋漁以食，皮毛以衣，轉徙隨時，車馬爲家。此天時地利所以限南北也。遼國盡有大漠，浸包長城之境，因宜爲治。秋冬違寒，春夏避暑，隨水草就畋漁，歲以爲常。四時各有行在之所，謂之「捺鉢」。

春捺鉢：

曰鴨子河濼。皇帝正月上旬起牙帳，約六十日方至。天鵝未至，卓帳冰上，鑿冰取魚。

冰泮，乃縱鷹鵠捕鵝雁。晨出暮歸，從事弋獵。鴨子河濼東西二十里，南北三十里，在長春州東北三十五里，四面皆沙塢，多榆柳杏林。皇帝每至，侍御皆服墨綠色衣，各備連鎚一柄，鷹食一器，刺鵝錐一枚，於濼周圍相去各五七步排立。皇帝冠巾，衣時服，繫玉束帶，於上風望之。有鵝之處舉旗，探騎馳報，遠泊鳴鼓。鵝驚騰起，左右圍騎皆舉幟麾之。五坊擊進海東青鵝，拜授皇帝放之。鵝擒鵝墜，勢力不加，排立近者，舉錐刺鵝，取腦以飼鵝。救鵝人例賞銀絹。皇帝得頭鵝，薦廟，羣臣各獻酒果，舉樂。更相酬酢，致賀語，皆插鵝毛于首以爲樂。賜從人酒，遍散其毛。弋獵網鈎，春盡乃還。

夏捺鉢：

無常所，多在吐兒山。道宗每歲先幸黑山，拜聖宗、興宗陵，賞金蓮，乃幸子河避暑。吐兒山在黑山東北三百里，近饅頭山。黑山在慶州北十三里，上有池，池中有金蓮。子河在吐兒山東北三百里。懷州西山有清涼殿，亦爲行幸避暑之所。四月中旬起牙帳，卜吉地爲納涼所，五月末旬、六月上旬至。居五旬。與北、南臣僚議國事，暇日遊獵。七月中旬乃去。

秋捺鉢：

曰伏虎林。七月中旬自納涼處起牙帳，入山射鹿及虎。林在永州西北五十里。嘗有

虎據林，傷害居民畜牧。景宗領數騎獵焉，虎伏草際，戰慄不敢仰視，上舍之，因號伏虎林。每歲車駕至，皇族而下分布灤水側。伺夜將半，鹿飲鹽水，令獵人吹角效鹿鳴，既集而射之。謂之「舐鱗鹿」，又名「呼鹿」。

冬捺鉢：

曰廣平淀。在永州東南三十里，本名白馬淀。東西二十餘里，南北十餘里。地甚坦夷，四望皆沙磧，木多榆柳。其地饒沙，冬月稍暖，牙帳多於此坐冬，與北、南大臣會議國事，時出校獵講武，兼受南宋及諸國禮貢。皇帝牙帳以槍爲硬寨，用毛繩連繫。每槍下黑氈傘一，以庇衛士風雪。槍外小氈帳一層，每帳五人，各執兵仗爲禁圍。南有省方殿，殿北約二里曰壽寧殿，皆木柱竹椽，以氈爲蓋，彩繪韜柱，錦爲壁衣，加緋繡額。又以黃布繡龍爲地障，牕、榻皆以氈爲之，傅以黃油絹。基高尺餘，兩廂廊廡亦以氈蓋，無門戶。省方殿北有鹿皮帳，帳次北有八方公用殿。壽寧殿北有長春帳，衛以硬寨。宮用契丹兵四千人，每日輪番千人祇直。禁圍外卓槍爲寨，夜則拔槍移卓御寢帳。周圍拒馬，外設鋪，傳鈴宿衛。

每歲四時，周而復始。

皇帝四時巡守，契丹大小內外臣僚并應役次人，及漢人宣徽院所管百司皆從。漢人樞密院、中書省唯摘宰相一員，樞密院都副承旨二員，令史十人，中書令史一人，御史臺、大理

寺選摘一人扈從。每歲正月上旬，車駕啓行。宰相以下，還於中京居守，行遣漢人一切公事。除拜官僚，止行堂帖權差，俟會議行在所，取旨、出給誥敕。文官縣令、錄事以下更不奏聞，聽中書銓選；武官須奏聞。

五月，納涼行在所，南、北臣僚會議。十月，坐冬行在所，亦如之。

部族上

部落曰部，氏族曰族。契丹故俗，分地而居，合族而處。有族而部者，五院、六院之類是也；有部而族者，奚王、室韋之類是也；有部而不族者，特里特勉、稍瓦、曷朮之類是也；有族而不部者，遙輦九帳、皇族三父房是也。

奇首八部爲高麗、蠕蠕所侵，僅以萬口附于元魏。生聚未幾，北齊見侵，掠男女十萬餘口。繼爲突厥所逼，寄處高麗，不過萬家。部落離散，非復古八部矣。別部有臣附突厥者，內附於隋者，依紇臣水而居。部落漸衆，分爲十部，有地遼西五百餘里。唐世大賀氏仍爲八部，而松漠、玄州別出，亦十部也。遙輦氏承萬榮、可突于散敗之餘，更爲八部；然遙輦、迭刺別出，又十部也。阻午可汗析爲二十部，契丹始大。至于遼太祖，析九帳、三房之族，更列二十部。聖宗之世，分置十有六，增置十有八，并舊爲五十四部；內有拔里、乙室已國

舅族，外有附庸十部，盛矣！

其氏族可知者，略具皇族、外戚二表。餘五院、六院、乙室部止見益古、撒里本，涅刺、烏古部止見撒里卜、涅勒，突呂不、突舉部止見塔古里、航幹，皆兄弟也。奚王府部時瑟、哲里，則臣主也。品部有孛女，楮特部有洼。其餘世系名字，皆漫無所考矣。

舊志曰：「契丹之初，草居野次，靡有定所。至涅里始制部族，各有分地。太祖之興，以迭刺部強熾，析爲五院、六院。奚六部以下，多因俘降而置。勝兵甲者卽著軍籍，分隸諸路詳穩、統軍、招討司。番居內地者，歲時田牧平莽間。邊防紕戶，生生之資，仰給畜牧，績毛飲漚，以爲衣食。各安舊風，狃習勞事，不見紛華異物而遷。故家給人足，戎備整完。卒之虎視四方，強朝弱附，東踰蟠木，西越流沙，莫不率服。部族實爲之爪牙云。」

古八部：

悉萬丹部。

何大何部。

伏弗郁部。

羽陵部。(三)

日連部。

匹絜部。

黎部。〔三〕

吐六于部。

契丹之先，曰奇首可汗，生八子。其後族屬漸盛，分爲八部，居松漠之間。今永州木葉山有契丹始祖廟，奇首可汗、可敦併八子像在焉。潢河之西，土河之北，奇首可汗故壤也。

隋契丹十部：

元魏末，莫弗賀勿于畏高麗、蠕蠕侵逼，率車三千乘、衆萬口內附，乃去奇首可汗故壤，居白狼水東。〔四〕北齊文宣帝自平州三道來侵，虜男女十餘萬口，分置諸州。又爲突厥所逼，以萬家寄處高麗境內。隋開皇四年，諸莫弗賀悉衆款塞，聽居白狼故地。又別部寄處高麗者曰出伏等，率衆內附，詔置獨奚那頡之北。〔五〕又別部臣附突厥者四千餘戶來降，詔給糧遺還，固辭不去，部落漸衆，徙逐水草，依紇臣水而居。在遼西正北二百里，其地東西互五百里，南北三百里。分爲十部，逸其名。

唐大賀氏八部：

達稽部，峭落州。

紇便部，彈汗州。

獨活部，無逢州。

芬間部，〔云〕羽陵州。

突便部，日連州。

芮奚部，徒河州。

墜斤部，萬丹州。

伏部，州二：匹黎、赤山。

唐太宗置玄州，以契丹大帥據曲爲刺史。〔七〕又置松漠都督府，以窟哥爲都督，分八部，并玄州爲十州。則十部在其中矣。

遙輦氏八部：

旦利皆部。

乙室活部。

實活部。〔八〕

納尾部。

頻沒部。

納會雞部。〔九〕

集解部。

奚嗚部。

當唐開元、天寶間，大賀氏既微，遼始祖涅里立迪輦祖里爲阻午可汗。〔二〇〕時契丹因萬榮之敗，部落凋散，卽故有族衆分爲八部。涅里所統迭刺部自爲別部，不與其列。并遙輦、迭刺亦十部也。

遙輦阻午可汗二十部：

耶律七部。

審密五部。

八部。

涅里相阻午可汗，分三耶律爲七，二審密爲五，并前八部爲二十部。三耶律：一日大賀，二曰遙輦，三曰世里，卽皇族也。二審密：一日乙室已，二曰拔里，卽國舅也。其分部皆未詳；可知者曰迭刺，曰乙室，曰品，曰楮特，曰烏隗，曰突呂不，曰捏刺，〔二〕曰突舉，又有右大部、左大部，凡十，逸其二。大賀、遙輦析爲六，而世里合爲一，茲所以迭刺部終遙輦之世，強不可制云。

校勘記

〔一〕景夕多風 夕，原誤「朝」。據周禮地官大司徒改。

〔二〕伏弗郁部及羽陵部 按此二部名本魏書契丹傳。魏書顯祖紀兩見，並作具伏弗部、郁羽陵部，册府元龜九六九同。魏書勿吉傳又見郁羽陵之名。魏書契丹傳誤，通典邊防典、北史契丹傳及本志均沿誤。

〔三〕匹黎部及黎部 按此本魏書契丹傳。魏書顯祖紀、勿吉傳並作匹黎爾部，册府元龜九六九、通典邊防典作匹黎部，均作一部之名。本志沿魏書契丹傳誤分爲二部。又魏書顯祖紀來朝者爲具伏弗、郁羽陵、日連、匹黎爾、叱六于、悉萬丹、阿大何、羽真侯各部。

〔四〕白狼水 按隋書八四契丹傳作白貔河。

〔五〕獨奚那頡 按世表及隋書契丹傳作渴奚那頡。

〔六〕芬間部 芬間部，册府元龜、新唐書地理志及契丹傳同。地理志一作芬阿部。

〔七〕大帥據曲爲刺史 據曲，新唐書契丹傳、地理志並作曲據。舊唐書地理志作李去閭。

〔八〕實活部 按地理志三作室活部。

〔九〕納會雞部 按地理志一作內會雞部。

〔一〇〕迪輦祖里 按世表作迪輦俎里。

〔一一〕涅刺 按上下文均作捏刺。

遼史卷三十三

志第三

營衛志下

部族下

遼起松漠，經營撫納，竟有唐、晉帝王之器，典章文物施及潢海之區，作史者尙可以故俗語耶？舊史有部族志，歷代之所無也。古者，巡守于方岳，五服之君各述其職，遼之部族實似之。故以部族置宮衛、行營之後云。

遼內四部族：

遙輦九帳族。

橫帳三父房族。

國舅帳拔里、乙室已族。

國舅別部。

太祖二十部，二國舅升帳分，止十八部。

五院部。其先日益古，凡六營。阻午可汗時，與弟撒里本領之，曰迭刺部。傳至太祖，以夷離董卽位。天贊元年，以強大難制，析五石烈爲五院，六爪爲六院，各置夷離董。會同元年，更夷離董爲大王。部隸北府，以鎮南境。大王及都監春夏居五院部之側，秋冬居羊門甸。〔一〕石烈四：

大蔑孤石烈。

小蔑孤石烈。

甌昆石烈。太宗會同二年，以烏古之地水草豐美，命居之。三年，益以海勒水之地爲農田。

乙習本石烈。會同二年，命以烏古之地。

六院部。隸北府，以鎮南境。其大王及都監春夏居泰德泉之北，秋冬居獨盧金。石烈四：

轄懶石烈。

阿速石烈。

斡納撥石烈。

斡納阿刺石烈。會同二年，命居烏古。三年，益以海勒水地。

乙室部。其先曰撒里本，阻午可汗之世，與其兄益古分營而領之，曰乙室部。會同二年，更夷離董爲大王。隸南府，其大王及都監鎮駐西南之境，司徒居鴛鴦泊，闡撒狻居車軸山。石烈二：

阿里答石烈。

欲主石烈。

品部。其先曰拏女，阻午可汗以其營爲部。太祖更諸部夷離董爲令穩。統和中，又改節度使。隸北府，屬西北路招討司，司徒居太子墳。凡戍軍隸節度使，留後戶隸司徒。石烈二：

北哲里只石烈。

南轄懶石烈。

楮特部。其先曰洼，阻午可汗以其營爲部。隸南府，節度使屬西北路招討司，司徒居

柏坡山及鐮山之側。〔三〕石烈二：

北石烈。

南石烈。

烏隗部。其先曰撒里卜，與其兄涅勒同營，阻午可汗析爲二：撒里卜爲烏隗部，涅勒爲涅刺部。俱隸北府，烏隗部節度使屬東北路招討司，司徒居徐母山、郝里河之側。石烈二：

北石烈。

南石烈。

涅刺部。其先曰涅勒，阻午可汗分其營爲部。節度使屬西南路招討司，居黑山北，〔四〕司徒居郝里河側。石烈二：

北場里石烈。

南察里石烈。

突呂不部。其先曰塔古里，領三營。阻午可汗命分其一與弟航幹爲突舉部；塔古里得其二，更爲突呂不部。隸北府，節度使屬西北路招討司，司徒居長春州西。石烈二：
北托不石烈。

南須石烈。

突舉部。〔五〕其先曰航幹，阻午可汗分管置部。隸南府，戍於隗烏古部，司徒居兀泉側。

石烈二：

北石烈。

南石烈。

奚王府六部五帳分。其先曰時瑟，事東遙里十帳部主哲里。後逐哲里，自立爲奚王。卒，弟吐勒斯立。遙輦鮮質可汗討之，俘其拒敵者七百戶，撫其降者。以時瑟鄰睦之故，止俘部曲之半，餘悉留焉。奚勢由是衰矣。初爲五部：曰遙里，曰伯德，曰奧里，曰梅只，曰楚里。太祖盡降之，號五部奚。天贊二年，〔六〕有東扒里斯胡損者，恃險堅壁於箭筈山以拒命，擲揄曰：「大軍何能爲，我當飲墮瑰門下矣！」太祖滅之，以奚府給役戶，併括諸部隱丁，收合流散，置墮瑰部，因墮瑰門之語爲名，遂號六部奚。命勃魯恩主之，仍號奚王。太宗卽位，置宰相、常袞各二員。聖宗合奧里、梅只、墮瑰三部爲一，特置二剋部以足六部之數。奚王和朔奴討兀惹，敗績，籍六部隸北府。〔七〕

突呂不室韋部。本名大、小二黃室韋戶。太祖爲達馬狻沙里，以計降之，乃置爲二部。

隸北府，節度使屬東北路統軍司，戍秦州東北。

涅刺拏古部。與突呂不室韋部同。節度使戍秦州東。

迭刺迭達部。本鮮質可汗所俘奚七百戶，太祖卽位，以爲十四石烈，置爲部。隸南府，節度使屬西南路招討司，戍黑山北，部民居慶州南。

乙室奧隗部。神冊六年，太祖以所俘奚戶置。隸南府，節度使屬東北路兵馬司。

楮特奧隗部。太祖以奚戶置。隸南府，節度使屬東京都部署司。

品達魯虢部。太祖以所俘達魯虢部置。隸南府，節度使屬西南路招討司，戍黑山北。

烏古涅刺部。〔亦曰涅離部。〕太祖取于骨里戶六千，神冊六年，析爲烏古涅刺及圖魯

二部。俱隸北府，節度使屬西南路招討司。

圖魯部。節度使屬東北路統軍司。

已上太祖以遙輦氏舊部族分置者凡十部，增置者八。

聖宗三十四部：

撒里葛部。奚有三營：曰撒里葛，曰窈爪，〔亦曰耨盃爪。〕太祖伐奚，乞降，願爲著帳子弟，籍于宮分，皆設夷離董。聖宗各置爲部，改設節度使，皆隸南府，以備收獵之役。

居澤州東。

窈爪部。與撒里葛部同。居潭州南。

耨盃爪部。節度使屬東京都部署司。

訛僕括部。與撒里葛三部同。居望雲縣東。

特里特勉部。初於八部各析二十戶以戍奚，偵候落馬河及速魯河側，置二十詳穩。聖

宗以戶口蕃息，置爲部，設節度使。隸南府，戍倒場嶺，居橐駝岡。

稍瓦部。初，取諸宮及橫帳大族奴隸置稍瓦石烈，「稍瓦」，鷹坊也，居遼水東，掌羅捕

飛鳥。聖宗以戶口蕃息置部。節度使屬東京都部署司。

曷朮部。初，取諸宮及橫帳大族奴隸置曷朮石烈，「曷朮」，鐵也，以冶于海濱柳濕河、

三黜古斯、手山。聖宗以戶口蕃息置部。屬東京都部署司。

遙里部。居潭、利二州間。石烈三：

撒里必石烈。

北石烈。

帖魯石烈。

伯德部。松山、平州之間，二〇太師、太保居中京西。石烈六：

啜勒石烈。

速古石烈。

腆你石烈。

迭里石烈。

旭特石烈。

悅里石烈。

楚里部。居潭州北。

奧里部。統和十二年，以與梅只、墮瑰三部民籍數寡，合爲一部。并上三部，本屬奚王

府，聖宗分置。

南剋部。

北剋部。統和十二年，以奚府二剋分置二部。

隗衍突厥部。聖宗析四關沙、四頗憊戶置，以鎮東北女直之境。開泰九年，節度使

奏請置石烈。隸北府，屬黃龍府都部署司。

奧衍突厥部。與隗衍突厥同。

涅刺越兀部。以涅刺室韋戶置。隸北府，節度使屬西南面招討司，戍黑山北。

奧衍女直部。聖宗以女直戶置。隸北府，節度使屬西北路招討司，戍鎮州境。自此至河西部，皆俘獲諸國之民。初隸諸宮，戶口蕃息置部。訖於五國，皆有節度使。

乙典女直部。聖宗以女直戶置。隸南府，二二居高州北。

斡突盃烏古部。聖宗以烏古戶置。隸南府，節度使屬西南面招討司，戍黑山北。

迭魯敵烈部。聖宗以敵烈戶置。隸北府，節度使屬烏古敵烈統軍司。

室韋部。聖宗以室韋戶置。隸北府，二二節度使屬西北路招討司。

尤哲達魯虢部。聖宗以達魯虢戶置。隸北府，節度使屬東北路統軍司，戍境內，居境外。

梅古悉部。聖宗以唐古戶置。隸北府，節度使屬西南面招討司。

頡的部。聖宗以唐古戶置。隸北府，節度使屬西南面招討司。

北敵烈部。聖宗以敵烈戶置。戍隗烏古部。

匿訖唐古部。聖宗置。隸北府，節度使屬西南面招討司。

北唐古部。聖宗以唐古戶置。隸北府，節度使屬黃龍府都部署司，戍府南。

南唐古部。聖宗置。隸北府。

鶴刺唐古部。與南唐古同。節度使屬西南面招討司。

河西部。聖宗置。隸北府，節度使屬東北路統軍司。

薛特部。開泰四年，以回鶻戶置。隸北府，居慈仁縣北。

伯斯鼻骨德部。本鼻骨德戶。初隸諸宮，聖宗以戶口蕃息置部。隸北府，節度使屬東北路統軍司，戍境內，居境外。

達馬鼻骨德部。聖宗以鼻骨德戶置。隸南府，節度使屬東北路統軍司。

五國部。剖阿里國、益奴里國、奧里米國、越里篤國、越里吉國，聖宗時來附，命居本土，以鎮東北境，屬黃龍府都部署司。重熙六年，以越里吉國人尙海等訴會帥渾斡貪污，罷五國會帥，設節度使以領之。

已上聖宗以舊部族置者十六，增置十八。

遼國外十部：〔二七〕

烏古部。

敵烈八部。

隗古部。

回跋部。

崑母部。

吾禿婉部。

迭刺葛部。

回鶻部。

長白山部。

蒲盧毛朶部。

右十部不能成國，附庸於遼，時叛時服，各有職貢，猶唐人之有羈縻州也。

校勘記

〔一〕秋冬居羊門甸 冬字原脫，據上下文義補。

〔二〕會同二年更夷離董爲大王 按紀，更夷離董爲大王在會同元年十一月。

〔三〕鐔山 鐔，南監本同，殿本改作鐔。鐔、鐔均不見字書，疑應作鐔或鐔。

〔四〕居黑山北 居，疑當作戍。

〔五〕突舉部 紀會同四年正月作突軌部，統和四年八月作諦居部。

〔六〕天贊二年 二年，原誤「八年」。按紀，天贊僅四年，滅胡損事在二年三月，據改。

〔七〕隸北府 按兵衛志上，奚五部隸北府，屬東北路統軍司。

〔八〕烏古涅刺部 按卷八二蕭陽阿傳作烏古涅里。

〔九〕窈爪 爪，原作「介」。據下文及兵衛志中、百官志二改。

〔一〇〕松山平州之間 松山上疑脫戍字。

〔一一〕統和十二年 十二年，原脫十字，誤作「二年」。按紀，以二剋分置二部在統和十二年十二月，據補。

〔一二〕隗衍突厥部 按卷八九耶律庶箴傳作烏衍突厥部。

〔一三〕隸南府 據兵衛志上，此下脫「節度使屬西南路招討司」。

〔一四〕隸北府 「隸北府」三字原脫，據兵衛志上補。

〔一五〕盆奴里國 按紀統和二十二年七月作蒲奴里。

〔一六〕會帥渾敵貪汚 渾敵，紀重熙六年八月作坤長。

〔一七〕遼國外十部 按百官志二，烏古、敵烈、隗古、迭刺葛入「諸部」，回跋、富母、吾禿婉、蒲盧毛朶入「大部」，長白山部作長白山女直國，與回鶻部並入「諸國」。

遼史卷三十四

志第四

兵衛志上

軒轅氏合符東海，邑于涿鹿之阿，遷徙往來無常處，以兵爲營衛。飛狐以北，無慮以東，西暨流沙，四戰之地，聖人猶不免於兵衛，地勢然耳。

遼國左都遼海，右邑涿鹿，兵力莫強焉。其在隋世，依紇臣水而居，分爲十部。兵多者三千，少者千餘。順寒暑，逐水草畜牧。侵伐則十部相與議，興兵致役，合契而後動。獵則部得自行。至唐，大賀氏勝兵四萬三千人，分爲八部。大賀氏中衰，僅存五部。有耶律雅里者，分五部爲八，立二府以總之，析三耶律氏爲七，二審密氏爲五，凡二十部。刻木爲契，政令大行。遜不有國，乃立遙輦氏代大賀氏，兵力益振，卽太祖六世祖也。

及太祖會李克用于雲中，以兵三十萬，盛矣。

遙輦耶瀾可汗十年，歲在辛酉，太祖授鉞專征，〔一〕破室韋、于厥、奚三國，俘獲廬帳，不可勝紀。十月，授大迭烈府夷離董，明賞罰，繕甲兵，休息民庶，滋蕃羣牧，務在戢兵。十一年，總兵四十萬伐代北，克郡縣九，俘九萬五千口。十二年，德祖討奚，俘七千戶。十五年，遙輦可汗卒，遺命遜位于太祖。〔三〕

太祖卽位五年，討西奚、東奚，悉平之，盡有奚、霫之衆。六年春，親征幽州，東西旌旗相望，互數百里。所經郡縣，望風皆下，俘獲甚衆，振旅而還。秋，親征背陰國，〔三〕俘獲數萬計。神冊元年，親征突厥、吐渾、党項、小蕃、沙陀諸部，俘戶一萬五千六百；攻振武，乘勝而東，攻蔚、新、武、媯、儒五州，俘獲不可勝紀，斬不從命者萬四千七百級。盡有代北、河曲、陰山之衆，遂取山北八軍。四年，親征于骨里國，〔四〕俘獲一萬四千二百口。五年，征党項，俘獲二千六百口；攻天德軍，拔十有二柵，徙其民。六年，出居庸關，分兵掠檀、順等州，安遠軍、三河、良鄉、望都、潞、滿城、遂城等縣，俘其民徙內地；皇太子略定州，俘獲甚衆。天贊元年，以戶口滋繁，糺轄疎遠，分北大濃兀爲二部，立兩節度以統之。三年，西征党項等國，俘獲不可勝紀。四年，又親征渤海。天顯元年，滅渤海國，地方五千里，兵數十萬，五京、十五府、六十二州，盡有其衆，契丹益大。

會同初，太宗滅唐立晉，晉獻燕、代十六州，民衆兵強，莫之能禦矣。

兵制

遼國兵制，凡民年十五以上，五十以下，隸兵籍。每正軍一名，馬三疋，打草穀、守營鋪家丁各一人。人鐵甲九事，馬韉轡，馬甲皮鐵，視其力；弓四，箭四百，長短鎗、鎗鏢、斧鉞、小旗、鎚錐、火刀石、馬盂、杪一斗、杪袋、搭鈔傘各一，〔馬〕縻馬繩二百尺，皆自備。人馬不給糧草，日遣打草穀騎四出抄掠以供之。鑄金魚符，調發軍馬。其捉馬及傳命有銀牌二百。軍所舍，有遠探攔子馬，以夜聽人馬之聲。

凡舉兵，帝率蕃漢文武臣僚，以青牛白馬祭告天地、日神，惟不拜月，分命近臣告太祖以下諸陵及木葉山神，乃詔諸道徵兵。惟南、北、奚王，東京渤海兵馬，燕京統軍兵馬，雖奉詔，未敢發兵，必以聞。上遣大將持金魚符，合，然後行。始聞詔，攢戶丁，推戶力，覈籍齊衆以待。自十將以上，次第點集軍馬、器仗。符至，兵馬本司自領，使者不得與。唯再共點軍馬訖，又以上聞。量兵馬多少，再命使充軍主，與本司互相監督。又請引五方旗鼓，然後皇帝親點將校。又選勳戚大臣，充行營兵馬都統、副都統、都監各一人。又選諸軍兵馬尤精銳者三萬人爲護駕軍，又選驍勇三千人爲先鋒軍，又選剽悍百人之上爲遠探攔子軍，以上各有將領。又於諸軍每部，量衆寡，抽十人或五人，合爲一隊，別立將領，以備勾取兵馬。

騰遞公事。

其南伐點兵，多在幽州北千里鴛鴦泊。及行，並取居庸關、曹王峪、白馬口、古北口、安遠馬口、松亭關、榆關等路。將至平州、幽州境，又遣使分道催發，不得久駐，恐踐禾稼。出兵不過九月，還師不過十二月。在路不得見僧尼、喪服之人。

皇帝親征，留親王一人在幽州，權知軍國大事。既入南界，分爲三路，廣信軍、雄州、霸州各一。駕必由中道，兵馬都統、護駕等軍皆從。各路軍馬遇縣鎮，卽時攻擊。若大州軍，必先料其虛實、可攻次第而後進兵。沿途民居、園囿、桑柘，必夷伐焚蕩。至宋北京，三路兵皆會，以議攻取。及退亦然。三路軍馬前後左右有先鋒。遠探攔子馬各十數人，在先鋒前後二十餘里，全副衣甲，夜中每行十里或五里少駐，下馬側聽無有人馬之聲。有則擒之，力不可敵，飛報先鋒，齊力攻擊。如有大軍，走報主帥。敵中虛實，動必知之。軍行當道州城，防守堅固，不可攻擊，引兵過之。恐敵人出城邀阻，乃圍射鼓譟，詐爲攻擊。敵方閉城固守，前路無阻，引兵進，分兵抄截，使隨處州城隔絕不通，孤立無援。所過大小州城，至夜，恐城中出兵突擊，及與鄰州計會軍馬，甲夜，每城以騎兵百人去城門左右百餘步，被甲執兵，立馬以待。兵出，力不能加，馳還勾集衆兵與戰。左右官道、斜徑、山路、河津，夜中並遣兵巡守。其打草穀家丁，各衣甲持兵，旋團爲隊，必先斫伐園林，然後驅掠老幼，運土木

填壕塹；攻城之際，必使先登，矢石樁木併下，止傷老幼。又於本國州縣起漢人鄉兵萬人，隨軍專伐園林，填道路。御寨及諸營壘，唯用桑柘梨栗。軍退，縱火焚之。敵軍既陣，料其陣勢小大，山川形勢，往回道路，救援捷徑，漕運所出，各有以制之。然後於陣四面，列騎爲隊，每隊五、七百人，十隊爲一道，十道當一面，各有主帥。最先一隊走馬大譟，衝突敵陣。得利，則諸隊齊進；若未利，引退，第二隊繼之。退者，息馬飲水抄。諸道皆然。更退迭進，敵陣不動，亦不力戰。歷二三日，待其困憊，又令打草穀家丁馬施雙箒，因風疾馳，揚塵敵陣，更互往來。中既飢疲，目不相覩，可以取勝。若陣南獲勝，陣北失利，主將在中，無以知之，則以本國四方山川爲號，聲以相聞，得相救應。

若帝不親征，重臣統兵不下十五萬衆，三路往還，北京會兵，進以九月，退以十二月，行事次第皆如之。若春以正月，秋以九月，不命都統，止遣騎兵六萬，不許深入，不攻城池，不伐林木；但於界外三百里內，耗蕩生聚，不令種養而已。

軍入南界，步騎車帳不循阡陌。三道將領各一人，率攔子馬各萬騎，支散游弈百十里外，更迭覘邏。及暮，以吹角爲號，衆卽頓舍，環繞御帳。自近及遠，折木稍屈，爲弓子鋪，不設鎗營塹柵之備。

每軍行，鼓三伐，不問晝夜，大衆齊發。未遇大敵，不乘戰馬；俟近敵師，乘新羈馬，蹄

有餘力。成列不戰，退則乘之。多伏兵斷糧道，冒夜舉火，上風曳柴。饋餉自賈，散而復聚。善戰，能寒。此兵之所以強也。

校勘記

〔一〕遙輦耶瀾可汗十年歲在辛酉太祖授鉞專征。按世表，耶瀾可汗在唐會昌間，次巴刺可汗在咸通間，又次痕德董可汗在光啓間。辛酉歲當天復元年，不合。太祖紀上，「唐天復元年，歲辛酉，痕德董可汗立，以太祖爲本部夷離董，專征討。」較近實際。

〔二〕十五年遙輦可汗卒遺命遜位于太祖。按太祖紀上云，丙寅年「十二月，痕德董可汗殂」，太祖翌年丁卯歲「正月，卽皇帝位」。

〔三〕背陰國。按紀太祖六年七月作朮不姑。

〔四〕于骨里國。按紀神册四年九月作烏古部，屬國表作骨里國。

〔五〕搭鈹傘。按「鈹」字不見字書。道光殿本考證云：「通考作『搭鈞氈織』。史以鈞、氈二字偏旁誤合爲『鈹』字」。

遼史卷三十五

志第五

兵衛志中

御帳親軍

漢武帝多行幸之事，置期門、伏飛、羽林之目，天子始有親軍。唐太宗加親、勳、翊、千牛之衛，布腹心之地，防衛密矣。遼太祖宗室盛強，分迭刺部爲二，宮衛內虛，經營四方，未遑鳩集。皇后述律氏居守之際，摘蕃漢精銳爲屬珊軍；太宗益選天下精甲，置諸爪牙爲皮室軍。合騎五十萬，國威壯矣。

大帳皮室軍。

太宗置，凡三十萬騎。〔一〕

屬珊軍。

地皇后置，二十萬騎。

宮衛騎軍

太祖以迭刺部受禪，分本部爲五院、六院，統以皇族，而親衛缺然。乃立幹魯朶法，裂州縣，割戶丁，以強幹弱支。詒謀嗣續，世建宮衛。入則居守，出則扈從，葬則因以守陵。有兵事，則五京、二州各提轄司傳檄而集，不待調發州縣、部族，十萬騎軍已立具矣。恩意親洽，兵甲犀利，教練完習。簡天下精銳，聚之腹心之中。懷舊者歲深，增新者世盛。此軍制之良者也。

弘義宮：

正丁一萬六千，

蕃漢轉丁一萬四千，

騎軍六千。

長寧宮：

正丁一萬四千，

蕃漢轉丁一萬二千，
騎軍五千。

永興宮：

正丁六千，
蕃漢轉丁一萬四千，
騎軍五千。

積慶宮：

正丁一萬，
蕃漢轉丁一萬六千，
騎軍八千。

延昌宮：

正丁二千，
蕃漢轉丁六千，
騎軍二千。

彰愍宮：

正丁一萬六千，
蕃漢轉丁二萬，
騎軍一萬。

崇德宮：

正丁一萬二千，
蕃漢轉丁二萬，
騎軍一萬。

興聖宮：

正丁二萬，
蕃漢轉丁四萬，
騎軍五千。

延慶宮：

正丁一萬四千，
蕃漢轉丁二萬，
騎軍一萬。

太和宮：

正丁二萬，

蕃漢轉丁四萬，

騎軍一萬五千。

永昌宮：

正丁一萬四千，〔三〕

蕃漢轉丁二萬，

騎軍一萬。

敦睦宮：

正丁六千，

蕃漢轉丁一萬，

騎軍五千。

文忠王府：

正丁一萬，

蕃漢轉丁一萬六千，

騎兵一萬。

十二宮一府，自上京至南京總要之地，各置提轄司。重地每宮皆置，內地一二而已。太和、永昌二宮宜與興聖、延慶同，舊史不見提轄司，蓋闕文也。

南京：

弘義宮提轄司。

長寧宮提轄司。

永興宮提轄司。

積慶宮提轄司。

延昌宮提轄司。

彰愍宮提轄司。

崇德宮提轄司。

興聖宮提轄司。

延慶宮提轄司。

敦睦宮提轄司。

文忠王府提轄司。

西京：〔三〕

弘義宮提轄司。

長寧宮提轄司。

永興宮提轄司。

積慶宮提轄司。

彰愍宮提轄司。

崇德宮提轄司。

延慶宮提轄司。

文忠王府提轄司。

奉聖州：

弘義宮提轄司。

長寧宮提轄司。

永興宮提轄司。

積慶宮提轄司。

彰愍宮提轄司。

崇德宮提轄司。

興聖宮提轄司。

延慶宮提轄司。

文忠王府提轄司。

平州：

弘義宮提轄司。

長寧宮提轄司。

永興宮提轄司。

積慶宮提轄司。

延昌宮提轄司。

彰愍宮提轄司。

興聖宮提轄司。

延慶宮提轄司。

文忠王府提轄司。

中京：

延昌宮提轄司。

文忠王府提轄司。

上京：

文忠王府提轄司。

凡諸宮衛，丁四十萬八千，出騎軍十萬一千。

大首領部族軍

遼親王大臣，體國如家，征伐之際，往往置私甲以從王事。大者千餘騎，小者數百人，著籍皇府。國有戎政，量借三五千騎，常留餘兵爲部族根本。

太子軍。

偉王軍。

永康王軍。

于越王軍。

麻答軍。

五押軍。

衆部族軍

衆部族分隸南北府，守衛四邊，各有司存，具如左。

北府凡二十八部。〔目〕

侍從宮帳：

奚王府部。

鎮南境：

五院部。

六院部。

東北路招討司：

烏隗部。

東北路統軍司：

遙里部。

伯德部。

奧里部。

南剋部。

北剋部。

圖盧部。〔五〕

朮者達魯統部。

河西部。

西北路招討司：

突呂不部。

奧衍女直部。

室韋部。

西南路招討司：

涅刺部。

烏古涅刺部。

涅刺越兀部。

梅古悉部。

頡的部。

匿訖唐古部。

鶴刺唐古部。

黃龍府都部署司：

隗衍突厥部。

奧衍突厥部。

北唐古部。

五國部。

烏古敵烈統軍司：

迭魯敵烈部。

戊隗烏古部：

北敵烈部。

南府凡一十六部。〔六〕

鎮駐西南境：

乙室部。

西南路招討司：

品部。〔七〕

迭刺迭達部。〔八〕

品達魯虢部。〔九〕

乙典女直部。

西北路招討司：

楮特部。

東北路統軍司：

達馬鼻古德部。

東北路女直兵馬司。〔一〇〕

乙室奧隗部。

東京都部署司：

志第五 兵衛志中

楮特奧隗部。

窈爪部。

稍瓦部。

曷朮部。

戍倒塌嶺：

訛僕括部。〔二〕

屯駐本境：

撒里葛部。

南唐古部。〔三〕

薛特部。

校勘記

〔一〕太宗置凡三十萬騎。按百官志二，太祖時已置。太宗增多至三十萬騎。

〔二〕正丁一萬四千。按各宮丁數，均爲戶數之二倍，檢營衛志上，永昌宮正戶八千。若非例外，則丁數應爲一萬六千。

〔三〕西京 按營衛志上，與聖宮提轄司四。此西京下無與聖宮提轄司，疑脫。

〔四〕北府凡二十八部 按營衛志下，尙有突呂不室韋部、涅刺拿古部、伯斯鼻古德部屬東北路統軍司，品部屬西北路招討司，均隸北府。凡三十二部。

〔五〕圖盧部 按營衛志下作圖魯部。

〔六〕南府凡一十六部 按營衛志下，尙有耨盃爪部屬東京都部署司，隸南府，又品部、南唐古部隸北府。凡十五部。

〔七〕品部 按紀會同四年正月作品卑部，統和四年四月作頻不部。

〔八〕迭刺迭達部 原誤「迭達迭刺部」，據營衛志下、百官志二改。

〔九〕品達魯號部 按紀開泰七年五月作品達魯瑰部。

〔一〇〕東北路女直兵馬司 按營衛志下作東北路兵馬司。

〔一一〕戊倒塌嶺訛僕括部 按營衛志下，訛僕括部，與撒里葛三部同，居望雲縣東。特里特勉部戊倒塌嶺。

〔一二〕南唐古部 按營衛志下，南唐古部隸北府。



遼史卷三十六

志第六

兵衛志下

五京鄉丁

遼建五京：臨潢，契丹故壤；遼陽，漢之遼東，爲渤海故國；中京，漢遼西地，自唐以來契丹有之。三京丁籍可紀者二十二萬六千一百，蕃漢轉戶爲多。析津、大同，故漢地，籍丁八十萬六千七百。契丹本戶多隸宮帳、部族，其餘蕃漢戶丁分隸者，皆不與焉。

太祖建皇都于臨潢府。太宗定晉，晉主石敬瑭來獻十六城，〔一〕乃定四京，改皇都爲上京。有丁一十六萬七千二百。

臨潢府：

臨潢縣丁七千。

長泰縣丁八千。

保和縣丁六千。

定霸縣丁六千。

宣化縣丁四千。

潞縣丁六千。

易俗縣丁一千五百。

遷遼縣丁一千五百。

祖州：

長霸縣丁四千。

咸寧縣丁二千。

越王城丁二千。

懷州：

扶餘縣丁三千。

顯理縣丁二千。

慶州玄寧縣丁一萬二千。〔三〕

泰州興國縣丁一千四百。

長春州長春縣丁四千。

烏州愛民縣丁二千。

永州：

長寧縣丁九千。

義豐縣丁三千。

慈仁縣丁八百。

儀坤州廣義縣丁五千。

龍化州龍化縣丁二千。

降聖州永安縣丁一千五百。

饒州：

長樂縣丁八千。

臨河縣丁二千。

安民縣丁二千。

頭下：

徽州丁二萬。

成州丁八千。

懿州丁八千。

渭州丁二千。

原州丁一千。

壕州丁一萬二千。

福州丁五百。

橫州丁四百。

鳳州丁一千。〔巴〕

遂州丁一千。

豐州丁一千。

順州丁二千。

閭州丁二千。

松山州丁一千。

豫州丁一千。

寧州丁六百。

東京，本渤海，以其地建南京遼陽府。統縣六，轄軍、府、州、城二十六，〔三〕有了四萬一千四百。天顯十三年，太宗改爲東京。

遼陽府：

遼陽縣丁三千。

仙鄉縣丁三千。

鶴野縣丁二千四百。

析木縣丁二千。

紫蒙縣丁二千。

興遼縣丁二千。

開州開遠縣丁二千。

鹽州丁五百。

穆州丁五百。

賀州丁五百。

定州定東縣丁一千六百。

保州來遠縣丁二千。

辰州丁四千。

盧州丁五百。

鐵州丁二千。

興州丁三百。

湯州丁七百。

崇州丁一千。

海州丁三千。

耀州丁一千二百。

嬭州丁七百。

淶州丁四千。

桓州丁一千。

豐州丁五百。

正州丁七百。

慕州丁三百。

南京析津府，統縣十一，〔六〕轄軍、府、州、城九，有丁五十六萬六千。

析津府：

析津縣丁四萬。

宛平縣丁四萬四千。

昌平縣丁一萬四千。

良鄉縣丁一萬四千。

潞縣丁一萬一千。

安次縣丁二萬四千。

武清縣丁二萬。

永清縣丁一萬。

香河縣丁一萬四千。

玉河縣丁二千。

遼陰縣丁一萬。

順州懷柔縣丁一萬。

檀州：

密雲縣丁一萬。

行唐縣丁六千。

涿州：

范陽縣丁二萬。

固安縣丁二萬。

新城縣丁二萬。

歸義縣丁八萬。〔七〕

易州：

易縣丁五萬。

涿水縣丁五萬四千。

容城縣丁一萬。

薊州：

漁陽縣丁八千。

三河縣丁六千。

玉田縣丁六千。

平州：

盧龍縣丁一萬四千。

安喜縣丁一萬。

望都縣丁六千。

灤州：

義豐縣丁八千。

馬城縣丁六千。

石城縣丁六千。

營州廣寧縣丁六千。

景州遵化縣丁六千。

西京大同府，統縣七，轄軍、府、州、城十七，有丁三十二萬二千七百。

大同府：

大同縣丁二萬。

雲中縣丁二萬。

天成縣丁一萬。〔八〕

長青縣丁八千。

奉義縣丁六千。

懷仁縣丁六千。

懷安縣丁六千。

弘州：

永寧縣丁二萬。

順聖縣丁六千。

德州宣德縣丁六千。

豐州：

富民縣丁二千四百。

振武縣鄉兵三百。

奉聖州：

永興縣丁一萬六千。

攀山縣丁六千。

龍門縣丁八千。

望雲縣丁二千。

歸化州文德縣丁二萬。

可汗州懷來縣丁六千。

儒州縉山縣丁一萬。

蔚州：

靈仙縣丁四萬。

定安縣丁二萬。

飛狐縣丁一萬。

靈丘縣丁六千。

廣陵縣丁六千。

應州：

金城縣丁一萬六千。

渾源縣丁一萬。

河陰縣丁六千。

朔州：

鄯陽縣丁八千。

寧遠縣丁四千。

馬邑縣丁六千。

金肅軍防秋兵一千。

武州神武縣丁一萬。

河清軍防秋兵一千。

聖宗統和二十三年，城七金山，建大定府，號中京。統縣九，轄軍、府、州、城二十三。草創未定，丁籍莫考，可見者一縣：

高州三韓縣丁一萬。

大約五京民丁可見者，一百一十萬七千三百爲鄉兵。

屬國軍

遼屬國可紀者五十有九，朝貢無常。有事則遣使徵兵，或下詔專征；不從者討之。助軍衆寡，各從其便，無常額。又有鐵不得國者，興宗重熙十七年乞以兵助攻夏國，詔不許。

吐谷渾。

鐵驪。

靺鞨。

兀惹。

黑車子室韋。

西奚。

東部奚。

烏馬山奚。

斜離底。〔九〕

突厥。

党項。

小蕃。

沙陀。

阻卜。

烏古。〔一〇〕

素昆那。

胡母思山蕃。

波斯。

大食。

甘州回鶻。

新羅。

烏孫。

燉煌。〔一一〕

賃烈。

要里。

回鶻。

轄戛斯。

吐蕃。

黃室韋。

小黃室韋。

大黃室韋。

阿薩蘭回鶻。

于闐。

師子。

北女直。

河西党項。

南京女直。二三

沙州燉煌。

曷蘇館。

沙州回鶻。

查只底。〔二二〕

蒲盧毛朶。

蒲奴里。

大蕃。

高昌。〔二四〕

回拔。

頗里。

達里底。

拔思母。

敵烈。

粘八葛。

梅里急。〔二五〕

耶覩刮。

鼻骨德。〔二六〕

和州回鶻。

幹朗改。〔二十七〕

高麗。

西夏。

女直。

遼之爲國，鄰於梁、唐、晉、漢、周、宋。晉以恩故，始則父子一家，終則寇讎相攻；梁、唐、周隱然一敵國；宋惟太宗征北漢，遼不能救，餘多敗衄，縱得亦不償失。良由石晉獻土，中國失五關之固然也。高麗小邦，屢喪遼兵，非以險阻足恃故歟。西夏彈丸之地，南敗宋，東抗遼。雖西北士馬雄勁，元昊、諒祚智勇過人，能使党項、阻卜掣肘大國，蓋亦襟山帶河，有以助其勢耳。雖然，宋久失地利，而舊志言兵，唯以敵宋爲務。踰三關，聚議北京，猶不敢輕進。豈不以大河在前，三鎮在後，臨事好謀之審，不容不然歟。

二帳、十二宮一府、五京，有兵一百六十四萬二千八百。宮丁、大首領、諸部族，中京、頭下等州，屬國之衆，皆不與焉。不輕用之，所以長世。

邊境戍兵

又得高麗大遼事跡，載東境戍兵，以備高麗、女直等國，見其守國規模，布置簡要，舉一可知三邊矣。

東京至鴨綠西北峰爲界：

黃龍府正兵五千。

咸州正兵一千。

東京沿女直界至鴨綠江：

軍堡凡七十，各守軍二十人，計正兵一千四百。

來遠城宣義軍營八：

太子營正兵三百。

大營正兵六百。

蒲州營正兵二百。

新營正兵五百。

加陀營正兵三百。

王海城正兵三百。

柳白營正兵四百。

沃野營正兵一千。

神虎軍城正兵一萬。大康十年置。

右一府、一州、二城、七十堡、八營，計正兵二萬二千。

校勘記

〔一〕晉主石敬瑭 主原作「王」，據大典七七〇二改。

〔二〕宣化縣丁四千 按地理志一，宣化縣戶四千。一戶一丁，疑誤。

〔三〕慶州玄寧縣 玄寧，地理志一作玄德。

〔四〕鳳州丁一千 按地理志一，鳳州戶四千。丁數少于戶數，疑誤。

〔五〕遼陽府統縣六轄軍府州城二十六 道光殿本考證云：「按地理志，統縣九，轄軍、府、州、城八十

七。此所載『縣六』，係據丁數可見者；其『二十六』之數，恐有舛誤。」

〔六〕析津府統縣十一 十一，原脫「二」字。按下列縣數十一，與地理志四合，據補。

〔七〕歸義縣丁八萬 按地理志四，歸義縣戶四千。「丁八萬」疑是丁八千之誤。

〔八〕天成縣 成，原誤「詳」。據地理志五改。金史地理志作天城。

〔九〕斜離底 百官志二：「達里得部，亦曰達離底。」按下文有達里底，疑與此為重出。

〔一〇〕烏古 按屬國表作骨里國卽烏骨里，亦作于骨里、于厥、于厥里。

〔一一〕燉煌 此與下文沙州燉煌、沙州回鶻爲重出。

〔一二〕南京女直 按紀統和二十二年九月：「丙午，幸南京。女直遣使獻所獲烏昭慶妻子。」屬國表誤作「南京女直遣使獻所獲烏昭慶妻子」。此「南京女直」似沿襲屬國表之誤。紀大安元年十一月，「以南女直詳穩蕭袍里爲北府宰相」。檢上文有北女直，則此目當作南女直。卽金史世紀所謂其在南者籍契丹，號熟女直；其在北者不在契丹籍，號生女直。下文不冠南北之女直，似指完顏強大以後之女直。

〔一三〕查只底 按部族表，「太平七年，查只底部來附。」是部，非屬國。

〔一四〕高昌 此與下文和州回鶻爲重出。

〔一五〕梅里急 按紀保大五年作密兒紀，卽金、元之篋兒乞。

〔一六〕鼻骨德 按百官志二作鼻國德。

〔一七〕幹朗改 按幹朗改及唄娘改本書屢見，一爲屬國，一爲部族。劉師培左盦集卷五遼史部族表書後云，均烏梁海之轉音，元秘史作兀良合。

遼史卷三十七

志第七

地理志一

帝堯畫天下爲九州。舜以冀、青地大，分幽、并、營，爲州十有二。幽州在渤、碣之間，并州北有代、朔，營州東暨遼海。其地負山帶海，其民執干戈，奮武衛，風氣剛勁，自古爲用武之地。太祖以迭刺部之衆代遙輦氏，起臨潢，建皇都；東併渤海，得城邑之居百有三。太宗立晉，有幽、涿、檀、薊、順、營、平、蔚、朔、雲、應、新、媯、儒、武、寰十六州，於是割古幽、并、營之境而跨有之。東朝高麗，西臣夏國，南子石晉而兄弟趙宋，吳越、南唐航海輸貢。嘻，其盛矣！

遼國其先曰契丹，本鮮卑之地，居遼澤中；去榆關一千一百三十里，去幽州又七百一十四里。南控黃龍，北帶潢水，冷陁屏右，遼河塹左。高原多榆柳，下隰饒蒲葦。當元魏

時，有地數百里。至唐，大賀氏蠶食扶餘、室韋、奚、靺鞨之區，地方二千餘里。貞觀三年，以其地置玄州。尋置松漠都督府，建八部爲州，各置刺史：達稽部曰峭落州，紇便部曰彈汗州，獨活部曰無逢州，芬阿部曰羽陵州，突便部曰日連州，芮奚部曰徒河州，隆斤部曰萬丹州，伏部曰匹黎、赤山二州。以大賀氏窟哥爲使持節十州軍事。分州建官，蓋昉於此。

迨于五代，闢地東西二千里。遙輦氏更八部曰日利皆部、乙室活部、實活部、納尾部、頻沒部、內會雞部、集解部、奚嗚部，屬縣四十有一。每部設刺史，縣置令。太宗以皇都爲上京，升幽州爲南京，改南京爲東京，聖宗城中京，興宗升雲州爲西京，於是五京備焉。又以征伐俘戶建州襟要之地，多因舊居名之，加以私奴置投下州。總京五，府六，州、軍、城百五十有六，縣二百有九，部族五十有二，屬國六十。東至于海，西至金山，暨于流沙，北至臚胸河，南至白溝，幅員萬里。

上京道

上京臨潢府，本漢遼東郡西安平之地。新莽曰北安平。太祖取天梯、蒙國、別魯等三山之勢于葦甸，射金甌箭以識之，謂之龍眉宮。神册三年城之，名曰皇都。天顯十三年，更名上京，府曰臨潢。

涑流河自西北南流，繞京三面，東入于曲江，其北東流爲按出河。又有御河、〔一〕沙河、黑河、潢河、鴨子河、他魯河、〔二〕狼河、蒼耳河、鞞子河、臚胸河、陰涼河、豬河、鴛鴦湖、〔三〕興國惠民湖、廣濟湖、鹽灤、百狗灤、火神淀、〔四〕馬孟山、兔兒山、〔五〕野鵲山、鹽山、鑿山、〔六〕松山、平地松林、大斧山、列山、屈劣山、勒得山——唐所封大賀氏勒得王有墓存焉。

戶三萬六千五百，轄軍、府、州、城二十五，〔七〕統縣十。

臨潢縣。太祖天贊初南攻燕、薊，以所俘人戶散居潢水之北，縣臨潢水，故以名。地宜種植。戶三千五百。

長泰縣。本渤海國長平縣民，太祖伐大諲譭，先得是邑，遷其人於京西北，與漢民雜居。戶四千。

定霸縣。本扶餘府強師縣民，太祖下扶餘，遷其人於京西，與漢人雜處，分地耕種。統和八年，以諸宮提轄司人戶置。隸長寧宮。戶二千。

保和縣。本渤海國富利縣民，太祖破龍州，盡徙富利縣人散居京南。統和八年，以諸宮提轄司人戶置。隸彰愍宮。戶四千。

潞縣。本幽州潞縣民，天贊元年，太祖破薊州，掠潞縣民，布於京東，與渤海人雜處。隸崇德宮。戶三千。

易俗縣。本遼東渤海之民，太平九年，大延琳結構遼東夷叛，圍守經年，乃降，盡遷於京北，置縣居之。是年，又徙渤海叛人家屬置焉。戶一千。

遷遼縣。本遼東諸縣渤海人，大延琳叛，擇其謀勇者置之左右。後以城降，戮之，徙其家屬於京東北，故名。戶一千。

渤海縣。本東京人，因叛，徙置。

興仁縣。開泰二年置。

宣化縣。本遼東神化縣民，太祖破鴨綠府，盡徙其民居京之南。統和八年，以諸宮提轄司人戶置。隸彰愍宮。戶四千。

上京，太祖創業之地。負山抱海，天險足以爲固。地沃宜耕植，水草便畜牧。金甌一箭，二百年之基，壯矣。天顯元年，平渤海歸，乃展郭郭，建宮室，名以天贊。起三大殿：曰開皇、安德、五鸞。〔一〇〕中有歷代帝王御容，每月朔望、節辰、忌日，在京文武百官並赴致祭。〔一一〕又於內城東南隅建天雄寺，奉安烈考宣簡皇帝遺像。是歲太祖崩，應天皇后於義節寺斷腕，置太祖陵。卽寺建斷腕樓，樹碑焉。太宗援立晉，遣宰相馮道、劉昫等持節，具鹵簿、法服至此，冊上太宗及應天皇后尊號。太宗詔蕃部並依漢制，御開皇殿，闕承天門受禮，因改皇都爲上京。

城高二丈，不設敵樓，幅員二十七里。門，東曰迎春，曰雁兒；南曰順陽，曰南福；（二）西曰金鳳，曰西雁兒。其北謂之皇城，高三丈，有樓櫓。門，東曰安東，南曰大順，西曰乾德，北曰拱辰。中有大內。內南門曰承天，有樓閣；東門曰東華，西曰西華。此通內出入之所。正南街東，留守司衙，次鹽鐵司，次南門，龍寺街。南曰臨潢府，其側臨潢縣。縣西南崇孝寺，承天皇后建。寺西長泰縣，又西天長觀。西南國子監，監北孔子廟，廟東節義寺。又西北安國寺，太宗所建。寺東齊天皇后故宅，宅東有元妃宅，即法天皇后所建也。其南貝聖尼寺，（三）綾錦院、內省司、麴院，贍國、省司二倉，皆在大內西南，八作司與天雄寺對。南城謂之漢城，南當橫街，各有樓對峙，下列井肆。東門之北潞縣，又東南興仁縣。南門之東回鶻營，回鶻商販留居上京，置營居之。西南同文驛，諸國信使居之。驛西南臨潢驛，以待夏國使。驛西福先寺。寺西宣化縣，西南定霸縣，縣西保和縣。西門之北易俗縣，縣東遷遼縣。

周廣順中，胡嶠記曰：上京西樓，有邑屋市肆，交易無錢而用布。有綾錦諸工作、宦者、翰林、伎術、教坊、角觝、儒、僧尼、道士。中國人并、汾、幽、薊爲多。

宋大中祥符九年，薛映記曰：上京者，中京正北八十里至松山館，（四）七十里至崇信館，九十里至廣寧館，五十里至姚家寨館，五十里至咸寧館，三十里度潢水石橋，旁有饒州，唐

於契丹嘗置饒樂州，〔二五〕今渤海人居之。五十里保和館，度黑水河，七十里宣化館，五十里長泰館。館西二十里有佛舍、民居，卽祖州。又四十里至臨潢府。自過崇信館乃契丹舊境，其南奚地也。入西門，門曰金德，內有臨潢館。子城東門曰順陽。北行至景福門，又至承天門，內有昭德、宣政二殿與氊廬，皆東向。臨潢西北二百餘里號涼淀，〔二六〕在饅頭山南，避暑之處。多豐草，掘地丈餘卽有堅冰。

祖州，天成軍，上，節度。本遼右八部世沒里地。〔二七〕太祖秋獵多於此，始置西樓。後因建城，號祖州。以高祖昭烈皇帝、曾祖莊敬皇帝、祖考簡獻皇帝、皇考宣簡皇帝所生之地，故名。城高二丈，無敵棚，幅員九里。門，東曰望京，南曰大夏，西曰液山，北曰興國。西北隅有內城。殿曰兩明，奉安祖考御容；曰二儀，以白金鑄太祖像；曰黑龍，曰清秘，各有太祖微時兵仗器物及服御皮毳之類，存之以示後嗣，使勿忘本。內南門曰興聖，凡三門，上有樓閣，東西有角樓。東爲州廨及諸官廨舍，綾錦院，班院祇候蕃、漢、渤海三百人，供給內府取索。東南橫街，四隅有樓對峙，下連市肆。東長霸縣，西咸寧縣。有祖山，山有太祖天皇帝廟，御靴尙存。又有龍門、黎谷、液山、液泉、白馬、獨石、天梯之山。水則南沙河、西液泉。太祖陵鑿山爲殿，曰明殿。殿南嶺有膳堂，以備時祭。門曰黑龍。東偏有聖蹤殿，立碑述

太祖遊獵之事。殿東有樓，立碑以紀太祖創業之功。皆在州西五里。天顯中太宗建，隸弘義宮。統縣二、城一：

長霸縣。本龍州長平縣民，遷于此。戶二千。

咸寧縣。本長寧縣。破遼陽，遷其民置。戶一千。

越王城。太祖伯父于越王述魯西伐党項、吐渾，〔二八〕俘其民放牧於此，因建城。在州東南二十里。戶一千。

懷州，奉陵軍，上，節度。本唐歸誠州。太宗行帳放牧於此。天贊中，從太祖破扶餘城，〔二九〕下龍泉府，俘其人，築寨居之。會同中，掠燕、薊所俘亦置此。太宗崩，葬西山，曰懷陵。大同元年，世宗置州以奉焉。是年，有騎十餘，獵于祖州西五十里大山中，見太宗乘白馬，獨追白狐，射之，一發而斃；忽不見，但獲狐與矢。是日，太宗崩于欒城。後於其地建廟，又於州之鳳凰門繪太宗馳騎貫狐之像。穆宗被害，葬懷陵側，建鳳凰殿以奉焉。有清涼殿，爲行幸避暑之所。皆在州西二十里。隸永興宮。統縣二：

扶餘縣。本龍泉府。太祖遷渤海扶餘縣降戶於此，世宗置縣。戶一千五百。

顯理縣。本顯理府人，太祖伐渤海，俘其王大諲譔，遷民於此，世宗置縣。戶一千。

慶州，**玄寧軍**，〔三〇〕上，節度。本太保山黑河之地，巖谷險峻。穆宗建城，號黑河州，每歲來幸，射虎障鷹，軍國之事多委大臣，後遇弒於此。以地苦寒，統和八年，州廢。聖宗秋畋，愛其奇秀，建號慶州。遼國五代祖勃突，貌異常，有武略，力敵百人，衆推爲王。生于勃突山，因以名；沒，葬山下。在州二百里。〔三一〕慶雲山，本黑嶺也。聖宗駐蹕，愛羨曰：「吾萬歲後，當葬此。」興宗遵遺命，建永慶陵。有望仙殿、御容殿。置蕃、漢守陵三千戶，並隸大內都總管司。在州西二十里。有黑山、赤山、太保山、老翁嶺、饅頭山、興國湖、轄失灤、黑河。景福元年復置，更隸興聖宮。統縣三：

玄德縣。本黑山黑河之地。景福元年，括落帳人戶，從便居之。戶六千。

孝安縣。

富義縣。本義州，太宗遷渤海義州民於此。重熙元年降爲義豐縣，後更名。隸弘義宮。

泰州，**德昌軍**，節度。本契丹二十部族放牧之地。因黑鼠族累犯通化州，民不能禦，遂移東南六百里來，建城居之，以近本族。黑鼠穴居，膚黑，吻銳，類鼠，故以名。州隸延慶宮，兵事屬東北統軍司。統縣二：

樂康縣。倚郭。

興國縣。本山前之民，因罪配遞至此，興宗置縣。戶七百。

長春州，韶陽軍，下，節度。本鴨子河春獵之地。興宗重熙八年置。隸延慶宮，兵事隸東北統軍司。統縣一：

長春縣。本混同江地。燕、薊犯罪者流配於此。戶二千。

烏州，靜安軍，刺史。本烏丸之地，東胡之種也。遼北大王撥刺占爲牧，（三）建城，後官收。隸興聖宮。有遼河、夜河、烏丸川、烏丸山。統縣一：

愛民縣。撥刺王從軍南征，俘漢民置于此。戶一千。

永州，永昌軍，觀察。承天皇太后所建。太祖於此置南樓。乾亨三年，置州于皇子韓八墓側。東潢河，南土河，二水合流，故號永州。冬月牙帳多駐此，謂之冬捺鉢。有木葉山，上建契丹始祖廟，奇首可汗在南廟，可敦在北廟，繪塑二聖并八子神像。相傳有神人乘白馬，自馬孟山浮土河而東，有天女駕青牛車由平地松林泛潢河而下。至木葉山，二水合

流，相遇爲配偶，生八子。其後族屬漸盛，分爲八部。每行軍及春秋時祭，必用白馬青牛，示不忘本云。興王寺，有白衣觀音像。太宗援石晉主中國，〔三三〕自潞州回，入幽州，幸大悲閣，指此像曰：「我夢神人令送石郎爲中國帝，卽此也。」因移木葉山，建廟，春秋告賽，尊爲家神。興軍必告之，乃合符傳箭於諸部。又有高淀山、柳林淀，亦曰白馬淀。〔三四〕隸彰愍宮。統縣三：

長寧縣。本顯德府縣名。太祖平渤海，遷其民於此。戶四千五百。

義豐縣。本鐵利府義州。遼兵破之，遷其民於南樓之西北，仍名義州。重熙元年，廢州，改今縣。在州西北一百里。又嘗改富義縣，屬秦州。〔三五〕始末不可具考，今兩存之。戶一千五百。

慈仁縣。太宗以皇子只撒古亡，置慈州墳西。重熙元年，州廢，改今縣。戶四百。

儀坤州，啓聖軍，節度。本契丹右大部地。應天皇后建州。回鶻孛思居之，至四世孫容我梅里，生應天皇后述律氏，適太祖。太祖開拓四方，平渤海，后有力焉。俘掠有伎藝者多歸帳下，謂之屬珊。以所生之地置州。州建啓聖院，中爲儀寧殿，太祖天皇帝、應天地皇后銀像在焉。隸長寧宮。統縣一：

廣義縣。本回鶻部牧地。應天皇后以四征所俘居之，因建州縣。統和八年，以諸宮提轄司戶置來遠縣，十三年併入。戶二千五百。

龍化州，與國軍，下，節度。本漢北安平縣地。契丹始祖奇首可汗居此，稱龍庭。太祖於此建東樓。唐天復二年，太祖爲迭烈部夷離董，破代北，遷其民，建城居之。明年，伐女直，俘數百戶實焉。天祐元年，增修東城，制度頗壯麗。十三年，太祖於城東金鈴岡受尊號曰大聖大明天皇帝，建元神冊。天顯元年，崩于東樓。太宗升節度。隸彰愍宮，兵事屬北路女直兵馬司。刺史州一，未詳。統縣一。

龍化縣。太祖東伐女直，南掠燕、薊，所俘建城置邑。戶一千。

降聖州，開國軍，下，刺史。本大部落東樓之地。太祖春月行帳多駐此。應天皇后夢神人金冠素服，執兵仗，貌甚豐美，異獸十二隨之。中有黑兔躍入后懷，因而有娠，遂生太宗。時黑雲覆帳，火光照室，有聲如雷，諸部異之。穆宗建州。四面各三十里，禁樵採放牧。先屬延昌宮，後隸彰愍宮。統縣一。

永安縣。本龍原府慶州縣名。太祖平渤海，破懷州之永安，遷其人置寨於此，建縣。

戶八百。

饒州，**匡義軍**，中，節度。本唐饒樂府地。貞觀中置松漠府。太祖完葺故壘。有潢河、長水、灤、沒打河、青山、大福山、松山。隸延慶宮。統縣三：

長樂縣。本遼城縣名。太祖伐渤海，遷其民，建縣居之。戶四千，內一千戶納鐵。

臨河縣。本豐永縣人，〔三六〕太宗分兵伐渤海，遷於潢水之曲。戶一千。

安民縣。太宗以渤海諸邑所俘雜置。戶一千。

頭下軍州〔三七〕

頭下軍州，皆諸王、外戚、大臣及諸部從征俘掠，或置生口，各團集建州縣以居之。橫帳諸王、國舅、公主許創立州城，自餘不得建城郭。朝廷賜州縣額。其節度使朝廷命之，刺史以下皆以本主部曲充焉。官位九品之下及井邑商賈之家，征稅各歸頭下；唯酒稅課納上京鹽鐵司。

徽州，**宣德軍**，節度。景宗女秦晉大長公主所建。媵臣萬戶，在宜州之北二百里，因建州城。北至上京七百里。節度使以下，皆公主府署。戶一萬。

成州，**長慶軍**，節度。聖宗女晉國長公主以上賜媵臣戶置。在宜州北一百六十里，因建州城。北至上京七百四十里。戶四千。

懿州，**廣順軍**，節度。聖宗女燕國長公主以上賜媵臣戶置。在顯州東北二百里，因建州城。西北至上京八百里。戶四千。

渭州，**高陽軍**，節度。駙馬都尉蕭昌裔建。尙秦國王隆慶女韓國長公主，〔三八〕以所賜媵臣建州城。顯州東北二百五十里。遼制，皇子嫡生者，其女與帝女同。戶一千。

壕州。國舅宰相南征，俘掠漢民，居遼東西安平縣故地。在顯州東北二百二十里，西北至上京七百二十里。戶六千。

原州。本遼東北安平縣地。顯州東北三百里。國舅金德俘掠漢民建城。西北至上京八百里。戶五百。

福州。國舅蕭寧建。南征俘掠漢民，居北安平縣故地。在原州北二十里，西北至上京七百八十里。戶三百。

橫州。國舅蕭克忠建。部下牧人居漢故遼陽縣地，因置州城。在遼州西北九十里，西北至上京七百二十里。有橫山。戶二百。

鳳州。橐離國故地，渤海之安寧郡境，南王府五帳分地。在韓州北二百里，西北至上

京九百里。戶四千。〔三九〕

遂州。本高州地，南王府五帳放牧於此。在檀州西二百里，西北至上京一千里。戶五百。

豐州。本遼澤大部落，遙輦氏僧隱牧地。北至上京三百五十里。戶五百。

順州。本遼隊縣地。橫帳南王府俘掠燕、薊、順州之民，建城居之。在顯州東北一百二十里，西北至上京九百里。戶一千。

閭州。羅古王牧地，近醫巫閭山。在遼州西一百三十里，西北至上京九百五十里。戶一千。

松山州。本遼澤大部落，橫帳普古王牧地。有松山。北至上京一百七十里。戶五百。

豫州。橫帳陳王牧地。南至上京三百里。戶五百。

寧州。本大賀氏勒得山，橫帳管寧王放牧地。在豫州東八十里，西南至上京三百五十里。戶三百。

邊防城

遼國西北界防邊城，因屯戍而立，務據形勝，不資丁賦。具列如左：

靜州，觀察。本泰州之金山。天慶六年升。

鎮州，**建安軍**，節度。本古可敦城。統和二十二年皇太妃奏置。〔三〕選諸部族二萬餘騎充屯軍，專捍禦室韋、羽厥等國，凡有征討，不得抽移。渤海、女直、漢人配流之家七百餘戶，分居鎮、防、維三州。東南至上京三千餘里。

維州，刺史。

防州，刺史。

河董城。本回鶻可敦城，語訛爲河董城。久廢，遼人完之以防邊患。高州界女直常爲盜，劫掠行旅，遷其族於此。東南至上京一千七百里。

靜邊城。本契丹二十部族水草地。北鄰羽厥，每入爲盜，建城，置兵千餘騎防之。東南至上京一千五百里。

皮被河城。地控北邊，置兵五百於此防托。〔三〕皮被河出回紇北，東南經羽厥，入臚胸河，沿河董城北，東流合沱漉河，入于海。南至上京一千五百里。

招州，**綏遠軍**，刺史。開泰三年以女直戶置。隸西北路招討司。

塔懶主城。〔三〕大康九年置。在臚胸河。

校勘記

〔一〕十六州 按紀會同元年十一月，十六州內有瀛、莫、無營、平。考異謂遼得瀛、莫後未久旋失，後人因以營、平計入十六州，蓋相沿之誤。

〔二〕天梯蒙國別魯等三山 蒙國二字原脫，據卷一一六國語解補。

〔三〕御河 按大典七七〇二作枯河。

〔四〕他魯河 按遊幸表作撻魯河。

〔五〕鴛鴦湖 按紀、傳及遊幸表並作鴛鴦澤。

〔六〕火神淀 火，原誤「大」。據通考三四六及國志四、五、六、一三各卷改。

〔七〕兔兒山 按營衛志中作吐兒山。

〔八〕鑿山 按大典七七〇二作鑿山。

〔九〕轄軍府州城二十五 按「二十五」與下文所列軍、府、州、城實數不合。

〔一〇〕五鸞 鸞，原作「鸞」。按本紀中凡五見，並作鸞，據改。

〔一一〕致祭 按大典七七〇二作致敬。

〔一二〕南曰順陽曰南福 按順陽大典作順歸。「曰南福」三字，原舛在「曰西鴈兒」下，大典引同，據上下文改。

〔二二〕貝聖尼寺 貝，南、北及乾隆殿本並作「具」，大典七七〇二亦作「具」。道光殿本改作「有」。

〔二四〕中京正北八十里至松山館 按富弼行程錄，由中京至臨都館、官審館，再至松山館，爲一百九十里。

〔二五〕唐於契丹嘗置饒樂州 州字原脫，據國志二四補。

〔二六〕涼淀 按紀天顯四年六月、八月以下及遊幸表並作涼陁。

〔二七〕祖州天成軍至右八部世沒里地 天成軍，大典同。太祖紀、太宗紀、聖宗紀並作天城軍。「右八部」，疑當作右大部。營衛志中阻午可汗二十部中有右大部，下文儀坤州亦有右大部之名。

〔二八〕于越王述魯 述魯，皇子表作述瀾，釋魯字。

〔二九〕天贊中從太祖破扶餘城 按紀，破扶餘城在天顯元年正月。

〔三〇〕慶州玄寧軍 按紀大康十年十二月，改慶州大安軍曰興平。玄寧應是大安以前或興平以後軍號。

〔三一〕在州二百里 州下疑脫方位字。

〔三二〕遼北大王撥刺占爲牧 按牧下應有「地」或「場」字，文意始完。

〔三三〕太宗援石晉主中國 宗，原誤「祖」。援石晉爲太宗時事，據改。

〔三四〕柳林淀亦曰白馬淀 白字原脫。據紀重熙七年十月及營衛志中補。

〔三五〕又嘗改富義縣屬泰州 按上文富義縣屬慶州。

〔三六〕豐永縣 按下文遼陽府仙鄉縣條作永豐縣。

〔三七〕頭下軍州 原無此目。按「頭下軍州」皆因諸王、外戚、大臣私城所建，與以上州軍不盡同。志別出「投下州」一項。今仿下文「邊防城」例，增此一目。

〔三八〕秦國王隆慶 按皇子表、國志十四並作秦晉國王。

〔三九〕鳳州戶四千 兵衛志下，鳳州丁一千。按一戶二丁通例，戶、丁數疑誤。

〔四〇〕皇太妃奏置「皇」應作王。參卷十三校勘記〔七〕。

〔三一〕置兵五百於此防托「托」疑應作戍。

〔三二〕塔懶主城 按塔懶卽撻覽，「主」應作王。

遼史卷三十八

志第八

地理志二

東京道

東京遼陽府，本朝鮮之地。周武王釋箕子囚，去之朝鮮，因以封之。作八條之教，尙禮義，富農桑，外戶不閉，人不爲盜。傳四十餘世。燕屬眞番、朝鮮，始置吏、築障。秦屬遼東外徼。漢初，燕人滿王故空地。武帝元封三年，定朝鮮爲眞番、臨屯、樂浪、玄菟四郡。後漢出入青、幽二州，遼東、玄菟二郡，沿革不常。漢末爲公孫度所據，傳子康；孫淵，自稱燕王，建元紹漢，魏滅之。晉陷高麗，後歸慕容垂；子寶，以勾麗王安爲平州牧居之。元魏太武遣使至其所居平壤城，遼東京本此。唐高宗平高麗，於此置安東都護府；後爲渤海大氏所有。大氏始保挹婁之東牟山。武后萬歲通天中，爲契丹盡忠所逼，有乞乞仲象者，度遼水

自固，武后封爲震國公。傳子祚榮，建都邑，自稱震王，併吞海北，地方五千里，兵數十萬。中宗賜所都曰忽汗州，封渤海郡王。十有二世至彝震，僭號改元，擬建宮闕，有五京、十五府、六十二州，爲遼東盛國。忽汗州卽故平壤城也，號中京顯德府。太祖建國，攻渤海，拔忽汗城，俘其王大諲譔，以爲東丹王國，立太子圖欲爲人皇王以主之。神冊四年，葺遼陽故城，以渤海、漢戶建東平郡，爲防禦州。天顯三年，遷東丹國民居之，升爲南京。

城名天福，高三丈，有樓櫓，幅員三十里。八門：東曰迎陽，東南曰韶陽，南曰龍原，西南曰顯德，西曰大順，西北曰大遼，北曰懷遠，東北曰安遠。宮城在東北隅，高三丈，具敵樓，南爲三門，壯以樓觀，四隅有角樓，相去各二里。宮牆北有讓國皇帝御容殿。大內建二殿，不置宮嬪，唯以內省使副、判官守之。大東丹國新建南京碑銘，在宮門之南。外城謂之漢城，分南北市，中爲看樓，晨集南市，夕集北市。街西有金德寺；大悲寺；駙馬寺；鐵幡竿在焉；趙頭陀寺；留守衙；戶部司；軍巡院；歸化營軍千餘人，河、朔亡命，皆籍于此。東至北烏魯虎克四百里，南至海邊鐵山八百六十里，西至望平縣海口三百六十里，北至挹婁縣、范河二百七十里。東、西、南三面抱海。遼河出東北山口爲范河，西南流爲大口，入于海；東梁河自東山西流，與渾河合爲小口，會遼河入于海，又名太子河，亦曰大梁水；渾河在東梁、范河之間；沙河出東南山西北流，徑蓋州入于海。有蒲河；清河；泃水，亦曰泥河，又

曰薜芋濼，水多薜芋之草；駐蹕山，唐太宗征高麗，駐蹕其巔數日，勒石紀功焉，俗稱手山，山巔平石之上有掌指之狀，泉出其中，取之不竭。又有明王山、白石山——亦曰橫山。天顯十三年，改南京爲東京，府曰遼陽。

戶四萬六百四。轄州、府、軍、城八十七。〔四〕統縣九：

遼陽縣。本渤海國金德縣地。漢沮水縣，高麗改爲勾麗縣，渤海爲常樂縣。戶一千五百。

仙鄉縣。本漢遼隊縣，渤海爲永豐縣。神仙傳云：「仙人白仲理能煉神丹，點黃金，以救百姓。」戶一千五百。

鶴野縣。本漢居就縣地，渤海爲雞山縣。昔丁令威家此，去家千年，化鶴來歸，集於華表柱，以味畫表云：「有鳥有鳥丁令威，去家千年今來歸；城郭雖是人民非，何不學仙塚纍纍。」戶一千二百。

析木縣。本漢望平縣地，渤海爲花山縣。戶一千。

紫蒙縣。本漢鏤芳縣地。〔五〕後拂涅國置東平府，領蒙州紫蒙縣。後徙遼城，并入黃嶺縣。渤海復爲紫蒙縣。戶一千。

興遼縣。本漢平郭縣地，渤海改爲長寧縣。唐元和中，渤海王大仁秀南定新羅，北略

諸部，開置郡邑，遂定今名。戶一千。

肅慎縣。以渤海戶置。

歸仁縣。

順化縣。

開州，鎮國軍，節度。本濊貊地，高麗爲慶州，渤海爲東京龍原府。有宮殿。都督慶、鹽、穆、賀四州事。故縣六：曰龍原、永安、烏山、壁谷、熊山、白楊，皆廢。疊石爲城，周圍二十里。唐薛仁貴征高麗，與其大將溫沙門戰熊山，擒善射者於石城，卽此。太祖平渤海，徙其民于大部落，城遂廢。聖宗伐高麗還，〔志〕周覽城基，復加完葺。開泰三年，遷雙、韓二州千餘戶實之，號開封府開遠軍，節度；更名鎮國軍。隸東京留守，兵事屬東京統軍司。統州三縣一。

開遠縣。本柵城地，高麗爲龍原縣，渤海因之，遼初廢。聖宗東討，復置以軍額。民戶一千。

鹽州。本渤海龍河郡，故縣四：海陽、接海、格川、龍河，皆廢。戶三百。隸開州。相去一百四十里。

穆州，保和軍，刺史。本渤海會農郡，故縣四：會農、水歧、順化、美縣，皆廢。戶三百。隸開州。東北至開州一百二十里。統縣一：會農縣。

賀州，刺史。本渤海吉理郡，故縣四：洪賀、送誠、吉理、石山，皆廢。戶三百。隸開州。

定州，保寧軍。高麗置州，故縣一，曰定東。聖宗統和十三年升軍，遷遼西民實之。隸

東京留守司。統縣一：

定東縣。高麗所置，遼徙遼西民居之。戶八百。

保州，宣義軍，節度。高麗置州，故縣一，曰來遠。聖宗以高麗王詢擅立，問罪不服，統和末，高麗降，^{〔七〕}開泰三年取其保、定二州，於此置摧場。隸東京統軍司。統州、軍二，縣一：

來遠縣。初徙遼西諸縣民實之，又徙奚、漢兵七百防戍焉。戶一千。

宣州，定遠軍，刺史。開泰三年徙漢戶置。隸保州。

懷化軍，下，刺史。開泰三年置。隸保州。

辰州，**奉國軍**，節度。本高麗蓋牟城。唐太宗會李世勣攻破蓋牟城，卽此。渤海改爲蓋州，又改辰州，以辰韓得名。井邑駢列，最爲衝會。遼徙其民於祖州。初曰長平軍。戶二千。隸東京留守司。統縣一：

建安縣。

盧州，**玄德軍**，刺史。本渤海杉盧郡，故縣五：山陽、杉盧、漢陽、白巖、霜巖，皆廢。戶三百。在京東一百三十里。兵事屬南女直湯河司。統縣一：

熊岳縣。西至海一十五里，傍海有熊岳山。

來遠城。本熟女直地。統和中伐高麗，以燕軍驍猛，置兩指揮，建城防戍。兵事屬東京統軍司。

鐵州，**建武軍**，刺史。本漢安市縣，高麗爲安市城。唐太宗攻之不下，薛仁貴白衣登城，卽此。渤海置州，故縣四：位城、河端、蒼山、龍珍，〔八〕皆廢。戶一千。在京西南六十

里。統縣一：

湯池縣。

興州，中興軍，節度。本漢海冥縣地。渤海置州，故縣三：盛吉、蒜山、鐵山，皆廢。戶二百。在京西南三百里。

湯州。本漢襄平縣地。渤海置州，〔五〕故縣五：靈峯、常豐、白石、均谷、嘉利，皆廢。戶五百。在京西北一百里。

崇州，隆安軍，刺史。本漢長岑縣地。渤海置州，故縣三：崇山、瀉水、綠城，皆廢。戶五百。在京東北一百五十里。統縣一：

崇信縣。

海州，南海軍，節度。本漢沮國地。高麗爲沙卑城，唐李世勣嘗攻焉。渤海號南京，南海府。疊石爲城，幅員九里，都督沃、晴、椒三州。故縣六：沃沮、鷲巖、龍山、濱海、昇平、靈

泉，皆廢。太平中，大延琳叛，南海城堅守，經歲不下，別部會長皆被擒，乃降。因盡徙其人於上京，置遷遼縣，移澤州民來實之。戶一千五百。統州二、縣一：

臨溟縣。

耀州，刺史。本渤海椒州，故縣五：椒山、貂嶺、澌泉、尖山、巖淵，皆廢。戶七百。隸海州。東北至海州二百里。統縣一：

巖淵縣。東界新羅，故平壤城在縣西南。東北至海州一百二十里。

嬪州，柔遠軍，刺史。本渤海晴州，故縣五：天晴、神陽、蓮池、狼山、仙巖，皆廢。戶五百。隸海州。東南至海州一百二十里。

涿州，鴨綠軍，節度。本高麗故國，渤海號西京鴨綠府。城高三丈，廣輪二十里，都督神、桓、豐、正四州事。故縣三：神鹿、神化、劍門，皆廢。大延琳叛，遷餘黨於上京，置易俗縣居之。在者戶二千。隸東京留守司。統州四、縣二：

弘聞縣。

神鄉縣。

桓州。高麗中都城，故縣三：桓都、神鄉、淇水，（二〇）皆廢。高麗王於此創立宮闕，國人

謂之新國。五世孫釗，晉康帝建元初爲慕容皝所敗，宮室焚蕩。戶七百。隸涿州。在西南二百里。

豐州。渤海置盤安郡，故縣四：安豐、渤恪、隰壤、硤石，皆廢。戶三百。隸涿州。在東北二百一十里。

正州。本沸流王故地，國爲公孫康所併。渤海置沸流郡。有沸流水。戶五百。隸涿州。在西北三百八十里。統縣一：

東那縣。本漢東耐縣地。〔二〕在州西七十里。

慕州。本渤海安遠府地，故縣二：慕化、崇平，久廢。戶二百。隸涿州。在西北二百里。

顯州，奉先軍，上，節度。本渤海顯德府地。世宗置，以奉顯陵。顯陵者，東丹人皇王墓也。人皇王性好讀書，不喜射獵，購書數萬卷，置醫巫閭山絕頂，築堂曰望海。山南去海一百三十里。大同元年，世宗親護人皇王靈駕歸自汴京。以人皇王愛醫巫閭山水奇秀，因葬焉。山形掩抱六重，於其中作影殿，制度宏麗。州在山東南，遷東京三百餘戶以實之。應曆元年，穆宗葬世宗於顯陵西山，仍禁樵採。有十三山，有沙河。隸長寧、積慶二宮，兵事屬東京都部署司。統州三、縣三：

奉先縣。本漢無慮縣，卽醫巫閭，幽州鎮山。世宗析遼東長樂縣民以爲陵戶，隸長寧宮。

山東縣。本漢望平縣。穆宗割渤海永豐縣民爲陵戶，隸積慶宮。

歸義縣。初置顯州，渤海民自來助役，世宗嘉憫，因籍其人戶置縣，隸長寧宮。

嘉州，嘉平軍，下，刺史。隸顯州。

遼西州，阜成軍，中，刺史。本漢遼西郡地，世宗置州，隸長寧宮，屬顯州。統縣一：

長慶縣。統和八年，以諸宮提轄司人戶置。

康州，下，刺史。世宗遷渤海率賓府人戶置，屬顯州。初隸長寧宮，後屬積慶宮。統

縣一：

率賓縣。本渤海率賓府地。〔三〕

宗州，下，刺史。在遼東石熊山，耶律隆運以所俘漢民置。聖宗立爲州，隸文忠王府。

王薨，屬提轄司。統縣一：

熊山縣。本渤海縣地。

乾州，廣德軍，上，節度。本漢無慮縣地。聖宗統和三年置，〔二〕以奉景宗乾陵。有凝神殿。隸崇德宮，兵事屬東京都部署司。統州一、縣四：

奉陵縣。本漢無慮縣地。括諸落帳戶，助營山陵。

延昌縣。析延昌宮戶置。

靈山縣。本渤海靈峰縣地。

司農縣。本渤海麓郡縣，併麓波、雲川二縣入焉。

海北州，廣化軍，中，刺史。世宗以所俘漢戶置。地在閭山之西，南海之北。初隸宣

州，〔二〕後屬乾州。統縣一：

開義縣。

貴德州，寧遠軍，下，節度。本漢襄平縣地，漢公孫度所據。〔三〕太宗時察割以所俘漢民置。後以弑逆誅，沒入焉。聖宗建貴德軍，後更名。有陀河、大寶山。隸崇德宮，兵事屬東京都部署司。統縣二：

貴德縣。本漢襄平縣，渤海爲崇山縣。

奉德縣。本渤海緣城縣地，〔二〕嘗置奉德州。

瀋州，昭德軍，中，節度。本挹婁國地。渤海建瀋州，故縣九，皆廢。〔二七〕太宗置興遼軍，後更名。初隸永興宮，〔二八〕後屬敦睦宮，兵事隸東京部署司。統州一、縣二：

樂郊縣。太祖俘薊州三河民，建三河縣，後更名。

靈源縣。太祖俘薊州吏民，建漁陽縣，後更名。

巖州，白巖軍，下，刺史。本渤海白巖城，太宗撥屬瀋州。初隸長寧宮，後屬敦睦宮。統

縣一：

白巖縣。渤海置。

集州，懷衆軍，下，刺史。古陴離郡地，漢屬險瀆縣，高麗爲霜巖縣，渤海置州。統縣一：奉集縣。渤海置。

廣州，防禦。漢屬襄平縣，高麗爲當山縣，渤海爲鐵利郡。太祖遷渤海人居之，建鐵利州。統和八年省。開泰七年以漢戶置。統縣一：

昌義縣。

遼州，始平軍，下，節度。本拂涅國城，渤海爲東平府。唐太宗親征高麗，李世勣拔遼城；高宗詔程振、蘇定方討高麗，至新城，大破之，皆此地也。太祖伐渤海，先破東平府，遷民實之。故東平府都督伊、蒙、陀、黑、北五州，（二）共領縣十八，皆廢。太祖改爲州，軍曰東平，太宗更爲始平軍。有遼河、羊腸河、錐子河、蛇山、狼山、黑山、巾子山。隸長寧宮，兵事屬北女直兵馬司。統州一、縣二：

遼濱縣。

安定縣。

祺州，（三）祐聖軍，下，刺史。本渤海蒙州地。太祖以檀州俘於此建檀州，後更名。隸

弘義宮，兵事屬北女直兵馬司。統縣一：

慶雲縣。太祖俘密雲民，於此建密雲縣，後更名。

遂州，刺史。本渤海美州地，採訪使耶律頗德以部下漢民置。穆宗時，頗德嗣絕，沒入焉。隸延昌宮。統縣一：

山河縣。本渤海縣，併黑川、麓川二縣置。

通州，**安遠軍**，節度。本扶餘國王城，**渤海**號扶餘城。**太祖**改龍州，**聖宗**更今名。**保寧**七年，以黃龍府叛人燕頗餘黨千餘戶置，升節度。〔三〕統縣四：

通遠縣。本渤海扶餘縣，併布多縣置。

安遠縣。本渤海顯義縣，併鵠川縣置。

歸仁縣。本渤海強帥縣，〔三〕併新安縣置。

漁谷縣。本渤海縣。

韓州，**東平軍**，下，刺史。本橐離國舊治柳河縣。**高麗**置鄭頡府，都督鄭、頡二州。〔三〕**渤海**因之。今廢。太宗置三河、榆河二州。**聖宗**併二州置。隸延昌宮，兵事屬北女直兵馬司。統縣一：

柳河縣。本渤海粵喜縣地，併萬安縣置。

雙州，**保安軍**，下，節度。本挹婁故地。**渤海**置安定郡，久廢。**漚里**僧王從太宗南征，以俘鎮、定二州之民建城置州。察割弒逆誅，沒入焉。故隸延昌宮，後屬崇德宮，兵事隸

北女直兵馬司。統縣一：

雙城縣。本渤海安夷縣地。

銀州，富國軍，下，刺史。本渤海富州，太祖以銀冶更名。隸弘義宮，兵事屬北女直兵

馬司。統縣三：

延津縣。本渤海富壽縣，境有延津故城，更名。

新興縣。本故越喜國地，渤海置銀冶，嘗置銀州。

永平縣。本渤海優富縣地，太祖以俘戶置。舊有永平寨。

同州，鎮安軍，下，節度。本漢襄平縣地，渤海爲東平寨。太祖置州，軍曰鎮東，後更名。

隸彰愍宮，兵事屬北女直兵馬司。統州一，未詳；縣二：

東平縣。本漢襄平縣地。產鐵，撥戶二百採鍊，隨征賦輸。

永昌縣。本高麗永寧縣地。

咸州，安東軍，下，節度。本高麗銅山縣地，渤海置銅山郡。地在漢候城縣北，渤海龍

泉府南。地多山險，寇盜以爲淵藪，乃招平、營等州客戶數百，建城居之。初號郝里太保城，〔二四〕開泰八年置州。兵事屬北女直兵馬司。統縣一：

咸平縣。唐安東都護，天寶中治營、平二州間，卽此。太祖滅渤海，復置安東軍。開泰中置縣。

信州，彰聖軍，下，節度。〔二五〕本越喜故城。渤海置懷遠府，今廢。聖宗以地鄰高麗，開泰初置州，以所俘漢民實之。兵事屬黃龍府都部署司。統州三，未詳；縣二：

武昌縣。本渤海懷福縣地，析平州提轄司及豹山縣一千戶隸之。

定武縣。本渤海豹山縣地，析平州提轄司併乳水縣人戶置。初名定功縣。

賓州，懷化軍，節度。本渤海城。統和十七年，遷兀惹戶，置刺史于鴨子、混同二水之間，〔二六〕後升。兵事隸黃龍府都部署司。〔二七〕

龍州，黃龍府。本渤海扶餘府。太祖平渤海還，至此崩，有黃龍見，更名。保寧七年，軍將燕頗叛，府廢。開泰九年，遷城于東北，以宗州、檀州漢戶一千復置。統州五、縣三：

黃龍縣。本渤海長平縣，併富利、佐慕、肅慎置。

遷民縣。本渤海永寧縣，併豐水、扶羅置。

永平縣。渤海置。

益州，觀察。屬黃龍府。統縣一：

靜遠縣。

安遠州，懷義軍，刺史。屬黃龍府。

威州，武寧軍，刺史。屬黃龍府。

清州，建寧軍，刺史。屬黃龍府。

雍州，刺史。屬黃龍府。

湖州，興利軍，刺史。渤海置。兵事隸東京統軍司。統縣一：

長慶縣。

渤海州，清化軍，刺史。渤海置。兵事隸東京統軍司。統縣一：

貢珍縣。渤海置。

郢州，彰聖軍，刺史。渤海置。兵事隸北女直兵馬司。統縣一：
延慶縣。

銅州，廣利軍，刺史。渤海置。兵事隸北兵馬司。統縣一：
析木縣。本漢望平縣地，渤海爲花山縣。初隸東京，後來屬。

涑州，刺史。渤海置。兵事隸南兵馬司。

率賓府，刺史。故率賓國地。

定理府，刺史。故挹婁國地。

鐵利府，刺史。故鐵利國地。

安定府。〔三八〕

長嶺府。

鎮海府，防禦。兵事隸南女直湯河司。統縣一：
平南縣。

冀州，防禦。聖宗建，升永安軍。

東州。以渤海戶置。

尙州。以渤海戶置。

吉州，福昌軍，刺史。

薊州，下，刺史。渤海置。

荊州，刺史。

懿州，寧昌軍，節度。太平三年越國公主以媵臣戶置。初曰慶懿軍，更曰廣順軍，隸上京。清寧七年宣懿皇后進入，改今名。統縣二：

寧昌縣。本平陽縣。

順安縣。

滕州，昌永軍，刺史。

順化城，嚮義軍，下，刺史。開泰三年以漢戶置。兵事隸東京統軍司。

寧州，觀察。統和二十九年伐高麗，以渤海降戶置。兵事隸東京統軍司。統縣一：新安縣。

衍州，安廣軍，防禦。以漢戶置。初刺史，後升軍。兵事屬東京統軍司。統縣一：
宜豐縣。

連州，德昌軍，刺史。以漢戶置。兵事屬東京統軍司。統縣一：
安民縣。

歸州，觀察。太祖平渤海，以降戶置，後廢。統和二十九年伐高麗，以所俘渤海戶復置。兵事屬南女直湯河司。統縣一：

歸勝縣。

蘇州，安復軍，節度。本高麗南蘇，興宗置州。兵事屬南女直湯河司。統縣二：
來蘇縣。

懷化縣。

復州，懷德軍，節度。〔三九〕興宗置。兵事屬南女直湯河司。統縣二：
永寧縣。

德勝縣。

肅州，信陵軍，刺史。重熙十年州民亡入女直，取之復置。兵事隸北女直兵馬司。統
縣一：

清安縣。

安州，刺史。〔四〇〕兵事隸北女直兵馬司。

榮州。

率州。

荷州。

源州。

渤海州。

寧江州，混同軍，觀察。清寧中置。初防禦，後升。兵事屬東北統軍司。統縣一：
混同縣。

河州，德化軍。置軍器坊。

祥州，瑞聖軍，節度。興宗以鐵驪戶置。兵事隸黃龍府都部署司。統縣一：
懷德縣。

校勘記

〔一〕東京遼陽府至號中京顯德府。「本朝鮮之地」，據史記一一五朝鮮傳、漢書二八下地理志，應作

「本燕國地」。本節誤以遼陽爲平壤。又據新唐書二一九渤海傳，忽汗州爲上京龍泉府，非平壤城，亦非遼陽。

〔二〕太祖建國攻渤海拔忽汗城至神冊四年葺遼陽故城建東平郡爲防禦州。按葺遼陽故城、建東平郡在前，攻渤海、拔忽汗城在後，叙次倒舛。疑神冊四年之前脫「先是」二字。

〔三〕城名天福。按紀天顯元年二月，改忽汗城爲天福。非升東平爲南京時以東平爲天福。

〔四〕轄州府軍城八十七。按「八十七」與下文所列州、府、軍、城之數不合。

〔五〕本漢鏤芳縣地。鏤芳，漢書地理志、後漢書郡國志均作鏤方，屬樂浪郡。

〔六〕聖宗伐高麗還。高麗原誤「新羅」，據紀統和三年七月、十年正月改。

〔七〕統和末高麗降。「統和末，高麗降」六字，原誤在「開泰三年，取其保、定二州」之下，時間倒舛，今改。

〔八〕河端。道光殿本考證引永樂大典作河瑞。

〔九〕渤海置州。「渤海置州」四字原脫，道光殿本據通考增。今從之。

〔一〇〕淇水。按趙萬里輯元一統志（以下稱輯本元一統志）卷二有淇水。「淇」字誤。

〔一一〕本漢東耐縣地。道光殿本考證謂，漢無東耐縣，或是後漢書郡國志東甌、不而之脫誤。索隱疑是唐羈縻代那州。

〔二二〕率賓縣本渤海率賓府地。索隱：「既云遷率賓府人戶置，則非故地。」

〔二三〕乾州聖宗統和三年置。按紀乾亨四年十一月置乾州。

〔二四〕宜州「宜」應作宜。此卽中京道宜州。屬縣開義，金史地理志同，本書中京道宜州條下作開義。

〔二五〕漢公孫度所據。依上下文例，漢下脫「末」字。

〔二六〕本渤海緣城縣地。緣城，上文崇州條作緣城。

〔二七〕渤海建瀋州故縣九皆廢。道光殿本考證：「按元一統志，渤海建定理府，都督瀋、定二州，領定理、平邱、巖城、慕美、安夷、瀋水、安定、保山、能利九縣，並廢。」

〔二八〕初隸永興宮。宮字原脫，據營衛志上補。

〔二九〕伊蒙陀黑北五州。北，新唐書二一九渤海傳作比。

〔三〇〕祺州。祺，原誤「棋」，據營衛志上及金史地理志改。

〔三一〕聖宗更今名至升節度。按聖宗在景宗保寧之後。景宗保寧七年已增置戶口，升節度，聖宗時，始更名通州。

〔三二〕強帥縣。金史地理志作強師縣。

〔三三〕鄭頡府都督鄭頡二州。按新唐書二一九渤海傳，鄭頡府領鄭、高二州。

〔三十四〕 郝里太保城 郝，紀開泰八年十月作耗。

〔三十五〕 信州彰聖軍下節度 按百官志四作信州彰聖軍節度，同。卷九一耶律僕里篤傳，太平中累遷彰聖軍節度使，紀大安八年有彰聖軍節度使耶律涅里。下文郢州，軍號與信州同，但爲刺史州，非節鎮。百官志四刺史州內有郢州。又皇子表及卷八二蕭陽阿傳有彰信軍節度，金史地理志作信州彰信軍。

〔三十六〕 置刺史于鴨子混同二水之間 按紀太平四年二月，「詔改鴨子河曰混同江」，但此後仍沿用鴨子河名稱，卷九八耶律儼傳：「父仲禧……清寧四年城鴨子、混同二水間。」

〔三十七〕 黃龍府都部署司 司，原誤「事」。據上下文及兵衛志中、營衛志下、百官志二改。

〔三十八〕 安定府 按紀天顯元年三月作安邊府。

〔三十九〕 復州懷德軍節度 按金史地理志：「復州，下，刺史，遼懷遠軍節度。」

〔四十〕 安州刺史 按紀統和二十八年十一月，馬保佑曾爲安州團練使，卷九四耶律何魯掃古傳，清寧初加安州團練使，百官志四亦作團練。惟國志二二刺史州內有安州。或初是刺史，後升團練。卷一〇五蕭文傳，「父直善，安州防禦使。」文官于大康、壽昌間。

遼史卷三十九

志第九

地理志三

中京道

中京大定府，虞爲營州，夏屬冀州，周在幽州之分。秦郡天下，是爲遼西。漢爲新安平縣。漢末步奚居之，幅員千里，多大山深谷，阻險足以自固。魏武北征，縱兵大戰，降者二十餘萬，去之松漠。其後拓拔氏乘遼建牙於此，〔一〕當饒樂河水之南，溫渝河水之北。唐太宗伐高麗，駐蹕於此。部帥蘇支從征有功。奚長可度率衆內附，爲置饒樂都督府。咸通以後，契丹始大，奚族不敢復抗。太祖建國，舉族臣屬。聖宗嘗過七金山土河之濱，南望雲氣，有郛郭樓闕之狀，因議建都。擇良工於燕、薊，董役二歲，郛郭、宮掖、樓閣、府庫、市肆、廊廡，擬神都之制。統和二十四年，五帳院進故奚王牙帳地。〔二〕二十五年，城之，實以漢

戶，號曰中京，府曰大定。

皇城中有祖廟，景宗、承天皇后御容殿。城池湫濕，多鑿井泄之，人以爲便。大同驛以待宋使，朝天館待新羅使，來賓館待夏使。有七金山、馬孟山、雙山、松山、土河。

統州十、縣九：

大定縣。白霽故地。以諸國俘戶居之。

長興縣。〔三〕本漢賓從縣。以諸部人居之。

富庶縣。本漢新安平地。開泰二年析京民置。

勸農縣。本漢賓從縣地。開泰二年析京民置。

文定縣。開泰二年析京民置。

升平縣。開泰二年析京民置。

歸化縣。本漢柳城縣地。

神水縣。本漢徒河縣地。開泰二年置。

金源縣。本唐青山縣境。開泰二年析京民置。

恩州，懷德軍，下，刺史。本漢新安平縣地。太宗建州。開泰中，以渤海戶實之。初隸

永興宮，後屬中京。統縣一：

恩化縣。開泰中渤海人戶置。

惠州，惠和軍，中，刺史。本唐歸義州地。太祖俘漢民數百戶免麀山下，創城居之，置州。屬中京。統縣一。

惠和縣。聖宗遷上京惠州民，括諸宮院落帳戶置。

高州，觀察。唐信州之地。萬歲通天元年，以契丹室活部置。開泰中，聖宗伐高麗，以俘戶置高州。有平頂山、灤河。屬中京。統縣一。

三韓縣。辰韓爲扶餘，弁韓爲新羅，馬韓爲高麗。開泰中，聖宗伐高麗，俘三國之遺人置縣。戶五千。

武安州，觀察。唐沃州地。太祖俘漢民居木葉山下，因建城以遷之，號杏塢新城。復以遼西戶益之，更曰新州。統和八年改今名。初刺史，後升。有黃柏嶺、裊羅水、箇沒里水。屬中京。統縣一。

沃野縣。

利州，中，觀察。本中京阜俗縣。統和二十六年置刺史州，開泰元年升。屬中京。統縣一。

阜俗縣。唐末，契丹漸熾，役使奚人，遷居琵琶川。統和四年置縣。初隸彰愍宮，

更隸中京。後置州，仍屬中京。

榆州，高平軍，下，刺史。本漢臨渝縣地，後隸右北平驪城縣。唐載初二年，析慎州置黎州，〔七〕處靺鞨部落，後爲奚人所據。太宗南征，橫帳解里以所俘鎮州民置州。開泰中沒入。屬中京。統縣二：

和衆縣。本新黎縣地。

永和縣。本漢昌城縣地。統和二十二年置。

澤州，廣濟軍，下，刺史。本漢土垠縣地。太祖俘蔚州民，立寨居之，採煉陷河銀冶。隸中京留守司。開泰中置澤州。有松亭關、神山、九宮嶺、石子嶺、灤河、撒河。屬中京。統縣二：

神山縣。神山在西南。

灤河縣。本漢徐無縣地。屬永興宮。

北安州，興化軍，上，刺史。本漢女祁縣地，屬上谷郡。晉爲馮跋所據。唐爲奚王府西省地。聖宗以漢戶置北安州。屬中京。統縣一：

興化縣。〔八〕本漢且居縣地。

潭州，廣潤軍，下，刺史。本中京之龍山縣，開泰中置州，仍屬中京。統縣一：

龍山縣。本漢交黎縣地。開泰二年以習家寨置。

松山州，勝安軍，下，刺史。開泰中置。統和八年省，復置。屬中京。統縣一。

松山縣。〔五〕本漢文成縣地。邊松漠，商賈會衝。開泰二年置縣。有松山川。

宋王曾上契丹事曰：出燕京北門，至望京館。五十里至順州。七十里至檀州，漸入山。五十里至金溝館。將至館，川原平曠，謂之金溝淀。自此入山，詰曲登陟，無復里埃，但以馬行記日，〔二〇〕約其里數。九十里至古北口，兩傍峻崖，僅容車軌。又度德勝嶺，盤道數層，俗名思鄉嶺，八十里至新館。過雕窠嶺、偏槍嶺，四十里至臥如來館。〔二一〕過烏灤河，〔二二〕東有灤州，又過摸斗嶺，一名渡雲嶺，〔二三〕芹菜嶺，七十里至柳河館。松亭嶺甚險峻，七十里至打造部落館。〔二四〕東南行五十里至牛山館。八十里至鹿兒峽館。過蝦蟆嶺，九十里至鐵漿館。過石子嶺，自此漸出山，七十里至富谷館。八十里至通天館。二十里至中京大定府。城垣卑小，方圓纔四里許。門但重屋，無築闌之制。南門曰朱夏，門內通步廊，多坊門。又有市樓四：曰天方、大衢、通闌、望闕。次至大同館。其門正北曰陽德、閭闔。城內西南隅岡上有寺。〔二五〕城南有園圃，宴射之所。自過古北口，〔二六〕居人草庵板屋，耕種，但無桑柘，所種皆從壠上，虞吹沙所壅。山中長松鬱然，深谷中時見畜牧牛馬橐駝，多青羊黃豕。〔二七〕

成州，興府軍，節度。晉國長公主以媵戶置，軍曰長慶，隸上京。復改軍名。〔一八〕統縣

同昌縣。

興中府。本霸州彰武軍，節度。古孤竹國。漢柳城縣地。慕容皝以柳城之北，龍山之南，福德之地，乃築龍城，構宮廟，改柳城爲龍城縣，遂遷都，號曰和龍宮。慕容垂復居焉，後爲馮跋所滅。元魏取爲遼西郡。隋平高保寧，置營州。煬帝廢州置柳城郡。唐武德初，改營州總管府，尋爲都督府。萬歲通天中，陷李萬榮。神龍初，移府幽州。開元四年復治柳城。八年西徙漁陽。十年還柳城。後爲奚所據。太祖平奚及俘燕民，將建城，命韓知方擇其處。〔一九〕乃完葺柳城，號霸州彰武軍，節度。統和中，制置建、霸、宜、錦、白川等五州。尋落制置，隸積慶宮。後屬興聖宮。重熙十年升興中府。有大華山、小華山、香高山、麝香崖——天授皇帝刻石在焉、駐龍峪、神射泉、小靈河。統州二、縣四。

興中縣。本漢柳城縣地。太祖掠漢民居此，建霸城縣。重熙中置府，更名。

營丘縣。析霸城置。

象雷縣。開泰二年以麥務川置。初隸中京，後屬。

閭山縣。本漢且慮縣。開泰二年以羅家軍置。隸中京，後屬。

安德州，化平軍，下，刺史。以霸州安德縣置，來屬。統縣一。

安德縣。統和八年析霸城東南龍山徒河境戶置。初隸乾州，更屬霸州，置州來屬。

黔州，阜昌軍，下，刺史。本漢遼西郡地。太祖平渤海，以所俘戶居之，隸黑水河提轄

司。安帝置州，析宜、霸二州漢戶益之。初隸永興宮，更隸中京，後置府，來屬。統

縣一。

盛吉縣。太祖平渤海，俘興州盛吉縣民來居，因置縣。

宜州，崇義軍，上，節度。本遼西曩縣地。東丹王每秋敗于此。興宗以定州俘戶建

州。〔三〇〕有墳山，松柏連亙百餘里，禁樵採；凌河，累石爲堤。隸積慶宮。統縣二。

弘政縣。世宗以定州俘戶置。民工織紉，多技巧。

聞義縣。世宗置。初隸海北州，後來屬。

錦州，臨海軍，中，節度。本漢遼東無慮縣。慕容皝置西樂縣。太祖以漢俘建州。有大

胡僧山、小胡僧山、大查牙山、小查牙山、淘河島。隸弘義宮。統州一、縣二。

永樂縣。

安昌縣。

巖州，保肅軍，下，刺史。本漢海陽縣地。太祖平渤海，遷漢戶雜居興州境，聖宗於此

建城焉。隸弘義宮，來屬。〔三〕統縣一：

興城縣。

川州，長寧軍，中，節度。本唐青山州地。太祖弟明王安端置。會同三年，詔爲白川州。

安端子察割以大逆誅，沒入，省曰川州。初隸崇德宮，統和中屬文忠王府。統縣三：

弘理縣。統和八年以諸宮提轄司戶置。

咸康縣。

宜民縣。統和中置。

建州，保靜軍，上，節度。唐武德中，置昌樂縣。太祖完葺故壘，置州。漢乾祐元年，故

石晉太后詣世宗，求於漢城側耕墾自贍。許於建州南四十里給地五十頃，營構房室，創立

宗廟。州在靈河之南，屢遭水害，聖宗遷於河北唐崇州故城。〔三〕初名武寧軍，〔三〕隸永興

宮，後屬敦睦宮。統縣二：

永霸縣。

永康縣。本唐昌黎縣地。

來州，歸德軍，下，節度。聖宗以女直五部歲饑來歸，置州居之。初刺史，後升。隸永興宮。有三州山、六州山、五脂山。〔二〕統州二、〔三〕縣一：

來賓縣。本唐來遠縣地。

隰州，平海軍，下，刺史。慕容皝置集寧縣。聖宗括帳戶遷信州，大雪不能進，建城於此，置焉。隸興聖宮，來屬。統縣一：

海濱縣。本漢縣。瀕海，地多鹹鹵，置鹽場於此。

遷州，興善軍，下，刺史。本漢陽樂縣地。聖宗平大延琳，遷歸州民置，來屬。有箭筈山。統縣一：

遷民縣。

潤州，海陽軍，下，刺史。聖宗平大延琳，遷寧州之民居此，置州。統縣一：

海陽縣。〔二〕本漢陽樂縣地，遷潤州，本東京城內渤海民戶，因叛移於此。

校勘記

〔一〕其後拓拔氏乘遼建牙於此。「乘遼」二字不解，疑有訛脫。按輯本元一統志大寧路：「奚匿松漠間。元魏時，其部族始於此建牙帳。」

〔二〕統和二十四年五帳院進故奚王牙帳地。按紀在統和二十年十二月。

〔三〕長興縣。長興，原誤「長安」。據金史地理志、輯本元一統志二及陳襄使遼語錄改。

〔四〕平頂山灤河。平，原誤「半」。按輯本元一統志：「平頂山在高州北五里。」據改。灤，原誤「樂」，

按下文澤州及王曾行程錄並作灤河，據改。

〔五〕裊羅水箇沒里水。按國志卷首初興本末作裊羅箇沒里。「裊羅箇」，黃也；「沒里」，水也。卽潢河，並非兩水。

〔六〕統和二十六年置刺史州開泰元年升。據遼文匯續編王悅墓誌，統和二十三年已有利州。北蕃地理云，利州，承天太后所建。又按紀，統和二十九年六月升。

〔七〕慎州。原誤「鎮州」，據新唐書地理志改。

〔八〕興化縣。原誤「利民縣」，據遼文匯五宋匡世墓誌及考異改。利民爲金承安五年以利民寨升置，遼無利民縣。

〔九〕松山州及松山縣 松山州，山原誤「江」，據百官志四及金史地理志改。松山縣，山原亦誤「江」，據紀開泰二年二月及金史地理志改。

〔一〇〕以馬行記日 按王曾行程錄作「以馬行記日影而約其里數」。

〔一一〕四十里至臥如來館 至字原脫，據行程錄補。

〔一二〕過烏灤河 灤，原誤「灤」。據行程錄改。

〔一三〕摸斗嶺一名渡雲嶺 摸，原誤「黑」，行程錄作墨。按陳襄使遼語錄、沈括使遼圖抄、蘇頌使北詩並作摸，據改。一名二字原脫，渡原作「度」，並據行程錄補正。

〔一四〕至打造部落館 至、館二字原脫，據行程錄補。

〔一五〕城內西南隅 城內，原誤「城西內」。據行程錄改。

〔一六〕古北口 古字原脫，據行程錄補。

〔一七〕青羊黃豕 羊，原誤「鹽」。據行程錄改。

〔一八〕復改軍名 按上京道作成州長慶軍。紀太平元年三月，「駙馬都尉蕭紹業建私城，賜名睦州，軍曰長慶」。是此州原為頭下州，名睦州，軍曰長慶，後隸上京道即成州長慶軍，改隸中京道以後為成州興府軍。「復改軍名」之上，應有「後來屬」三字。

〔一九〕命韓知方擇其處 按卷七四韓知古傳，神册初知古曾授彰武節度使，與此事蹟合。疑「方」是

古字之訛。

〔二〇〕興宗以定州俘戶建州。按紀，統和八年三月置宜州。遼文匯四李內貞墓誌有宜州觀察，劉繼文墓誌亦有宜州。卷七五王郁傳稱太祖時已有宜州。所屬弘政縣，爲世宗以定州俘戶置。蓋因頭下州而建置者。

〔二一〕隸弘義宮來屬。按應是「初隸弘義宮，後來屬」。

〔二二〕唐崇州故城。唐，原誤「康」。據新唐書地理志改。

〔二三〕初名武寧軍。名，原誤「屬」。金史地理志：「建州，遼初名軍曰武寧。」據改。

〔二四〕五脂山。脂，疑應作指。

〔二五〕統州二。按下文實統三州。

〔二六〕潤州海陽縣。原與隰州海濱縣互舛。金史地理志：「海陽縣，遼潤州海陽軍故縣也。」海濱縣，遼隰州平海軍故縣也。按海陽縣與軍名同，海濱縣瀕海。輯本元一統志二：「遼隰州治海濱縣。」據改。

遼史卷四十

志第十

地理志四

南京道

南京析津府，本古冀州之地。高陽氏謂之幽陵，陶唐曰幽都，有虞析爲幽州。商併幽於冀。周分并爲幽。職方，東北幽州，山鎮醫巫閭，澤藪奚養，川河、洙，浸菑、時。其利魚、鹽，其畜馬、牛、豕，其穀黍、稷、稻。武王封太保奭于燕。秦以其地爲漁陽、上谷、右北平、遼西、遼東五郡。漢爲燕國，歷封臧荼、盧縮、劉建、劉澤、劉旦，嘗置涿郡廣陽國。後漢爲廣平國廣陽郡；或合于上谷，復置幽州。後周置燕及范陽郡，隋爲幽州總管。唐置大都督府，改范陽節度使。安祿山、史思明、李懷仙、朱滔、劉怦、劉濟相繼割據。劉總歸唐。至張仲武、張允仲，以正得民。劉仁恭父子僭爭，遂入五代。自唐而晉，高祖以遼有援立之勞，

割幽州等十六州以獻。〔二〕太宗升爲南京，又曰燕京。

城方三十六里，崇三丈，衡廣一丈五尺。敵樓、戰櫓具。八門：東曰安東、迎春，南曰開陽、丹鳳，西曰顯西、清晉，北曰通天、拱辰。大內在西南隅。皇城內有景宗、聖宗御容殿二，東曰宣和，南曰大內。內門曰宣教，改元和；外三門曰南端、左掖、右掖。左掖改萬春，右掖改千秋。門有樓閣，毬場在其南，東爲永平館。皇城西門曰顯西，設而不開；北曰子北。西城巔有涼殿，東北隅有燕角樓。坊市、廨舍、寺觀，蓋不勝書。其外，有居庸、松亭、榆林之關，〔三〕古北之口，桑乾河、高粱河、石子河、大安山、燕山——中有瑤嶼。府曰幽都，軍號盧龍，開泰元年落軍額。〔三〕

統州六、縣十一：

析津縣。本晉薊縣，改薊北縣，開泰元年更今名。以燕分野旅寅爲析木之津，故名。戶二萬。

宛平縣。本晉幽都縣，〔四〕開泰元年改今名。戶二萬二千。

昌平縣。本漢軍都縣，〔五〕後漢屬廣陽郡，晉屬燕國，元魏置東燕州、平昌郡及昌平縣。〔六〕郡廢，縣隸幽州。在京北九十里。戶七千。

良鄉縣。燕爲中都縣，漢改良鄉縣，舊屬涿郡，北齊天保七年省入薊縣，武平六年復

置。唐聖曆元年改固節鎮，〔七〕神龍元年復爲良鄉縣，劉守光徙治此。在京南六十里。戶七千。

潞縣。本漢舊縣，屬漁陽郡。唐武德二年置元州，貞觀元年州廢，復爲縣。有潞水。在京東六十里。戶六千。

安次縣。本漢舊縣，屬漁陽郡。唐武德四年徙置東南五十里石梁城，貞觀八年又徙今縣西五里常道城，開元二十三年又徙耿就橋行市南。在京南一百二十里。戶一萬二千。

永清縣。本漢益昌縣，隋置通澤縣，唐置武隆縣，改會昌，天寶初爲永清縣。在京南一百五十里。戶五千。

武清縣。前漢雍奴縣，屬漁陽郡。水經注，〔八〕雍奴者，藪澤之名，四面有水曰雍，不流曰奴。唐天寶初改武清。在京東南一百五十里。戶一萬。

香河縣。本武清孫村。遼於新倉置榷鹽院，居民聚集，因分武清、三河、潞三縣戶置。〔九〕在京東南一百二十里。戶七千。

玉河縣。本泉山地。〔一〇〕劉仁恭於大安山創宮觀，師煉丹羽化之術于方士王若訥，因割薊縣分置，以供給之。在京西四十里。戶一千。

灤陰縣。本漢泉山之霍村鎮。遼每季春，弋獵於延芳淀，居民成邑，就城故灤陰鎮，後改爲縣。在京東南九十里。延芳淀方數百里，春時鵝鶩所聚，夏秋多菱芡。國主春獵，衛士皆衣墨綠，各持連鎖、鷹食、刺鵝錐，列水次，相去五七步。上風擊鼓，驚鵝稍離水面。國主親放海東青鶩擒之。鵝墜，恐鶩力不勝，在列者以佩錐刺鵝，急取其腦飼鶩。得頭鵝者，例賞銀絹。國主、皇族、羣臣各有分地。戶五千。

宋王會上契丹事曰：自雄州白溝驛渡河，四十里至新城縣，古督亢亭之地。又七十里至涿州。北渡范水、劉李河，〔二〕六十里至良鄉縣。渡盧溝河，六十里至幽州，號燕京。子城就羅郭西南爲之。正南曰啓夏門，內有元和殿，東門曰宣和。城中坊閭皆有樓。有閔忠寺，本唐太宗爲征遼陣亡將士所造；又有開泰寺，魏王耶律漢寧造。皆遣朝使遊觀。南門外有于越王廡，爲宴集之所。門外永平館，舊名碣石館，請和後易之。南卽桑乾河。

順州，歸化軍中，刺史。秦上谷，漢范陽，北齊歸德郡境。隋開皇中，粟末靺鞨與高麗戰不勝，厥稽部長突地稽率八部勝兵數千人，自扶餘城西北舉落內附，置順州以處之。唐武德初改燕州，會昌中改歸順州，唐末仍爲順州。有溫渝河；白遂河；曹王山，曹操嘗駐軍于此；黍谷山，鄒衍吹律之地，南有齊長城。〔三〕城東北有華林、天柱二莊，遼建涼殿，春賞花，夏納涼。初軍曰歸寧，後更名。統縣一。

懷柔縣。唐貞觀六年置，治五柳城，改順義縣。開元四年置松漠府彈汗州。天寶元年改歸化郡。乾元元年復今名。戶五千。

檀州，武威軍，下，刺史。本燕漁陽郡地，漢爲白檀縣。魏書，曹公歷白檀，破烏丸於柳城。續漢書，白檀在右北平。元魏創密雲郡，兼置安州。後周改爲元州。隋開皇十八年割燕樂、密雲二縣置檀州。唐天寶元年改密雲郡，乾元元年復爲檀州。遼加今軍號。有桑溪、鮑丘山、桃花山、螺山。統縣二：

密雲縣。本漢白檀縣，後漢以居庠奚。元魏置密雲郡，領白檀、要陽、密雲三縣。高齊廢郡及二縣，來屬。戶五千。

行唐縣。本定州行唐縣。太祖掠定州，破行唐，盡驅其民，北至檀州，擇曠土居之，凡置十寨，仍名行唐縣。隸彰愍宮。戶三千。

涿州，永泰軍，上，刺史。漢高祖六年分燕置涿郡，魏文帝改范陽郡，晉爲范陽國，元魏復爲郡。隋開皇二年罷郡，屬幽州，大業三年以幽州爲涿郡。唐武德元年郡廢，爲涿縣，七年改范陽縣，大曆四年置涿州。石晉以歸太宗。有大房山、六聘山、涿水、樓桑河、橫溝河、禮遜河、祁溝河。統縣四：

范陽縣。本漢涿縣。唐武德中，改范陽縣。有涿水、范水。戶一萬。

固安縣。本漢方城縣，先屬廣陽國。隋開皇九年，自易州涑水縣移置，屬幽州，取漢故安縣名。唐武德四年屬北義州，徙治章信堡。貞觀二年義州廢，移今治，復屬幽州。在州東南九十里。戶一萬。

新城縣。本漢新昌縣。唐大曆四年析固安縣置，後省。後唐天成四年復析范陽縣置。在州南六十里。戶一萬。

歸義縣。本漢易縣地。齊併入鄭縣。唐武德五年置北義州，州廢，復置縣來屬。民居在巨馬河南，僑治新城。戶四千。

易州，高陽軍，上，刺史。漢爲易、故安二縣地。（一）隋置易州，隋末爲上谷郡。唐武德四年復易州。天寶元年仍上谷郡。乾元元年又改易州。五代隸定州節度使。會同九年孫方簡以其地來附。應曆九年爲周世宗所取，後屬宋。統和七年攻克之，升高陽軍。有易水、涑水、狼山、太寧山、白馬山。統縣三：

易縣。本漢縣，故城在今縣東南六十里。齊天保七年省。隋開皇十六年，於故安城西北隅置縣，卽今縣治也。戶二萬五千。

涑水縣。本漢道縣，（二）今縣北一里故道城是也。元魏移於故城南，卽今縣置。周大象二年省。隋開皇十八年改涑水縣。（三）在州東四十里。有涑水。戶二萬

七千。

容城縣。本漢縣，先屬涿郡，故城在雄州西南。唐武德五年屬北義州。貞觀元年還本屬。聖曆二年改全忠縣。天寶元年復名容城縣。在州東八十里。戶民皆居巨馬河南，僑治涿州新城縣。戶五千。

薊州，尚武軍，上，刺史。秦漁陽、右北平二郡地。隋開皇中徙治玄州總管府，煬帝改漁陽郡。唐武德元年廢入幽州，開元十八年分立薊州。統縣三：

漁陽縣。本漢縣，屬漁陽郡。晉省，復置。元魏省。唐屬幽州，開元十八年置薊州。有鮑丘水。戶四千。

三河縣。本漢臨胸縣地，唐開元四年析潞州置。戶三千。

玉田縣。本春秋無終子國。漢置無終縣，屬右北平郡。元魏屬漁陽郡治，省，唐

武德二年復置。貞觀初省，乾封中復置。萬歲通天元年更名玉田，屬營州。開

元四年還屬幽州。八年屬營州。十一年又屬幽州。十八年來屬。搜神記：「雍

伯，洛陽人，性孝，父母沒，葬無終山。山高八十里，上無水，雍伯置飲。人有就飲者，與石一斗，種生玉，因名玉田。」戶三千。

景州，清安軍，下，刺史。本薊州遵化縣，重熙中置。戶三千。遵化縣，本唐平州買馬

監，爲縣來屬。

平州，遼興軍，上，節度。商爲孤竹國，春秋山戎國。秦爲遼西、右北平二郡地，漢因之。漢末，公孫度據有，傳子康、孫淵，入魏。隋開皇中改平州，大業初復爲郡。唐武德初改州，天寶元年仍北平郡。後唐復爲平州。太祖天贊二年取之，以定州俘戶錯置其地。統州二、縣三：

盧龍縣。本肥如國。春秋晉滅肥，肥子奔燕，受封於此。漢、晉屬遼西郡。元魏爲郡治，兼立平州。北齊屬北平郡。隋開皇中，省肥如，入新昌。十八年改新昌曰盧龍。唐爲平州，後因之。戶七千。

安喜縣。本漢令支縣地，久廢。太祖以定州安喜縣俘戶置。在州東北六十里。戶五千。

望都縣。本漢海陽縣，久廢。太祖以定州望都縣俘戶置。有海陽山。縣在州南三十里。戶三千。

灤州，永安軍，中，刺史。本古黃洛城。灤河環繞，在盧龍山南。齊桓公伐山戎，見山神兪鬼，卽此。秦爲右北平。漢爲石城縣，後名海陽縣。漢末爲公孫度所有。晉以後

屬遼西。石晉割地，在平州之境。^{〔八〕}太祖以俘戶置。灤州負山帶河，爲朔漢形勝之地。有扶蘇泉，甚甘美，秦太子扶蘇北築長城嘗駐此；臨榆山，峰巒崛起，高千餘仞，下臨渝河。統縣三：

義豐縣。本黃洛故城。黃洛水北出盧龍山，南流入於濡水。漢屬遼西郡，久廢。

唐季入契丹，世宗置縣。戶四千。

馬城縣。本盧龍縣地。唐開元二十八年析置縣，以通水運。東北有千金冶，東有

茂鄉鎮。遼割隸灤州。在州西南四十里。戶三千。

石城縣。漢置，屬右北平郡，久廢。唐貞觀中於此置臨渝縣，萬歲通天元年改石

城縣，在灤州南三十里，唐儀鳳石刻在焉。今縣又在其南五十里，遼徙置以就

鹽官。戶三千。

營州，鄰海軍，下，刺史。本商孤竹國。秦屬遼西郡。漢爲昌黎郡。前燕慕容皝徙都于

此。元魏立營州，領昌黎、建德、遼東、樂浪、冀陽、^{〔九〕}營丘六郡。後周爲高寶寧所

據。隋開皇置州，大業改遼西郡。唐武德元年改營州，萬歲通天元年始入契丹。聖

曆二年僑治漁陽。開元五年還治柳城。天寶元年改曰柳城郡。後唐復爲營州。太

祖以居定州俘戶。統縣一：

廣寧縣。漢柳城縣，^{〔三〕}屬遼西郡。東北與奚、契丹接境。萬歲通天元年，入契丹李萬榮。^{〔三〕}神龍元年移幽州界。開元四年復舊地。遼改今名。戶三千。

校勘記

〔一〕高祖以遼有援立之勞割幽州等十六州以獻。援立，原誤「援力」。按地理志五：「晉高祖以契丹有援立功，割山前、代北地爲賂。」又地理志一：「太宗援立晉。」據改。

〔二〕榆林之關。索隱謂，今山海關，隋書曰渝關，亦曰臨渝關。此榆林蓋臨渝之聲同而倒誤者。

〔三〕開泰元年落軍額。按紀開泰元年十一月，改幽都府爲析津府。

〔四〕本晉幽都縣。索隱謂晉無幽都縣，唐志幽州范陽郡有幽都縣，晉應作唐。

〔五〕昌平縣本漢軍都縣。按昌平，軍都並漢置縣，後魏始廢昌平入軍都。

〔六〕元魏置東燕州平昌郡及昌平縣。「州平昌」三字原脫。輯本元一統志卷一：「後魏卽縣郭置東燕州及平昌郡昌平縣，後郡廢縣存，以隸幽州。」據補。

〔七〕固節鎮。據新唐書地理志及太平寰宇記（以下稱寰宇記）六九，應作固節縣。

〔八〕水經注。注字原脫。按「雍奴者」云云，非水經經文，爲酈道元注，據補。

〔九〕因分武清三河潞三縣戶置。三河，原誤「香河」。按香河爲分武清、三河、潞三縣戶所新置，非

舊有。據改。

〔二〇〕本泉山地 索隱：「泉山上當有玉字。清一統志玉泉山在宛平縣西北二十五里。玉河源出于

玉泉山，亦名御河。玉河廢縣在宛平縣西南。」

〔二一〕北渡范水劉李河 渡，原誤「復」。據王曾行程錄改。又行程錄范水上有涿水，下文元和殿後有洪政殿。

〔二二〕齊長城 按此地非齊境，索隱謂齊當作燕。昌平山水記則謂北齊天保中所築。

〔二三〕改歸化郡 郡，原誤「縣」。據舊唐書地理志及寰宇記六九改。

〔二四〕易故安二縣地 故安，原誤「安故」，據漢書地理志及上文改。

〔二五〕本漢道縣 索隱謂「道」當作迺，漢志注：「迺，古道字，音字由反。」續志亦作迺，晉志始作道。

〔二六〕周大象二年省隋開皇十八年改涑水縣 「二年省，隋開皇」六字原脫。按周大象三年二月爲隋所滅，無十八年。寰宇記六七云：後周大象二年省迺縣入涑縣。隋志云：開皇元年以范陽爲迺，更置范陽於此；六年爲固安，八年廢；十年又置爲永陽，十八年改爲涑水。據補。

〔二七〕本漢臨胸縣地唐開元四年析潞州置 考異謂「胸」當作洵。索隱云：「兩漢志俱無臨洵縣。唐武德二年析潞縣置臨洵。貞觀元年省。開元四年復析潞縣置三河縣，卽臨洵故地。」

〔二八〕石晉割地在平州之境 此九字衍文。按石晉割地在太宗時，灤州爲太祖以俘戶置，不在十六

州之內。

〔一九〕冀陽 冀，原誤「翼」，據魏書地形志、隋書地理志改。

〔二〇〕廣寧縣漢柳城縣 拾遺云，漢當作唐。元豐九域志：「河北路營州下都督柳城郡，領羈縻四州，柳城一縣。」漢柳城在中京道。索隱謂自此以下至「復舊地」，應移入中京道興中縣下。

〔三一〕李萬榮 榮，原誤「營」，據世表及舊唐書一九九、新唐書二一九契丹傳改。

遼史卷四十一

志第十一

地理志五

西京道

西京大同府，陶唐冀州之域。虞分并州。夏復屬冀州。周職方，正北曰并州。戰國屬趙，武靈王始置雲中郡。秦屬代王國，後爲平城縣。魏屬新興郡。晉仍屬雁門。劉琨表封猗盧爲代王，都平城。元魏道武於此遂建都邑。孝文帝改爲司州牧，置代尹，遷都洛邑，改萬年，又置恒州。高齊文宣帝廢州爲恒安鎮，今謂之東城，尋復恒州。周復恒安鎮，改朔州。隋仍爲鎮。唐武德四年置北恒州，(一)七年廢。貞觀十四年移雲中定襄縣於此。永淳元年默啜爲民患，移民朔州。開元十八年置雲州。(二)天寶元年改雲中郡。乾元元年曰雲州。乾符三年，大同軍節度使李國昌子克用爲雲中守捉使，殺防禦使，據州以聞。僖宗赦克用，以

國昌爲大同軍防禦使，不受命。廣明元年，李琢攻國昌，國昌兵敗，與克用奔北地。黃巢入京師，詔發代北軍，尋赦國昌，使討賊。克用率三萬五千騎而南，收京師，功第一，國昌封隴西郡王。國昌卒，克用取雲州。〔三〕既而所向失利，乃卑詞厚禮，與太祖會于雲州之東城，謀大舉兵攻梁，不果。克用子存勗滅梁，是爲唐莊宗。同光三年，復以雲州爲大同軍節度使。晉高祖代唐，以契丹有援立功，割山前、代北地爲賂，大同來屬，因建西京。

敵樓、棚櫓具。廣袤二十里。門，東曰迎春，南曰朝陽，西曰定西，北曰拱極。元魏宮垣占城之北面，雙闕尙在。遼旣建都，用爲重地，非親王不得主之。清寧八年建華嚴寺，奉安諸帝石像、銅像。又有天王寺、留守司衙，南曰西省。北門之東曰大同府，北門之西曰大同驛。初爲大同軍節度，重熙十三年升爲西京，府曰大同。

統州二、縣七：

大同縣。本大同川地。重熙十七年西夏犯邊，析雲中縣置。戶一萬。

雲中縣。趙置。沿革與京府同。戶一萬。

天成縣。〔四〕本極塞之地。魏道武帝置廣牧縣，唐武德五年置定襄縣，遼析雲中置。在京北一百八十里。戶五千。

長青縣。〔五〕本白登臺地。冒頓單于縱精騎三十餘萬圍漢高帝於白登七日，卽此。遼

始置縣。有青陂。梁元帝橫吹曲云：「朝跋青陂，暮上白登。」在京東北一百一十里。戶四千。

奉義縣。本漢陶林縣地。後唐武皇與太祖會此。遼析雲中置。戶三千。

懷仁縣。本漢沙南縣。元魏葛榮亂，縣廢。隋開皇二年移雲內于此。大業二年置大利縣，屬雲州，改屬定襄郡。隋末陷突厥。李克用敗赫連鐸，駐兵於此。遼改懷仁。在京南六十里。戶三千。

懷安縣。本漢夷輿縣地。歷魏至隋，爲突厥所據。唐克頡利，縣遂廢爲懷荒鎮。高勳鎮燕，奏分歸化州文德縣置。初隸奉聖州，後來屬。在州西北二百八十里。戶三千。

弘州，博寧軍，下，刺史。東魏靜帝置北靈丘縣。唐初地陷突厥，開元中置橫野軍安邊縣，天寶亂廢，後爲襄陰村。統和中，以寰州近邊，爲宋將潘美所破，廢之，乃於此置弘州，初軍曰永寧。有桑乾河、白道泉、白登山，亦曰火燒山，有火井。統縣二：永寧縣。戶一萬。

順聖縣。本魏安塞軍，五代兵廢。高勳鎮幽州，奏景宗分永興縣置。〔六〕初隸奉聖州。在州西北二百八十里。戶三千。

德州，下，刺史。唐會昌中以西德店置德州。開泰八年以漢戶復置。有步落泉、金河山、野狐嶺、白道坂。縣一。

宣德縣。本漢桐過縣地，屬雲中郡，後隸定襄郡，漢末廢。高齊置紫阿鎮。唐會昌中置縣。〔七〕戶三千。

豐州，天德軍，節度使。秦爲上郡北境，漢屬五原郡。地磧鹵，少田疇。自晉永嘉之亂，屬赫連勃勃。後周置永豐鎮。隋開皇中升永豐縣，改豐州。大業七年爲五原郡。義寧元年太守張遜奏改歸順郡。唐武德元年爲豐州總管府。六年省，遷民於白馬縣，遂廢。貞觀四年分靈州境，置豐州都督府，領蕃戶。天寶初改九原郡。乾元元年復豐州，後入回鶻。會昌中克之，後唐改天德軍。太祖神冊五年攻下，更名應天軍，復爲州。〔八〕有大鹽澤、九十九泉、沒越澤、古磧口、青塚——卽王昭君墓。兵事屬西南面招討司。統縣二：

富民縣。本漢臨戎縣，遼改今名。戶一千二百。

振武縣。本漢定襄郡盛樂縣。背負陰山，前帶黃河。元魏嘗都盛樂，卽此。唐武德四年克突厥，建雲中都督府。麟德三年改單于大都督府。〔九〕聖曆元年又改安北都督。開元七年割隸東受降城。八年置振武軍節度使。會昌五年爲安北都護府。〔一〇〕後唐

莊宗以兄嗣本爲振武節度使。太祖神冊元年，伐吐渾還，攻之，盡俘其民以東，唯存鄉兵三百人防戍。後更爲縣。

雲內州，開遠軍，下，節度。本中受降城地。遼初置代北雲朔招討司，改雲內州。清寧初升。有威塞軍、古可敦城、大同川、〔二〕天安軍、永濟柵、安樂戍、拂雲堆。兵事屬西南面招討司。統縣二。

柔服縣。

寧人縣。〔三〕

天德軍，本中受降城。唐開元中廢橫塞軍，置天安軍於大同川。乾元中改天德軍，移永濟柵，今治是也。太祖平党項，遂破天德，盡掠吏民以東。後置招討司，漸成井邑，乃以國族爲天德軍節度使。有黃河、黑山峪、廬城、威塞軍、秦長城、唐長城，又有牟那山，鉗耳觜城在其北。

寧邊州，鎮西軍，下，刺史。本唐隆鎮，遼置。兵事屬西南面招討司。

奉聖州，武定軍，上，節度。本唐新州。後唐置團練使，總山後八軍，莊宗以弟存矩爲之。軍亂，殺存矩于祁州，（一）擁大將盧文進亡歸。太祖克新州，莊宗遣李嗣源復取之。同光二年升威塞軍。（二）石晉高祖割獻，太宗改升。有兩河會、溫泉、龍門山、涿鹿山。東南至南京三百里，西北至西京四百四十里。兵事屬西京都部署司。統州三、縣四：永興縣。本漢涿鹿縣地。黃帝與蚩尤戰于此。戶八千。礮山縣。本漢軍都縣。山出白綠礮，故名。有礮山、桑乾河。在州南六十里。戶三千。

龍門縣。有龍門山，石壁對峙，高數百尺，望之若門。徼外諸河及沙漠潦水，皆於此趣海。兩則俄頃水踰十仞，晴則清淺可涉，實塞北控扼之衝要也。在州東北二百八十里。戶四千。

望雲縣。本望雲川地。景宗於此建潛邸，因而成井肆。穆宗崩，景宗入紹國統，號御莊。後置望雲縣，直隸彰愍宮，附庸于此。在州東北二百六十里。戶一千。

歸化州，雄武軍，上，刺史。本漢下洛縣。元魏改文德縣。唐升武州，僖宗改毅州。後唐太祖復武州，明宗又爲毅州，潞王仍爲武州。晉高祖割獻于遼，改今名。有桑乾

河；會河川；愛陽川；炭山，又謂之陘頭，有涼殿，承天皇后納涼於此，山東北三十里有新涼殿，景宗納涼於此，唯松棚數陘而已；斷雲嶺，極高峻，故名。州西北至西京四百五十里。統縣一：

文德縣。本漢女祁縣地。元魏置。戶一萬。

可汗州，清平軍，下，刺史。本漢潘縣，元魏廢。北齊置北燕郡，（二）改懷戎縣。隋廢郡，屬涿郡。唐武德中復置北燕州，縣仍舊。貞觀八年改媯州。五代時，奚王去諸以數千帳徙媯州，（三）自別爲西奚，號可汗州；太祖因之。有媯泉在城中，相傳舜嬪二女於此。又有溫泉、版泉、磨笄山、雞鳴山、喬山、歷山。統縣一：

懷來縣。本懷戎縣，太祖改。戶三千。

儒州，縉陽軍，中，刺史。唐置。後唐同光二年隸新州。太宗改奉聖州，仍屬。有南溪河、沽河、宋王峪、桃峪口。統縣一：

縉山縣。本漢廣寧縣地。唐天寶中割媯川縣置。戶五千。

蔚州，忠順軍，上，節度。周職方，并州川曰溫夷，在州境飛狐縣。趙襄子滅代；武靈王置代郡；項羽徙趙歇爲代王；歇還趙，立陳餘王代；漢韓信斬餘，復置代郡；文帝初封代；皆

此地。周宣帝始置蔚州，隋開皇中廢。唐武德四年復置。至德二年改興唐縣。乾元元年仍舊。大中後，朱邪執宜爲刺史，有功，賜姓名李國昌。子克用乞爲留後，僖宗不許。廣明初，攻敗國昌，代北無備，太祖來攻，克之，俘掠居民而去。石晉獻地，升忠順軍，後更武安軍。統和四年入宋，尋復之，降刺史，隸奉聖州，升觀察，〔二七〕復忠順軍節度。兵事屬西京都部署司。統縣五：

靈仙縣。唐置興唐縣，梁改隆化縣，後唐同光初復置，晉改今名。戶二萬。

定安縣。本漢東安陽縣地，久廢。後唐太祖伐劉仁恭，次蔚州，晨霧晦冥，占，不利深入，會雷電大作，燕軍解去，卽此。遼置定安縣。西北至州六十里。戶一萬。

飛狐縣。後周大象二年置廣昌縣于五龍城，卽此。隋仁壽元年改名飛狐。相傳有狐於紫荊嶺食五粒松子，成飛仙，故云。西北至州一百四十里。戶五千。

靈丘縣。漢置。後漢省。東魏復置，屬靈丘郡。隋開皇中罷郡來屬。大業初改隸代州。唐武德六年仍舊。東北至州一百八十里。戶三千。

廣陵縣。本漢延陵縣。隋唐爲鎮州。後唐同光初分興唐縣置。石晉割屬遼。東南至州四十里。戶三千。

應州，彰國軍，上，節度。唐武德中置金城縣，後改應州。後唐明宗，州人也。天成元年升彰國軍節度，興唐軍、寰州隸焉。遼因之。北龍首山，南雁門。兵事屬西京都部署司。統縣三。

金城縣。本漢陰館縣地，漢末廢爲陰館城。隋大業末陷突厥。〔一六〕唐始置金城縣，遼因之。戶八千。

渾源縣。唐置。有渾源川。在州東南一百五十里。戶五千。

河陰縣。本漢陰館縣地。初隸朔州，清寧中來屬。戶三千。

朔州，順義軍，下，節度。本漢馬邑縣地。元魏孝文帝始置朔州，在今州北三百八十里。定襄故城。葛榮亂，廢。高齊天保六年復置，在今州南四十七里新城。八年徙馬邑，卽今城。武成帝置北道行臺。周武帝置朔州總管府。隋大業三年改馬邑郡。唐武德四年復朔州。遼升順義軍節度。兵事屬西京都部署司。統州一、縣三。

鄯陽縣。〔一七〕本漢定襄縣地。建安中置新興郡。元魏置桑乾郡。高齊置招遠縣，郡仍舊。隋開皇三年罷郡，隸朔州。大業元年初名鄯陽縣，遼因之。戶四千。

寧遠縣。齊天保六年，於朔州西置招遠縣。唐乾元元年改今名，遼因之。有寧遠鎮。

東至朔州八十里。戶二千。

馬邑縣。漢置，屬雁門郡。唐開元五年，析鄯陽縣東三十里置大同軍，倚郭置馬邑縣。南至朔州四十里。戶三千。

武州，宣威軍，下，刺史。趙惠王置武川塞。魏置神武縣。唐末置武州。後唐改毅州。重熙九年復武州，號宣威軍。統縣一：

神武縣。魏置。晉改新城。後唐太祖生神武川之新城，卽此。初隸朔州，後置州，併寧遠爲一縣來屬。戶五千。

東勝州，武興軍，下，刺史。隋開皇七年置勝州。大業五年改榆林郡。唐貞觀五年於南河地置決勝州，故謂此爲東勝州。天寶七年又爲榆林郡。乾元元年復爲勝州。太祖神冊元年破振武軍，勝州之民皆趨河東，州廢。晉割代北來獻，復置。兵事屬西南面招討司。統縣二：

榆林縣。

河濱縣。

金肅州。重熙十二年伐西夏置。割燕民三百戶，防秋軍一千實之。屬西南面招討司。
河清軍。西夏歸遼，開直路以趨上京。重熙十二年建城，號河清軍。徙民五百戶，防秋兵一千人實之。屬西南面招討司。

校勘記

- 〔一〕唐武德四年置北恒州。按新唐書地理志作武德元年置。舊唐書地理志作武德六年。
〔二〕開元十八年置雲州。雲州，原誤「雲中州」。據新唐書地理志改。舊唐書地理志作開元二十年。
〔三〕克用取雲州。州，原誤「南」。據太祖紀及新五代史四改。
〔四〕天成縣。金史地理志作天城縣。
〔五〕長青縣。兵衛志下同。遼文匯續編董匡信墓誌、金史地理志並作長清縣。
〔六〕奏景宗分永興縣置。據紀應曆十三年正月、卷八五高勳傳及金史地理志，景宗應作穆宗。
〔七〕唐會昌中置縣。按紀開泰八年十一月，置雲州宣德縣。新、舊唐書地理志無宣德縣。
〔八〕更名應天軍復爲州。按金史地理志豐州天德軍，遼嘗更名應天，尋復。
〔九〕改單于大都督府。索隱：「督，當作護。」新、舊唐書地理志並作「龍朔三年置雲中都護府，麟德

元年改爲單于大都護府。

〔二〇〕會昌五年爲安北都護府。索隱：「案方鎮表會昌三年改。」

〔二一〕大同川。川，原作「州」。據下文及新唐書地理志改。

〔二二〕寧人縣。按卽寧仁縣。紀開泰六年七月以西南路招討請，置寧仁縣于勝州。此隸雲內，或是以後改屬。金史地理志雲內州有寧仁舊縣。

〔二三〕殺存矩于祁州。祁州，新五代史四八及通鑑並作祁溝關。

〔二四〕升威塞軍。通考三一六作威勝軍。

〔二五〕北齊置北燕郡。索隱：「郡，當作州。隋志，後齊置北燕州，領長寧、永豐二郡。」

〔二六〕去諸以數千帳徙媯州。徙，原誤「欲」。據新五代史附錄改。

〔二七〕升觀察。按紀，統和二十九年六月升。

〔二八〕隋大業末陷突厥。隋字原脫。大業爲隋年號，據補。

〔二九〕鄴陽縣。隋書、唐書地理志及通考三一六作善陽。遼文匯一〇甯鑑墓誌、元和郡縣志作鄴陽。

〔三〇〕後唐改毅州。後字原脫，據上文「唐末」及通考三一六補。

〔三一〕東勝州。按紀開泰六年七月作勝州。紀清寧四年三月、保大二年四月、四年七月、百官志四並作東勝州。

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>

